

**EIGHTH LEGISLATIVE ASSEMBLY OF MIZORAM
(THIRD SESSION)**

LIST OF BUSINESS

FOR NINTH SITTING ON MONDAY, THE 24th JUNE, 2019
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS
DISCUSSION AND VOTING ON DEMANDS

2. **Pu LALCHAMLIANA**, Minister to submit to the vote of the House various Demands under his charge.
3. **Pu LALCHHANDAMA RALTE**, Minister to submit to the vote of the House various Demands under his charge.
4. **Pu T.J. LALNUNTLUANGA**, Minister to submit to the vote of the House various Demands under his charge.

S.R. ZOKHUMA
Commissioner & Secretary

....

SPEAKER : Lalpa tih apiang chu an eng a thawl e, a kawng zawkute chu.

Sam 128:1

Zawhna leh chhanna-ah kan kal leh nghal ang a. Starred Question No. 136-na zawt turin member zahawm tak Dr. Vanlaltanpuia kan sawm e.

Dr. VANLALTANPUIA : Pu Speaker, ka lawm e. Ka zawhna chu hon'ble Minister, Home Department changtu chhanah a ni a.

- a) Immoral Traffice (Prevention) Act tlawh chhanin Mizoramah mihring rukbo (Human trafficking) case eng zatnge registered a nih ?
- b) Human trafficking tibo turin sorkar engtinne a inbuatsaih ?

SPEAKER : Chhang turin a changtu Minister zahawm tak Pu Lalchamliana i lo sawm ang u.

PU LALCHAMLIANA, MINISTER : Pu Speaker, member zahawm tak Dr. Vanlaltanpuia zawhna chhanna chu –

- a) Immoral Traffic (Prevention) Act tlawhchhanin Mizoramah mihring rukbo case 9 (pakua) registered tawh a ni.
- b) Mizoramah Human trafficking tibo turin sorkarin hmalakna hrang hrang a nei a, Aizawl, Lunglei, Kolasib leh Champhai District-ah te Anti-Human Trafficking Unit din a ni. State leh district level training buatsaih a nih thin bakah school, college leh zirna in hrang hrangah awareness campaign neih thin a ni bawk.

SPEAKER : Zawhbelhna zawt turin member zahawm tak Pu Zodintluanga i lo sawm ang.

Pu ZODINTLUANGA RALTE : Pu Speaker, ka lawm e. Hmanni-a zawhna leh chhanna an rawn siamthatah khan Unstarred Question 82 Paper Laid on the Table-ah khan Mizoram leh Assam sorkar inrina ramri ah hian eng ramri ber nge Mizoram sorkarin a pawm tih chhanna kha, Mizoram leh Assam ram inrinaah hian Mizoramin ramri a pawmtur chin hi zirchian mek a ni tih kha House zahawm tak a chhanna a ni a.

Pu Speaker, SEDP bu hi Assembly kaltlangin kan envelope chhungah zanah a rawn thleng ve a, chu chu keimahni Assembly through-a min rawn pek a ni a. Hetah hian Government of Mizoram, Planning & Programme Implementation Department-in a thuchhuah, sorkar policy leh sorkar kalphung te, a tum te hetah hian section (a)(1)-ah hian Statement of Boundary Conflict tih an rawn ziak a, hetah hian Pu Speaker, i phalnain “there have been a boundary conflicts between Mizoram and its neighbouring states which often results into killing, kidnapping and threatening of innocent people. The govt. will try its best for effective settlement of boundary disputes with its neighbours without losing our land. The government accepts the state boundary based on the North Eastern Bengal Frontier Regulation, 1873” a rawn ti a, sorkar lehkha tho a ni si a. Helai House-a an rawn chhannaah hian zirchian mek a ni tih a ni, min hrilhfiah theih chuan Pu Speaker, ka lawm ngawt ang.

SPEAKER : Ngawi rawh, SEDP kha party thil nge?
(Pu ZODINTLUANGA RALTE : Government of Mizoram Sir). Aw le, zawhbelhna zawt turin Dr. Vanlaltanpuia a ni ang a, chumi zawah Dr. Thiamsanga.

Dr. VANLALTANPUIA : Pu Speaker, ka lawm e. Zawhbelhna tawite ka sawi hmain mihringa sumdawnna hi sumdawnna leh pawikhawihna rapthlak ber leh tenawm ber a ni a. Mizoram-ah hian a lo lut chho ve zauh zauh ta a, hei hi fimkhur a ngai hlein a lang a. Tin, pawikhawihna intiamrual, organized crime kan tih dik tak a ni, a hlawkna pawh hi an telkhawm thin a. Hei hi ven a ngai tak zet zet a, kan inrin loh hlan hian min rawn run deuh reng ta mai a.

Kum 2019 kumtirah khan Lunglei Farm Veng nula/tlangval 4 (pali) lai kha hetiang a ruk chhuah/bum chhuah an ni a. Amaherawhchu, Thenzawl an rawn thlen sown an man chhuak ta a, Mizoram Police-te an fakawm khawp mai a. Tin, nimin lawkah khan facebook ah leh whatsapp ah te kan hmu a, Aizawl veng pakhatah naupang pakhat huaisen zetin hetiang hi a chhanchhuak a, naute rukbo tur ni ngei kha. Khango kha Pu Speaker, vawiina ka

zawhbelhnaah chuan a bik takin tunhnaia incident pahnihah khan a mawhpurtute man an ni em ? Engtinnge hrem an nih tih ka zawt duh a.

Tin, Mizoram leh kan sorkar hian a lapse tak tak a ngaiin ka hria a. Sumdawnna hi a rapthlak em em mai a, sal ah mi ramah leh vai ram-ah hna tenawm ber ber thawk tur te-a tih thin an nih avangin fimkhur a ngai hle a ni tih ka sawi duh a. Helaia incident pahnihte kha eng tinnge hrem an nih tih ka zawt a ni.

S P E A K E R : Zawhbelhna zawt turin member zahawm tak Dr. Thiamsanga kan sawm e.

Dr. Z.R. THIAMSANGA : Pu Speaker, ka lawm e. Ka Starred Question No. 150-na kha a chhuak hman dawn si lova, tun ami nen hian a in relation deuh tho avang hian kan zawt duh a, a Department chan a inang bawk a.

Mizoram puma Women Police indaihlohma hi hnawhkhah tumna a awm em tih leh lakbelh dawn ni se, Champhai Police Station-a hmeichhe police indaihlohma hi min ngaihpawimawh sak thei ang em ? Tin, Aizawl Police Traffic Police hi tihchangtlun/thuam chak tura hmalakna a awm em tih a ni a. Pu Speaker, khawngaih takin kan sawibelh lawk ang a.

Aizawl Traffic hi kan hria a, an buai em em mai a, S.P. Traffic jurisdiction hi Aizawl Municipal Corporation nen hian a inang a ni. Amaherawhchu, staff indaihlohma avang hian Bawngkawn leh Kulikawn tleng chiah hi kan tuam thei a. Kan khawpui chhung Zemabawk te, ITI te, College Veng te, Bethlehem Veng te leh Ramrikawn te pawh Traffic Police mamawhna a sang hle mai a. Tin, Traffic Police-te hian motor leh mihring kea kalte buaipui mai piahlamah sorkar function pawimawh tak tak kan tih ang chi te; tin, inneih, lungphun, chhiatni/thatni kan ti ang chi leh inkhelh te, khatiang kha buaipui tur a tam hle a. Tin, mithenkhat sawi dan phei chuan Aizawl khawpui lun deuh hlek laia awm tan phei chuan chhiat tawhte pawh hi a ngam awm loh tih hial khawp hian kan buai tawh a ni. Tunah hian ka hriatsual loh chuan Traffic Police 240 vel hi field - a thawk an niin ka hria a, damloh nikhua te a lo awm ve a, chawlh te a lo awm ve a, a tak taka

thawk hi chu 200 vel lek hi niin a rinawm a. Chuvangin, an buai a; tin, an hah em em mai a, an ke hman a ngai a, an ban hman a ngai a, an mit hman a ngai a, chutiang chuan hman tur hi a tam khawp mai a. Salute lo pek tur lah an tam si, Traffic Police hi an buai em em mai a ni. Engkim an ngaiantuahna zawng zawng nen hman a ngai a, Motor-te a lo jam a, a chang chuan kawng laiah motor-te va nawr pui te a ngai a, an khawngaihthlak em em a. Chutiang chuan Traffic Rule lo kal sual/lo zawmlo te buaipui an ngai a, khatiang a nih avang khan sawi belh tur hi a tam khawp mai a.

Tin, pollution, vaivut karah an awm a, office kal hmain naupang school kal tur te an kal a ngai a. Tin, office ban hnuah an hawn a ngai a. Heng avang hian an khawngaihthlak em em a, special allowance-te pawh hi pek tlak hial an ni tih te hi ka rilru hian a ngaiantuah a, an hah a ni. Tunah hian kan Home Minister-te hmalaknain 91 (sawmkua pakhat) chu an han tihbelh niin ka hria a, 500 (zanga) vel tal hi chu pek belh theih an ni lo maw tih hi ka ngaiantuahnaah a awm a, ka rawn zawt tel a ni. Pu Speaker, ka lawm e.

SPEAKER : Zawhna a inkarkik deuh a, ramri-te nen lam a ni a, a inpuahchahna ang ang chhang turin Home Minister zahawm tak kan sawm e.

Pu LALCHAMLIANA, MINISTER : Pu Speaker, member zahawm tak Pu Zodintluanga'n SEDP chuan 1873, Bengal Eastern Frontier Regulation angin 1875 kha inner line kha pawm a ni ti angin a ziak tih kha a rawn sawi a, ka la hmu ve lo va. Keini Home lam atang chuan ramri Mizoram sorkarin a pawm hi a la awm lo niin kan hria a. Tunah hian zirchiang tur core committee an din mek a, document hrang hrang an la khawm a. An la peih chiah lo deuh tih kha Home lam atanga kan hmalak dan chu a ni e tih kha ka sawifiah theih dan tawk a ni.

Tin, zawhna neitu member zahawm tak Dr. T.P-a, Farm veng tleirawl 4 Thenzawl-ah kidnap tum ni awm takin miin an hruai a, khang kha man an ni a. Tin, Lunglei lam mi bawk Aizawl, Thuampui, Falkland velah khan nu pakhatin a hruai a, chu chu man chhuah a ni bawk a. Kha kha engtin nge action lak a ni tawh em tih kha action lak kan la hre lo va, amaherawhchu, kidnap an ni ngei em tihte chhuichian mek an ni a, khatiang an nih chuan case siam sak an ni ang tih kha hmabakah a awm a ni.

Tin, Dr. Thiamsanga kha thahnem a ngai a, a zaghna hi Starred Question 150-na ah a awm a, a chhanna pawh kan pe a. Chu chu – hmeichhe police te indaihlohma tunah mai chuan hnawhkhah tumna a awm rih lo va. Amaherawhchu, Police hi kan la belh thei a nih chuan hmeichhia hi tam zawk lak tumna rilru kan nei tih kha ka chhanna ni sela. Kan Traffic Police te hi an hah em em mai a, tunah hian thawktu hi 300 leh tlem an awm a. Kan hnung deuh tawh atang khan Traffic lam duty hi tihbelh kan duh a, mahse, kan Police-te General Election avangin state pawnah company 16 lai duty-in an chhuak a. Chuvang chuan kan pe thei lawk lo va. Tun hnaiah khan mi 90 chuang zen zawn pek belh an ni a, tun aia effective zawka hna thawh a nih tawh kan beisei a ni tih kha ka chhanna a ni e.

S P E A K E R : Starred Question 137-na zawl turin member zahawm tak Pu Lalduhoma kan sawm e.

Pu LALDUHOMA : Pu Speaker, Art & Culture Minister zahawm tak chhan atan ka zaghna chu – Vangchhe khuaa hmanlai thil hlui hmuhchhuahte hi tute sulhnu nge tih a ni e.

S P E A K E R : Chhang turin a changtu Minister zahawm tak Pu R.Lalzirliana i lo sawm ang.

Pu R.LALZIRLIANA, MINISTER : Pu Speaker, ka lawm e. Member zahawm tak Pu Lalduhoma zaghna chhanna chu – Art & Culture Department leh Indian National Trust for Art & Culture Heritage (INTACH), Mizoram Chapter te hmalaknain Vangchhe khua hian kum 2016, January thla atangin kum 2019 tleng hian Archaeological Survey of India, Govt. of India, Aizawl Circle chuan archaeological excavation tum thum an nei tawh a. An thil laih chhuah leh zirchianna atang chuan Mizo hnam thenkhat thlang lo tla hmasa te sulhnu nia ngaih a ni e.

S P E A K E R : Zawhbelhna zawl turin zaghna neitu member zahawm tak Pu Lalduhoma kan sawm e.

Pu LALDUHOMA : Pu Speaker, media thenkhatah hianin vai pathian limte an hmu chhuak a, khi khi Hindu sulhnu a ni tihte a lo lang thin a, chu chu a diklo ngeiah kan pawm thei em tih kha ka zawhbelhna a ni a.

Tin, khilaia hmun hlui awm dan chiah khi a chhungah khian khimi hnuiah khian khawpui hlui lian tak a awm ang tea sawi a awm a. Eng ang chiah nge a nih kha zau deuhhlekin min han hrilh thei em ka ti a. A dawt lehah chuan, kan hnam tobul hi official taka chhui chian hi a la ni lo va. A thenin Israel thlah kan ni an ti a, mahni chian chianin kan chiang a. Chhinlung chhuak kan ni kan ti a, hengah hian official taka kan pawm tlan theih tura chhuichian a la ni lo va. Hemi atan hian Commission te dinin, mithiam rualte nen sorkar sensovin kan hnam tobul chhui hi a hun ve tawh a, chumi kawng zawng chuan sorkar hian hma a la thei ang em tih ka zawt bawk a ni e.

S P E A K E R : Zawhna chhang turin a changtu Minister zahawm tak Pu R. Lalzirliana i lo sawm ang.

Pu R.LALZIRLIANA, MINISTER : Pu Speaker, Mizo hnam tobul chhui tur hian thil tam tak ngaiatuah a ngai a. Chung angah chuan, kan la naupang hle kan tih lai hian kan lo upa hle tawh ni te pawh hian lanna a awm a. Chuvang chuan, chutiang han chhui tur leh khatiang ang committee han din kha a awm hranpa lo va. Amaherawhchu, Vangchhia leh khilai constituency chhungah khian tunhma Mizo thlangtla hmasate an awm ngei a ni tih lanna ang chu kan hmu hnem khawp mai a, khilai khian, tlawh tur pawh a tam a. Chutiang zir chiang tur chuan INTACH, Mizoram Chapter-te hian tunah chuan theihtawp chhuah an tum a. Mizoramah pawh hian hmun changtlung zawk neih a, Aizawlah pawh hian office lian zawkte pawh rawn dah a ni tan tawh a. Chutiang ang chu tuna kan hma lakna mai chu a ni.

Media ho ten Hindu leh tunhmaa Mizo sulhnu ngei ni-a kan hriatte vai, midang sulhnu ni anga an sawi ni anga lo langte phei kha chu sorkar ngaihdan a ni lo va, a pawm hranpa lo va. Mizo hnam thenkhat thlang lo tla tawhte sulhnu ni ngeia a lan avangin media-te hi chuan an duh chu an sawi ve thei a, an right a ni a. Amaherawhchu, kha kha sorkarin a pawm e tihna a ni hranpa chuang lem lo a ni tih kha ka chhanna ni mai teh se.

S P E A K E R : Starred Question 138-na zawt turin member zahawm tak Pu Lalrinsanga Ralte ka sawm e.

Pu LALRINSANGA RALTE : Pu Speaker, ka lawm e.

Sericulture Minister zahawm tak chhan atana ka zawhna chu hei hi a ni –

- a) Sericulture Department hian project kalpui mek engzatnge a neih? Eng project te nge ?
- b) Tun sorkar thar hian Sericulture-ah hian hma thar lakna a nei tawh em ?

S P E A K E R : Chhang turin Sericulture Department changtu Minister zahawm tak Dr. K. Beichhua ka sawm e.

Dr. K. BEICHHUA, MINISTER : Pu Speaker, member zahawm tak Pu Lalrinsanga Ralte zawhna chhanna chu:

- a) Tunah hian Project 4 (pali) kalpui mek a ni a, chung project-te chu :
 - i) ISDP - Integrated Sericulture Development Project
 - ii) IBSDP - Intensive Bivoltine Development Project
 - iii) IMSDP - Integrated Muga Silk Development Project
- a) Development of Eri Culture in Mizoram for the upliftment of Aspirational district – Mamit District (EDC Mamit District)
- (b) Nei tawh e. (i) Eri Silk Development Project in Siaha District proposal thehluh mek a ni.
- (ii) PIMC approval angin Large Scale Eri Farmer project proposal buatsaih mek a ni.

S P E A K E R : Zawhbelhna zawt turin Dr. Vanlaltanpuia sawm ila, chumi zawahah Pu C. Lalsawivunga.

Dr. VANLALTANPUIA : Pu Speaker, ka zawhbelhna chu Sericulture-ah hian kan practice hi 4 vel a awm a. Pakhat-na chu Mulberry a ni a, pahnihna chu Muga a ni a, pathumna chu Eri a ni a, palina chu Pasar a ni a. Hetah hian in tunhnaia department-a ka lennaa ka thil hmuhchhuah ka lo hriat thar ve ah hian Eri-ah hian Mizoram-in potential kan lo nei tha em em mai a. Kan national production rate aiin Eri-ah hian kan lo sang daih mai tih kha a ni a. Minister zahawm tak khan a chenna

bial lamah khan pilot project tur khan a tiin a lang a Eri kha. District dangah te leh a bik takin Lunglei North lamah te hian nasa deuhin min pe ve thei ang em tih ka zawhbelh e.

S P E A K E R : Member zahawm tak Pu C. Lalsawivunga zawhbelhna zawt turin kan sawm e.

Pu C. LALSAWIVUNGA : Pu Speaker, ka lawm e.

Ka zighthna te chu Mulberry seed farm engzat nge kan neih? Muga seed farm engzat nge kan neih? Eri seed farm engzat nge kan neih? Reeling factory hi engzat nge kan neiha, din belh tura hmalakna a awm em tih a ni e.

S P E A K E R : Zighthna neitu member zahawm tak Pu Lalrinsanga Ralte kan sawn ang a, a tawpna a ni ang.

Pu LALRINSANGA RALTE : Pu Speaker, ka lawm e.

Lunglei North bialtu zahawm tak khan mi rawn sawi khalh a, Eri bikah hian Kolasib District pawh khu sik leh sa leh engkim mai pangang khawi ang chi te pawh hian a ngeih viau mai a. Chuvang chuan Kolasib district-ah hian project min siamsak ve thei ang em tih ka zawhbelhna a ni e.

S P E A K E R : District hrang hrangah te in ti thei em tihna te a ni. Chhang turin department changtu Minister zahawm tak Pu Beichhua kan sawm e.

Dr. K. BEICHHUA, MINISTER : Pu Speaker, member zahawm tak Dr. Vanlaltanpuia zighthna hi district a bik takin Lunglei North-ah Eri project-hi hma lak a ni ang em tih kha a ni a. Large Scale Promotion Project tunah hian kan siam mek a, chutah chuan kan tum dan chuan bial tin leh district tin tan kan siam mek a ni tih kha ka chhanna ni se.

Tin, Pu Lalrinsanga zighthna pawh kha khatiang deuh tho kha a ni a. Kolasib-ah pawh hian tunah project kal mek a awm bawk a. Hemi piah lamah tuna Muga project kan tihah hian project siam mek a ni tih kha ka chhanna ni se.

Tin, Pu Lalsawivunga zighthna Mulberry-hi Rangvamual-ah khuan seedling farm kan nei a. Rangvamual-a seedling farm atang khuan Serchhip district-a multiplication centre-ah sawn kan la phei leh a. Thenzawl leh Serchhip-ah sawn

multiplication centre kan nei a. Sawta tang sawn Mizoram farmer hrang hrang kan pe chhuak thin a ni. Tin, tuna Rangvamual-a kan neih khu englaipawha enkawl reng, englaipawha hmun danga thawnchhuah theih tura farm kan neih mek a ni. Muga pawh hi tun dinhmunah hian ka hriat sual loh chuan Kolasib-ah khuan a farm kan nei a. Khuta tanga siam chhuah khu a ni thin a ni.

Tin, reeling machine engzat nge kan neih tih em ni kha zawhna kha? Tunah hian reeling machine hi keimahni Mizoram-a kan siam ngei Zemabawk bulah sawn kan neihlai a awm a. Pakhat kan neiin ka hria a, sawta tang sawn reeling pawh hi tunah hian phak ang tawkin hma kan la mek a ni tih kha ka chhanna a ni e. (Pu C. Lalsawivunga : Tihbelh tura hmalakna a awm em tih kha min la chhang lova) Reeling machine hi hmanni ka sawi tawh ang khan Central Silk Board nen kan zuk indawr khan Mizoram-ah hian tun aia chak zawka hmalak kan chak viau a. Hma lak chhoha tihbelh zel pawh kan tum a ni tih kha ka chhanna a ni e.

S P E A K E R : Starred Question 139-na zawt turin Dr. ZR. Thiamsanga kan sawm e.

Dr. ZR. THIAMSANGA : Pu Speaker, ka lawm e.

Labour, Employment, Skill Development Minister zahawm tak chhan atan-

- 1) Champhai Zote-a Industrial Training Institute (I.T.I) building sak zawh tawh khi function tir tumna a awm em?
- 2) Champhai Labour & Employment Office Staff indaihlohma hi phuhru tura hmalak a ni em tih hi ka zawhna a ni e.

S P E A K E R : Chhang turin a changtu Minister zahawm tak Pu Lalchhandama Ralte kan sawm e.

Pu LALCHHANDAMA RALTE, MINISTER : Pu Speaker, Champhai North bialtu MLA zahawm tak Dr. ZR. Thiamsanga zawhna chu:

- a) Awm e tih a ni.
- b) Hmalakna a awm rihlo tih a ni e.

S P E A K E R : Pu Lalrinsanga Ralte a phar hmasa ber mai. Member zahawm tak Pu Lalrinsanga Ralte kan sawm phawt ang.

Pu LALRINSANGA RALTE : Pu Speaker, ka lawm e.

Contract works-ah hrim hrim hian Labour cess-hi dah thin a ni a. Chulaiah chuan tunhnai deuhah khan Kolasib district chhunga a hna chhe te te an han thawhah khan Labour cess chhunna tur kha a buaithlak riau mai a. Aizawl-ah kan chhung vek mai a, thingtlang kilkhawr deuh atang pawhin Aizawl kal a ngai thin a. Hemi tihreh theihna tur hian Labour cess chhuhluhna tur hi district tinah collector hi a dah theih mai ang em tih hi ka zawhna a ni e.

S P E A K E R : Helam hi ka tih ve a ngai a ni. Member zahawm tak Pu Andrew H. Thangliana ka sawm e.

Pu ANDREW H. THANGLIANA : Pu Speaker, ka lawm e.

Zawhna a hmaa ka lo zawh tawh Thingdawl I.T.I din tur chungchang ah khan a hmunhma zawn mek a ni tih kha a ni a. Kan sorkar hmasaah khan a hmunhma tur hi Agriculture compound khu kan Minister zahawm tak Pu Zira hian a pe tawhin ka hria a. Kha kha ministry portfolio intlhak velah khan phal leh loh tih angte a rawn awm chho leh a. Khulai hmun I.T.I. centre khu central-in din tura a rawn tih tawh a nih si avang khuan a hmunhma te khu sorkar hian ngaiantuah leh dan kawng a awm em tih kha ka zawhna a ni e.

S P E A K E R : Zawhna neitu member zahawm tak Dr. ZR. Thiamsanga ilo sawm ang.

Dr. ZR. THIAMSANGA : Pu Speaker, ka lawm e.

Champhai I.T.I building khi ka hriat ah chuan estimates-hi nuai 453 a ni a, nuai 408.84 hi hman tawh a ni a. Tunah khian khi building khi enkawltu awm lovin a tlabal tawh khawp mai a. Sorkar hmasa khan building te leh hetiang luah loh hi tam tak a sa a, a lawmawm khawp mai a. Amaherawhchu, hetianga building enkawl mang loh, maintenance pawh awmloa khatianga luah loha a nihna tur anga hman tangkai loa han sak mai thin hi kan tih tawh loh te pawh a thain ka hria a. Amaherawhchu, Minister zahawm tak khan function tir tumna a awm e a rawn ti kha

a lawmawm a. Tunah khian approach road-te pawh khi a ping vek tawh mai a. Khing te pawh khi hmalak hmasak a ngaiin ka hria a.

Tin, Champhai Labour & Employment staff kha dahbelh tumna kha awmlo tlat mai kha a pawi ka ti a. BA result-te a han chhuak chho a, Employment-khi an lun a. Tunah pawh khian staff khi pahnih an ni deuh tawng tawng chauh mai a. Khing erawh khi chu min han ensak sela, min han lakbelh sak ngei sela District khitiang ve tawha khitiang em em khi chu min han ngaihtuah sak deuh se ka han ti a ni. Ka lawm e.

S P E A K E R : Chhang turin Minister zahawm tak kan sawm e.

PU LALCHHANDAMA RALTE , MINISTER : Pu Speaker, member zahawm tak Serlui bialtu Pu Lalrinsanga Ralte rawn zawhbelhna Cess lakkhawmna (Collection Centre) tur hi District hrang hrangah hian ruahman tum a ni em tih hi Department lam pawhin a ngaipawimawh khawp mai a. District tam takah kan la khawm tawh a. Kolasib district khu tlemin DC Office bawrah a lakkhawmna tura ruahman kha an kal pelh deuh a, ennawna siamfel tum mek a ni e.

Tin, Tuirial bialtu zahawm tak Pu Andrew H.Thangliana zagh belhna Thingdawl ITI hmun chungchang la fel lo te, hemi chungchangka kan hmalakna a hriat duh lai kha a sawi ang khan sorkar hmasaah khan Thingdawl-ah ITI hmun tur kha Agriculture leh Horticulture ramri lai bawrah khuan en tawh a niin an tifel deuh thuak tawha ngaih a nih laiin department changtu te leh eng emaw han insiksawi leh avangin harsatna dangte a lo awm leh a. A hmun hma tura an kawhhmu kha ITI hmun atana duhthusam a nih leh loh deuh avangin hmun hma dang zawn leh a ni a. Tunah hian Thingdawl bul hnaiah khuan ITI hmun tur chu identify mek a ni a, reilote ah tihfel kan inbeisei a ni.Tin, Champhai North bialtu zahawm tak Dr Z.R.Thiamsanga zawhbelhna kha helaih hian thil han sawifiah ngai deuh a awm a, ITI pathum hi Serchhip, Champhai leh Kolasib district-ah te sorkar hmasa lamah khan lo kal chhoh pui a ni tawh a. Tah hiancentral ministry atangin sanction tam tak, a building sakna tur atan te pek an ni a. Kan sorkar nen thawhdunna turah a building sakna tur an rawn pek rual khan a thawktu tur lakna tur ah Finance Department in assurance han siama thil tih kha a lo awm lem lova. Building kan han sa a, ITI a taka han function leh tur hian thil tul leh ngai a lo tam viau mai a. Champhai-a thawktu indaihlohma a tih nena chhan kawp nan tunah hian Labour &

Employment Department-ah hian thawktu mi 117 an awm mek a, post hi 173 kan nei a, 56 filled up loh kan nei a ni. Hengte hi kan sorkar-ah fill up turin kan dil a. Champhaia ITI ami tur pawh hi a building sak zawh thawkhat a nih tawh avangin run theihna turin ministry-ah hian thawktu min pe turin tunah hian dil turin kan inbuatsaih mek a. Hengte hi min pek theih chuan ITI Champhai run kan tum a ni. Ka lawm e.

SPEAKER : Building & Worker Welfare Cess kha sem vat a nih loh chuan Supreme Court khu an in ham strict viau a nia. Starred Question No. 140-na zawt turin member zahawm tak Pu Vanlalhlana kan sawm e.

PU VANLALHLANA : Pu Speaker, ka lawm e. Starred Question 140-na, Minister zahawm tak Disaster Management & Rehabilitation changtu chhan atan ka zawhna chu: Khuarel chhiatna (natural disaster) avanga in leh lo chan kum 2019 chhung hian an awm em tih a ni e.

SPEAKER : Chhang turin Minister zahawm tak Pu Lalchamliana i lo sawm ang.

PU LALCHAMLIANA, MINISTER : Pu Speaker, member zahawm tak Pu Vanlalhlana zawhna chhanna chu: Awm e, khuarel chhiatna avanga in leh lo chan kum 2019 hian district hrang hrang atangin report dawn a ni.

SPEAKER : Zawhbelhna zawt turin member zahawm tak Pu Lalduhoma, chumi zawahah Pu H. Biakzauva.

PU LALDUHOMA : Pu Speaker, ka lawm e. Serchhip khawpui innghahna leilung saw a nghet lo em em mai a. 2017 kuma ruah tam tak a lo tlak khan veng thenkhat (veng pakhat mai pawh ni lo) dinhmun hlauhawmah an ding a. Lunglei kawngpui pawh saw a tichhia a. National Disaster Fund atang hian central in nuai 320 vel a rawn pe a, hna an thawk a, amaherawhchu, hnathawh mumal hmuh tur a lawi chu a awm lemlo a. Tunah sawn kan dinhmun saw a la chhe em em reng mai a. DPR mumal tak siam a, a zirchiangtu mithiamte tirh a, project lian tham tak kalpui a nih loh chuan kan kawngpui saw a tha ngai dawn lo va. Tin, veng tam tak saw dinhmun hlauhawmah an ding reng dawn a, hei hi project lian tham deuh hleka min enfiah sak a, fund pawh a hrangpa central lama min

ngaihtuah sak turin ka ngen duh a. Chu chu min tihsak thei ang em tih ka zawt duh a ni.

S P E A K E R : Member zahawm tak Pu H. Biakzauva, Lawngtlai lam i sawm ang aw.

Pu H. BIAKZAUVA : Pu Speaker, zawhbelhna, M.P. election lai khan rial a tla tam khawp mai a, ka kalnaah pawh rial tam tak a tla a. Ka bial chhungah inchung tam tak rial-in a deng chhia a, Lawngtlai D.C. -ah tanpuina an dil a, vawiin thleng hian tanpuina pek an ni lo a. A pawisa a awm an ti si a, an pe thei tlat lo mai a. Hei hi pek theih a ni ang em tih ka zawhbelh a ni. Ka lawm e.

S P E A K E R : Tunah zawhna neitu Pu Vanlalhlana ilo sawm ang.

Pu VANLALHLANA : Pu Speaker, ka lawm e. Zawhbelhna chu District tina chhiatna tawk report lo lut kha engzatnge an nih? District hrang hrangah khan engzatnge an nih? Tanpuina kha engzatnge pek an nih hlawm? Tin, tanpuina hi thingtlang leh Aizawl hi in ang rengin em ni pek an nih?

Tin, Pu Speaker, Starred Question 155-na a tawp berah hian ka nei a, chu chu kan supplement bawk ang a. Building sak that tawk loh vang emaw, leilung him tawk loh vang emaw a chim mai hlauhawm, thiah tur thiah si loh hi Aizawl-ah a awm em tih ka han zawt tel a ni.

S P E A K E R : A theih ang ang chhang turin Minister zahawm tak Pu Lalchamliana kan sawm e.

Pu LALCHAMLIANA, MINISTER : Pu Speaker, member zahawm takin a bial khawpui Serchhip chungchang a sawi kha a dik khawp mai a, Serchhip khi Bazar kawn lam atanga a chhuahlam khi dinhmun hlauhawm takah a awm tih min hrilh hlawm a. Amaherawhchu, tun thleng hian mumal takin project-te siam a la ni lova, a tul khawpin ka hria. Amahin a ngen ang khan a duh angin kan lo enzui ang a, a theih ang kawng kawngin hma kan lo la ang e tih kha ka chhanna ni ta se.

Tin, Lawngtlai bialtu zahawm takin ka bial chhungah rial ten a tichhia a tih kha Lawngtlai District chhungah khan in 42 ngawt mai kan

hnung deuha rial tla khan a khawih a, tanpuina an lo la pe lo a nih chuan pe thuai turin D.C. lamah te kan lo nawr ang tih kha ka chhanna ni ta se.

Tin, zaghna neitu khan District ah khawi khawi nge a ti a, an hming list hi chu chhiarchhuak lo mai ila. District wise-in kan ti ang a. Mamit tih loh hi chu kan hnung deuha rial tla khan a lo khawih deuh vek mai a, mak deuh maiin Mamit atangin report kan dawng lo teh tlat a, tunhmaa a tuar nasa thin kha an ni a. Aizawl-ah hian fully damage an tih hi 53, partially damage 77 Aizawl District-ah khaw 37-ah an awm a ni. Tin, Lunglei-ah hian khaw 41 Lunglei District-ah a khawih a. Fully damage hi 6 a ni a, severely damage hi 13, partially damage 1555 a ni. Siaha District-ah hian khaw 30 a khawih a, fully damage chu 11 a ni a, severely damage 13, partially damage 98. Tin, Champhai District-ah khaw 18 a khawih a, fully damage hi 9 a ni a, severely damage hi 4, partially damage hi 18. Kolasib District-ah khaw 15 a khawih a, fully damage 31, severely damage 99, partially damage 164. Serchhip District-ah hian khaw 12 a khawih a, fully damage hi 2 a ni a, severely damage 5, partially damage 28. Lawngtlai District-ah hian khaw 41 a khawih a, feully damage 26 a awm a, severely damage 33, partially damage 387 an ni. Tin, tanpuina hi central guidelines angin pek an ni thin a, mahse chutiang ang chiah chiah phei chu zawm a ni lem lova. Entirnan fully damage-ah hian tlang ramah chuan 109,000 leh tlem pek theih an ni a; tin, severely damage hi 15% aia tam a chhiat chuan 5,200 pek theih a ni a, 15% aia tlem kha 3,200 pek theihna dan a awm a. Chutiang chu a tlangpuiin tanpuina peknaah hian chutiang zulzui chuan pek theih an ni tih kha ka chhanna a ni e.

Zaghna hnunng ber chhanna kha ka'n chhiar ang e, building sak that tawk loh vang emaw, leilung him loh vanga chim mai hlauhawm a awm em a ti a. Awm e tih chu chhanna a ni. Aizawl District huam chhungah in him lo 3 leh Kolasib District huam chhungah in him lo 96 a awm. Heng report te hi District Disaster Management Authority atanga kan dawn a ni e.

SPEAKER : Office lamah in en dawn nia. Starred Question 141-na zagt turin member zahawm tak Pu Lalduhoma kan sawm e.

PU LALDUHOMA : Pu Speaker, Horticulture Department changtu Minister zahawm tak chhan atan ka zaghna te chu :

- a) Kum 2018-2019 chhunga Crop loan atana target leh achievement .
- b) Target hi phak loh a nih chuan phak lohna chhan te.
- c) Tun dinhmuna recovery percentage.
- d) Recovery hi a chhia a nih chuan a chhiat chhan.

SPEAKER : Chhang turin a changtu Chief Minister zahawm tak Pu Zoramthanga kan sawm e.

PU ZORAMTHANGA, CHIEF MINITER : Pu Speaker, member zahawm tak Pu Lalduhoma zawhna chhanna te chu :-

- a) Kum 2018-2019 chhunga Crop loan atana target leh achievement a awm lo.
- b) Target a awm loh avangin phak lohna chhan sawi tur a awm lo.
- c) Tun dinhmunah recovery percentage a awm lo.
- d) Recovery hi a awm loh avangin a chhiat chhan sawi tur a awm lo.

SPEAKER : Zawhbelhna zawt turin a neitu Pu Lalduhoma kan sawm e.

PU LALDUHOMA : Pu Speaker, tuna kan Chief Minister zahawm tak min chhanna kha a mak ka ti hle mai. Crop loan hi kum tin a awm a, target pawh a awm thin a, kan kuthnathawkute innghahna lian tak pawh a ni a. Information kha a dawng fuh lo deuh emaw ni aw ka ti a, rawn inbuatsaih tha leh thei se ka duh khawp mai. Kumin February ni 12-ah khan DLRC meeting Serchhip-ah kan nei a, chutah pawh chuan kan achievement hi 12.80 % a ni tih a ni. Khami achievement rate percentage hniam lutuk kha a dik lova ka hriat avangin tisang turin tan i la ang u te pawh kan ti a. Rural leh Semi Urban bank branch awm zawng zawngte pawh kan district huam chhungah tan la lehzual turin kan infuih a. Tin, 2018-19 chhung hian crop loan 50 tal pechuak turin hma lak ni se tih te pawh kha kan minute thlap a ni. Chutih laia ‘target pawh kan nei lo, achievement pawh a hriat loh’ han tih kha chu chhanna lungawi thlak loh tak niin ka hria a, hei hi hriatchian leh theih deuh ni se. (Speaker : Agriculture nen i hriat pawlh a ni lo maw.) Crop loan a ni a hei hi.

SPEAKER : Horticulture a zawt a. Chhang turin Chief Minister zahawm tak kan sawm e.

PU ZORAMTHANGA, CHIEF MINISTER : Pu Speaker, a zaghna leh a department lo inbuatsaihna hi eng emaw inhriatsual palh emaw, target inhmuh lohna emaw a awm a nih ka ring a. Department hian crop loan target a nei lova, bank ho target zawk a ni a ti a. Helai hi tlema a inhmuh lohna lai a awm a ni maithei a. Engpawh ni se, khalai kha bank ho target emaw a nih pawhin, khalai kha inhriatsual palh deuh a awm a ni ang a. Engpawh ni se bank ho target a nih pawhin heng hi chu kan lo siam ang a, kan lo zawl nawn leh ang a, department lamin an hmuh theih ang a hranin, a ziak pawhin kan lo pe dawn nia.

SPEAKER : A lawmawm e, hmannah kan sawi tawh a, an zaghna kha a department a lo fuh lo hlek a nih pawhin, a department hotute khan a concern-ah, appropriate-ah khan an kaltir leh tur tih a ni, chu chu kan zawn zel dawn nia. A lawmawm e. Tunah Starred Question 142-na zawl turin member zahawm tak Pu C. Lalmuanpuia kan sawm e.

PU C. LALMUANPUIA : Pu Speaker, Minister zahawm tak Disaster Management & Rehabilitation Department changtu chhan atan:

- a) Edenthal Veng Methodist mual (National Highway) zawnna lei che (tawl) hi sorkarin a ven nan ruahmanna a siam em?
- b) Sorkarin a venna ruahmanna a siam chuan sum engzat nge a dah?

SPEAKER : Chhang turin a changtu Minister zahawm tak Pu Lalchamliana kan sawm e.

PU LALCHAMLIANA, MINISTER : Pu Speaker, member zahawm tak Pu C. Lalmuanpuia zaghna chhanna chu hetiang hi a ni :

- a) Edenthal Veng leimin/tawl venna tur atan hian State Mitigation Fund atangin sorkarin pawisa a dah a, ruahmanna kalpui mek a ni.
- b) Hemi atan hian ₹ 107.70 lakh a ruahman a ni.

SPEAKER : Zaghbelhna zawl turin member zahawm tak Pu Lalchhuanthanga ilo sawm ang.

PU LALCHHUANTHANGA : Pu Speaker, ka zawhbelhna, khamphei Mission Veng leh Ngaizel lung tla thin leh leimin thin hi dang tura hmalakna a awm em tih ka zawt e.

SPEAKER : Hmanni khan a zawt tawh lo maw? Zawhna neitu member zahawm tak Pu C. Lalmuanpuia kan sawm ang a, chumi zawahah Dr. Vanlalthlana.

PU C. LALMUANPUIA : Pu Speaker, ka lawm e. A lawmawm hlein ka hria a, khutilai National Highway kawngte pawh khu bal tla mai thei dinhmunah a dingin ka hria a. Khati zat sum an han dah kha a lawmawm ka ti tak zet zet a ni. Ka zawhbelhna chu Starred Question 151-naah hian a awm a, hei hi ka zawhbelh mai teh ang. (Speaker : Khami kha ni lovin i zawhbelh duhna kha zawt mai rawh.) Aw, ka'n zawhbelh ang e. Electric Veng, Hebron area, Chhingga Veng nen a inrina kawrpui min hlauhawm tak hi siam tumna a awm em tih ka zawhbelh e.

SPEAKER : Zawhbelhna zawt turin member zahawm tak Dr. Vanlalthlana kan sawm e.

Dr. VANLALTHLANA : Pu Speaker, ka lawm e. Village Disaster Management Committee hi Village Council emaw Local Council engzatah nge neih a nih tih ka zawt duh a. Hei hi Village Disaster Management Committee te hian hamthatna an neih vak loh vang deuh nge ni, an din tha duh vaklo ni te in ka lo hria a. Chhiatrupna a lo thlen hian silpaulin mai ni lo deuh hruizen te, torchlight te, a thenah phei chuan wireless set te pawh mamawh te pawh an awm hial mai thei a. An veng, an khua awmdan a zir te pawh a ni ang e. Chutiangte chu pek tumna te a awm em? Pek te an lo ni tawh thin em tih a ni a. A dang lehah chuan ka bial chhung Ramthar Sihpui-ah sawn kawr chhuat a chim a, a bulhnai in ho an mangang khawp mai a. Hmanni khan an en a septic tank chim mai thei leh a bulhnai in, ruahsur deuha nghawr dut dut mai saw a awm a, sawngte saw min enpui thei ang em ka ti a ni.

S P E A K E R : Chhang turin a changtu Minister zahawm tak Pu Lalchamliana ka sawm e.

PU LALCHAMLIANA, MINISTER : Pu Speaker, member zahawm tak Pu Lalchhuantanga han sawi Khamphei chung lei tla thin leh lung lum thin" chungchang kha chu hmanniah kan sawi tawh a, UD & PA te nen

entlan tur kan ti khan ka hria a. DM&R atang hi chuan a hrampain ka hriat chinah chuan hmalakna kan la neilo a ni.

Tin, zaghna neutu Pu Muanpuia zaghbelhna “Electric Veng leh Hebron inkar leimin saw siam tumna a awm em?” a ti a. Hei hi siam tumna a awm a, mahse Pu Speaker, hmannya ka sawi tawh ang khan, nikum sorkar kum chhung khan mitigation fund-ah cheng nuai zakua leh sawmkua leh paruk leh tlem kan dil a. Eng emaw thil kal fello, inhriat fuh tawk loh vang emaw ni sanction pakhatmah min pe lo va. Tichuan, kumin kumthar tir khan kan han dil leh a, zakua sawmkua leh paruk leh tlem kan dilah khan zathum sawmriat leh paruk min sihchhuah a, kan pawisa neih hi a beitham khawp mai a. Nichina Edenthal za pasarih tih pawh kha a za pasarih khan kan pek theih loh hmel khawp mai a. Tin, hemi Electric Veng leh Chhingga Veng inkar pawh hi zathum sawmriat leh paruk atang khan nuai sawmthum hian bul tan ta sela, a dang chu a remchan dan ang zelin tihbelh ni ta se ti ang deuhin kan ngaihtuahna ah hi chuan a awm deuh a ni tih ka sawi duh a ni.

Tin, member zahawm tak Dr. Vanlalthana han sawi kha ka hriat chinah chuan Village Disaster Management Committee hi an awm ka la hre lo va, an phur lo deuh te pawh a ni mai thei a. Amaherawhchu, central sorkar scheme hnuiah AAPDA MITRA an ti a, district tinah hian training, engemaw khuarel chhiatrup lo thlen thulhah khatiang anga training nei tur khan an ti a. Aizawl District hi a hmasa berah an rawn thlang a, mi 200 training pek tur an ni a, hmanni lawk khan an trained chhuak tawh a. Tah chuan emergency atana thil tul torchlight te, hruizen te leh tuboh ang chi te kha an khua theuha kawl turin pek an ni a. Khang ho khan engemaw, kan tawng zulin zui lo sela, chhiatrup thil a lo thlen palh pawhin a hmatawnga hma la thei tur khan tih an ni a. AAPDA MITRA training chu district dangah te pawh tih theih zel an beisei a ni tih kha ka chhanna a ni a.

Tin, chhiatna a lo thlen hian V/C fel te hi chuan anmahni D.C.-ah emaw, DM&R Directorate-ah emaw an report a, annin kha an lo enzui ta thin a ni a. Khatiang kha kan V/C zawng zawngte hian an reportna tur hmun hria se a thain ka hria a. Nuihzatthlak deuh chu khaw pakhatah nichina kan han sawi ang chi rial leh thli khan in a tichhe nual mai a, tanpuina pek tur

list-ah khan an khua kha an lo tel ve lova, an VCP kha an zawt a, 'LAD Group whatsapp-ah khan ka thawn alawm' a ti a. A thawnna turah khan a lo thawn awzawng lo mai a, chuvang chuan hei hi remchangah la in hetiang thil chhiatna hlauhawm emaw, chhiatna lo thleng emaw ah hian V/C te hian a reportna tur dik tak anmahni bialtu DC-ah emaw, Directorate, DM&R-ah hian report vat thin sela, whatsapp a ni emaw, ziak a ni emaw thu dang ni ta sela. Report lohna tura report kha chu a sawt lo viau a ni tih kha ka rawn sawikai remchang a nih chu Pu Speaker, ka lawm e.

S P E A K E R : Starred Question No. 143-na zawt turin member zahawm tak Pu K.T. Rokhaw ka sawm e.

PU K.T. ROKHAW : Pu Speaker, ka zawhna Starred Question no. 143-na, Sericulture Department changtu Minister zahawm tak Dr. K. Beichhua chhan atan :

- (a) Sericulture Department hi Siaha District-ah a la function em ?
- (b) Eng nge hma thar lakna a awm em?

S P E A K E R : Chhang turin a changtu Minister zahawm tak Dr. K. Beichhua ka sawm e.

Dr. K. BEICHHUA, MINISTER : Pu Speaker, member zahawm tak Pu K.T. Rokhaw zawhna chhanna chu:

- (a) Sericulture Department hi Siaha District-ah District Sericulture Officer enkawlna hnuaiah function mek a ni.
- (b) Eri Silk Development-ah hma thar lak tum mek a ni,

S P E A K E R : Pu Andrew H. Thangliana i lo sawm ang.

PU ANDREW H. THANGLIANA : Pu Speaker, ka lawm e. Mizote hian kan fashion ah silk hi kan uar lutuk lo niin a lang a, a leina kan neih zawh loh vangte pawh a ni mai thei a. Ka zawh duh tak chu kan silk tharchhuahte hi engtiang chiahin nge kan deh ral state hian, revenue te hi kan hmu tha ve reng em tih a ni e.

S P E A K E R : Pu K.T. Rokhaw sawm ang.

PU K.T. ROKHAW : Pu Speaker, zawhbelhna. Development Project, Siaha District tana thehluh mek hi a project estimated amount hi engzat vel nge min hrilh thei em ? Siaha District chhungah hian he project hi khawi hmunah nge din tum a nih ka zawt e.

S P E A K E R : Chhang turin a changtu Minister Dr. K. Beichhua i lo sawm ang.

Dr. K. BEICHHUA, MINISTER : Pu Speaker, member zahawm tak Pu Andrew H. Thangliana zawhna kha - kan silk tharchhuah te, cocoon te pawh hi a tlangpuiin helaia kan hman loh, a cocoon ang hian W. Bengal-ah te, Assam-ah te leh hmun dangah te hian zawrh chhuah thin a ni tih kha ka chhanna ni se. Tin, a revenue te pawh hi han zawh takah chuan kan hriat mai mai atan - tuna cocoon kan thar chhuah, a bik takin mulberry cocoon-ah hian a silk atan hian 1 kg hi ₹ 350.00 in kan lei thin a. Grade 'A' hi kg.-ah ₹ 265/- in state dangah kan hrалh chhawng leh thin a ni. Grade 'B' hi ₹ 212/- in kan zuar a, Grade 'C' hi ₹160/- a ni a. Tichuan yarn khat hi ₹4800/- a ni. Tin, Nerry hi kg-ah yarn khat ₹ 4000/- a ni. Tin, Muga cocoon hi kg-ah yarn khat ₹18000/- a ni a; tin, cocoon pakhat hi ₹ 3/- in state dangah tun dinhmunah kan zuar rih a ni.

Tin, member zahawm tak Pu K.T. Rokhaw zawhna kha - Siaha District a Eri Silk Development kan siam mek hi a project cost hi 12.91 crore a ni. A hmun tur erawh hi chu a project te lo hlawtling phawt se kan select turah kan ngai a, beneficiaries 400 tura ruahman mek a ni tih kha ka chhanna a ni e. Pu Speaker, ka lawm e.

S P E A K E R : Starred Question No. 144-na zawt turin member zahawm tak Pu Lalduhoma ka sawm e.

PU LALDUHOMA : Pu Speaker, LESD&E Department changtu Minister zahawm tak chhan atan:

(a) Asia Pacific Youth Exchange, Seol, South Korea-a tel turin thalaite tirh ve tumna a awm em ?

- (b) A awm chuan mi engzat nge tirh tur ?
- (c) A kal turte thlan dan ?
- (d) A senso kalmang tih a ni e.

S P E A K E R : Chhang turin a changtu Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER : Pu Deputy Speaker, Serchhip bialtu MLA zahawm tak Pu Lalduhoma zawhna chhanna chu:

- (a) Awm e, tunah hian hma lakk mek a ni.
- (b) Tun dinhmunah chuan mi engzat nge tirh tur tih hi a la chiang thei lo a, APYE selection team, South Korea atanga sponsorship/funding hmuh theih dan a zira thutlukna la siam tur a ni.
- (c) APYE delegation team, South Korea ten selection hi an kalpui dawn a ni.
- (d) APYE delegatiion fee hi \$1000 naupang pakhat tan a ni.

S P E A K E R : Tunah chuan zawhna leh chhanna hun a lo tawp leh ta a. Vawiinah hian kan Deputy Chief Minister zahawm tak Pu Tawnluia a dam lo va, a lo kal thei lo kan hriat sa a ni.

Tunah chuan Financial Business-ah kan kal leh tawh ang a, vawiinah hian Minister zahawm tak tak pathum – Pu Lalchamliana te, Pu Lalchhandama Ralte te, Pu T.J.Lalnuntluanga te demand kan sawiho ang a, vawiinah hian pass kan tum bawk dawn a ni.

Tunah chuan Minister zahawm tak Pu Lalchamliana'n a Demand-Demand No. 8 - Taxation Department, Demand No. 16 Home Department leh Demand No. 30- na Disaster Management & Rehabilitation Department te han submit se, kan sawm e.

PU LALCHAMLIANA, MINISTER : Pu Speaker, ka lawm e. On the recommendation of Governor of Mizoram and with your permission sir, I move

the Demand Nos. 8, 16, and 30 for ₹ 8,50,23,28,000.00 only for meeting expenses during 2019 -2020 in respect of the following Departments:

Demand No. 8	Taxation Department	₹24,69,24,000.00
Demand No. 16	Home Department	₹7,98,09,27,000.00
Demand No. 30	Disaster Management	₹ 27,44,77,000.00,
& Rehabilitation Department		
Total		₹ 8,50,23,28,000.00

hi he House zahawm tak hian min ngaihtuah sak turin ka han pharh e. Ka lawm e.

S P E A K E R : Tunah Minister zahawm tak Pu Lalchhandama Ralte-in a Demand No. 18-na Printing & Stationery Department, Demand No. 20-na School Education Department leh Demand No. 28 na – Labour, Employment, Skill Development & Entrepreneurship Department te House-ah ngaihtuah turin han submit ve sela. I lo sawm ang.

PU LALCHHANDAMA RALTE, MINISTER : Pu Speaker, Governor of Mizoram recommendation leh i phalnain ka Demand No. 18, 20 leh 28 te a vaiin ₹13,92,99,71,000.00 hi kum 2019 atanga 2020 chhunga ka Department chan pathum te hman atan

Demand No. 18	Printing & Stationery Department	₹16,98,55,000.00.
Demand No. 20-na	School Education Department	₹13,28,42,02,000.00.
Demand No. 28-na	Labour, Employment, Skill Development & Entrepreneurship	₹ 47,59,14,000.00.

A vaiin ₹13,92,99,71,000.00 hi he House zahawm takah hian ka rawn pharh e.

SPEAKER : Tunah chuan Minister zahawm tak Pu T.J.Lalnuntluanga'n a Demand No. 4 – Law & Judicial, Demand No. 12- Parliamentary Affairs, Demand No. – 36 Environment, Forests & Climate Change, Demand No. - 42 Transport Department te House-a ngaihtuah turin han submit se, i lo sawm ang.

PU T.J. LALNUNTLUANGA, MINISTER : Pu Speaker, ka lawm e. Governor of Mizoram recommend-na leh i phalnain he House zahawm takah hian Demand No. 4 – Law & Judicial - ₹ 27,89,27,000.00, Demand No. 12 – Parliamentary Affairs Department - ₹ 1,05,91,000.00, Demand No. 36-na Environment, Forests & Climate Change Department ₹ 1,60,07,28,000.00 leh Demand No. 42-na Transport Department - ₹ 50,31,08,000.00. Heng Department hrang hrangte tana avaia belkhawm ₹ 2,39,33,54,000.00 te hi kum 2019-2020 meeting expense atan ka rawn move e.

S P E A K E R : Aw le, Minister zahawm tak tak 3 ten Demand hrang hrang an chan te House-ah an rawn chhawp chhuak ta a. Sawihona kan tan ang a, minute 10 kha kan ti leh mai ang a, a tha ang ti rawh u, a tha mai em?

PU LALDUHOMA : Pu Speaker, vawiina kan sawi tur hi Department 10 ngawt mai a ni a, member lam atanga thlirna atang chuan Department pakhat sawi nan minute khat chauh vek kan nei a ni. Amaherawhchu, minute sawm kha chu ti leh tho ila, hmang zo lo te pawh kan awm a, tuah deuh te kha chu min hrethiam leh ta ula. Tin, Minister ten an windup hian a sermon lam hi uar lo deuh ila, member lam te point hi rawn response deuh mah mah se tih lam kha kan duhdan deuh a ni.

S P E A K E R : Minute 10 kha chu a la ding a nih kha, minute 10 i ti mai ang u aw. A sawi tur dan azirin kan ham strict vak lo aniang chu. Tunge tan ang le? Aw, Pu Lalrinsanga Ralte, member zahawm tak sawi hmasa ber turin ilo sawm ang.

PU LALRINSANGA RALTE : Pu Speaker, ka lawm e. Vawiina demand kan sawi tur hi Minister 3 te demand a ni a, kan thian dang te pawh hian Minister zahawm tak tak 3 te demand hi sawi an phur viauin a rinawm a. Demand No. 16 – na Home Department te, Taxation leh Disaster Management changtu Minister zahawm tak Pu Lalchamiana demand hi han sawi hmasak ka duh a. Amaherawhchu, Pu Speaker, kan sawi tawh ang khan sawi tur a tam thin si a, ngaihpawimawh zuala lang hi sawi mai hi thain ka hria a.

Home Department-ah hian kan Minister zahawm tak hi Home Department changtu inhmeh tak leh in-fit tak niin ka hria a. Ramri a vei a, khunglai Assam nena kan ramri te min tlawh kual sak a, lawmawm kan ti hle a ni tih hi han sawi hmasak ka duh a ni.

Tin, Home Department hi kan ram venghimtu, law & order kengkawtu an ni a, ram, mipui, nunaute tan an hlu a. Chuvang chuan Police Department-ah hian post ruak tam tak 2000 chuang awmin ka hria a. Hengte pawh hi kan hnawhkhah vat vat hi a tulin ka hria a ni. Home Department bikah hian hma nasa taka kan lak hi a tulin ka hria a, tuna kan ram dinhmun han en hian tan lak a ngai nasa hle a ni.

Tin, Home Department hian indaihlohma nasa tak leh tan lak tharna tur tam tak an nei a. Staff indaihlohma satliah mai ni lo in police quarter tam tak sak that leh siam belh ngai kan nei tawh a ni. Chungah te pawh chuan Finance lam atanga kan sum dah bakah Home Department pawimawhna leh a tel lova kan awm theih lohma hre ran a, Home Department tana sum kan ui loh deuhte hi a tul em aw ka ti a. Police quarters kan mamawh nasa em em mai a. Tin, a awm sa pawh chei that ngai/sak that ngai tam tak a awm tawh a ni. Tin, motor hi an indaihlo nasa khawp mai a. An motor neihchhunte hi a tawng tawh em em mai a. Chuvang chuan Home Department pawimawh tak, law & order kengkawha ram mipuite min venghimitute motor lei belh sakte hi a tul hlein ka hria. Home Minister zahawm tak hi ka bial chhungah ramri a rawn tlawh kual tumin Saiphai-ah a kal a, IR Post a han tlawh dawn a, kalkawngah a tang a, an innawr vak mai a, an thleng thei lova. Tawite a ni a, metre 100 bawr vel awrh chauh a ni a, a kawng a tha lo khawp mai. Kan Home Minister ngei pawh a motor lut tlang thei lovin a tang a. Tin, khumi ramria IR kan dah, Saiphai-a IR Post te khu a bang dap a ni a, a kaw ser suar tawh a. Chuvangin ramria kan force-te, kan sipaite kan thuam chak a, kan duat thiam deuh hi a ngaiin ka hria a. Tin, chutiang bawk chuan Saipum-ah pawh IR kan dah a. Chungte pawh chu thuam chak an ngai khawp mai. Motor pawh kawl tur an nei lova, ramria kan Police awmte hian. Chuvang chuan a bik takin ramri hmung hrang hranga kan force-te hian motor tha tak an kawl hi a tul hlein ka hria a. Tin, staff pawh, sipai pawh kan indah belh theih chuan a lawmawm hlein ka ring a ni.

Tin, Pu Speaker, kan sawi fo tawh thin angin, ka bial khu thil tha pawh, thil tha lo pawh rawn luh tamna a ni a. Phainuam khu motor bo kalkawng a ni a. Motor rukbo kalpui nan an hmang nasa a, Phainuam-ah khuan Police check gate siam ni thei se tih ka sawi duh bawk a.

Tin, kan sawi fo tawh angin Vairengte Sub-Jail, hun rei tak lo awm tawh lo, MNF ministry hmasain Sub-Jail function tura a lo siam, a building engkim a lo sak zawh tawh, kum 10 kal ta chhunga NLUP Bawng dah nana an hman, tuna building chei that ngai te khu chei thain function tir theih dan a awm ang em? Tin, Pu Speaker, ramri kan ngai pawimawh a. MNF ministry chuan ramri hi kan vei a, huaisen takin ramri kan enkawl ngam a ni. Ramri ah hian hna kan thawk dawn a ni tihlen nan hian Vairengte-ah khuan Home Department hian hmun tha tak mai an nei a, tah khuan IR Battalion em te kan dah thei lo a nih pawn IR Company Headquarter ang tala kan dah theihte khu a tul mang e tih ka sawi duh a.

Tin, Pu Speaker, Disaster Management & Rehabilitation Department, Demand No. 30-naah hian lawmthu han sawi tel ka duh a. Kan hriat theuh angin tun kumtir khan ka bial, Serlui bial bikah te chauh mai hian thli na tak mai hi a thawk a, mipui an buai em em mai a, khawtlang buaiin an buai a. Chumi ah chuan a bik takin Kolasib DC leh a staff te leh DM & R Directorate chungah hian lawmthu ka sawi duh a. Theihtawp chhuahin an office hun ni lovah zing leh zanah hna thawkin hma min lak sak a, an chungah lawmthu ka sawi duh bawk a ni.

Pu Speaker, Education Department, Demand No. 20-na hi han luh leh nghal mai ka duh a. Nichina kan Home Minister chungchang kan sawi ang deuh khan kan Eductaion Minister hi Education Department chang tur awm hliah hliah hi kan pu hian a dah thiam hlein ka hria a. A hun tam zawk zirna siam thatna tura theihtawpa lo bei thin, MZP President te pawh a lo ni a, theihtawpa zirna siam that a nih a, kalphung thar kan hman theihna tura ngaihtuahna lo seng thin Minister kan nei hi lawmawm hlein ka hria a. Ani kaihhruinaah thla ruk chhung lek hian kan education system leh hmalakna thar, thil thar kan hmu nual ta a, lawmawm hlein ka hria a. Kan nun leh khawsak phung mil turin zirna, sikul timing te a'n siam danglam nghal a. Hengte hi thingtlang lamah chuan kan lawm khawp mai tih ka sawi duh a. Tin, CCE tun anga kalpui zel hi zirlaite tan a tha lo zawk nia lan deuhna a neih avangin CCE pawh kalphung tharin a saimrem ngai deuhin siam rem deuhin hma an

la chho te; tin, Education Minister ber eduction campaign-a khaw hrang hranga a'n zin kualte hi ropui ka ti tak zet a ni.

Tin, Pu Speaker, kan hre theuh a, zirtirtu indaihlohma nasa tak kan neih avangin kan sorkarin theihtawp chhuahin Education Minister hma lakanain zirtirtu MR Teacher 946 lai kan la turte kha a ropui ka ti tak zet a ni. Hetianga Education Department-in theihtawp chhuaha hma an laknaah thil leh ropui tak tak kan hmu nachungin Education Department hi ram mipuite innghahna, khawtlang a lo changkan a, ram develop tak takna tur te, kan ramin hma a sawnna tur chuan Education hi a bulpui ber a ni si a. Chuvangin Education Department-ah hian Pu Speaker, kan Finance Minister te, he sorkar ngei pawh hian ngaihtuahna kan pek deuh hi a tulin ka hria a. Nakinah sum inpek leh theih tur a awm a nih pawhin kan hotute hian ngaihtuahna seng nasa deuh hlek ila tulin ka hria. Vawiinah kan hmu vek a, thingtlang khuaah, khawiah pawh hian sikul, a bik takin Primary leh Middle hi a chhe viau tawh mai a. Nu leh pate tan pawh an fate kaltir chakawm loh khawp hian sikul building a chhe tawh a ni. Hengte hi Aizawl-ah chuan kan hre lo mai thei a, thingtlang kilkhawr apiangah hian kan sikul hi a chhia a ni mai a. Green Board kan tihte pawh hi thingtlangah chuan kan nei zo ve lova, plywood te hi kan hnawih dum a, chungah chuan ziak mai maite kan la ni a. Chutiang khawp chuan World Class Education min tiamtuten Education-a kan hmasawnna kum 10 chhung khan eng nge a nih tih hi ram mipuite hian kan hmu. Chuvang chuan Education Department hi kan thuam chak deuh a ngai em aw tih ka rilruah a awm a. Chuvangin sikul sak that ngai tam takte kan sak that theihna tur hian ruahmannna awm thei se a tha hlein ka hria.

Tin, thingtlangah zirtirtu an awm tha peih lo hi a chhan lian tak awmin ka hria a. A pawimawh berte zinga pakhat nia ka ngaih chu zirtirtute hian awmna mumal, in luah tur hi an hmu lo thin a ni. Chuvang chuan Pu Speaker, zirtirtute tan hian quarter ang chite pawh nei thei tura hma lak hi a va tul em tih kha ka sawi duh a. Tin, thingtlangah hian tam tak kan thiante ho zawng zawng hi an nih ve tho ka ring a, ai kal lak hi kan buaipui khawp mai a. Hei hi Education Department hian uluk leh zualin lo en se. (Pu Speaker, ka sawi rei tawh loveng) Heng SSA te, RMSA Teacher te leh regular teacher ten aikal an la a, annin secondhand te an lo zuar leh daih a, auto te an lo khalh leh daih thin a ni. Hengte hi engtinng Department-in hma a lak dawn? Hei hi ngun leh zualin lo en se thani ka hria a. Tin, Elementary School-

a kan Cook-te an lawmman a beitham hle mai a. Hei vang hian thawk duh hi an vang hlein ka hria a. Chuvang chuan Pu Speaker, Education Department-ah hian sum dah belh viau a ngaiin ka hria a ni.

Forest Department, Demand No. 36-na kha han sawi leh zawk ka duh a. Nichina kan sawi ang khan Minister zuanzang tak, mi taima tak, thalai veh vawh kan nei a, a lawmawm hlein ka hria a, a zin pawh a zin nasa tawh a. Forest Department hi sik leh sa danglam chak lutuk tur venna tura thawk tu pawimawh tak, a thawh hlawk ber an ni a. Chulaia an hmalakna tur leh an thawh theihna tur chuan sum pawh kan dah sak viau a ngaiin ka hria. Kan neih ang angte uluk zawk leh tha zawka kan enkawl leh hnathawktu pawh kan inpekbelh tam a tul hlein ka hria. Tin, Assam nena ramria kan buaina tam ber hi Forest kaihhnawih hi a ni thin a ni. Chulaiah chuan Pu Speaker, han sawi ka duh chu, ka bialah khuan ramriah buaina leh harsatna kan nei thin a. Assam lam Forest Department chu DFO ho te an rawn kal a, motor nen zahawm takin an rawn ri khap thin a. Keini ah chuan Vairengte-ah RO kan dah ve a, motor pawh a nei lova, tute motor hnungah emaw a zuang thla ve thauh thin a. Chuvang chuan ramri chungchanga han buai hian rualawh a na hle mai thin a. Vairengte-ah RO mai ni tawh lo hian DFO dah theih dante a awm em tih kha kan Minister-in min hriat sak se thain ka ring. (Pu Speaker, minute 1 vel chiah ka sawi tawh ang, ka sawi zo tep) Nichina member zahawm tak Pu Duhoma rawn dil belhna kha ka'n hmang hmasa ber ang a, min lo hrethiam ula.

Transport Department hi han sawi leh lawk ka duh a. Zo hnahthlakte kan inunau zual nan leh inpawhna kan neih nasat leh zual theihna turin kan Minister-in ngaihtuahna a seng a. Manipur te, Zampuitlangdung leh Tahan- a bus service tir a han tum te hi ropui ka ti a. Hma nasa taka la a, chak leh zuala a kalpui a, bus hi a service vat theih nan tan la leh zual se a thain ka ring. Tin, thingtlangah hian MST bus hi a lun reng mai a. MST bus a tlan tam leh zual theihna turin bus leina tur pawh hi pek theih ni se. Chu chu thingtlang mipuite tan a hlu si a tih ka sawi duh bawk a.

Vairengte-ah khuan kan hmu vek a, motor lian (Truck) hi zanah hian za chuang hi a ding thin a ni. Chhunah pawh by road-a in tlan chuan in hmu fo in ka ring. Chulaiah chuan sualna tam tak pawh a chhuak thei a, nulat tlangvalna a ni emaw, ruihtheihthilah a ni emaw, road accident pawh a hlauhawm em em a. Chuvangin, Transport Department hian Vairengte-ah khuan hmun tha deuh mai an

lo nei a. Chu chu Inter state Truck Terminal ang tur te hian ruahmanna min han siam sak thei se a lawmawm viau ang tih ka sawi duh a ni e. Pu Speaker, ka lawm e.

SPEAKER : Sawi thiam si a. Tunge sawi ve leh ang le? Pu L Thangmawia, member zahawm tak ilo sawm ang.

PUL THANGMAWIA : Pu Speaker, ka lawm e. Vawiin hi demand sawi tur a tam khawp mai a, Department zawng zawng pawh kan sawi hman lo ang a.

A hmasa berah chuan lawmthuin han tan ila. Home Department, a bik takin kan Home Minister zahawm tak duhsaknain ka bial chhungah Police quarter 3 kan thawmtha zo tawh a. Amaherawhchu, satachchhuakpek ang deuh chauh mai hi a ni a. Quarter thar leh thil dang kan la mamawh nasa em em mai a. Tin, Mizoram pum ang pawhin Aizawl angah te hian quarter luah tur nei lo police, hah tak tak ram tana thawk te an la tam em em a ni. Aizawl-ah pawh hian quarter lian zawk, kan la mamawh viauin ka hria a. Chung chu ka han sawi tel duh a ni.

Tin, Khawzawl police station hnuiah Kawkulh lam area te kan han awm a. Kawkulh hi a khaw chheh vel nena han en pawh hian police outpost awmna hliah hliah tur niin a lang a. Tunah hi chuan Chhawrtui leh Vancheng atanga kal dawn hian Kawkulh thleng Aizawl pan tur motor-in an kal phawt a, Khawzawl police station kal tur hian. Kawkulh atangin Champhai motor an chang chho leh a. Harsatna tam tak an tawk a. Dulte te, Kawkulh khaw chhehvel tam tak Vankalte, tan hian police outpost hi a awm a tul hle mai a. Hei hi sorkar hmasa lamah pawh khawtlang hruduit leh mi thahnemngaiten an lo nawr fo tawh a. Sum awm loh chhuanlam leh chhuanlam hrang hrang hmangin thehthlaksak an ni fo thin a. Tunah hi chuan kan mamawhna avang hian min tihsak turin ka han ngen ni bawk se.

Tin, Education lam hi kan sawi tam hman lo ang tih a hlauhawm a, han lut chho nghal ta mai ila. Elementary education hi ICU-ah a awm mek tih chu kan hre tlangin ka ring a. Kum chanve vel sorkarna kan han chan hnuah hian ram pum dinhmunte theih ang angin kan han thlir a. Tunah hian zirtirtu pawh hnawhsaruma lak ngai khawpin a awm a. A building that leh that loh hi education that leh that loh chu a ni vak lova. Building-te chu a pawimawh viau laiin chu ai chuan zirtirna faculty-te leh zirtirna a pek that leh that loh hi kan tehna a ni thin, result te a

nghawng chho bawk a. Chuvangin, zirtirtu hi indaihlohma a nasa. Minister zahawm tak pawh hian a vei a, sorkar tantirh te atangin hmalakna pui berah a neih nghal a. Tunah hian kan dah hnaivai thei dawn te pawhin han ring ta ila. Runtu kha kan tawk ve bawk a ni, elementary hian. English medium school kohhran hrang hrangten an rawn hawng chho a. Tahchuan KG I leh II a lo awm si a. An fate kum 4 an han ni a, KG I kal rual an han ni a, kal tir loa Anganwadi-a han kaltir ngawt kha ni chiahin an hre si lo ni berin ka hria. Chuvangin KG I & II English medium-a an lo kal tir laklawh tawh kha chuan Class I pawh kha an tlang deuh tlangpui a. Ka bial chhungah hian school pakhat kuminah hian khar a ni tawh a, warning pek lai mek an awm bawk a ni. Chuvangin, sorkar hmasa khan sum tam tak nuai 50 dawn lai sengin Pu Speaker, Education Reform Commission-a din a, tah hian Early Childhood Care & Education (ECC) kan tih pawh tha taka focus in, zawm duh se chuan sorkar hmasa khan tuna kan sawi laite pawh kha hman mai tur a awm a. Amaherawhchu chung chu ti loin ICU-ah min rawn dah chho a ni a. Hemi issue hi tha taka kan address a nih loh chuan tun atanga reiloteah chuan (Aizawl pawh a tel ve tho) Mizoram hmun tam takah kan elementary education-hi chhinchhiah theih loh khawpin a awm chho dawn a ni. Tin, hmania A pawl leh B pawl kan tih chi ang deuh KG I & II kan tih loh pawhin English medium compete tur hian ngaiantuahna kan sen a ngai tih kha tawitea ka sawi theih ni se. Tin, quarter hi a lo tul khawp mai a. Khaw te teah a lo tul a, khua a len chuan inluah tur han zawn mai te pawh hi a awl a, a khua a tet chuan mi inhnuai luah tur hi a awm mang lova. Chuvangin, hmannia Social Welfare kan sawi laia ka sawi ang deuh khan Pu Speaker, Social Welfare-te leh Department dang dang NEC-te pawh a ni ang a, fund awm thei hrang hrang DONER-ah te pawh en in khaw te teah te hian zirtirtu quarter sak hna hi tan hma a ngai dawn a ni. A nih loh chuan zirtirtu thiam kan duh bawk si a, a thiama kha an khaw mi an lo awm remchan loh phei chuan khaw dang mi dah an lo ngai ang a. Inluah tur neih loh vang khan buaina tam tak a awm a ni. Nasa takin kan address a ngaiin ka hria a. Building pakhatah, New Capital Complex-a kan tih ang deuh khuan zirtirtu pali/panga len theihna tur, building hrang hrang ni lo hian ngaiantuah thei ila. Hei hi Mizoram pum atan ka rawn sawi a ni.

Tin, MNF sokar kalta kum 2008-ah khan vantlangin an mamawhna avanga sikul an lo din 337 lai kha upgrade a ni a, kan la hre theuh ang a. Provincialized-ah school 48, Adhoc Aided-ah 206 leh Lumpsum-ah 83 lai, a vaiin 337 kha an upgrade

a ni a. Engemaw chen pawh hma a la hman a. Amaherawhchu, sorkar a inhlak a, kihhnawk-ah min ngaih sak char char a, kum 10 chhung kihhnawk tiin kan awm a ni. Mahse, an lo kithnawk ve duh tho chu a nih hmel a, Pu Speaker. Inthlan puan hma ni 1, October ni 6-ah inthlan an puang a, October ni 5 khan Middle School 7, High School 26 leh Higher Secondary School 43, a vaiin school 76 kha lumpsum Aided-ah an lo upgrade a, a lawmawm viauah ka ngai a. Keini chuan kihhnawk kan ti ve ngai lova. Mipui vantlang mamawh a nih avangin kan hotute pawhin tha takin an chhawm chhoh mai ka ring a. Tin, chumi hma deuhin Pu C. Zakhuma Higher Secondary School kha provincialized an nei bawk a. Kum 10 an sorkar chhungin aided-ah 76 leh provincialized 1 an nei bawk a ni. Chung pawh chu inthlan puan ni hma chiah October ni 5-ah a ni.

Chuvangin, kan hotute pawhin ngaihtuahna an seng niin ka hria a. Education budget han en ila, nikum budget estimate aia kumin budget estimate tamna chu 25003 lakh lai a ni a, a lawmawm khawp mai. He sorkar hian Education-hi a ngaipawimawh a ni tih a langin ka hria; heta tang ringawt pawh hian.

Pu Speaker, Ngopa hi SDEO awm nan hun rei tawh tak atang khan ngaihtuahna hman tawh a ni a, mahse tih hlawhtlin ngawt theih loh a ni te pawh a ni ang a, kum 10 an sorkar chhung khan an ti hleithei lo a ni a. Amaherawhchu, inthlan puan ni leh SDEO office mumal vak lova an hawn ni, ni 7 chiah a kara tla in, SDEO office Ngopa kha mumal lo takin hawn a ni a. Chu chu 27.9.2018 khan order a chhuak a, chu pawh chu a kal dan phung pangngaiah chuan Cabinet approval kha Govt. in order a chhuah tur a nih laiin , ka hriat sual loh chuan Directorate-in Govt. approval in order a rawn chhuah ringawt mai a, lawm tur nge lawm loh tur tih kha kan hrethiam vak lova. Amaherawhchu, kan sorkar chak tak hian a pangngaia min tihsak leh ka ngen duh a. Education hi website update peih pawl tak an nih ka ring a. Nizan pawh khan ka tlawh a, 20th June pawh khan an la update a. Mahse, he SDEO hawnna hi an website-ah pakhatmah ka hmu lo a ni. Tin, chubakah a huam chin tur leh thil dang dang hemi kaihhnawih hi an dah lo a. A department pawh hian thil tak tak loah an ngai em maw ni ka ti deuh hlek a, an website an update that tehlul nen tihte kha ka sawi tel duh deuh a.

Transport lamah han kal ta ila. Transport Minister hian Zofate impumkhatna a vei a. Kan ngaihthlak tak ang khan theihtawp chhuahin inter-state bus service

(MST) tur khan a ti a, a lawmawm khawpin ka hria a. Amaherawhchu, harsatna pakhat hi a awm a. Krismas dawna thingtlang bialtu MLA kan buaina ber chu Transport-a thawktute ka han ngen thin a. Kumin kan tlin hlim pawh khan inthlahrung chung chungin bus 3/4 lai kan ngen a ni. MST pangngaiin a daihlo a nih pawhin Krismas dawn bikah hian, election dawna an tih ang deuh hian, bus hmang thang deuh leh bus mamawh deuh khua te hi chu a hriat theih ka ring a. Sorkarin subsidised-a Krismas hlim taka mahni khuua hman theih nan bus 50 vel hi arrange sak turin, MST tlan bakah hian a tha ang em tih te, a theih ang em tih chu ka hre lo a, Pu Speaker, thingtlang mite ngaihtuahna zawnah ka rawn rawt ni se. MST pangngai hi chu kan indaihlo a ni. Nikumah pawh kan han inngen ngawng ngawng a, Department-a thawkte an fel em em a, rem leh rem lo in an ti a. Driver-te pawh kha an hah ngawtin ka ring a. Anmahni khuaah Krismas an hmang hman tawk tawkin ka ring.

Tin, Forest-ah pawh hian Forest Division hi Ngopa-a awm turin Cabinet agenda-ah pawh Pu Speaker, a lut tawh a. Amaherawhchu, la zirchian deuh ni se tia decline rih kha a ni a. An zir chiang rei tawh khawp mai. Forest Minister zahawm tak leh kan House Leader-te pawhin min lo hriatpui sela. Zir chian vak ngai tawh lovin kei pawhin ka hre chiang viau tawhin ka hria a. Cabinet meeting leh hmasa berah chuan DFO, Forest Division Office tur hi Ngopa-ah pawh min dah sak kha kan beisei a, ngen nghal bawk ni se. Eng pawh ni se Pu Speaker, sawi tur a tam a, sawi duh kan tam ka ring a, Minister 3 demand-te a ni a. Hun ka titawp dawn ang a. Ka tihtawp nan chuan tun thlenga kan performance-ah Minister 3-te department chanah pawh a lawmawmin ka hria a. Tun sorkarah hian mipuite thlawpna kan hmuh that chuan ram ropui tak kan thleng thei dawnin ka hria. He House zahawm tak kaltlang hian mipuite thlawpna pawh ka ngen chho nghal bawk a ni. Ka lawm e.

SPEAKER : Member zahawm tak Pu Vanlalhlana kan sawm e.

PU VANLALHLANA : Pu Speaker, ka lawm e. Ka sawi duh hmasak ber chu Forest Department kan nei thin a, Central Forest Ministry-te kan ti a. A hnuah a lo danglam deuh a, Environment & Forest Department tih a lo ni ta a. A huam zauin lui te leh boruak leh a chhehvelte huam telin, tunah phei chuan a lo danglam leh ta a, Environment, Forest & Climate Change tih a lo ni ta a. Climate change hi thil pawimawh tak, sorkar pawhin a ngaih pawimawh turah ka ngai a.

Chhim tawp leh hmar tawp vur a tui hluam hluam a, tuifinriat hi 1 ft-in sang leh ta se, Bangladesh hi tuifinriatin a chim vek ang a, Bangladesh-a mihring maktaduai 160 vel khu an tlan darh dawn a ni. Hmun sang zawk an pan lo thei lo ang a, an kalna tur pawh kha Mizoram-te pawh a ni mai thei a ni. Chuvangin, climate change hian khawvel hi kan beisei leh kan hriat aia nasa, kan suangtuah aia nasa hian min la nghawng dawn ni te pawhin a lang a ni.

Mizoram University leh Pachhunga Univiversity-ah te Zoologists an awm a. Field trip an neih hian species thar Mizorama la awm ngai lo hi an hmuchhuak thin a ni. Chu chang ni lovin khawvelah pawh an la hmuh ngai loh hi Mizoramah an hmu leh thin. Sangha te, rannung/insect te, rul te Mizoramah hian a lo piang thar thin a ni. Engatinge a lo pian tharna chhan kan tih chuan climate change-in a nghawng chhuah pakhat chu a ni ve tlat a ni. Kan ram inrelbawl dan te, economic development kan duan danah pawh hian climate change resilient development, sik leh sa inhlak danglam zung zung pawh do zo thei programme leh policy hi kan sorkar hian a ngaihpawimawh a tulin ka hria a. Tun hnaiah fall army worm-te kan ti a, sawhthing tam te kan ti a, natna chi hrang hrang leh mak tak takte pawh hi a la piang a la piang dawn a, tam tak hi a mang ang a, a ral ang a, lo piang tur hi a awm zel a ni. Khawvel sik leh sa danglamin a hrin chhuah tur hi a la awm a ni. Chuvangin kan sorkar hian development programme a duanahte pawh rubber-te, bamboo-te chu sik leh sa do zo pawh a ni mai thei, research te neiin a ni chiah em chu hre lo mah ila, kan sorkar hian khati zawng khan ngaantuahna a sen ka duh a ni tih ka sawi lang duh a.

A dawt lehah chuan Education chungchang hi ka sawi duh a. Chumi hma chuan kan Minister-te pawh ngenna angreng deuh ka nei duh a. Ka bial chhungah khian Chaltlang khua, Aizawl-a khaw hlun tak mai leh lian tak mai a awm a. Lal lal lai atanga lal nei khua an ni a. Khawtlang remtihna sorkar ram hi an pe thin a ni. Tuna Basic mual kan tih DIET hmun zawng zawngte pawh khi Chaltlang ram a ni thin a, mamawhna avangin sorkarah an hlan a ni. Khua an lo pung a, mihring an lo pung a. Chaltlang-ah khian thalaiten infiamna hmun an nei mumal ta lo a. DIET hmar lamah khian ram awl chhete a awm a, chu chu chei chawpin volley ball te, basket ball-te an khel ve thin a. Tunah chuan khawtlang tangrualin, pawl hrang hrang Local Council kaihhruaina hnuia inkhawm chuan joint action committee an din a. Chu chuan chulai hmunah chuan multipurpose sports complex din an duh a ni. Hmate pawh thui takin an la a, project te pawh an han siam thin a. Amaherawhchu, a

ramah khan neitu nihna an neih chiah lo avangin harsatna an tawk leh thin a. Chu chu sorkar hian ngaihtuah se, kan Minister pawhin duhsak takin, application-te pawh thehluh tawh a niin ka hria a. Helai hmun hi Chaltlang tan pawh nula leh tlangval infiamna atan, DIET leh Mizoram tan hmun laili a ni a, pan nuam a ni a, sports discipline hrang hrang infiamna a awm theihna tura sports complex din kha remti se. A hmun thu hlaah pawh hriathiamna thui tak nen lo dawng sawng se tih ka ngen hmasa duh a ni.

Demand No. 20-na hi nasa taka hmalak tumna a ni tih a lang a. Nikuma budget estimate aiin kumin budget estimate hi 23.19%-in a pung nghe nghe a ni. A nihna takah chuan nikum revised estimate ai pawhin budget estimate hi a pung a ni. Kan Minister thothang tha tak hian a duh ang thalin hma han la se kan education pawh hi a changkang ang tih ka ring a. A hlauhawm ber zawk chu a duh anga a tih theih loh hi a hlauhawm a. Hnam Run list tih te, khawi khawi emaw atangin a ngam loh thu kha a dawng ang tih a hlauhawm a, chutiang a nih chuan beisei tur a awm bik lo mai thei. Amah mimal ngau ngauah chuan kan education system siam tha thei tur khawp beiseina hi ka nei a ni. Starred Question 126 chhannaah khan Mizoram hlimthla a lang chiang khawp mai. Mizoramah zirtirtu pakhatin naupang 14 vel kan enkawl a ni. National norms-ah chuan zirtirtu pakhatin naupang 30 a enkawl a ni. National level-a ngaihtuah chuan zirtirtu kan nei tlem lo hle a ni, naupang 14 kha zirtirtu pakhatin a enkawl a ni a. Kan zawlpu deuh chu India rama UT te ber 30 sq. km. vel Lakshadweep-te, Sikkim 7000 sq. km. vela lian te a ni a, a chhuanawm loh khawp mai. Zirtirtu hi chu kan indaih a ni tih hi a langin ka hria. Tunah hian zirtirtu 946 lak tum a la ni leh ta nghal a, kan indaih lehzual dawn a, a ratio pawh hi a la danglam leh thei a ni tih a lang a. Tin, hei chang ni lovin SEDP-ah hian vaibelchhe 30 zirtirtu indaihlohnna phuhruk nan dah a ni a la ti leh ta a. Zirtirtu a kawk deuh ran a, zirtirtu hi kan ngaipawimawh a, ngaihpawimawh tur pawh a ni ang a. Kan zirna quality improvement hi a tul ber lai chu a ni a, zirtirtu chu kan ngah tawk a, a quality dangin training te nge, seminar te nge, school building nge, thil dang tam tak kha ngaihpawimawh turah ka ngai tawh zawk a ni. Kan neih sa hi an tam tawk viau mai a. Tun dinhmunah zirtirtu pakhatin naupang 14 a enkawl a ni a. Kan mamawh zawk chu zirtirtu sem rual hi a ni a. Chu chu a harsa hle a nih ka ring a. Sorkar hmasa kha an beidawng thak i tih teh ang. Mahse, kan beidawn thak avangin sorkar tharte pawh a lo piang a ni. Mipuite pawhin hemi chungchangah hian sorkar tharah zirtirtu

rationalisation chungchangah pawh hian beiseina thar kan nei a ni. Tunah hian Dan tha tak mai Mizoram Education Transfer and Posting of Teachers Rules, 2006 kan nei a. He Rules hi MNF sorkar hmasak laia duan a ni a, a kara sorkar dingten an tipuitling thei lo a. Tunah hemi tipuitling tur hian an lo ding leh angahte pawh a ngaih theihin ka hria a, beiseina sang tak pawh a neih theihin ka hria. Chumi Dana a lan dan chuan zirtirtute hi grade 4-ah a then a, A, B, C, D tiin. Aizawl leh Lunglei amite chu kum 6 an awm thei a, District Headquarters leh National Highway-in a tlawh khuaah kum 4, a dang zawng amite chu kum 3 ti khan rotation in a kal thei a ni. Hi Dan tha tak an lo duan hi a kengkawh turin an lo sorkar remchang lehah te pawh ngai ila a tha awm e.

Tin, ka tarlan leh duh chu Matric result a chhuak a, pawl 12 result te a chhuak a, result kha ngun taka en in sorkar department enkawl, government school kha an result a chhe zar zar a ni. Matric-ah khan Government High Schools-ah hian 60 % a nih laiin Deficit High Schools-ah chuan 91 % te, Aided-ah pawh 63%, private-ah 72 % te Matric result a ni. Engatinge High School zirtirtu nei tha, building nei tha, enkawlna tha dawng zawkah hian result hi a chhiat tlat mai aw tih hi ka ngaihtuah a. Pawl 12 result pawh en ta ila, Government School result kha a chhe zel a ni. Chuvangin heng siam that hi thil harsa lutuk niin a lang lo a. Kan Minister viak tha tak hian a duh ang thalin han enkawl se a tha thei ang tih ka ring a ni. Bell a ri a, hun ka hmang tam vak lo ang a.

A tawp bera ka sawi duh chu Home Department concern-ah hian tukin zing ah khan member zahawm tak Pu Zodintluanga khan a rawn tarlang tawh a. Mizoram leh Assam sorkarin ramri pawm tur chin hi zirchian mek a ni tih a ni a. SEDP booklet-ah hian North East Bengal Frontier Regulation 1873-in a sawi hi sorkar dinna a ni a ti bawk si a, sorkar dinna 2 kha chu a dik lo a ni. Tin, North East Bengal Frontier Regulation hi a awm lo a, Bengal Eastern Frontier Regulation chu a awm a, a hming pawh hi an ti diklo niin ka hria. Engpawh ni se, MNF party-in dinna nghet tak an nei a, party-ah pawh chu chu an reflect a. SEDP chu flagship programme a lo ni tawh a, flagship programme chuan he 1873-in ramri a siam hi a pawm a nih chuan Department-in kan la ngaituah lo tih kha a fel em ni? Chuvangin helai chungchang hi kan Minister hian chiang takin min hrilh se tih ka ngen duh bawk a ni. Ka sawi theih tawk ni se. Ka lawm e, Pu Speaker.

SPEAKER : Dr.Vanlaltanpuia, member zahawm tak kan sawm leh e.

Dr. VANLALTANPUIA : Pu Speaker, ka lawm e. Vawiinah hian kan Minister zahawm tak tak Pu Lalchamliana te, Pu Lalchhandama Ralte te leh Pu T.J Lalnuntluanga te demand sawiho a ni hi lawmawm ka ti a, an rawn pharh hi a lawmawm ka ti a.

Hetah hian kan ram mamawh te leh kan bial mamawh te leh demand te tlem a zawng tal han sawi ka duh a. Pakhatnaah chuan demand 16 -na Home Department demand -ah hian kan hriat theuh angin sorkar liam ta ah khan zu te kan zuar nasa a. Police hmunpuiah te zu kan zawrh chilh a. Kan Police hote hi an fit lo em em hlawm mai a, a thi hma hma te an ni a, chuvangin hei hi kan Minister hian min lo chhinchhiah sak sela. Police fitness check te hi neih fo ni se a tha tawhin ka hria. Kan Police te hi chhuanawm tak, fit nelh nawlh te hi ni se a tha hlein ka hria. Mi ram foreign -ah te kan phak tawka kan han kal ve chang te in kan police te hi an inthlau thei em em mai a. Tha za hmel tak tak te hi an tlem thin a, heng te hi neih ni se tha ka ti khawp mai.

Tin, Haulawng-ah hian Lunglei khawpui luh hma lawkah hian Police check post nei tura tih deuh kha a niin ka hria a, a outpost hi. Hei hi chak takin hma min lak sak se ka duh khawp mai. Tunah hian ruihlo te leh thil hrang hrang check ngai tur, Lunglei khawpui ah te, chhim lama kal tur te lo veng tur atan te hian awm se tha in ka hria a, hei hi min lo hriat sak se thani ka hria a ni.

Tin, Lunglei khawpui tana Fire & Emergency Station din hi 13th Finance Commission-ah khan proposal a awm a. Amaherawhchu hei hi tun tlengin siam a la ni lo a. Fire & Emergency Services Station hi a theih chuan tun tumah hian min ngaithuah sak se kan duh khawp mai. A dawt leh ah chuan Pukpui-ah sawn 1986-a MNF leh India sorkar inremna zulzuiin sipai hmunpui an chhuahsanah khan tunah hian Airforce hote an awm leh nasa hle tawh mai a, establishment ropui tak an din leh tawh a. Hei hi min en sak se ka duh khawp mai a. Land Revenue changtu hnenah pawh hian vawi engemaw zat ka sawi tawh a. Hei hi eng danin nge an awm? Tunah hian enthat ni se ka duh khawp mai a, hei hi min lo en sak turin ka duh a ni.

Demand No.8-na Taxation Department ah hian 1st July 2017 atang khan GST hman a ni a. Goods & Service Tax kan tih kha. Chu chuan entertainment tax te, sales

tax te, entry tax te a rawn subsume a, a rawn thlak vek a. Hetah hian kan state hian hlawkna tur pakhat kan neiin ka hre ve a, chu chu alchohol leh petroleum products-ah tax lak hi min remtih sak. Alchohol hi chu kan bandh ta a, kan la dawn ta lo ngei mai a; zu ah hi chuan zu chhiah chu kan hmu dawn ta lo a. Amaherawhchu petroleum products-ah hian petrol, diesel ah te hian pawisa tlem te te pawh lo la ila, 1 ltr-ah 50 paise pawh ni se kan state tan chuan nasa takin revenue kan hmu theihna tur niin ka hria a. Hei hi khawngaih takin Taxation lam khan min lo hriat sak se tha ka ti khawp mai. Tin, Bill pekna leh chhiah pekna hrang hrang ho hi online-a pek theihna tur tunlaiah awlsam taka mahni awmna hmun atanga bill pek theihna tur dan online portal tha te hi min siam sak se a tha khawpin ka hria a, khalai kha ka han thlen duh a.

A dawt lehah chuan Demand No.30 – na Disaster & Rehabilitation Department demand -ah hian zawhnaah khan ka zawt tawh a, Zotlang Tourist Lodge ah sawn sawlai hmun tlang pum pui saw lei nghet lo em em a ni a, lei thil heuh heuh hi awm reng thin a ni. Sawlaiah sawn lei a khi nasa em em mai a. A tlang pum pui hian a khi emaw tih turin tunah chuan a awm tawh a. Hmanni a ka zawhna Starred Question-a ka pekah khan pawisa dah a awmlo tiin min chhang a. Hei hi he budget hian min address sak se tih ka duh a, Zotlang-a Tourist Lodge leh a chhehvel lei min, lei khi ho hi min en sak sela. Geology lam mithiamte nen pawh en a, mumal taka he kan harsatna hi min en sak turin ka ngen duh a ni. Hetiang deuh chiah hi Mualthuam North- a khelmual tlahniam kha ATL road tibuai thei reng tur kha a awm bawk a, kha pawh kha ₹ 30 lakhs min dah sak rih niin ka hria a. Mahse kha kha chuan engmah tham a ti thei dawn lo a, khang te pawh mumal deuha min rawn en saka min lo duhsak deuh turin ka rawn chah duh bawk a ni.

Tin, kan bial chhungah hian ka sawi fo thin ATL road, Aizawl-Thenzawl-Lunglei road paltlang kan ni a. Helaiah hian kawng bal leh kawng hek te ngaantuah ngai a tam em em a, kha kha bial interest chauh a ni lo a, ram pum huap tana kan inkalpawhna kawngpui busy tak a nih avangin chulai te chu min lo en sak turin vawiinah hian ka thlen duh bawk a ni.

Demand No.20 –na School Education Department demand-ah hian kan Minister- in min lo hriat sak se ka duh thenkhat a awm a. Kan zirna in hi vawiinah chuan zirna in tha tha ho te pawh hi nungchang hre mang lo tak tak te kan ni a.

Tihian sawi ta ila, St.Pauls School bang ho chu Kulikawn-ah an chhuk thla a, bus-a an han chuang chu aia upa te ken nachang hre tawh lo, khatiang kha an tam em em tawh mai a, example ah kan pe mai a ni a. School tha bera kan neih te an lo ni a, henga kan zirlai hote hi nungchang value, Mizo traditional value kan tih te, kan religious value te hrilh an ngai em em tawh mai a. Value oriented education hi nei thei ila tha ka ti khawp mai. Tin, vocational courses kan tih te, hmanlai kan naupan ve laia kan zir thiam, school ah hnang min tah tir ang chi te, eng emaw craft thil min tih tir ang chi hote hi education-ah hian lakluh a tha tak zetin ka hria a ni.

Tin, kan zirna in hi her rem a ngai ka tihna em em pakhat chu job oriented kan tih, hna hmu thei zawnga kan kalpui a hun tawhin ka hria a. India rama zirna in kan en chuan, kan sawi ang khan professional courses tha tak takin an her rem tawh a. IIM kan tih te, IIT kan tih te, NIT kan tih te, NIFT (National Institute of Fashion Technology) kan tih te leh Doctor zirna te, Pilot zirna te, khati khan thil hi a kal deuh vek tawh a. B.A, M.A, siam tlur lam kha a ni lutuk tawhin a lang tawh lo a, kan zirna danah hian. Chuvang chuan hemi tichak thei tur zawnga kan zirna in hi her rem a thain ka hria a. Helaiah hian kan Education Minister zahawm takin lehkha min rawn pek theuh ang in, in MLA fund te pawh 10% hi chu zirna lamah in bial tan min dah sak thei ula a rawn tih hi kei pawhin JEE leh NEET tling ho phei chu ka bial ami hi Laptop ka pe vek dawn che u a ni ka lo ti tawh a. Chungte chu, a lawmawm ka ti a.

A dawt lehah hian kan bial chhungah zirna ti tha thei turin bialtu MLA ka nihna angin ‘aikal lak rem ka ti lo’, ka ti ve ringawt mai a. Mi tam tak phei chuan hei hi MLA te discretion a ni a, anmahnin khatianga ti thei an ni em ni, min ti tawk an awm a. Chu chu kan Minister leh he House zahawm tak hian min lo hriatpu se. Bial chhunga aikal lak rem kan tih lohna te hi min phal sak se ka duh khawp mai tih kha House zahawm tak leh Mizoram mipui mithmuah hian ka sawi chhuak duh a ni.

A dawt lehah chuan Demand No. 28 na LESDE-ah hian Mizoram, Pu Zoramthanga kaihruai sorkar hian bung thar a kai dawn niin kan hria a. Thalai lekhathiamte leh Mizo fate keimahnia Pathian-in theihna a dah, theihna sang tak min lo pek, kan skills nei tura min lo duanna te hi haichhuak turin tunah hian kan bei dawn a. Tuna kan budget-ah khan a high grade, budget punnaah khan a pung tam

ber niin, a pung tam berah min dah niin ka hria a, 40% chuang min puntir a. Hei hi keimah pawh a changtu tur, hemi kawnga hma la ve tu tura min ruatnaah te hian ka lawm em em mai a, kan CM zahawm tak, Finance changtu hnenah pawh lawmthu ka sawi duh a ni. Man-power development hi nasa takin kan la dawn a. Chutah chuan Skills Development Training Centre kan tih ho, nichinah pawh ITI kan tih te, Polytechnic kan tih te hi kan revamp a ngai a, kan enthat a ngai. Chung atan te pawh chuan kan Minister te hian theihtawpa hma min lo lakpui a emaw, khalaiah khan lo thilphal hle turin kan innge duh nghal a ni.

Pu Speaker, minute 1 chiah min pek belh la, demand 2 kha sawi tur ka la nei a. 42-na Transport Department-ah hian kan Minister zahawm tak kaihruaina hnuaiah chhiah rip em em mai, Lifetime Tax te siam that a lo ni hi kan lawm tak zet zet mai a. Hei hi sorkar thar chak tak hma thar lakna niin ka hria a, a lawmawm a. Hetah hian ka sawi duh chu 2 Wheeler Taxi kan tih te hi Aizawl khawpuiah chuan a buaithlak deuh hlek tawh a. Amaherawhchu district dangah te hi chuan heng 2 Wheeler Taxi te hi mi tam takin eizawnna an lo hmuh theihna tur leh mipui remchanna atan rem min tih sak se tih tun tumah hian ka sawi duh bawk a.

Pu Speaker, pakhat chiah min sawi tir teh, Demand No. 36-Environment-ah hian Green House effect te hi a tam tawh si a. Helaiah hian sawi duh pakhat ka neih chu, Lunglei-in tui kan lakna Lunglei Greater Water Supply Scheme Phase-I hi, Tlawng hian Zobawk-ah hnar a nei a. Tawite, Pukpui daiah khuan hemi tui pump na hi a awm a. A tui hi a kangchat nasa em em mai a, chuvangin, kan Minister hian hemi chhehvel ram ngaw humhalhna, tui hna lak theihna tur humhalhna, water catchment area conservation scheme hi min kalpui se ka duh khawp mai tih kha ka sawi duh bawk a ni e. Ka lawm e.

S P E A K E R : I pel thu deuh. Member zahawm tak Pu Lalrindika Ralte a phar hmasa a, chumi zawah Pu K.T.Rokhaw. Member zahawm tak Pu Lalrindika Ralte ka sawm e.

Pu LALRINDIKA RALTE : Pu Speaker, ka lawm e. Vawiina demand kan sawi tur hi a pawimawh hlawm khawp mai a. Amaherawhchu a chhung han luhchhuah erawh chuan sum leh pai hman tur te, sum leh pai dah te helamah hian a tlem deuh, helamah hian engatinge, han tih lai vel hi chu a rawn sawi chhuaktu nih pawh intlahrunawm khawp hian a sum tam zia min hrilh let zek zel mai a.

Chuvangin, kha lam kha chu ka sawi lo ang a, Engemaw, ramin a mamawh te leh bialin a mamawh ang zawngte kha han tihrik ve ka duh a.

Sawi ang khan demand No. 20 – Education hi a pawimawh khawp mai a. Zirtirtute pawh hian an pawimawh zia te min hrilh thin a. Thiamna hi khawiahnge a awm tiin inzawt ta ila. Khawi emaw institution hi chu tuman kan kawh ka ring hran lo va. Chuvangin, keimahniah hian thiamna chu a awm a ni tih lai hi kan hriatchian a thain ka hria. Education-a hma kan lak dawn pawh hian zirlaite pawhin, zirtirtute pawhin hria ila tha ka tih ve chu mihringah hian thiamna chu a awm a. Chu mihringa thiamna awm chu haichhuak turin kan bei tlang a ni tih hi kan hriat a thain ka hria. Chutiangah chuan zirtirtute pawhin kan zirlaite, an thiamna tak tak hmang chhuak thei tura ngaihtuahna an neih theihna tura thil ruahmanpui te a thain ka hria a. Tin, chu kan hriatna hmang chuan keimahni hi kan inbuaipui thei tur a ni tih hi hria ila a tha ka ti. Tu emaw buaipui tur kan ni lo a ni tih hi kan hriat pawh a thain ka hria. Kan hriatna, kan thiamna hmang hian keimahni, kan chhungkua chu kan inchingfel tur a ni tih te pawh hi kan ngaihtuahnaah hian awm se a thain ka hria a. Keimahni kan pawimawhna em em chu institution pakhata lut theuh theuh hi engatinge mihring hi kan inthlauh zung kan tih chuan, mihring pawimawh zia chu chutah chuan a lang nghal a. Chuvang chuan kan zirlaite pawh hian hria se ka duh chu, a pawimawh ber chu kan school kalna a nih rualin keimahni hi kan pawimawh ber a ni tih hi hria ila a thain ka hria a ni.

Tin, thiamna kan tih te hi a chianna chu a awmna a lo rei tawh khawp. Tuna zirlai bua kan zirna ang a awm hma hian khawvelah hian finnate hi a lo kal nasa tawh khawp mai. Chuvang chuan Bible-ah kan hria a, Greek mite pawhin finna an lo zawng daih tawh. Chuvangin, finna hi chu keimahni mihringah hian a awm a ni tih hi chiang taka kan hriat a pawimawhin ka hria, he demand kan sawi rual hian. Shah Jahan te pawh khawi Engineering College-ah nge a kal tih pawh kan hre lem lo. Amaherawhchu, khutiang khuan engvanginnge in ropui tak te an din theih kan tih chuan mihring bawk a ni. Tin, nichinah khan an rawn sawi tawh a. Zirtirtuah hi chuan kan information hmuh hi a dik lo a nih si loh chuan Right to Education Act, 2009-in a phut ang ai hi chuan kan tha hle a ni tih chu a chiang khawp mai. Chuvangin, helaiah hian kan mutan ni zawka lang chu sorkar hnathawk hi, zirtirtute hi, khawiah emaw chuan an buk hle a, khawiah emaw chuan an tlem hle a ni tih hi a chiang reng a ni. Chuvang chuan ram hruaitu tha kan mamawhna a lang dawn chiah

niin ka hria a. A Minister han nih chu ka chak ve ang reng khawp mai a, kei hi nih leh loh hlau miah lo kha ka ni ve ringawt mai a. Chutiang Minister ni tur chuan tuna a changtu Minister hi kan fuih ve teh ang. Ram leh hnamin a thatpui dawn chuan nih loh ngam ve te pawh hi a thain ka hria. Nih rei te hi kan tum lutuk a, America President te pawh hi a ropui viau a, term 2 bak an chelh thei miah lo a. Nih loh hi kan hlau a, kan ni lo dawn tho tho, tih hi kan hriatte pawh a thain ka hria. Chuvangin ram leh hnam tan hian thil tha hi ti mai ang u tih hi ka'n inchah duh bawk a ni. Chutichuan, zirtirtu kan la leh dawn a, kan indaih hle dawn a ni. Am Maherawhchu, hruaituin a hruai ngam loh neihte hi a mak ang reng khawp mai a, ka hrithiam pha chiah lo e. Hruaitu kan nih chuan a hruai te pawh hi kan hruai ve dawn lawm ni tihte pawh hi kan rilruah awm se a thain ka hria a ni. Education-ah chuan kha kha duhtawk mai ila. Taxation Demand no. 8 hi tax hi Mizo mipuite hian kan ngaihsak vak lo, pek hi kan rilruah a awm vak lo tih hi kan sawi thin a, a dikna chin a awm a. Ka rilrua awm ve thin pakhat chu, chhiah pek chungchangah hian Mizo hman tluka ram tana tha leh zung thawh NASA hi kan awm ang em aw tih hi ka ngaihtuah ve thin a. Hnatlang ringawta kan thawh pawh hi a sumin chhut ta ila. Tin, ruihhlo do te kan ti a, sorkar ni lo agency dang hmalakna hi a tam hian ka hria. Ram leh hnam tan hian Mizo tluka thawh hlawk hi India ram hmun dangah hian an awm ang em aw tih hi ka ngaihtuah thin a. Chuvang chuan heng avangte pawh hian tax-te pawh hi, Income-tax phei hi chu kan tang tlat tur a ni tihte ka ngaihtuah mai mai thin.

Kan zin thin a, vai ramah hian vai hnatlang ka hmuh awm pawh hi ka la hre lo reng reng. Chuvangin hengte hi kan tihchhunzawm zel pawh a thain ka hria. Tin, heng avangte pawh hian tax te pawh hi kan pek hreh phah deuh em ni? Sorkar tan hian tha kan thawh hnem avang hian hemi kawngah te pawh hian kan rilru hi kan pe tawk lo deuh em ni tihte ka ngaihtuah deuh thin a. Tin, ka inthiam ang reng khawp a ni tih kha ka sawi tel duh bawk a ni.

Tichuan Demand no 16- Home-ah hian ka sawi duh chu Pu Speaker, sipaite hi min thlamuantu tur, khua leh tuite min thlamuantu tura awm an ni a, a department hi a pawimawh a. Hengah hian ka ngaihpawimawh em em chu sipai kan lak hian physical fitness hi i ngaipawimawh teh ang u tih hi a ni. A chhan chu khawvel hmun dang han hmuh hian eng emaw buaina leh harsatna a han awm hian Police leh mipui innawr a ngaih hian physically pawh hian sipai lam hi chu lian tha tak, thlamuanpuiawm tak, en reng reng pawhin chutiang chu an ni thinin ka hria a. Keini

hi chu kan lak dan hi a fuh tawk lo niin ka hria a. Hengah hian pumraw lian deuhte pawh hi kan duhsak zawng kan la dawn rau rau a nih pawhin, chuti zawng deuh ngaihtuahnate chu nei thei ila a tha khawpin ka ring.

Chutihlaia ka han sawi tel lawk duh chu, kan bial lam khu keimahni bial bik interest pawh ni chuang lo in, kan ram pum atan Tripura leh Assam inrina bulah khuan kan awm a. Helte pawh hi khulai velah khuan an vei tawn ve reng a, chuvang chuan khulai Assam leh Tripura inrina bul khung Kanhmun, khulaiah chuan Medali lei kan ti mai a, khumi bulah te khuan Checkpoint-te hi awm thei se kan duh khawp mai a. Khulai khu a pawimawh ve hle a ni tih pawh min hriat sak se a thain ka hria.

Tin, kan sawi thin tawh angin Kanhmun-ah khuan Inspector a awm lo a, a post-ah chuan Inspector post niin ka hria a, eng emaw buaina a thlen deuh hian harsatna kan tawk thin a. Hengte pawh hi Minister hian min hriat sak se ka duh bawk a ni.

A tawp berah chuan Pu Speaker, Demand no. 36- Environment, Forests & Climate Change tih hi a pawimawh khawpin ka hria a. Rawtna pakhat han siam ve ka duh a, Minister khan min ngaihpawimawh sak ang chu maw, rawtna ka'n siam ve teh ang. Kan report tam taka a lan dan hian kan Forests dinhmun hi a cover te hi a zau viau anga a lan lai hian ramngaw tak tak hi chu a tam tawk lo niin a hriat a, 28.42% vel hi Forest dik takin a cover anga chhut a ni. Chuvang chuan ramte a lum a, kumin pawh a lum chho viau a, a lumna chhan hi chu kan mawh ni chuang lo in a Minister kha. Amaherawhchu, heng avangte hian ramngaw, afforestation zawng hian hma kan lak a pawimawhin ka hria a. Chuvang chuan ramngaw siam thar turin hma min lak sak thei se tih kha rawtna angin ka rawn siam duh bawk a ni e. Ka lawm e.

SPEAKER : Member zahawm tak Pu K.T. Rokhaw. Chumi zawahah Pu B.D. Chakma

PU K. T. ROKHAW : Pu Speaker, ka lawm e. Demand no. 20-na School Education hi ka han sawi hmasa ang a. Kan Minister hi MZP-ah pawh President lo ni tawh, zirlaite harsatna hrethiam em em vawiinah School Education Minister a lo ni hi a lawmawm ka ti a, a demand kan sawi tur pawh hi a phurawm viauin ka hria.

Pu Speaker, ka bial lam ka han sawi phawt ang a, Tuipang Centenary Hr. Sec. School kan din hi, Palak Constituency-ah hian khaw 40 chuang a awm a, chutah chuan Hr. Sec. School kan neih awmchhun a ni a. Tunah hian lump sum-in kum khatah nuai 3 min pe a, hei hian a daihlo em em mai a. Chuvang chuan kan Minister zahawm tak hnena ka ngen duh chu adhoc grant-in-aid status-a min hlangkai turin ka ngen a ni. A chhan chu school building-ah hian school naupangte tunah hian an leng lo a. Tin, school teacher ten office pawh an nei lo a, school building-ah an awm ve mai a.

Minister-in min ngen ang khan a office turte hi chu MLA fund atangte in theihtawp kan lo chhuah ve ang a. Kan Minister-in min ngaipawimawh a, min pek tura ka ngen erawh chu adhoc grant-in-aid status-a min hlangkai turin a ni e tih ka sawi duh a.

Tin, Govt. Hr. Sec. School, Siaha hi teacher an indaihlo em em mai a. Tunah hian heng subject Geography te, Economics te, Political Science te, Mizo te, Mathematics-ah te hian teachers an indaihlo em em mai a ni. Chuvang chuan he subject 5-ah hian teacher 1 theuh min pe leh turin ka ngen duh bawk a ni.

Tin, ka bialah hian Govt. High School, a bik takin Govt. High School, Zawngling te, Govt. High School, Chakhang te, Govt. High School, Serkawr te, Phura High School te, Tawngkawlong High School te an la awm a. Heng High School-te hi Headmaster nei lo deuh vek an ni a, Headmaster an nei lo a. Tin, school teacher nei tam zawk ho chu 3 an ni a, a thenin 2 an nei a, a then chuan 1 chauh an nei a ni. Chuvang chuan kan Minister zahawm tak hian heng school zirtirtu tur hi a pawimawh anga min pe tur leh Science teacher phei chu kan nei lo vek tluk a ni. Matric-a school naupangte hi ti tha tur, pass tha tur chuan, teacher an awm tlat loh chuan tih that ngaihna a awm lo a ni tih ka sawi duh a. Chuvang chuan, kan Minister zahawm tak hian a tul angin khawngaih taka teacher te min pe turin ka ngen a ni.

Tin, Pu Speaker, a bik takin tuna Primary leh Middle School teacher 946 lak tur chungchangah hian han sawi ka duh kawp mai a. Kan Minister khan a hma pawhin a sawi tawh a, heng teacher kan lak tur hi MPSC kaltlanga lak tur a ni dawn lo ti zawng khan a sawiin ka hria a. Hei hi ka lo ngaipawimawh ve khawp mai a. Keini a bik takin Congress sorkar lai khan keini chu term hmasa khan hetah kan thu ve thei lova. Congress a sorkar chhung, 2013 atanga 2018 khan Primary leh Middle

teacher te hi 468 kan la a ni. Khang Primary leh Middle Teacher te kha khatih laia kan hotute Pu Lal Thanhawla te hnenah an kal a, engpawhnise tun tum teacher lak turah hi chuan kan mi leh sa te hi chu min duh sak ve tur a ni tiin theihtawp in kan nawr a ni. Chuta kan Chief Minister Pu Lal Thanhawla thusawi kha vawiinah hian ka beng ah a la cham reng a ni. Pu Hawla chuan ‘vawiina Primary teacher te, Middle teacher te, naupang zirtirtute hi an pawimawh lutuk, Mizoram future te chu tuna zirlai te hi an ni a. Chumi te zirtirtu tur chu mithiam tak an ngai a. quality nei tha tak an ngai a ni. Chumi avang chuan MPSC through-in kan la dawn a ni,’ a ti tlat mai a ni.

Chuvang chuan party atangin pakhatmah kan sawi pui thei lo. MPSC atangin an la vek, tuna 468 hi MPSC through veka lak an ni. Mithiam tak tak vek an ni. Chumi avang chuan vawiina 946 lak tur hi kan Minister zahawm tak hi MZP President te pawh a lo ni tawh, zirlaite harsatna hrethiam em em a ni a. Kan chhuang hle a ni. Keini te nen pawh MZP-a lo thawkho hrep tawh kan ni. Chuvang chuan Right to Education Act, 2009-in a phut ang leh Recruitment Rules awm sa Primary School leh Middle School teacher lak thar tur reng reng chu Mizoram Teacher Eligibility Test an paltlang tur a ni tih a ni a. Chuvang chuan Teacher Eligibility Test paltlang tawh atang hian kan Minister zahawm tak hian school teacher te hi chu min lak sak thei se tih hi ka rawn ngen a ni.

Mizoram Teacher Eligibility paltlang tawh hi thalai 4109 an awm in ka hria. Chumi atang chuan Primary school teacher leh Middle school teacher 946 lak tur te hi khawngaihtakin min lak sak thei se tih ka rawn ngen a ni. Chuvang chuan heng teacher lak tur te hi hnawl an nih chuan kan Mizoram sorkar hian zirna ngaihpawimawh vang ni lovin an party mi leh sa leh an duhsak zawng te thun an duh vanga la angin Mizo mipuite hian an ngai ang a. Tin, keini pawhin chu chu kan ngaihdan a ni ang. Chuvang chuan he sorkar hian Mizoram future a ngaihtuah tak tak a nih chuan Mizoram Teacher Eligibility Test paltlang tawh atang hian min lak hram rawh se tih ka rawn ngen duh a ni.

Pu Speaker, demand no.16 Home-ah hian rawn sawi leh duh ka nei a. Ka bial Palak bial hi Burma border-a awm a ni a, international border a ni a. Chuvangin ruihtheih thil chitin lo luhna hmun a ni a. Tin, ranvulh a bik takin sial te, lawi te, vawk te, bawng te, ar te, kel te lo luhna hmun a ni. Tunah hian Police Outpost hi

Tuipang-ah pakhat a awm a. Khawthlang lamah Phura ah a awm bawk a. Khawchhak lam kan nei lo a ni. Congress sorkar khan khawchhak lam Chakhang-ah Police Outpost dah a tum a.

Khatih hun laia Siaha SP pawh vawi 2 vawi 3 lai Chakhang-ah a rawn kal a, a hmun te pawh en vek tawh a ni a. VC leh NGO te nen pawh en vek tawh a ni a, an lo dah mai dawn emaw kan ti a. Mahse an lo dah hman ta lova. Chuvang chuan tuna kan Home Minister chak tak hian khawngaih takin Palak bial Chakhang-ah hian Police Outpost hi min lo dah sak hram turin hi ka rawn ngen duh bawk a ni.

Tin, Siaha SP office hi a hlui tawh lutuk a, tunah hian a tlabal nasa tawh lutuk, UT hun laia sak kha a ni a. Khawngaihtakin kan Minister zahawm tak hian Mizoram a SP office sak thar tur te zingah hian min sak that sak ve se tih hi ka rawn ngen duh a ni. Tih tak emah chuan Siaha-ah a hma in district 3 kan nei a, Aizawl district, Lunglei district, Chhimtuipui district tih a ni. Siaha hi Chhimtuipui district headquarter a ni a.

Khami lai UT hun laia SP office hi sak a ni a. Tunah hian tlangah a awm si a, fur a lo ni leh dawn a. Fur a lo niha thli a lo tleh te hian awm ngamna chi a ni lo, kan police te khi silai leh ralthuam nen thuam tha eng ang mah ila, cyclone te chu silaia do chi a ni lo. Silaiin kap mah ila a reh thei chuang reng reng lo, Pu Speaker. Chuvang chuan Siaha SP office khi khawngaih taka min lo sak that sak turin kan Minister zahawm tak hi ka ngen duh a ni. Pu Speaker, Police quarter zawng zawng pawh khi Siaha-ah chuan UT hunlai ami vek kha a ni a, khi pawh khi ka rawn ngen duh bawk a ni.

Pu Speaker, demand no.42 hi kan sawi leh lawk ang a, Transport Department hi. Ka bialah hian mini bus hi a service na tur, Siaha atanga Chakhang khi a service thei a, PMGSY kawng laih vek tawh a ni a. Chu kawng chhawrtu turte chu Niawhtlang te, Lungbun te, Chhuarlung te, Ainat leh Siata te an ni ta a. Khilai khi mini bus service turin Transport Minister zahawm tak hian min han siam sak thei se kan lawm khawp ang. Tin, Siaha to Phurra pawh hi mini bus a service thei a. Kawlchaw lam chu BRTF-in kawng an laih mek avangin Tuipang, Zawngling, Khopai, Ahmypi, Laki, Vahai, Kaisih leh Phura a ni leh dawn a. Hetah hian mini bus khawngaih takin min service sak thei sela a lawmawm khawp ang. Pu Speaker, ka lawm e.

SPEAKER : Dr. BD. Chakma, member zahawm tak i lo sawm ang.

Pu B.D. CHAKMA : Pu Speaker, ka lawm e. Vawiin chu department 10 vel a awm a. Minute 10 chhung kan sawi chuan department tinah minute 1 theuh hun a awm dawn tihna a ni a. Engpawh ni se, Demand no.8-na Taxation chungchang sawi ka duh a. Tax lak tur hi give and take policy a ni a. Service provider leh tax payer hi kalkawng a that loh chuan tax lak a har em em a ni. Chuvangin service provider angin government lam atangin tunah service holder atangin revenue a lak bak kha chu tax lak a lian ber pahnih te zinga pakhat a ni a. Keima bial chhungah a bik takin Chawngte lamah hemi chungchang hi sawiselna a nasa lutuk a. Electric pawh hi department-ah ka la sawi ang a, electric hi a eng tha lo khawp mai a. Bill lak dawnah chauh current a awm tha a, engatinge current a va awm tha ve kan tih chuan tax lak a hun dawn tihna a ni ber a Pu Speaker. Current hi awm tha zel thei se ka duh khawp mai.

Tui lamah pawh vawi tam tak he House zahawm tak ah hian ka sawi tawh a. Chawngte area hi a bik takin tui pawh a harsa lutuk a. Thal ah hian tui nikhatah vawikhat lak pawh hi a harsa lutuk a. Thla tin kan tax, monthly tax chawi tur kha chu ₹200 niin a lang a. Chuvangin thla khata vawikhatmah tui la lo a ₹200 chawi kha a harsa a. Chuvangin hemi chungchangah hian service provider nihna angin sorkar atang pawh hian he thil hi pawimawhin ka hria a.

Tin, Demand No.16, Home chungchang a ni a. Home-ah pawh district tin ah ka hriat dan chuan building & infrastructure hi a hlui viau a, a bik takin Police quarters te. Ka bial Vaseitlang, Chawngte leh Borapansury khaw pathumah te hian police station a awm a. Ka bial chhungah khaw 83 ka nei a. Heng khaw 83 enkawl tur hian police outpost 3 chiah a awm a. Heng building hi a chhe lutuk a, luah loh a ni a quarters thenkhat hi chu. Chuvangin khangte kha khawngaihin kan Home Minister zahawm takin min ensak thei se.

Tin, vehicle chungchangah pawh buaina tam tak a awm thin a. Thil tha lo deuh emaw, thil diklo deuh a awm a police te kan koh pawhin, FIR kan thehluh pawhin harsatna pakhat chu vehicle problem a ni a. Bike pawh a awmlo a, Gypsy pawh a awmlo a, kan kal thei tlat lo tiin police official ten min chhang thin a. Chuvangin heng Outpost 3-ah hian Gypsy 1 theuh tal dah theih ni se. Chawngte-ah chuan a awmin ka hria a, mahse hman tlak loh, auction tura tih emaw in an dah a.

Chuvangin Gypsy a nih loh pawhin, Longpuighat-ah leh Borapansury-ah bike tal chu dah thei se a tha khawpin ka ring. Ka bial chhunga khaw 2 Rasmondal leh Montola hman atangin hei hi chu ka nawr nasa a, Borapansury outpost hnuaih awm an ni a. Borapansury atangin heng khaw 2 hi a hla lutuk a, Chawngte lam a hnaih zawk avangin Chawngte Outpost hnuaih min dah sak turin ka ngen duh a ni.

Tin, Demand No.30 ah ka lut ang a, Disaster Management & Rehabilitation chungchangah. Thil pawimawh tak pakhat chu silpaulin chungchang a ni a. Tunah he thil hi court-ah a awm avangin engmah sem chhuah theih loh tiin department lam atangin an sawi a. Mahse zing thawh veleh atangin mipui ten silpaulin min rawn dil a, a awmloh thu in ka chhang thin a ni. Chuvangin court a awm pawh ni se, ‘where there is a will, there is a way and necessity knows no law’ tiin sap ho pawhin an sawi thin a. Tunah chuan silpaulin sem hun tak tak tawh a ni a, ruah a sur tam tawh si a. Chuvangin court-ah a awm a nih pawhin kawng dang zawn chhuah tur a awm em tih hi ka zawt duh a ni.

Pu Speaker, silpaulin hi a pawimawh lutuk a mirethei te tan phei chuan. Chuvangin court-ah a awm a nih pawhin kawng dang kan ngaihtuah sak a ngai a ni. Chu chu DM&R Minister zahawm takin min hriat sak thei se.

Tin, Chawngte area bik hi chu Tuichawng lui dungah a awm avangin kum tin tuilian avang hian soil erosion a awm thin a, Chawngte ‘P’, Chawngte ‘L’ leh Chawngte ‘C’khaw 3 ah te hian. Chuvangin soil erosion hi a awm tawh loh nan project lianpui hi 1 kan mamawh a. DM&R lam hian min ngaihtuah sak se, duh leh DM&R Ministry lam atangin officer leh engineer thiam tak tak te a hmunah kalin en thei se. Pu Speaker, soil erosion hi kumtin a tam lutuk a, in pawh a tichhe hnem a Chawngte area ah hian. Chuvangin project thar 1 hi min lo ngaihtuah sak thei se.

School Education chungchangah tlem sawi belh ka duh deuh a. Chawngte-a Kamalanagar Higher Secondary School hi a dinna a rei tawh a. Arts chauh zir theih niin Science leh Commerce hawn theih dan hi a awm em tih ka zawt duh a. Hmana chhan tawhnaah chuan hawng thei lo, man power a awmlo a, geographical location pawh a diklo tiin an chhang a Department lam atangin. Mirethei te tan Lunglei emaw, Aizawl emaw kal hi a harsa si a, chuvangin pawl 12 thleng chu Science leh Commerce hi Chawngte lamah zir theih se a tha khawp in ka ring a. Hei pawh hi School Education Minister zahawm takin min en sak thei se.

Tin, Borapansury-a Parva High School-ah pawh zirtirtu hi an indaihlo nasa khawp mai a. Pension tawh te post fill-up miah lohin a awm tawp a ni a. Nichin lawkah member zahawm tak Pu Rokhaw sawi angin Primary leh Middle zirtirtu 900 aia tam lak tur a awm a, mahse ka ngaihdan ah chuan High School hi a ngaihpawimawh awm zawkin ka hria a. Pawl 8, pawl 9 leh pawl 10-ah hian education base hi kan siam that loh chuan a buaithlak dawn lutuk a. Chuvangin Primary leh Middle zirtirtu rualin High School zirtirtu hi ngaipawimawh ila a thain kan hria, Pu Speaker.

Tin, zirtirtu pakhat, Pu (Sakib) Ranjan Chakma, Kamalanagar High School atangin, Pu Speaker, i bial hluiyah kum 5 dawn a awm tawh a, Chawngte-ah lo sawn thei se tih ka ngen duh a, Headmaster thin a ni a. Chawngtlai-ah a la awm a, min lo sawn sak thei se ka lawm khawp ang.

Tin, Demand No.28, (hun hi a kal chak lutuk Pu Speaker) Labour, Employment, Skill Development & Entrepreneurship. He department hi a pawimawh lutuk a, unemployment solve nan he department hian responsibility an nei sang hle a. Mahse budget allocation hi ka duh ang a ni thei tlat lo. SEDP hnuaiia ₹5 crores chauh an dah kha chu a tawk ang em tih ngaihtuahna ka nei a. Chuvangin Labour, Employment, Skill Development & Entrepreneurship development atan sum hi dah tam theih ni se.

Tin, Printing & Stationery, Demand No.18 hi tlem ka sawi duh a. Hmanah khan Minister zahawm takin a chhan tawh angin department tam takin an dawr ngailo. Kha kha eng vang nge? Stationary Department atangin stationary lak tur, kha thil kha eng vang nge, quality hi a chhia nge, department-in a dawr duh lo nge chu kan hre lo a. Hei hi chu chhiah lak nan government pawisa hi government bawmah awm thei tur a ni a, hei hi chu department tin ten dawr ngei turin ka ngen duh a ni. Pu Speaker, chuvangin hei pawh hi concerned Minister zahawm takin uluk deuhin en thei se.

Tin, Demand No. 36 Environment, Forest & Climate Change chungchangah pawh kum tin uar takin keini World Environment Day, 5th June leh Green Mizoram Day, 11th June hi kan lo hmang ve thin a. Mahse hei hi ni khat chauh hman hi a duh tawk em ni ka ti thin a. Tunah khawvel hi a lum zel avangin buaina tam tak a thleng tawh a, global warming vangin climate change pawh a awm nual a ni. Chuvangin ni

khat chauh hmang lovin hun lo kal zelah monsoon season-ah pawl hrang hrangin zirtirtu emaw, zirlai pawl emaw department hrang hrangin hma la thei se, pawisa pawh hi concerned department ah refreshment atan hmang ve rawh u tih ang zawngin fund allotment te pawh awm thei se. Nasa taka road side plantation emaw tih theih dan te ngaihtuah thei se a lawmawm khawp ang Pu Speaker.

Tin, Demand No. 42 a tawp ber hi chu thil thar pawh a ni mai thei a, thil pawimawh ber pawh a ni mai thei Pu Speaker, chuvangin khawngaihin hun min pe thei la (SPEAKER : Dar 1 hi chawlh tho tho a ni a, dar 1 chiah chiahah zo ang che aw.) Pu Speaker, ka lawm e. Sumo, bus, taxi leh autorickshaw permit lak a har em em mai a, Aizawlah hian pawi kan ti miah lo motor a tam si a, traffic a jam nasa lutuk si a. Mahse disctrict dangah a bik takin Lawngtlai lamah hian duh angin a chhuak thei lo, enge a chhan? A bik takin Chawngte area lamah pawh tunah autorickshaw eng emaw zat hi permit nei miah lovin an tlan tawp a ni Pu Speaker. Chuvangin, autorickshaw permit tal chu duh duh hunah lak theih dan kan thalailte tan eizawnna pawh kawng tha sorkar hna pek theih loh laia taxi emaw, autorickshaw emaw tal chu an khah theih dan hi awm thei se, duh duh hunah permit an lak theih chuan a tha khawp ang ka ring, Pu Speaker.

Tin, chu mai bakah (SPEAKER : Duh tawk ang aw, chawlha hun tawh tlat mai). Pu Speaker, minute 1 a la awm a, bus service chungchangah Chawngte-Lunglei, Chawngte-Lawngtlai hi min en sak thei se. Very short-in ka lo ti ang. Tin, a tawp ber atan Pu Speaker, motor tlan dan chungchang hi kan ngaipawimawh khawpin ka hria a, tun thlengin kan professional driver, public transport khalantu sumo emaw, taxi emaw kan check ngai lo hrim hrim a, accident a awm loh chuan kan check ngai lo driving license hi. Chuvangin sumo emaw, bus emaw, taxi emaw at least 5 years experience an neih loh chuan an khah miah lo tur a ni Pu Speaker. (SPEAKER : Hun i pel lo ang aw.) Pu Speaker, hun min pek belh avangin i chungah lawmthu ka sawi e Pu Speaker, ka lawm e.

SPEAKER : Kan chawl ang a dar 2-ah kan tan leh dawn nia.

RECESS TILL 2:00 PM

2:00 PM

S P E A K E R : Tunge sawi tan leh ang? Member zahawm tak Pu Zothantluanga kha nichin khan a phar a, a phar zawm em? Pu Zira ka sawm mai dawn. Ani hi nichinah a phar tawh a ni. Member zahawm tak Lalzirliana ka sawm e.

Er. H. LALZIRLIANA : Pu Speaker, ka lawm e. Vawiinah Minister pathumte demand Department 10, a zavaein vaibelchhe 2,481 kan sawiho dawn a, hun a tawi a, rang deuhin fiah siin ka ngaih pawimawh zual han sawi ve ka duh a ni. A zawng zawng chuan sawi a rem lovang a.

Ka sawi hmasak ber duh chu Transport Department a ni a, Budget-ah a zavaein 50 crores a awm a. Ka sawi duhte chu Mizoram-ah Transport Department kan nei a, tunah hian MST bus 36 an nei a, neih belh leh tur te pawhin hma an la a, a tha em em a. Mizoram hmun hrang hrangah a tlan a, amaherawhchu, vanduaithlak takin tunah hian ka bial chhungah pakhatmah a tlan ve lo a ni. Hei hi kan Minister pawhin min lo note sak se ka duh khawp mai.

Tin, kan transport system hi improve a ngai hlein ka hria a. Tunah hian liabilities ang deuhin kan nei a, he liabilities hi revenue earners-ah engtinngé kan convert ang tih hi a pawimawh lai niin ka hria a. State hrang hrangah North-east-ah te pawh a ni a, corporate system-in an kalpui deuh vek a ni. KSRTC, Karnataka state te, Maharashtra te, West Bengal te, Assam leh Meghalaya thlengin Meghalaya Transport Corporation a awm a. Corporate system hian kalpui ta ila, vawiina ba kan neih liabilities hi revenue earner tha takah kan chantir thei lawm ni aw tih ngaihdan ka nei a ni.

Road Transport mai piah lamah Transport Department-in a kaihhnawih theih Inland Waterways Transport te pawh hi Mizoram-ah hian lui tam tak pawh kan nei ve a, hengte hi hman tangkai theih ni ta se. India ramah hian Inland Waterways Authority of India, Ministry of Shipping hnuaiah October ni 27, 1986 khan din a ni tawh a, Noida-ah headquarter an nei a ni. Road Transport mai piahlam-ah hian kan Waterways Transport-te hi han develop thei ila, chu chuan nasa takin kan economy leh transport system hi a improve

theihin ka ring a. Chu chu earner-ah pawh kan hmang thei a. Goods transport nan leh passenger transport nan te pawh, a bik takin entirnan khutilai Dapchhuah Tut khu Bairabi-ah a pawh a, Bairabi nena an inkar ah hian lawng kal theih lohna suar chhia hi tam tak a awm lo, 5/6 vel bak a awm lo. Chungte chu han bomb chhiain lui kuang mumal tak han nei ila chuan a fur a thalin tuiah lawng, passenger phurte leh bungraw phur-te pawh a kal thei ang a, chu chuan kuthnathawka eizawng lui kam leitha atanga thlai tharte leh passenger goods thlengin, vai rama kan lakluhte pawh awlsam zawkin road transport mai piah lamah pawh kan hmang tangkai thei dawn a ni.

Tin, heng public transport system hi a pawimawh khawp mai a. State lianah chuan office-a kal zawng zawng hian motor an hawl chhuak vek lova, public transport system a that em avangin motor hawl chhuah vek ngai lovin office-te an kal thin a ni. A bik takin kan Aizawl khawpuiah te pawh traffic problem a nasa em mai a, hengah te hian public transport mumal tak nei ila chuan, office hour-a kan zi luih luih leh kal hleihtheih loh te pawh hi a ziaawm theih ka ring a ni. Heng inter-Village atana kan hman Sumo te leh Bazar Bus te pawh hi mumal taka enkawlin, corporate hnuaiah chuan awm se, nasa takin hma sawn nan kan hmang theiin ka ring a ni.

Tin, Taxation Department-ah hian han sawi ve hram ka duh chu nichin khan an rawn sawi nual tawh a. Kan revenue earn-na pawimawh tak a ni a, a bik takin petroleum product-ah hian July, 2017 khan GST introduce a ni a. Chung zingah chuan petrol leh diesel hi GST product-ah an la telh lova, state-in an duh anga an tih theih turin state subject-ah a la awm a ni. Tunah hian khulai Bagha, Silchar Assam area leh Mizoram area Vairengte-ah petrol leh diesel litre a inthlauhna hi ₹ 3.30/- a ni a, diesel-ah hian ₹ 2.93 a ni a, chu chu 32.6% leh 20% a ni. Hei hian nasa takin adulteration chungchangah pawh effect a nei a. Khutilaia Petrol Pump run tu tam tak hi Maruari an ni a, hmun tinah Petrol Pump an nei a, chutiang chuan product an uplift in, a price hniamin state quota ten an uplift a. Amaherawhchu, an dispose-na chu state dangah te a ni thin a ni. Chu chuan adulteration chungchangah te pawh nasa takin kawngro a su a. Chuvangin, mipuite burden

tlem chu a awm ngei ang. ₹ 1.00 lek pawh-in he a gap hi han reduce ta ila, kan revenue earn-na tur tha tak a ni dawn a ni tih ka sawi lang duh a.

Mizoramah hian wealth tax te hi kan la lo niin ka hria a. Tin, professional tax te pawh hi lak a hun hle lawm ni tihte pawh hi rilruah a awm a. Vairamah kan awm thin a, income tax kan pe thin a ni. Keini ringawt pawh hian kum khatah nuai nga, nuai ruk te income tax kan pe thin a. Income tax leh tax dang pek hrim hrim hian neitu nihna rilru min pe a ni. Mizoram-ah pawh kan mihausate leh sorkar hnathawk liante hian tlem a zawng tax pek te hi hreh lo ta ila, chu chuan mipuiah pawh zirtirna tha tak a neih mai piah lamah, kan state intodelhlo tak pawh hi hmasawn zawngin kan kal theih ka beisei deuh a ni.

Tin, Mining lamah hian stone quarry-te hi Mizoram-a kan hmuh chu kawngsir hi a ni mai a, hei hi disaster chungchangah hian a pawimawh hlein ka hria a. Leimin leh thil tam tak hi man made disaster a nihna chen a awm tlat mai a, chuvang chuan, kan quarry neihte pawh hi mumal zawka regularize a, royalty te mumal zawka lak leh, a nihna tur ang deuh takin quarry neihna tur chu kawngpui atangin a approach-na tur kawng pawh an insiam tur a ni. A thei thei leh a hman hmanin kawng chung lama lung kan la leh ringawt thin hian harsatna tam tak min thlen a ni tih ka sawi tel duh bawk a ni.

Tin, Forest chungchangah hian Mizoramah hian sanctuary 8 kan nei ve a, National Park 2 – Murlen leh Phawngpui kan nei a. Sanctuary kan tiho chu Dampa, Khawnglung, Lengteng, Ngengpui, Pualrang, Tawi, Thorang Tlang, Tawkalaw te hi an ni a. Hetah hian a area cover sang lawrlak chu Dampa sanctuary, Mamit District ami a ni. 500 sq.km. a ni a, a dawttu hi Tawkalaw a ni a, 250 sq.km area a cover ve a. Khu khu a nih tur ang leh a tangkai tur ang hian kan la hmang tangkailo niin ka hria a. Dampa sanctuary hi Mizoramah chuan sakei awmna sanctuary awmchhun ni te pawhin an sawi a ni. Forest tha tak a awm a. Teirei khu hun hmasa lamah khan hming thlak deuhte a awm an ti a, Hruaitluang ti te pawhin an lo thlak a, Gazette notice te pawh lo chhuak hial tawh niin ka hria. Mahse, a mipuite leh Mizoram mipui hian Teirei hi kan hriathiam dan a ni a. Khu khu an hmunpui a ni a, Dampa sanctuary hi a nihna ang taka tourist attraction-ahte pawh hman a, tun aia nasa zawka thuam a pawimawh hlein ka hria a ni.

Tin, tunlaiah hmun tina kan buaina chu tui hi a ni. Forest neih thata thing phun a tha em em a, thing phun a that rual rual hian kan thing neih chhunte conserve hi kan tih tur a ni dawn lawm ni? Hei hi nasa zawkin, mumal zawkin kalpui ila a va tha lehzual zawk dawn em tihte ka ngaihtuah a.

Tin, Education lamah hian tlem sawi hram ka duh a, Pu Speaker. Mamit chu aspirational district tih kan ni a, Mizoram nei pha awm chhun kan ni. District dang zawng zawng hian min tluklohra a ni ve thung a, aspirational district kan ni pha a. Aspirational district ni tur hian qualification, criteria hrang hrang a awm a, chung zinga pawimawh em em zing chu education hi a ni. Tuna kan education system hi tlem chuan improve a ngai deuh emaw ni aw tih rilruah a awm ve a. Sikul tam tak mai zirtirtu awm mumal lo ang-te hi engtinne kan tih zel ang? Kan la zel mai dawn nge tih te, zirtirtu tam zawk, naupang tlem zawk tihte pawh hi khawpuiah chuan a awm an ti a ni. Hengte pawh hi huaisen takin kan sorkar hian amalgamation han ti tlang hrawk ngam sela kan tangkaipui awm mang e aw tih ka ngaihtuah a. Transfer system hi tunlai a runpui laite a ni a, ka bial chhunga rawn transfer luh dil ngat hi pakhat chiah ka la tawk a, chu pawh chu chhungkaw lam harsatna vang a ni a. A dil zawng zawng hi ka bial atanga chhuah duh vek an ni a, engemaw zat chu kan chhuah tir tawh bawk a. Chuvang chuan a bik takin ka bial, aspirational district tih hi kan Minister chak tak hian a bik deuh pawhin min ngaihven deuh se tih ka request a ni. Chu chu ka sawi theih tawk ni sela, ka lawm e.

S P E A K E R : Dr. Z.R. Thiamsanga i sawm ang.

Dr. ZR. THIAMSANGA : Pu Speaker, ka lawm e. Vawiinah hian kan Minister pathumte demand kan sawiho a, kan sawi tam tawh khawp mai a. Education hi department pawimawh berte zing ami a ni a, kan ram kan hnam kan dam chhuahna tur chu education hi a ni. Education system a that chuan kan hnam hi kan boral thei dawnlo tih a chiang a. Tunhma khan zirtirtute kan zah em em thin a, vawiin thleng hian kan zirtirtute pawh hi kan la zah a ni. An zahawm bawk a, thingtlangah phei chuan ‘hotupa’ kan ti thin a ni. Khatiang khawp khan thingtlangah chuan kohhranah hruaitu, NGO-ah pawh hruaitu niin, zirtirtute hi kan hruaitu berte zing ami an ni thin a. Amaherawhchu, tun hnuah hi chuan tha tak tak mi tam tak an awm laiin, a then erawh chu an inthlahdah deuh hlek niin a lang ta a, hei hi a pawi khawpin ka hria. Tunah hian Head Teacher te pawh hmuh loh tun kum 10 chhung

kan han ni te kha a pawi khawpin ka hria a. Head Teacher awm ve si, a tak ram hmuh tur awmlo te. Tin, sikul awm ve si, zirtirtu awm lohna engemaw zat kan neite kha, tun kum 10 chhung kha a lungchhiathlak khawpin ka hria. Tunah hian Minister chak tak, hma thlir nei tak, zirlai a nih lai pawha hruiatu ni thin kan nei ta hi a lawmawm a. System thar, ruangam thar a rawn chhuakchho dawn a, tichuan, hun reilote chhungin zirtirtu hlawh rei tak la lo ten an la a, Headmaster pawh engemaw zat kan han la a, zirtirtute pawh engemaw zat kan han lak belh theite kha a ropui a. Ka bial Selam khua, Primary School zirtirtu nghet nei ngai reng renglo kha zirtirtu min pe a, ka bial chhungah pathum pali min pe hi a lawmawm khawp mai. Thinglang hmangaihtu Minister kan nei hi a chhuanawmin a lawmawm hle a ni.

Chutih rual erawh chuan tih tur tam tak kan la neiin ka hria a. Kan sikul zawng zawng tih mai tur hi tunah hian luah tlak loh tam tak sak that tur a la awm a, entirnan, ka bialah pawh (tam tak a la awm a) Tualpui Middle School te, Neihdawn Middle School te, Ngur Middle School te pawh khi a bik taka min rawn hriat ka duh khawp mai.

Tin, lawmawm em em chu kan Education Minister leh Education lama kan hotuten tan an la a, thinglangah computer neilote pawhin kan han nei ta te, green board pawh kan la nei dawn a, kan khua/ka bialte chu an lawm khawp mai a, a lawmawm khawpin ka hria. Tunah hian tan an la nasa a, SSA lam amite, RMSA lama kan hotute, Education Department mite pawh, hma kan la chho va. Zirtirtute pawh a hma khan kan hria a, Congress hun lai khan MPSC kaltlangin tha tak mi 400 chuang an la a, a lawmawm khawp mai. Amaherawhchu kan hriat angin MPSC lam hi an indaihlo va, kuminah pawh schedule a khat vek tawh a. Chuvangin, thinglangah zirtirtu indaihloh a na si a, tuna kan Education Minister-in zirtirtu 946 MR lakna tur Dan a ruahmannaah a khaw mi ngei kan ti ngam te hi a ropui a ni. Zirtirtu MPSC kaltlanga kan lak avang khan kan education system pawh kha rawn danglam viau awm tak chu a ni si a. Amaherawhchu, kum 10 chhung khan sorkar hmasa chuan theihtawp chu a chhuah a, MPSC kaltlanga kan lakte pawh hi an tha ber em tih pawh hi ngaihtuah a ngai a. Tuna kan lak turte pawh hi qualified kan la dawn an ti a, qualified ngei kan lak dawn avangin dan a kallh chuangin ka hre lo va. Chuvang chuan, Right to Education Act, 2009 nen khan a danglamna awmin ka hre lo va. Party bik tan a ni lo va, a qualified tan a ni. A khaw chhung ami, awm duhte

tan a ni zirtirtu hi lak an tum. Hei hi a ropuiin ka hria a, hei hi chu huaisen takin kan Education Minister hian kaltlang pui se thain ka hria a ni.

Tin, mahni bial lam hi sawi loh theih a ni lo va, kei pawh mimal angin, bialtu MLA ka nihna angin ka MLA Fund 10% hi ka bial lam education hmasawn nan a remchan chuan dah ka tum a ni. Education-ah 10% tal, Health-ah 10% tal, tin, 1% hi Health department-a Vice Chairman ka nihna ang te pawh ni ve sela, 1% ka hlawh hi chu Health Care-ah pawh hian dah ka tum a ni ka rilru chuan. A theih chuan chu chu, hmahruiatu nih pawh ka tum a ni, Health Care system atan pawh hian. Chutiang chuan Education, Health kan ngaipawimawh. Vawiinah hian thil tam tak Education-ah pawh sawi tur a awm a, kan building tam tak Champhai-ah te pawh GM High School, tuna kan House Leader ngei te pawh a lokal tawh thinin ka hria a. Khing hmanlaia kan school tha, Mizoram-a mithiam tam tak lo chhuahna, khitiang hlui lutuk tlabal lutuk, te pawh khi tuai thar a hun tawh a ni. Chuvang chuanin, kan Education Minister chak tak hianin min rawn hriatpui se thain ka hria a. Zirtirtu chu mathematics teacher te hmuntinah kan indaihlo. Hei hi a bik takin mathematics teacher te hi a bik taka lak dan te a awm ang em? Bial hrang hrangah kan indaihlo hle hei hi. Champhai ka bial Ngur-ah khian mathematics teacher tha deuh mai kan nei a, an rawn dil an rawn dil mai a. Khi khi chu kan Minister chak tak hian min laksak lo se ka duh a ni, khi khi result-te pawh a that phah. Mathematics teacher-te pawh hi a bik taka lak ni thei se ka duh deuh a.

Chulovah chuan Champhai-a Labour & Employment Office khi (nichinah khan ka rawn sawi tawh a) an indaihlohma khi min rawn ngaihtuah nawn leh se thain ka hria.

Chutiang bawk chuan Printing & Stationery Office Champhai IB vengah khian a awm thin a, tunah chuan a til tiak ta a ni ber mai a. Khing te pawh khi min rawn ngaihtuah sak tha se ka duh a. Tin, Printing & Stationery-te pawh hi state pum pui ang te, district pum pui ang te pawha kan hman tangkai theih tur ang hian hi thuam that a tha hlein ka hria.

Thil dangah han kal leh ta ila. Minister zahawm tak Pu Chama chan Home lamah khan han kal leh ta ila. Nichinah kan sawi tawh a, kan Police-hi kan thuam that an ngaiin ka hria. Kan ram, kan hnam venhimna turah Police-te hi kan thuam that a pawimawhin ka hria. Quarter te pawh SP quarter thleng hian kan quarter neih

reng reng hi hmuntinah hian a chhe vek mai a. Police hrim hrim hi a chhia a, hmanniah Champhai-ah khian kan Police station building engemaw zat chu Minister hian min rawn repair sak a. Nuai khat diat diat ang khan nuai 6/ nuai 7 man vel min rawn pe a, a lawmawm khawp mai. Amaerawhchu, kan han repair dawn a, a englai ber hi nge maw kan repair ang le? A chung a far bawk si a, a bang a pawp bawk si a, a chhuat zut a ngai bawk si a. Nuai 1 kha chu indaih a har khawp mai. Chuvangin, ka bial chhung Champhai ami ngei te pawh khi min rawn hriat sak se ka duh a. Tin, motor-hi an nei lova, motor tha te hi a ngai a ni Police tan chuan. Border mai kan ni lo, state border mai kan ni lo, inter-state border mai kan ni lo, international border kan ni a Champhai khi. Drug tawlhma hmunpui a ni. Chuvangin, khilaiah khian a bik takin Hnahanah pawh khian Police Outpost hi kan Minister zahawm tak hian min siam sak ve ngei se tih ka rawn rawt duh bawk a.

Tin, nichinah khan ka sawi tawh a, sawi nawn leh ka duh. Traffic chungchang hi a pawimawh em em mai a. Pu Speaker, reilo te ka han sawi nawn leh teh ang. Hah takin an ding a, an chau em em thin a. Keini chuan sitting allowance kan la a, officer meeting-ah pawh hahdam tak hian sitting allowance kan nei a. Traffic Police nilenga ding te hi special allowance, standing allowance te pawh hi pek an ngaiin ka hria. Standing allowance-hi pe ila thain ka hria, an ding hah em mai. Hei hi kan Home Minister hian min lo hriatpui rawh se, kan Traffic-te hi.

Tin, Women police-te hi ka sawi leh lawk ang a. Champhai-ah khianin hmeichhia khi constable 2 kan nei a, tin, SI 1 kan nei a, head constable 2, constable 3 an awm bawk a. Maternity-hi mi 1-in anla leh nghal a, hmeichhia ten case an ngah lutuk a. Chuvang chuanin, hmeichhe police-te pawh hi kan lak tam angai hle in ka hria. Tin, Pu Speaker, sawitur a tam si a, khawngaih takin minute 1 tal min han pe leh teh.

Forest chungchang hi kan sawi lawk ang e, a pawimawhin ka hria. Kan Minister chak tak, naupang tak, tlangval tak mai hian hma a han la chho a, a lawmawm hlein ka hria. Tunah hian Aizawl to Lamka, tunhmmaa kan la neih ngai loh te, Aizawl to Zampuitlang, Mizo hnaathlak kan inunau thatna tur leh awlsam taka kan inkalpawh theihna turin Aizawl to Zampui te, Champhai to Tahan te, kan khawchhak lam mite nen hetianga kan inkalpawh theihna tur hi a ropui ka ti a, fak tlak hlein ka hria a, vawiinah hian fak a phu ka ti.

Tin, lifetime tax kum 15-thin kum 5, kum 10, kum 15-ah te min han tih sak a. Ruahmanna tam tak thil a rawn siam a, tunah hian Seling Plantation tihte an rawn ruahman leh a.

Tichuan, ka han rawt duh chu kan bialah khian Ngur tlang tha deuh mai a awm a. Botanical garden siamna tur tha em em mai Far Pathian in a lo dah sa, chin ngailo tam tak kan nei a. Chhawkhlei parmawi tak tak a vul chuk bawk a, nauban chi hrang hrang a awm bawk a. Khi khi Mizoram tan pawh Eco-tourism hmalakna atan a tangkai a, khi khi min rawn tih sak se. Tin, 2 wheeler taxi permit te pawh hi Champhai-ah te hian min rawn pe ve se, a pawimawh khawpin ka hria. (Pu Speaker, minute 1 chiah a ni tawh ang)

Tin, taxi fare hi zan ah hian a let deuhthaw mai sen a ngai a, Mizoram-a taxi fare te, rickshaw fare te, zan leh chhuna taxi rate sang lutuk, Mizoram pum ami te pawh hi min rawn enfiah se thani ka hria.

Pu Speaker, a tawp ber atan chuan khi sanctuary pawimawh tak kan ni a. Keini hi Murlen sanctuary kan ni a, Tualpui, Murlen, North Khawbung, Bavar leh Rabung-ah te hian wildlife guard hi an tlem a. Hengte pawh hi tam zawk min rawn dah sak se. Tin, a tawp ber nan tak tak chuan Champhai khawpui hian Green Clean, Green Healthy Champhai tih ruahmanna kalpui kan han tum ve chhin a. A hminga MLA han ni ve ta chu, chumi atan chuan puih kan ngai dawn a, he kan khawpui hi thianghlim se, he kan khawpui hi hring se, he kan khawpui hi hrisel sela District tin, khawpui tin, khatiang khan MLA tinte pawh hian hma i la ang u tih ka rawn sawi duh a ni. Pu Speaker, ka lawm e.

S P E A K E R : Member zahawm tak Pu V.L. Zaithanzama, chumi zawah Pu Biakzaua i sawm ang aw.

Pu V.L. ZAITHANZAMA : Pu Speaker, ka lawm e. Vawiinah Minister zahawm tak tak 3 Demand kan sawiho dawn a ni a. Vawiina kan sawiho tur department te budget hi nikum aiin a pung vek mai a, hna thawk tak tak tur vek an ni turah ngai ila.

A hmasa berin Demand No. 42-na, Transport Department hi ka sawi hmasa ang a. Ka hmaah khan MLA zahawm tak tak, ka thawhpuite khan an rawn sawi tawh a. Transport Department hian hma thar lak an tum hle mai a, Tahan, Churachandpur,

Zampuitlangdung, Shillong-ah te MST service tir tum a ni a. Hei hi Zofate insuihkhawmna atana tangkai tak tur a ni dawna ka ngaih avangin ka phurpui hle a.
(SPEAKER : Chair kan han inthlak lawk ang e, khawngaihin)

(DEPUTY SPEAKER AT THE CHAIR)

(DEPUTY SPEAKER : Tan lehngthal mai ang aw).

Kan Minister hi ZORO-a thalai Vice President thin kha a ni a, a tih awm tak pawh a niin ka hria. A lawmawm lo lamte pawh sawi ila a tha awm e. Transport Department-ah hian ka lo hriat danin, Joint Director inthlak zing lutuk hian department a tibuai hlein ka hria a. Hei hi inthlak sek tawh lo sela a va tha em tih ka rawn rawt duh a. Hmanniah Co-operation Department-ah ka sawi tawh a, RCS inthlak zing lutukin department a tibuai ang khan a tibuai ve mai ang tih ka hlau deuh a.

Tin, workshop hi ngaihsak an ngai hlein ka hria a. A thawktute khi an upa deuh tawh nachungin an indaihlo a, Inrinni pawh chawl lovin an kal niin ka lo hria a. Chuvangin, Mechanic naupang leh viak tha deuh lak belh pawh a ngai mai thei e. Hmannia ka sawi tawh han sawi nawn leh ila, khi department-ah khian hnathawktu, Mechanic upa lam tawh, bus tar lam, driver tar bawk hi kan Minister viak tha tak hian siam rem tur leh siam tha turin ka ngen a ni.

Demand No. 30-na, Disaster Management & Rehabilitation hi han sawi leh ta ila. He department innghahna bul ber chu DM&R Act, 2015 kha a ni a. Hetah hian national, district leh state level thuneihna inkhaidiat fel taka siam a ni a. Tunah hian central atangin Finance Commission recommend-na angin kum tin State Disaster Management Fund kan hmu a. He pawisa hi khuarel chhiatna atana hman thin a ni. Mibo zawnna atan te leh chhanchhuahna hmanraw leina atante leh training nan te, silpauline leina atante kan hmang thin a ni.

Pu Speaker, he department pawimawh tak hi a la naupang hle naa kan ram hian a mamawh em avangin siamthat a ngai hle mai a. Thawktu lamah thalai mithiam, thluak tha leh hna thawk thei kan mamawh takzet a ni. Tin, Directorate leh Secretariat a hranga awm hi pawhkhawm dan a awm em aw tihte ka lo ngaihtuah ve a. A tul huna decision rang taka siam a nih theih nan a hranpaa awm lo hian pawhkhawm theih ni se chu a that ka ring a ni.

Pathumnaah chuan chhiatna lo tleng thutah awmze nei tak leh mumal zawka hna kan thawh theih nan chhiatna runpui rapthlak lo thlen pawha chhe ve lo tur State Emergency Operation Centre changtlung tak kan neih a ngai a ni. Tunah hian kan nei naa a changtlung lo hle mai a. Pu Speaker, Kerela tuilianah pawh khan an Chief Minister khan inah pawh haw hman mang lovin hetiang centre atang hian chhiatna thil tleng kha a vil a, amah pawh khan a hmingthat phah hle a ni. Chuvangin, khang kha kan mamawh ve a ni. Tin, tun aia training kan uar lehzual a pawimawh bawk e.

DM & R Department hi mi tam tak hian silpauline sem department ang deuhte hian kan ngaiin ka hria a, a tlawmngailthlak hlein ka hria a. Pu Speaker, he department hi silpauline sem department ang maia kan ngaih hun hi kalsan a hun tawhin ka hria. Silpauline hi kan lei tam hle mai a, ka'n zawt chhin a, nikum lam khan 360 lakhs vel dawn kan lo hmang der mai a. Hei hi a tha ber em aw tih ka ngaihtuah a ni. Plastic free state siam tumin hma kan la a, nichin pawh khan kan ngaithla a, silpauline hi kan la sem zel dawn ni awm tak a ni. Theih chu ni se nakum lam atang chuan MLA-te pawh hi silpauline sem MLA-a ngaih tawk vel kan ni ang tihte pawh hi ka hlau deuh a. Chuvangin, silpauline sem hi chu tih tlem hret hret dan a awm lawm ni tih ka sawi tel hram duh a ni. He Department hi chak lehzuala a kal theih nan ngaihsak a ngai hle a. Siamrem ngai tur ka sawite pawh kha a theih chin chin chu kan siam rem turah ngai ila.

Demand No. 36-na, Environment, Forests & Climate Change Department hi ka'n sawi veleh ang e. Hmanniah House-ah ngei hian zawhna chhannaah khan 'ramngaw' kan ti mai a, ram hring hrim hrim kha 86.27% kan la nei a ni. State Forest Report-a a lan dan pawhin a lo dik thlap a. Amaherawchu, 2015 report leh 2017 report ka en khan kan ramngaw kha kum hnih chhungin 531 sq.km kan hloh a ni. Dampa Tiger Reserve Forest, 500 sq.km hu vel kum hnih chhungin kan hloh a ni. Chutiang zela a kal chuan kan dinhmun hi a tha lo hle a. Tin, khang mai bakah khan, khang kha chu ramngaw hring a ni mai a, State of Forest Report-ah hian ramngaw dur kan tih phei hi chu kan lo nei chau hle tawh mai a. 2015-ah 135 sq.km. kan nei a, 2017-ah khan 131 sq.km chauh kan nei tawh a ni. Chu chu Mizoram pum atanga chhutin 0.62% chauh a ni. Mizoram hian ramngaw mumal tihtlak kan lo nei ta hauh lo mai. Chuvangin, he department hi tan lak a ngai hle mai. Chumi tan lak nana ka rilrua lo langte chu Pu Speaker, ka'n sawi ang e.

Pakhatnaah chuan Village Supply and Safety Reserve hi lal lal lai atang khan kan nei tawh a. British hoin min humhalhpui leh a, vawiin thlengin kan la nei a ni awm e. Amaherawchu re-survey a ni lo va. Tunah hian khaw 238 safety reserve nei angin an lang. Mahse, boundary description chu awm angin lang mahse heng khaw 238 nei anga lang zingah hian nei tawh lo an awm nual a ni. Re-survey ni se, an area hi chiang taka hriat a, a la nei tha reng te hi lawmman te pe ta ila. Chu chuan kan ramngaw chhe zel tur hi a ven that te ka ring deuh a. Tin, YMA te hian YMA Park leh Sanctuary te an nei a. Heng YMA Branch thawk tha te hi zawn chhuah a, a theih phei chuan lawmmante pek ni se, chu chuan kan ramngaw chhe zel tur hi a ven that ka ring deuh a ni.

Zawhna pakhat, Mizoram luipui 16, a kam tawn tawn km chanve hi forest reserve a ni a, hei hi mau leh raw tamna hmun a ni. He hmun hi hmannah kan sawi tawh a, Horticulture hian mau lam hi a la tawh si a, he forest reserve hi Horticulture in nge enkawl dawn Forest in tih te pawh chiang deuha tih a va tha ve tih ngaihtuahna te ka nei a ni. Hetiang taka kan ram ngawte a chhiat zel lai hian hmun hrang hrangah kan hmalakna te en in belhchian kan dawl lo hle a. Chalfilh Reserve Forest kan tih te pawh khi kan tichhe ta hle mai a. Hmanni lawk khan ICA Construction Company ten Department hriatpui lohin quarry an nei tih te ka lo hria a. Chuvangin, Chalfilh Reserve Forest te pawh khi central govt. phalna la hmasa lo chuan non-forestal plant reng reng kih phal loh a nih laiin Tourist Lodge te kan sak hian forest clearance te kan la em tih te kha ka zawt a ni.

Pu Speaker, School Education lam te pawh han sawi ve a chakawm viau a, kam khat lekin thui ka sawi tawh lovang. English Medium kan uar tual tual a, mahse, central service lamah kan tling thei ta lo zawk tlat mai hi a hahthlak hlein ka hria. Chuvangin English uar lampang ni lo in, a bik takin nichina kan ngaihthlak angin mathematics-ah phei chuan Educationah hian English Medium pawh hi kan sorkar hian Mizo tawng veka zir tur hian order chhuah ila hma kan sawn deuh lawng maw tih kha ka rawn sawi tel ve a ni. Pu Speaker, hun tha tak min pe a, ka lawm e.

DEPUTY SPEAKER : Lawnglai East bialtu zahawm tak Pu H.Biakzauva i lo sawm ang.

PU H. BIAKZAUVA : Pu Deputy Speaker, Demand No. 16-na atang hian tan nghal mai ila, hun a tawi deuh thin avangin. Home department hi kan ram venghimtu ber an nih avangin ngaihpawimawh a tul hlein ka hria. An indaihlohma hi a lian khawp in ka hria. Pakhatnaah chuan Police indaihlohma hi. Police-ah hnaruak a tam hle mai a. Hei hi kan chak lohma chhan leh harsatna tam tak kan tawh nachhan niin ka hria a. Chuvangin, Police kan indaihlohma zawng zawng hi hnawkhah vek a tul hlein ka hria a ni. Tunah hian Police station leh outpost tam takah an strength tur zat an ni lo deuh vek a ni. Tin, Traffic Police pawh chutiang bawk chuan an indaihlo em em a, Aizawl-ah pawh an indaihlo a, Lawnglai-ah pawh sawn an indaihlo khawp mai a ni. Tunah hian Police indaihlohma avangin hmun hrang hrangah harsatna kan tawk mek a. Hnaruak tam tak a awm bawk a, hnawkhah ni thei se tha ka ti khawp mai. Tin, Police house, Police quarter hi a indaihlo em em bawk a. Kum tir lam khan Lawnglai-ah Police quarter kan tlawh a, an bialtu MDC te leh anmahni Police Officer te nen, a tha a awm manglo a ni. Kum 40 te, kum 30 te, chutiang aia tam deuh vek chu an lo ni tawh a, a chhe em em vek mai a, a repair-na kan Home Minister zahawm takin a han tih ang te pawhin a repair tur pawh hriat theih loh khawpin a tha lova, sak that an tul hle a ni. Tin, ka bial chhung Bualpui NG-ah phei chuan Police-in quarter an nei lo hrim hrim a. A thawktu police te hi hlawn tlem te te an ni a, mi in an luah a, an harsat pui em em a ni. Chutiang chuan Police quarter neih loh avangin Police ten harasatna an tawk nasa em em a ni, in luah man chungchangah. Tin, Police hi motor pek that an ngai ka ti a. Motor an neih loh avanga tih tur an tih theih loh hi ka hnenah pawh an sawi fo a ni. Tin, Sangau godown-ah sawn Home Guard an duty thin a, border a ni a, venhim a ngai a, mahse, awmna tur kan nei tha lo an ti deuh nge ni an chhuahsan ringawt mai a. Chu chu kan Home Minister zahawm tak pawhin min hriat sak se ka duh khawp mai. Supply Department-in room ruak an nei a, chu chu an inhre fuhlo nge godown ven lohin tunah sawn a awm a, ven tir leh a tul khawp mai tih ka han sawi lang tel duh a.

Tin, Demand No. 30-na DM&R-ah hian tawite ka han sawi leh duh chu DM&R hi Department pawimawh tak , buaina leh harsatna kara chhanchhuahna hna thawktu an nih avangin belhfakawm taka siam an ngaiin

ka hria a. Kartir lamah khan Lawngtlai khua Tuipui ferry-ah tuiah a tla palh a, chu chu a zawnnaah kei pawh ka zuk kal ve a. CYLA leh MTP Siaha lam leh Lawngtlai lam atangtein an lo kal a. Ruang kan dahnaah khan thu kan sawi hlawm a, kei pawh thusawina hun min pe a. Chuta an thusawi tam ber chu kum tin ferry-ah sawn tui tla 4/5 vel an awm ziah an ti a. Chuta an harsatna tam ber chu tui luhna an nei lova, life jacket te, rubber boat te leh oxygen te, torchlight te, tarmit, tui chhunga luh theihna hmanrua hi Siaha lam leh Lawngtlai lam hian nei ve ve ta ila, tui tla zawn chungchangah hian harsa lo takin thil ka ti thei ang tih te an sawi a, tul hlein ka hre bawk a. Chu chu ngaihtuah an tul khawp mai. Tin, district tinah hian hetiang chhanchhuahna lam motor dah ve thei se a that ka ring a. DC Office-ah eng emaw chu an dah a, hman tangkai a ni thin lova, tuman hmang tangkai lovin YLA te leh thalaiin tuitla an zawng tawp zel mai a, anmahni tan pawh a danger thei hle nghe nghe a ni. Tin, Lawngtlai L-III-ah sawn sinking area zau tak mai a awm a, in 20 vel affected area a ni a, chu chu furah hian an luah ngamlo zel a ni. Tunah pawh hian a buaithlak khawp mai a, National Highway 54-hi a ni , Siaha leh Lawngtlai khawpuiin kan rinpui ber kawng a ni bawk si a, chuvangin helai hmun hi mithiamte kan rawih a, ngaih pawimawha tih that tum a ngai bawkin ka hria a ni.

School Education-ah hian han sawi leh ta ila, tawite te sawi loh chuan Pu Deputy Speaker, hun a awm si lova. Ka ngaihpawimawh em em chu science zirna hi a ni a. Lawngtlai District-ah sawn sorkarin science zirna kan neilo hrim hrim mai a. Lawngtlai Govt. Higher Secondary School-ah sawn science zirna dah ve a tul hlein ka hria. A chhan chu a feeder high school tam tak a awm a, chuvangin sawtah sawn science zirna dah ve ni se. Tin, a building high school nen a inkawp avang sawn a chhe em em bawk a, building sak a ngai a ni.

Tin, Bualpui NG-ah sawn Higher Secondary School, lumpsum grant-in-aid-in tunah a ding ve tawk tawk a, Sangau-ah pawh Higher Secondary School a awm bawk a, a feeder high school-te ngaihtuahin tihpuitlin an tul hle a ni. A tlangpui thuin Mizoram hmun hrang hrangah Headmaster indaihlohn a tam a, saw lamah sawn kumtir lama an lak kha an rawn post mang lova. Ka bial chhungah pawh Bualpui-ah te, Lungtian-ah te, Govt. Regional High School, Lawngtlai-ah te Headmaster an nei lova. Tin, non teaching staff pawh indaihlohn a nasa em em bawk a. Example pakhat han pe ila, Lungtian High Scholl-ah chuan LDC a pension

a, a ai an la lova, W/E Teacher a pension a, a ai an la lova, peon a boral a, a ai an la lova, chowkidar a pension a, a ai an la lova. Tin, period inthlak dawnin zirtirtu tu emaw classroom atanga va chhuah a, dar va vuak a ngai thin. Chutiang khawp chuan non teaching staff-ah tlakbalna hmun a awm a ni.

Tin, teacher quarters hi hmun tam takah a awm tha lo em em bawk a ni. Zirtirtu ten mi in an luah a, harsa takin an hmunah an awm theih loh phah ni te pawhin a lang. 6th Schedule to the Constitution of India, para 6 kan en chuan Middle School hi District Council enkawl tur ni awm tak a ni a. Tunah hian Autonomous District Council thenkhatah te chuan state sorkarin middle school la enkawlin, helam atangin hlawh te la pek a ni a, DEO hnuaiah an la awm a, administration pawh a buaithlak khawp nghe nghe a. Hei hi kan Minister, School Education changtu zahawm tak pawhin min sawifiah sak se a thain ka hria a ni.

Tin, Law & Judicial hi sawi a tam lo khawp mai a Pu Deputy Speaker, ka han sawi duh chu ram a thang zel a, thubuai pawh a tam zel a. Lawngtlai District Court-ah thawktu regular post hi 13 awm tur a nih laiin tunah hian 5 chiah regular-in an awm a, an indaihlo em em a ni. Tin, court building sak a la ni lova, hei hi a sakna hmun tur an nei tawh a, sak thuai a tha khawp mai a, tunah DC Office-ah room thenkhatte luah ve in chep takin an awm a. Tah chuan ukil 9 lai an awm a, BAR pawh an hawng thei mang lova, confidential sawi theih loh khawpin an inhnawh chep mek a ni. (Deputy Speaker : Minute 1 ila nei.) Chuvangin court building hi sak thuai a ngai khawp mai.

Tin, District & Session Court hi Lawngtlai-ah a la awm loh avangin case lian tham deuhte chu Lunglei-ah kalpui a ngai thin a. Chumi kal tur chuan accused leh an chhungte tan problem tam tak a awm a, chu mai bakah witness tan harsatna a awm bawk a, police tan pawh escort an ngai a, motor nen hruai an ngai a, harsatna tam tak a awm a ni. Hei vang hian Siaha-ah sawn fast tract court a awm a, chu fast tract court chuan Lawngtlai District Court hi vil kawp zawk mai se. A chhan chu Lunglei-a kal tur khan Lawngtlai paltlang a ngai a, Lawngtlai District atanga thubuai tam ber hi Siaha piaha awm te an ni. Chung mite tan chuan Lunglei Session Court-a rawn kal kha a har khawp mai a. (Deputy Speaker : Kan hun a tawp a.) Pu Deputy Speaker, ka laklawh hlek a, ham strict lo deuhhlek ila tih te pawh sawi a awm a, min lo hrithiam turin ka ngen a che.

Siaha-a fast tract court khan Lawngtlai hi vil kawp thei hram se a tha khawp mai. Public Prosecutor kha a indaih dawn lova, chuvangin public prosecutor lak belh ni se, Lawngtlai hi Siaha atangin an vil kawp thei dawn a ni. Hei hi a theih ngang lo a nih chuan Lawngtlai-a case lian deuhte hi Lunglei Court-ah ni tawh lovin Siaha-ah hian ni tawh zawk se. A chhan chu mipui, khilam ami zawng zawnge thubuai nei leh harsatna tawkte kha Lunglei-ah hla taka rawn kal kha an tan harsatna a tam em em mai a. Siaha-ah tal dah ni thei se, Siaha ami in a vil loh pawhin a hmuna va pan tur khan a awl deuh dawn a ni.

Tin, Environment & Forest-ah hian Pu Deputy Speaker, Demand no. 36-naah hian Ngengpui Sanctuary leh Phawngpui Sanctuary hi ngaihpawimawh a tul khawpin ka hria a. Sa kap an la awm zeuh zeuh mai a, hruizik kheh tih te. Tunah hian DFO Lawngtlai office-ah silai an man 8 an kawl nghe nghe a ni. Chuvangin khilai khi state sorkarin kan enkawl a, kan vil a, mahse kan vil hnehlo em ni aw tih turin chereu lam zel a pan dawn niin a lang a, a tha lo ka ti a. State Bird Vavu te pawh a awm a, tunah chuan a awm leh awm loh pawh a hriat theih chiah tawh loh nghe nghe a ni. Sawlai hmun saw ngun taka vil a tul em em a, chutiang a nih lai chuan thawktu indaihlo taka a lan laiin 4 lai Lawngtlai Division atangin Forest Department-ah hmun dangah transfer an ni leh a. Hengte pawh hi dah let an ngai dawn niin ka hria a, kan Minister zahawm tak pawhin min lo hriat sak se, wildlife guard-te pawh tam zawk an mamawhin ka hria a ni.

Tin, Pu Deputy Speaker, Demand no. 42-na chiah hi ka sawi tawh ang a. Transport Department hi kan hriat angin kan state chhung mai ni lo, state dang leh foreign tlengin kan Minister zahawm takin bus a service tir dawn thu te kan ngaithla a, lawmawm ka ti a. Hetiang a nih rual hian kan state chhungah, internal-ah hian Lawngtlai to Sangau te, Lawngtlai to Aizawl tih te hi kalkawng a tha vek si a, BRTF road vek a ni a, Lawngtlai atanga Sangau pawh. Bus hi service thei vek a ni englaipawhin, bahlah miah lova kal thei a ni a. Sumo-ah man to takin passenger engemawzat an kal a. State Transport Bus hi awm ta se heliaih hian kan tangkaipui em em dawn a. Chutiang a nih lai chuan Lawngtlai Transport Department-a thawk te chu tunah hian an transfer deuh vek a, bus pakhatmah a awmlo a ni. Chuvang chuan bus lei thar tur te a awm chuan Lawngtlai to Aizawl, Lawngtlai to Sangau nitin a tlan theih loh pawhin kar khatah vawi hniih emaw, vawi thum emaw pawh tlan ta se,

passenger hi a full an awm theih reng a rinawm a. An lo awm lo deuha sorkarin kan hloh deuh a nih pawhin mipui rawngbawl tur kan ni a sorkar chu, chuvangin kan hlohnai lai pawh a awm ang a, kan hlawkna lai pawh a awm ang a. Kan hlawkna ringawt pawh hi um tur kan niin ka hre lova, mipui rawng kan bawl theihna tur ngaihtuah a tulin ka hria. Chuvangin Lawngtlai to Aizawl leh Lawngtlai to Sangau hi bus service tir ve Transport Department hian tum ta se a tha hlein ka hria a. Ka bial chhungah sorkar bus tlan pakhatmah a awm reng reng lo a ni. Chu chu Pu Deputy Speaker, ka han sawi tel duh bawk a ni e. Ka lawm e.

DEPUTY SPEAKER : Pu Nihar Kanti Chakma, MLA zahawm tak i lo sawm ang u.

PU NIHAR KANTI CHAKMA : Pu Deputy Speaker, ka lawm e. Vawiinah Minister pathum Demand kan sawiho mek a. A hmasa berin Demand No. 16, Home Department chungchang hi sawi ka duh a.

Pu Deputy Speaker, a hmasa berin kan hre vek a, Indo Bangladesh border fencing hi hna an thawk mek a. Hei hi a pawimawh hle mai a, a chhan chu ramri hungna pawimawh tak a nih avangin kan zavaia kan ngaihtuah a ngai a ni. Kum 2005 atangin hna hi tan a ni a, central sorkarin direct company hmangin hna an thawh tir a, hung tur pawh hi a zau em em a, 318km lai hung tur a ni a. Tunah hian 80% lai hna hi zawh tawh a ni a, company pali - NPCC, NBCC, BRO leh EPIL hian an thawk mek a. Pawisa pawh rin aiin an hmang hnem a, 656 hi central sorkarin an sanction a ni. Hemi fencing chungchang ka sawi duh nachhan chu, a guideline-a an sawi dan chuan zero point atangin 150 yard India huamchhung an hung tur a ni a. A remchang lo a nih erawh chuan 500 yard thlengin India ram huamchhung hi an hung tur a ni. Ka bial chhungah pawh an khawih nasa a, company ho hian an duh ang angin hna hi an thawk a, thenkhat phei chu km chanve India ram huamchhungah an hung a ni. Tunah hian ngaihtuah ila, 150 yard into 318kms. pawn lamah hian a awm dawn a ni a, chuvangin ka bialah hian harsatna chi hrang hrang an tawk nasa a ni. Ka bial ringawt pawh a ni lo, Pu B.D. bialte pawh an buai nasa a ni. Ka biala khaw awm tam ber chu luikama awm kan ni a, Bangladesh nen khuan natural river boundary kan nei

a, tunah khuan lui chanve laiah khuan zero point kan lai a. Sawlai ram saw a fertile em em a, chubakah hemi project tih hma hian Mizoram sorkarah engmah hriattir a ni lova, buaina engemaw a awm hnuah chauh Mizoram sorkar hi an hriattir a ni. Land acquisition avangin buaina an nei nasa a, chubakah hetiang hi social impact assessment pawh a la tling miah lova. Vawiina ka zawhna te pawh Pu Deputy Speaker, Minister zahawm tak hian a la chhang hman miah lova. Indo Bangladesh border fencing-a thawk mek company ten corporate social responsible hnuiah Tlabung Sub-Division tan engnge an thawh ve min hrilh thei em tih kha ka zawt a. Tun thlengin kum engemaw zat an thawk tawh a, pawisa pawh a tam a, Tlabung-ah hetiang corporate social responsible hnuiah thawk duh a bialtu ka nihna angin ka hre miah lo a ni.

Tlabung bazarah te sawn community toilet tal sa ni ila chu ka hrethiam deuh tur. Chubakah Pu Deputy Speaker, entirnan hemi hna an thawh lai hian khaw tam tak saw an bifurcate a, veng khat ni thin te kha a inthen ta daih a, a then fencing huam chhungah an awm a, thenkhat fencing pawn lamah an awm ta daih mai a. An buai nasa khawp mai a, sawlai saw Minister zahawm tak hian min ngaihven sak se ka duh a.

Tunah pawh central sorkarin engmah a la sawi thei lo a, pawn lamah a awm dawn em, a phal em? Pawn lama awm ho kha fencing chhung lamah dah lut ta se, rehabilitate tur hian khawiahnge kan awmtir ang tih an ngaihtuah miah lo a ni. Chubakah an fencing tih dan hi leilet an tichhe nasa khawp mai a, dumping ground siam miah lovin an duh duhna ah lei an pah a, chumi avang chuan mi ram, mi leilet an tichhe nasa em em a ni.

Pu Deputy Speaker, chubakah hmun tinah leilet hmun hi a water logged nasa a ni. Chuvangin leilet te pawh a tih theih miah loh hi, a tam zawk mi eizawnna pawh an tichhia a ni. Chuvangin Home Department hi nodal department an nih avangin ngaihsak thei se chu ka duh khawp mai, Pu Deputy Speaker.

Demand No. 20 na – School Education Department-ah hian Pu Deputy Speaker, kan hre vek a, Economic survey lehkhabuah a lang a. Lungsen R.D. Block hi literacy-ah hian an hniam a, chuvangin hemi cover-na tur hian Tlabung

hi KGP te pawh an dah a, tunah hian a function mek a ni a. Tunah hian a building hi a chhe nasa tawh khawp mai a. Hei pawh hi thuam that a hun tawh a. Tin, Lungsen-ah te pawh KGP a construction hi a zo tawh a, engtikahnge a function theih ang tih pawh a hriat loh va.

Chubakah Pu Deputy Speaker, ka bial hi zirtirtu hi an indaihlo nasa khawp mai a, zawhnaah te pawh Unstarred Question-ah te pawh ka zawt a, a tam zawk hi chu single teacher a ni. Chubakah zirtirtu awm lohna hi a tam zawk a ni a. MLA fund atangin zirtirtu kan ruai ringawt mai a ni. Chuvangin, Minister zahawm tak hian zirtirtu hi min ngaihtuah ran sak se tih ka sawi duh a. Example-a ka sawi duh chu department atanga an chhanna a ni a – Govt. Primary School zirlai 67 awmnaah zirtirtu pakhat chiah a awm a ni, Pu Deputy Speaker. (kei chu tawng lamah tlem harsatna ka neih avangin tlem min pek belh a ngai a nia) Zirtirtu hi a indaihlo nasa khawp mai a, chubakah ka bial chu problem chi hrang hrang kan nei a. Pakhatnaah chuan language problem a ni a. entirnan kei pawh Mizo tawng hi ka thiam vak lo a. Mizo tawng hi state language a ni a, ka bial te pawhin zir an duh a, mahse zirtirtu hi min pe thei lova. Ka bialah zirtirtu an rawn dah pawhin engemaw chhuanlam siamin helamah transfer an duh zel a. Nichinah ka hmaa member zahawm tak Pu TPA sawi ang khan aikal hi kei pawh ka duh a ni. Tih tak takah chuan tunah pawh hian a tam zawk chu ka bialah pawn lam atangin zirtirtu dah kha aikal vek a ni. Pu Deputy Speaker, problem hi an nei nasa khawp mai. Ka bialah chuan four language formula hi a ngai a ni. Pakhatnaah chuan Chakma kan nih avangin Chakma mother language hi zir a ngai a. Mizoramah kan awm avangin state language hi khawi hmunah pawh a ngai a, mahse duh mah ila kan zir thei lo a ni. Chuvangin Minister zahawm tak hian min dah thei se ka lawm khawp ang. Aw le, Pu Deputy Speaker, sawi tur hi a tam em em a, chu zawng chu ka sawi theih ni mai se. Ka lawm e.

DEPUTY SPEAKER : Pu Lawmawma Tochhawng, Lunglei East bialtu zahawm tak i sawm ang.

PU LAWMAWMA TOCHHAWNG : Pu Deputy Speaker, ka lawm e. A thupuia kan luh hmain Speaker zahawm tak nen hian ka thiante hian hming an phuah che u a, ‘Bialtuapiangtehnenaunpekbelhzela’ te an ti che u a, in pu zo

hlein ka hria a. Tun tumah pawh hian chu chu in la ken tlang zawh zel ka beisei che u a ni.

Pu Deputy Speaker, kan subject-ah lut nghal ila, a chipchiarin kan sawi hman dawn lova, a phawhlawh hlawk hawkin kan sawi dawn a.

Demand No. 16 na Home Department hi dinhmun pawimawh tak luanlu Mizoramah chauh pawh ni lova, khawvel hmun hrang hrangah ramnuam an tehna chu a ralmuanawm em, a chhunga chengte an thlamuang em? A ralit leh tit lohah te a ni a. Tangkaina tam tak te, hmasawnna tam tak te nei mah se, a mi cheng, khua leh tui te an ralmuang em? An ralit miau si chuan ram nuam, sorkar nuam a ni ngai lo a ni. Chuvang chuan an dinhmun hi a pawimawh em em a ni tih hi sawi nawn sawi nawn pawh ngai lovin a lang reng mai a, an mawhphurhna pawh a sang em em mai a ni. Chutiang mawhphurhna sang tak, hna zahawm tak kengkawh tur leh hlen chhuak tura kan Minister kan hotutena an dah hi a rinawm tawkin ka hria a, experience a lo nei tawh a. Tin, ram humhimna chungchangah pawh rilru thuk tak nei, mahni nunna ngei pawh lo dahkham tawh a ni a. A chungah hian rinna sang tak kan nghat a ni. Venghantu Police te leh sipai hna hi hna zahawm a ni a, chu zahawmna erawh chu an vawng nung reng thei a, hoteah an hloh vek thei bawk a ni. Chutiang hna pawimawh tak chuan ram hmel a tarlang a, a pho chhuak thei a, chuvang chuan kan sorkar tan pawh hian ngaihthah chi emaw, haider chi emaw a ni lova, state priority list-ah pawh hian hmaih tur chi niin ka ngai lo. Hun lo la awm leh zel tur atan pawh chu chu kan sorkar hruaitute leh kan sum lam khawihtute pawhin lo hriat sak se ka duh khawp mai. Chutiang taka pawimawh a nih avang chuan an harsatna thenkhat te pawh hi nichinah kan sawi tawh a, han sawi lan leh hram hram thanin ka hria a. A zawng a zain kan sawi hman loveng kan tih kha. Tun dinhmunah hian Police Department-ah hian hna ruak hnawkhah loh (nikum lamah in loh loh tur an in avangte pawh kha a ni ang e) 2800 vel zet awm anga hriat a ni a. Heti chung pawha indaihlo lang mang lova an hna an han thawk a, theihtawp an han chhuahna hian an hah tur zia leh an rim tur zia hi a tarlang hlein ka hria a. Chuvang chuan ngaihthah loh chi tak a ni. Thuam that an mamawh em em naah chuan police personnel, a mihring piah lamah hna tha taka thawk tur chuan in leh lo tha zawk te, nuam zawk te leh zahawm zawk te pawh an neih a ngai a. Nichinah an sawi tawh a, an quarters te pawh hi hmun hrang hrangah, ram pum puiah a ni a, thuam that ngai, chei that ngai, a bul atanga tan that ngaite pawh a awm nual a ni tih

kan ngaithla tawh a. Lunglei khawpui chhungah ngei pawhawn Police quarter kan neihte saw aw, ruahpui vanawn sur nikhuaah pawh kel leh uite pawhawn tawmhul nana hman tlakah an ngai lo em maw ni chu le tih khawpin a awm tawh a, a zahthlak a, mualphothlak lam rawng kai a ni tawh tlat mai a. Chuvangin, kan Minister-ten hma an lak lehzelna turah pawh min theihngihlh loh kan duh khawp mai, Pu Deputy Speaker. Aizawl khawpui bikah hian Traffic Duty te hi an fakawm thlawtin ka hria. Nichinah pawh an rawn sawi tawh a. Anni hi extra-a hlawh pekte pawh hi an phu an tih kha. An thawhrima an hah tehlul nen hian, an hna an tlin a, ram hmel tilangtu an ni a, an zahawmin an fakawm tak meuhin ka hria.

Tin, sorkar kal taah khan lawmthu sawina Police Department bikah hian tlem han neih lawk ka duh a. Chu chu Lunglei bikah sawn a ni a. Lunglei khawpui hmun 19-ah sawn Lunglei Town Surveillance hnuaiah cheng vaibelchhe 1 leh nuai 45 hmangin CCTV Camera hi bunfel a ni tawh a. Hemi kawngah hi chuan kan MLA kal ta Pu S. Laldingliana, chatuan ram min panson ta khan a tuipui em em a, a fakawm ka ti a. Lunglei khawpui hmasawnna kan hmu a ni. Chubakah chuan Thingsai-ah nuai 58 vel zet sengin Police Station building sak mek a ni bawk a. Hei te hi hun kal tawh atanga tuna kal mek a ni, a lawmawm kan ti. Chumai piah lamah chuan Tlabung SDPO quarter saw nuai 40 vel senga sak peih tawh a ni bawk a, a lawmawm kan ti a, luah mai theih a ni tawh a. Ka han sawi chhuahna chhan chu sorkarin thil tha, rotling min hnutchhiah a, mel lung min phun sak saw a ni a. He sorkar thar pawh hian hun lo awm lehzel turah pawh hian he inelna kawngah hian ke a pen ve ngei ang tih kan ring, kan beisei a ni. Tunah hian Lunglei Police bikah sawn sanction strength hi staff 374 a ni a, chutih lai chuan 259 chauh an awm a, hmun ruak hi 115 zet a awm tihna a nih chu. Indaihlohnna a awm a ni. Pu Deputy Speaker, dil dil pawh ngai lova kan mamawh chu a lang mai awm e, khawpui pahnihna ve lem si ah chuan.

Tin, Lunglei khawpui traffic management saw buaipui tham a tling ve ta. A hma chuan “Lunglei Traffic Police-te chuan varak kal mai maite an hawi thin”, an tih kha a ni ta hauh lova. Tunah chuan kan tawt a, kan ding, traffic jam a nasa ve ta hle mai a ni. Mihring kan pung a, motor a pung bawk si a, loh theih lohvin Police 28 hi an duty na piah lamah traffic duty turin pawh chawp an ngai a, indaihlohnna a tizual em em a ni. Chuvangin, Lunglei Traffic Police atan hian Traffic Deputy SP post hi a hran min siam sak thei se kan va duh em aw! Kan duh piah lamah kan

mamawh a ni. Lunglei Traffic Police Station sanction saw a tul tak zet zet tawh, a tlai luat hma hian ka ti a ni.

Chubakah chuan, PAHOS-te pawh hi han sawi kai lawk ila. Nakumah te tal chuan min pe ve thei se kan duh, kan ngen nghal bawk a ni. Tin, chhim bial pum pui Siaha, Lawngtlai leh Lunglei zawng zawng enkawl tur sawn Southern Range DIG, Lunglei-ah a thu a, mahse designated quarters a la nei lova. Kum 10 a liam ta, hei hi, neih lohna a rei tawh khawp mai. Addl SP quarters luahfir a ni a. Addl SP saw Police Rest House-ah a awm mai mai a ni. Chungte chu min lo hriat sak hram se kan duh.

Tlabung border, nichinah bialtu zahawm takin a sawi tawh a. BSF chauh ni lovin dah a va tul em aw, Pu Deputy Speaker! Thil dang dang avangin kan mamawh lehzual tih hi a chipchiarin ka sawi lovang a. Eng Battalion ber emaw saw chu chhawp hnaih theih ni se kan duh hle mai.

Fire Station saw nichinah an sawi tawh a, pakhat chauh kan nei a, pakhat dang a hmun tur pe phal pawh an awm niin kan hria a. Min ngaihtuah sak sela, khawpui a lian ve tawh a, harsatna kan tawk nasa em mai. Chu chu Demand No. 16-ah chuan ni sela.

Demand No. 20-na hi ka'n sawi leh teh ang. Ram leh hnam hma lam hun atana beiseiawm a awm leh awm loh chu zirnaah, zirtuteah a innghat a ni tih a ni thin a. Tuna kan ram dinhmunah hian hei hi a la dik ve tho a ni. Tichuan, kan zirna a tha tual tual, kan sang tual tualin kan hria a, kan thlen chin erawh chu a tawi tual tual! Mahni ram pawh kan pel lo deuh em tihte hi ngaihtuahnaah a awm a ni. Central Service-a kan tlakhniam tial tialna chhan hi engnge ni ang le? Tunge mawh phur ang le? Zirtirtu nge, department nge? Zirlaite nge nu leh pate aw, tihte hi ngaihtuah ngun a ngaiin ka hria. Tin, tunah phei chuan kan Mizotawng hi a ral hlauhawm zingah a lo awm tawh lehnghal an ti a. Hemi kawngah hian Education-ah hian tan kan lak a ngai khawpin ka hria a, ngaihtuahna pawh kan pek a ngaiin ka hria.

Pu Deputy Speaker, khawngaihin, kan zirlaibu, a hniam ber atanga a sang ber thleng hian kan zirtir thin hi ngaihtuah chian a tulin kan hre bawk. Khawiahnge min thlen dawn? Eng kawng nge min zawhpui dawn? Tun ang zel a nih hi chuan a

tawpa thihna ni siah hian kan tla palh mai ang tihte pawh hi ngaihtuahwm niin ka hria a. Hun tam zawk nei ila, chhim lam mamawh heng Govt. Higher School-te leh Ramthar leh Zobawk Higher School-te hi kan mamawhna han sawi a chakawm. Chung zawng zawng piahah chuan MBSE Regional Office kan nei a. Saw saw Headmaster pakhat thil phalna avangin office saw kan la luah mai mai a ni. A phal loh hun hunah sawlai saw Office kan nei lo mai dawn. Khawngaih takin min rawn en sak turin ka ngenin ka sawm a ni.

Demand No. 36-na hi tawngkam hniih khat lekin Pu Deputy Speaker, min phal sak leh hram teh. Environment, Forest & Climate Change chungchangah hian kawngdunga kumtina thing phun hi kum engemawzat atangin kan kalpui tawh. Maktaduai engzat tak seng ral tawh ang i maw? Mahse, kan ram a ngaw phah chuang si lo! Eng nge a chhan ni ang? Kan tihdan phung, a phun tam lama kan inel hi a hlawhtlinnaah kan ngai mai hi em ni le? Hei hi thlak thleng a hun tawhin ka hria. Chuvangin, a changtu department te pawhin hei hi chu nguntaka an ngaituah a ngai. Engzatnge phun nun awm tawh tih hi kan inelna ni sela. A phun tamah ringawt ni lo in a phun danah pawh lei laikhuar a, leitha te nen chawm a, dung chen a nih hunah hmun dangah a tahtawlin zau zawngin kal ta ila a hlawhtlinna hi kan ram hian a hmu in a rinawm. Chuvangin, kumtina kan Green Mizoram Day kan hman leh te pawh hi ennawn a va ngai leh tawh em ve aw.

Tin, Anchiri hi Pu Deputy Speaker, kan hre vak lo a ni mai thei. Thingtlang leh hmun chengker zawkah kal ta ila, vai-ho hian silpauline phah chungah an lo phoro thin. Anchiri hi ka hriat dan chuan rimtui siam nan leh silai zen siam nan an hmang thin a ni awm e. An duh em em mai, a lakna pawh a pilril tawh, ram chengker, ngaw hnuai tak takah a ni tawh. Chuvangin humhalha, tihpun a ngai em em in ka hria a.

Mau, kan ramngaw siamtu pawh hi a enkawl dan inzirtir a ngai tawh. Mautuai hi kan duh em em a, kan ei a, chawhmeh tui tak a ni. Amaherawhchu, tunah tak hian mautuai khawrhte pawh hian an lakna hi a hla em em tawh a ni. A chhan chu awmze neiloa kan mautuai te kan rawk a, kan tihchhiat vang a ni. In zirtir a ngai, hmunkhata mi 10 a awm chuan 5 bak lak loh tur tih te hi inzirtir a va ngai em e aw! Department lam pawh hian hetiang zawng hian hma lo la thei se. Tin, Khawthlangtuipua an tawlh thlak dul dul mau leh teak saw Pu Deputy Speaker,

ngaihven a ngai khawp mai. A km a km-in kan ram ro hlu Maurawkela hun atang tawha Pathianin min pek saw a liam nasa tawh em mai, a uihawm a ni! Engemawti zawng talin, hmannya kan sawi tawh ang khan bamboo plantation emaw bun ila, bamboo treatment plant emaw te saw nei ila. Sawmi kan ram rohlu mau hnuaiah sawn teak an la dah leh ta nghal a nia! Hmanni lawkah kan Minister zahawm tak pawh a kal a, a hmuin ka ring. Chutiang kawngah chuan hma lak a ngai tak meuh meuhin ka hria a ni.

Tam tak sawi tur ka la nei a. Labour, Employment Demand No. 28 hi ka sawi leh hram teh ang. Hamnniah khan sawi lan zawk a ni tawh a. Ka tawng tu huatthu suh ah, “Isua hi Lal a ni” tih vang ni hauh lova leivangdapa bungbu suau suau-te kha (High field-ah niin ka hria) ram leilung fate an ni hauh lo. Kan ramah hian eng nge an tih ? An inhlawhfa a ni, kan ram pawisa an hlawh a ni. Kan ram pawisa chu khawiahnge a kal zel ? Hmun dangah a kal a ni. Chuvangin Pu Deputy Speaker, LESD&E hian tih tur an neiin ka hria. Mizorama an awm theihna chu ILP a ni, ILP hi engatannge an hman ber? Kan ramchhunga inhlawhfak nan a ni. An tam a, hna an thawk a, tunah chuan kan ngam tawh lo, theka lo chuan tumahin kan chhawr ngam tawh lo. “Theka lo chuan kan thawk duh lo,” an ti a, theka-in kan pe leh mai thin. Hetiang renga kan kal chuan kan ram dinhmun hi a hlauhawm ngawt ang. Mithiam zawkten nguntakin lo en sela, labour work mumal tak neih a, work permit hi kan ramah hian a hman ve theih lo a mi le? Department ten lo zirchiang se ka duh khawp mai.

A tawp berna atan chuan Enterpreneurship leh Skill Development chungchang hi tawitein sawi ve ka duh. Hemi tello chuan khawvel hi a ding chhuak zo lo tih hriat a ni tawh a. Chuvangin, helamah hian ke kan pen a ngai a. Lunglei sawn, “Makedonia ramah lo kai la, min pui rawh,” tih ang deuhin he Department changtu Minister-te kan au duh. Lunglei-ah sawn Leitlang rahbi kan siam mek a. Tahchuan mi 10 tan chauh bul tan nan an idea, project an siam ang a, an tih theih eizawnna tur atana an hman tur kha an rawn intihsiaik ang a. A pass te chu 2.5 lakh thlenga bul tan turin hma lak kan tum a ni a. Tunah hian mi sang chuangin dilna an rawn thehlut tawh a. Kan sum neihsa ang angin a daih dawn loh avangin kan Minister te pawh “Makedonia ramah lo kai la, min pui rawh,” tih kha kan inauhna leh kan insawmna a ni e. Tichuan, kan Minister hnenah pawh hemi chungchangah hi chuan, “I ram i thlen hunah min hrereng ang che,” tih ang khan kan budget session

zawh, kan pawisate khawihchet theih a nih hunah chuan chhim lam lo hawi ngei turin ka sawmin ka ngen a ni.

Pu Deputy Speaker, Printing & Stationary chungchangte pawh hi sawi tur a va la tam em! Mahse hunin min daih tawh si lova. Kan sawi bakte pawh hi nakinah lehkhain kan la inchhunzawm dawn nia. Ka lawm e.

DEPUTY SPEAKER : Aw le, kha kan ngaithla a. Tawng chungchang kha kan sawi thin a, helai atang pawhin inngenna ni pahfawmin, kan tawng hi kan tuk chak si lova, kan tawng karah hian saptawng kan belh nasa tawh lutuk a. Chuvangin a theih hram chuan keimahniin kan neih loh tih loh kha chu Mizotawngin sawi hram hram tum ila. Tawng pakhat, “Room light off rawh,” tih hi karah hian Mizotawng pakhat chiah a awm a, hetiang hian kan tawng hi a chhuak ang tih a hlauhawm a. Chuvangin helamah hian tan la hram hram ila a thain ka hria.

Tunah chuan Dr Vanlalthlana, Aizawl North II bialtu MLA zahawm tak i lo sawm ang u.

Dr. VANLALTHLANA : Pu Deputy Speaker, ka lawm e. A senior lam atang khan ka han tan ang a. Minister zahawm tak Pu Lalchamiana chanvo-ah khan, Demand No. 8-na Taxation kha 55.84%-in a pung dawn a ni a. Hei hi major works-ah 612.90 lakh a rawn kal vang te pawh a ni mai thei a. GST introduce a ni a, India ramah an han dah a. Sumdawng ho hi an buai khawp mai a, keini College lam la kan lo ni bawk a, a takin kan khawih tam lo a, kan thiam lemlo a. Amaherawhchu, min zawttu hi kan nei leh thin a. A tir lamah khan training chu a tam a, tunah hian training hi a awm ta vak lo niin ka hria a. Sumdawng ho training pekah hian tan lakkhar leh ni se, a lawmawm khawpin ka ring a.

State hian kan chhiah lak ve atangin state own tax revenue (SOTR) atang hian kan tax receipt zawng zawng hi 5.57% chauh a ni a, tan kan lakkha ngai viau bawk a. Mizoram Finance Commission hmasa berah khan inrawnkhawmna hmunah ka tel ve hlauh mai a. Chutah chuan petrol leh diesel-ah cess lakkha kan rawt tawh a. Politics-ah te kan lut ta a, sawi chhuah ka duh viau a. A thenin, “Min dem nan an hmang ang, sawi chhuak lo mai rawh,” te min ti a. Mahse, ruling lam atangte pawhin cess lakkha te an rawn sawi a. Petrol leh diesel atang hian cess lakkha, kan driver hote leh kawng siamna atan hman theih tura tih hi a chakawm khawp mai. Tuk khat

bial ka fannaah driver pakhat chu ama motor khalh thin a ni a, heart attack a nei a, room-ah diaper nen a mu hlawm hlawl mai a ni, a va hmuh theih vek a. A inenkawl nan motor an hralth a, an fapa nerve tha lo a lo ni a, an fanu school kal lai an chawl tir a, nu berin pa enkawl a ngai a. Chutiang chuan harsatna an lo tawk a, rilru a khawih khawp mai. Driver hote enkawl an ngai a, hma lak theih ni se chu a lawmawm khawpin ka ring a. Amaherawhchu, cess lak turah khan mipui tibuai lo zawng, harsatna thlen tam lo zawngte pawh khan a tih theih a rinawm a ni.

Tin, Demand No. 16-na Home kha han lut leh ila. Home-a kan budget hi 33.03%-in a han pung leh a. Mizoram hi kan tlem viau em ka ti a, kan lo tam ve tawh khawp mai a. 14th Finance Commission Report-in annexure 8.2 a rawn siamah khan kum 1971-2011 inkar state tin punna kha a rawn dah a. Nagaland an pung tam ber a, a dawtah Mizo kan ni. Nagaland chu Greater Nagaland intiin an inpawt khawm a. Mizoram hi kan inpawt khawm ve chiah em ka hre lo a. Kan punna hi 230.09% a ni, kan lo pung tam khawp mai. Kan kohhran lian neih Mizoram Presbyterian Synod chuan kan pung tlem em mai Mizote hi, pun tam policy i nei ang an ti a, fa nei tam te lawmman an pe. Eng nge kan pun chhan ni ta ang le? Hei hi kan Home Ministry hian en se a tha khawp mai. Kum 2001-2011 inkar khan Lawngtlai District-ah sawn 60%-in kan pung thei bik a. Eng nge a chhan ka sawi dawn lo, kan en a tul a ni. Major works-ah hian police quarters te, an chenna tur hmun te, office-te tihchangtlun ngai tih kan sawi kan sawi a. Kum 2017-2018 major works-ah khan a tak taka hman ₹ 2274.52 lakh a nih laiin nikum revised estimate-ah khan ₹ 763.90 lakh a awm a. Kuminah hian a tlahniam ve ta daih mai a, ₹ 346.18 lakh chauh a awm mai a. Hma lak a nih dawn chuan ngaihtuah tham a awmin ka hria a. Amaherawhchu a bawmpui kha an sawi ziah mai a, a bawmpui atang khan kan la leh mai dawn ni awmah kan ngai a.

Economic Offences Wing, CID hnuai amite hian Mizorama sum dahna peipunna lem awm ang chi te an buaipui nasa khawp mai a Tun hnaiah pawh ₹ 20 crore vel scam awm tur buaipui te a awm a. Mizote sum peipun kawngah kan la inhrilh hre tawk lo hle tih a lang a. Home atang chuan a tih theih loh mai thei, Finance lam atangte pawhin en a ngai khawp mai a. Economic Offences Wing lam pawhin buaipui tur an ngah viau mai.

Tin, Disaster Management kha han lut ila. Demand No. 30-na budget hi 121.45%-in a pung a. Ka biala Ramhlun Sports Complex leh Sihpui ruam, Ramthar te saw lei tlahniam reng mai, hmanni lawkah pawh Education Minister-in school chim thei mai tura awmte min rawn enpui a. Sihpui ruam pawh saw tunah hian a che leh tan deuh a, a bul hnaia awmte an mangang tan viau tawh mai a thenkhat laiah chuan. Hmalak thar ngaihna, check dam siam thar ngaite a awm em ka ti a, chungte pawh chu en a tha viauin ka ring.

Tin, Pu Lalchhandama Ralte chan kha han lut leh ila. Demand No. 18-na Printing & Stationery. Economic survey thar berah khan report hmuh tur a awm miah lo mai a, kum dangah a lang thin si a, an lo hmaih nge ni? Hei hi 125.95%-in a pung dawn a. Wages-a budget hi nikum lama ₹ 7.37 lakh atangin ₹ 23.36 lakh-ah a pung dawn a. MR-te, hnate an lak belh dawn a nih ka ring a. Other charges-ah hian department dangte hi an duhthawh thin khawp mai a, other charges-ah pawisa an dah teuh zel mai a. Kum 2017-2018-a hman tak tak, actual-ah khan ₹ 398.44 lakhs dah a nih lain kuminah hian ₹ 1 lakh chauh dah a ni a, ‘thingkhawn’ lam kha a tawk leh dawn a ni ang e. Kha lam kha a ni turah han ngai leh ringawt mai ila. Tin, fiscal strategy statement 39-naah khan guidelines thar a awm avangin revenue collection/pawisa pawh kan dawng hnem thei dawn a ni. 2018 kumtirah ruahmanntha thar a awm e an rawn ti a. Amaherawhchu, pawisa lakluhna tur lam kha receipt budget-ah hian a tam leh em em lutuk lem lo a, an thusawite pawh a lo inkalh deuhte pawh a ni mahna.

Demand No. 20-na School Education-ah kal leh ila, (educationist-te kan ni ve a) 123.19%-in a pung dawn a, a lawmawm khawp mai. PRS Legislative Research-in per capita expenditure mi pakhata education-a sen zat an tehin India ramah pahnihna nikum khan kan ni a. Kuminah hian data ka la hmu thei chiah lo a, kan seng hnem khawp mai a. Amaherawhchu, education-a kan thlen chin chu tun hi a ni. Mi pakhata seng hnem ber dawttu ni chung si khan eng nge kan thlen chin kan hria a. Kan Minister pawhin hma a lak a ngai viauin ka hria. Mizoram Education Transfer and Posting of School Education Rules, 2006, section 8-na kha en a ngai bawkin ka hria a. Compulsory posting tih a awm a, he Dan hi paikh a ni pawhin ka hre lo a, a saptawng ang ngau ngau hian han chhiar mai ila, a chiang ber a. In a cycle of 18 years from the date of commencement of this rules, a teacher may be required to serve at least one spell of minimum tenure at a school located in D category.

D category chu hmun hrehawm bera dah a ni a. Category hrang hrang A, B, C, D-ah an dah a. D category-ah hian kum 18 a thawh chuan, “minimum tenure” an tih kha thawh hun chhung rei lo ber, kum 3 a awm tur tih a ni. Tunah hian mi tam tak kum 18 aia rei hmun khata thawk an awmin ka hria a, kan Minister hian he Rules hi a hmang tak tak dawn em tih ka zawt duh a. UDISE 2015- 2016 zirchiannaah khan medical check-up nei thin school kha an han enchiang a, chutah chuan Mizoram hi India ramah a hniam ber pathumna kan ni a. School naupang ho hriselna lamah te pawh hma kan lak a ngai viau awm e. Chutihrual chuan zirtirtu ho qualification ah hian regular teacher ho trained hi 99% an ni, an ti a. Kan education level chu sawi ngai loin a lang leh sa awm e. Trained 99% khan tun hun hi min thlenpui a ni, kan Minister tan tan lak a ngai viau mai.

Tin, Labour, Employment, Skill Development & Entrepreneurship kha a tam khawp mai a, 256.54% in a pung a. Minister thenkhat department chan zawng zawng mai kha 23% te a han tlahniam a, a thenin 256 lawih ten an dawn belh a, chuam deuh te an awm em ni aw te ka ti deuh a. Building and other construction welfare fund, Cess fund hi mi hian an la hre tam tawk lo in ka hre thin a. Bial fannaah pawh ka zawt thin a, ‘ka la in register lo,’ ti hi an tam khawp mai. Hrilh hriat an ngai khawpin ka hria. Local Council emaw, Village Council emaw te nena hma lak ho te pawh a thain ka hria. Sankalp test thrive tih te, PMKVY tih te, chi hrang hrang ESDI tih te, scheme tam tak a awm a. Hei hi tangkai taka hman a ngai a, hei hi Mizoram state policy, (Deputy Speaker : Hun a tawp a) (Pu Deputy Speaker, tlem a zawng kan tih belh ve ang e, tun tum chu. Sawi tur a tam khawp mai, ka tui na lam a ni helam hi chu.) Mizoram State Policy, Skill and Entrepreneurship Development 2018 policy document ah khan department 14-in skill development an kalpui mek thu kan hmu a. Hetah hian construction lam in saknate a ni ang chu, khatianga hnathawk tur hi 2011-ah mi 40,000 vel mamawh a nih laiin 2023-ah chuan mi 140328 mamawh a nih tawh dawn thu kan hmu a. Mizorama cheng ngei nuai khat kha an inhmuh belh a ngai dawn, chuvangin kan tan a ngai khawp mai. Engtinnge kan tih dawn tih te; tin, entrepreneurship-ah hian skill development ngawta kal lo hian innovation leh research lam hi kan kal tam a ngai a, chutiang chuan hma la se a tha in ka hria a.

Tin, Minister zahawm tak Pu T.J. Lalnuntluanga demand hi tlem kan lut leh lawk ang a, Demand No.4-na Law & Judicial hi 28.23 % in a pung dawn a. State

Legal Services Authority ho hi hman tangkai thiam a ngai khawp mai a, kan inhrilhhriat tam te pawh a ngai a. Tin, Lok Ayukta kan neih tur te a lawmawm ka ti khawp mai. Demand No.36-na Environment Forest & Climate change hi han luh leh lawk ka duh a reilote, state of forest report nichina Pu Zama sawi ang khan 531 sq kms-in kan forest a tlahniam a. Hei hi a tlahniam tawp a ni lo a, India ramah a sang ber a ni kan tlak hniamna hi. State area atang pawhin, a area zat atang pawhin kan sang ber a, hei hi department lam pawhin en se. Tin, Finance Commission hian pawisa pekna tur ah hian tehfung ah a rawn hmang thin a, kan tan a ngai viauin ka hria, helamah hian.

A tawp ber atan Transport-ah hian han lut leh lawk ila. Smoke emission test hi notification te a awm a, State pollution control board lam atang ten lehkha a awm tawh a. Kan kal thinin ka ring a, kalkawngah bus tlan khu lutuk te, public transport a ni tlangpui a, kawng kal ten hrehawm an ti thin khawp mai a. A bik takin school naupang ho an inhup chawn chawn a, khatiang kha a ni thin a, hei hi kan endik a ngai khawp mai. Transport Minister hian hei hi hmalak nan hmang se ka duh khawp mai. Transport Department hi eizawna tur, sorkarin sum a lakluh ve theihna tur a ni a. Amaherawhchu kha budget-ah khan duh angin kan hmu tam chiah lo a, pawisa lakluhna tur kha. Khang ah te pawh khan tan la se a tha ang e. Ka lawm e.

DEPUTY SPEAKER : A lawmawm e. Dr F. Lalnunmawia, Aizawl South III bialtu MLA zahawm tak i lo sawm ang.

Dr. F. LALNUNMAWIA : Pu Deputy Speaker, ka lawm e. Minister zahawm tak Pu Lalchhandama Ralte chan atang khan tan ka duh a. Midangin kan la sawi tam loh deuh pawl te pawh ni a ka hriat Labour, Employment, Skill Development & Entrepreneurship Department atang hian tan ka duh a. He Department tan hian kum hmasa ngaihtuahin budget thahnem tak dah a ni a. Nikum budget estimate-ah nuai 1334.08 dah a ni a. Tin, revised estimate-ah nuai 2560 zet dah a ni a, kuminah erawh chuan nuai 4759 zet dah a ni. Hei hi nikuma budget estimate nena khaikhin khan a let thum aia tamin a pung a, a lawmawm hlein ka hria. He department hian manpower development policy SEDP-a kan dah kha nasa takin a kalpui dawn niin ka hria a, a lawmawm takzet a ni. Hei hi thalai te leh Mizoroma hna neilo tam tak ten an nghahfak tur kha a ni a. Chuvangin he department hian nasa takin thalai te tan beiseina thar a siam dawn niin ka hria a, a lawmawm hle a ni. Chutihrual chuan he

department hnuia Mizoram Building and Other Construction Workers Welfare Board hnuia kuthnathawktute tana hamthatna hrang hrang kha tangkai zawka kalpui a nih ka beisei a. Chungah chuan Labour Cess kan tih, Workers Welfare Board hnathawktuten, kuthnathawka eizawng tuten hamthatna hrang hrang an hmuh ang hi tun aia tangkai lehzuala hman a inhrlhhriatnate , awareness te pawh hi nasa lehzual leh zau zawka kalpui a tul mang e tih ka tarlang duh a.

Tin, kuthnathawka eizawng ten vanduaina an tawha anmahni chhawmdawlna Mizoram workmen compensation kan tih te pawh hi tangkai lehzuala a ngaihna hrelo te pawhin an hmuh ve theih dan tur ngaihtuah a nih ka beisei a, kan Minister zahawm tak pawh khan min lo chhinchhiah sak se. He department hi nasa takin thalai leh sorkar hnawthawk ve lo te hian an chhawrin ka ring a, kan innghahna pawimawh tak an ni tih ka han tarlang duh a ni.

Tin, Minister zahawm tak chan bawk School Education chungchang ka han sawi ve duh a. Nikum budget estimate nena khaikhinin 23.9%-in a pung a, a punna a sang hle a. Tun sorkarin elementary education a ngaihpawimawh zia a rawn tarlangin ka hria a. He budget-ah hian thil thar engemaw zah kan hmuh ka beisei a. Chung zingah chuan kum engemaw zah kalta chhunga CCE kan lo hman tawh, tha tura an ngaih mahse tha famkim si lo ennawn a nih tur thu te kan hriat kha a lawmawmin ka hria a. Chutih rual chuan professional courses leh job oriented education, member zahawm tak ten an lo sawilan tawh kha uar zawka kan kalpui kha a tul dawnin ka hria a, ka beisei a ni. Tin, hmun hrang hrangah school tlabal tak tak a tam a. Kum tam tak chhung enkawlloh a nihna laiah khan thawklekhata siamthat that a har chu ka ring a. Engpawh ni se, Minister a ngaihna hria, zamtha kan nei a. A kaihruaina hnuia hian sorkar schoolte pawh hian hma a sawn chho zel ang tih hi ka ring a, ka beisei a ni.

Tin, keini bial bik han sawi zawk ila. Sumsuih-ah sawn Primary School I leh II kan nei a, zirtirtu an indaihlo ve ve a. Vengchhak leh Vengthlang inkarah sawn school chu awm thei se, school hi suihfin sawikhawm kan duh tih khawtlangin an rawn thlen a. Chu chu kan Minister zahawm tak pawh hian min lo chhinchhiah sak se ka duh khawp mai a. School kan dah sak theih chuan Vengthlang leh Vengchhak ami kha a lai takah, a tu tan pawh hla lo ve ve khan

dah a, school khata sawikhawm an duh a. Tahchuan zirtirtu pakhatah pahnih an ni in ka hria a, thlang lamah pathum, an awmkhawm chuan panga an lo nei thei dawn a. Khatiang sawikhawm ang chi kha a remchanna hmunah chuan tihchhoh zeuh zeuh theih ni se chu a tha awm mang e tih ka han tarlang duh bawk a ni.

Ka bialah hian HSS pahnih kan nei a, Sialsuk leh Aibawk-ah. Aibawk ami saw naupang an pun zel avangin classroom-ah an leng tawh lo va. Hengte pawh hi kan Minister zahawm tak hian min lo hriat sak se. A extend na tur te pawh hi min la ngaihtuah sak thei ang em tih pawh kha an bulah ka rawn thlen duh nghal a ni.

Minister zahawm tak Pu Lalchamliana chan Home Department-ah hian tawite ka sawi duh chu, nikum aia budget punna hi 33.29% a ni a. Hei hian sorkarin venhimna lam a ngaihpawimawh zia a lo lang a. Chung zingah chuan district thar 3 kan neihante hian District SP neih tharna tur order hi ni 18.6 khan tihchhuah a ni a. Hemi district-a cheng mipuite pawh an lawm ngei ka ring a. Sorkarin a thutiam anga venhimna lam a ngaihpawimawh zia kha a langin ka hria a, ka lawm hle a ni. Tin, ka bial Sialsuk-ah sawn Police Station a awm a. Midang ang tho khan a quarter vel a tlabal ang reng khawp mai a, motor an nei tha lo bawk si a a. Chu chu kan Minister zahawm tak hian min lo chhinchhiah sak theih chuan ka lawm ngawt ang tih ka rawn tarlang ve duh bawk a ni.

Tin, Minister zahawm tak Pu T.J. Lalnuntluanga chan Transport chungchangah hian han sawi ve ka duh chu he department-ah hian kuminah hian thil thar kan hmu nual mai a. Mipui tana thu lawmawm tak tak te a ni a, Zoram mipui pawh kan lawm in ka hria a. Chungah chuan tax pek dan zangkhai zawk te an han duang chhuak a, hengte hi mipui tan enghawlna a ni. Tin, chubakah thingtlang leh hmun kilkhawr zawka bus service tharte siam a ni hi a lawmawm hlein ka hria a. Zoram mipui tan, a bik takin inkalpawhna leh hmun harsa zawka awmte tan thil lawmawm tak a ni.

Pu Deputy Speaker, kan bial chhung Hlimen-ah Transport Department-ah hian Vehicle Inspection & Certification Centre din tum a ni a, MST Workshop kan tih thin hmunah khan, a lawmawm hlein ka hria a. Chutih rual chuan sawlai saw a nihna tur anga hman a nih chuan motor tam tak kalna tur a ni dawn a, motor lian leh motor te. Chutih rual chuan Melthum 3 atang sawn a kawng saw a zim khawp mai a. Sawtiang reng chuan harsatna NASA tak kan tawk dawnin a rinawm a. Chuvangin,

kan Minister zahawm tak leh Mizoram sorkara kan hotute hian min lo hriat sak thei se ka duh chu Melthum 3 atanga Hlimen inkar saw, a theihna lai laiah zauh tura ruahmanna siam ni se. Nakinah motor endik tur hrang hrang an kal sup sup dawn a ni. Chungah chuan buaina kan tawh lohna turin tun atanga ngaihtuahna min lo sen sak theih chuan a lawmawm hle ang tih ka sawiduh bawk a ni.

Tin, Forest Department hnuaih hian kan Minister zahawm tak hmalaknaah hian kalphung thar, thil tharte pawh kan hmuve ka beisei a. Heta ka sawi duh chu Forest Department-ah hian plantation lam hi kan kalpui nasa em em a. Chutih rual chuan a maintenance hi duhthu a sam lo deuh thin em aw, ka ti, hun kaltaah. Aizawl – Lunglei tlangdungah road side plantation leh afforestation programme-ah hian thing kan phun nasa thin a. Thingtiak tam tak YMA te leh NGO kaltlangin, heng tanpuina hian kan phun thin a ni. Chutih rual chuan February/March a lo ni a, kan thingphun tam tak kha meiin a kanglum thin a, a thlawn fo a ni. Chuvang chuan, a number a thing kan phun tam ai hian a thi hi a tam em em mai a ni. Chuvangin, Forest Protection & Maintenance lamah hian a enkawlzui lamah hian tan lak zual ka rawn rawt duh a. A bik takin sawnglai tlangdung Melthum 3 leh Hualngohmun inkar te saw mi chawlh tam na a ni a. Meizial bung han pah leh mei han hal mai te kha a awm thin a, chung chuan a ti kang a. Hlimen tlang Lalsavunga Park te leh Samtlang ram tlang thlengin a kang thin a ni. Hemi kawngah hian ruahmanna siam a, NGO te leh YMA te thawhpui dan ngaihtuah ni se, kan Minister te leh sorkar ten min lo hriat sak se tiin ka rawt ve duh a.

Tin, tunlai hian sava veh khap lamah kan thangharh a. Chutih rual chuan khawi khawiah emaw airgun tha chi, lens te nena pai hi kan hmu zauh zauh a. Sava an kap thla teuh teuh mai a ni. Hengte hi nasa leh zuala ven dan a awm em, khap dan a awm em tih Department lamah ka zawt duh a. Annin beng min lo chhit sak theih chuan ka lawm ngawt ang. Sawi tur tam tak a awm a, a tlangpuia ka sawi theih tawk ni mai rawh se. Ka lawm e.

DEPUTY SPEAKER : Pu Lalchhuanthanga, Aizawl South II bialtu MLA zahawm tak i lo sawm ang.

PU LALCHHUANTHANGA : Pu Dy Speaker, ka lawm e. Department kan sawi hi a tam tham a, chuvangin tlem tlemin han lak khawmte pawh tum chhin ta ila. A hmasa berah chuan Taxation Department hi han sawi ta ila. Kumin kum tir

26th January-a Vanglaini chhuakah khan GST 1st July, 2017 atanga kan laks tan atang khan hnam dang sumdawng phalna nei hi mi 810 lai an lo awm tawh mai a. Mizoram Taxation Department atanga register chu 367 a nih lain Central Taxation Commissionerate atang hian 443 lai online hmangin registered a ni a. Hei hi department hruaitute leh kan Minister-te pawh hian enhian deuh a va tha awm ve aw kan ti a. Hetianga hnam dang sumdawngin kan rama bu an lo khuar chuan keini Mizote tan harsatna a la thleng thei mai awm mang e ka ti a, inventhawn thu hlaah ka sawi duh a.

Tin, Professional Tax hi ka chiang vak lo a, Grade IV atanga Chief Secretary thleng hian ₹2500 hi kan chawi vek mai a. Hei hi tihdanglam theih chi a ni nge kan hlawh atanga siam rem chi a ni lo em ni? Hei hi en atan tha ka ti a.

Demand 36-na Forest Department-ah hian rawtna siam ka duh a. Kan sawi thin Ngaizel khamah sown saza hi a khawi theihin ka hria a, saza hi khama chetla thin a ni a. Tin, saza hi kan state animal a lo ni kher bawk si a, thangtharte kan state animal chetlai vel han hmuh tir kha a chakawm viauin ka hria a. Thil hautak tak a nih ka ring lo a, a chhan chu kham ko chunglamah hian fencing hmangin han hung ta ila, a thlang lamah hi chuan a zuang thla ngam bik dawn chuang lo a, thil tih chi tak tur niin ka hria a.

Tin, a senso hi a tam vak lo ang, chaw te pawh saw lai hmunah sown a puar khawpte hi chu a hmuh ve tho ka ring deuh a. Chu chu a tih chi viau awm mang e aw ka ti a, kan thalaite kan state animal han chetlai vel han hmuh tir te kha a tha lawm ni ka ti a. Tin, helai ram hi free-land a ni a, kan Local Council hruaitute leh kan Forest Officer-te pawh ka lo be rawn tawh a, anni pawh an phur viau a ni.

Demand 18-na Printing & Stationery chungchang hi ka han sawi ve leh zeuh ang a, hmanni khan zawnha leh chhanna hunah khan kan sawi nual tawh a. Printing lam hi a pawimawh khawp mai a, sorkar department-te pawh hian kan chhawr tangkai khawp mai, tichangtlun hi an phu ka ti a. Chutih lai chuan stationery lam hi chu sorkar sum luanralna hi a ni ve chiang khawp mai. An awmna hmunte a zuk hlat deuh avang khuan department te hian an dawr chak vak lo a. Chuvang chuan stationery items dah tawih, dah chhiat leh expire te, keh chhia te a tam khawp mai a. Hetah hian sorkar-in a lo thlawnin sum tam tak a seng a ni tih ka thai lang duh a.

Labour, Employment, Skill Development & Entrepreneurship hi tlem te ka sawi leh duh bawk a. He department hi department pawimawh tak a ni chho ta mai a tunah chuan. Tunhmaa Labour Employment tih ni mai lo khan, tunlai kan thalaite tana kawngro su tak tur a ni a. An department hotu Special Secretary hi hnam dang a ni a, he department hi a dawrtute hi mimawl te te an ni hlawm a, chuvang chuan department lu bera hnam dang, Mizo tawng thiam lo an nei hi an buaipui khawp mai a. Union hrang hrangte pawhin Mizo ngei dah turin rawtna an rawn siam thin a, khangte kha tihpuitlin a ni tawh em tih ka zaws nghal duh bawk a. Tin, an department-in building, ram an neih Republic Venga Directorate saw NGO kutah hlan tumna a awm ni te'n an sawi a. Hengte hi a tak a ni em tih kha kan Minister hian min rawn tihchian sak se ka duh a.

Home Department, Demand no 16-na hi tlemte han sawi ve leh ila. Dan kengkawhtu tura kan tih kan Police Force-te hi ruihhloah hian an buai viau mai a, a pawi khawp mai. Mi tam tak, kan Force-te an thi tawh a. Hei hi engtia tih tur nge ni ang? Kan Minister-te pawh hian hmalak dan turte pawh hi chiangkuang deuh hlekta hian nei thei se a that ka ring.

Nichina an sawi tak ang khan tunah hian Police Force 2000 chuang post ruak a awm a, chu chu fill-up tum mek ni te pawhin kan han hria a. Hengah te pawh hian political fitness lam ni lo in, physical fitness lam kha ngaihpawimawh ni ve tawh se la. A nihna takah chuan tuna kan Police Force ruihhloa buai tak takte hi MNF ministry hmasaa lakte kha an ni tlat a ni. Chuvangin, khatiang mi kha kan la leh dawn a nih chuan a pawi khawpin ka ring a. Kan fimkhur deuh chu a ngai dawn a ni.

Demand no. 20-na, Education Department pawh hi a beidawnthlak angreng hlein ka hria a. Zirtirtu indaihloh vang pawh ni chiah lo a posting & transfer kan tih ngam loh avanga post siam belhte pawh hi niin a lang a. Kan lak tum dante pawh MPSC kaltlang loa, phuahchawp Board ang deuh siam chawpa lak kan han tumte hi a pawi khawpin ka hria a. Kan fa-te sikul luhna atana kan siam theih loh a han ni ringawtte pawh hi a tha lo a ni. He department hi department lian a ni a, sum tam tak involve-na a ni a, sorkar-in sum a seng tam khawp mai. Hengte pawh hi a tlawm thlak khawp mai a. A bik takin Education Department leh Home Department-ah hian politics-a induhsakna hi a uchuak lutuk a, hei hi kan ram thanmawh bawk leh kan zirna pawhin a tuar a ni a. Chuvang chuan hetiang hian kal chho zel tawh lo ila a

tha ka ti a. Huai tak leh khawng taka zirtirtu tling leh tlak ngei MPSC kaltlanga han lak ngei te kha kei chu ka la rawt a ni. Pu Deputy Speaker, chungte chu ka sawi theih tawk a ni mai a. Ka ngenna te kha kan Minister te hian min ngaihpawimawh sak theih chuan a lawmawm khawp ang. Ka lawm e.

DEPUTY SPEAKER : Kan insum rei hmain dar 4 khi kan hun tawp kha a ni a. Kan chaw fakna kha a la rei si lova, chuvangin eng nge House hian kan ngaihdan ? Dar 5:00-ah khian kan chawl mai zawk dawn em ni ? Kan chaw fakna kha a la rei si lo, dar 5-ah chawl mai ang aw, a lawmawm e. Member zahawm tak te hetia thu kan sawi paha kan han chhiar dawn khan hetia a ziak ang ngau ngaua kan chhiar dawn kha chuan chair remtihna lak a ngai tih kha hre tlang leh ila a tha awm e. Tunah Dr.K.Pachhunga, Lunglei South bialtu MLA zahawm tak i lo sawm ang u.

Dr.K.PACHHUNGA : Pu Speaker, ka lawm e. Demand kan sawi tur hi kan Minister zahawm tak pathum te demand vaibelchhe 2481 ngawt mai a ni a, department 10 a ni a. Member zahawm tak tak ten an lo sawi teuh tawh a. Demand No.16-na Home Department kha han lut dawn ila. Kan sorkar atanga thla 4/5 lekah ka bial bik Lunglei South Hrangchalkawn-ah outpost a awm a, saw sawn Tawipui tlangdung leh khutah Khawmawi, Lawngtlai piahah te an area of coverage a ni a. (Pu Speaker, saptawng telh kha phal leh zeuh zeuh rawh aw)

An outpost in a enkawl kha a zau angreng si a, bike ringawt an nei thin a. Misual an man in bike-in an phur a, a hlauhawm em em a. Chuvangin kan hotute hnenah thlenin tunah chuan Bolero min pe a, kan lawm tak zet a, Home Minister hnenah House kaltlangin lawmthu ka sawi tel nghal duh a. Chutihlai chuan 2nd Battalion awmna Luangmual a ni a. Quarter eng emaw zat kan nei a, repair loh chin pawh hriat a ni lem lova, a chhe tawh em em a, chungte pawh chu Home Minister te hmalaknain tunah chuan eng emaw zat repair a ni te hi kan lawm tak zet a.

Tin, MLA fund te pawh advance-a hmangin a tlabal lai eng eng emaw te kan han ruahman bawk a, kan lawm hle a ni tih te kan sawi tel duh a. Police indaihlohma a tam em em a, kan hre vek a, 2000 chuang a nih te kan hria a.

Tin, nichinah member zahawm tak khan an han sawi deuh lawng lawng a, MNF in police an la vek bik lo tih te pawh kha kan hriat ve a ngai a. Kum 25 sorkar tawh kan hotute pawh hi an awm ve bawk a. Inpuh bik kha chu a dik ka ring chiah lo

a, MNF hian mi tha tak tak kan nei a. Chutiang chuan Mizoram Police hi a hmingtha a, fak tlak an niin ka hria. Kan police fel tak tak te avangin kan khawtlang hi a him a ni tih hi lawmthu he House kaltlang hian kan sawi duh hrim hrim a ni.

Tin, Pu Speaker, Demand No.30-na Disaster Department ah, kan hriat angin rial a rawn tla nasa em em a. A bikin ka bial-ah chhimah te nichinah report te kan dawng tawh a. House-ah kan sawi tawh a, kan sorkar-a disaster changtuten theihtawp chhuahin tanpuina rehabilitation te pawh pe in hma an la a, lawmthu ka sawi duh a. Mi tam takin compensation emaw an ti thina, an rangva chhe zat ang hmuu an tum thin hi a dik lo a, kha kha mipui pawhin kan hriat tlan than ka hria. Chutihlai chuan landslide disaster a tam em em a, kan hre vek a, construction te, lei laih te leh quarry te, kan hre vek a. Tin, quarry hi a hnuai lam atanga lak tur a ni lova, a chhip lam atanga lak hmasak zawk tur a ni a. Hengte pawh hi inzirtir a va tha em tih ka sawi tel duh a. Chutihlai chuan kalkawng emaw, building te Disaster Department hi YMA department dik tak an ni a. Accident na chi hrang hrang a tam em em a, fur a rawn ni leh ang a, kawng chhia emaw chutiang chuan leimin te, silpouline te pawh silpouline sem MLA nih kha kan bialah chuan a ngai tlat a nia. Silpouline tam thei ang ber te pawh kan la mamawh zel dawn tih te pawh ka sawi tel duh bawk a.

Demand 20 na Educatio-ah hian kan sawi nual tawh a, kan hriat angin education hi kan ram hnuk a ni a. Tunah hian kan tla chhe deuh ta in ka hria a. Khawtlang nun te kan han en a, kan sawi thin angin mithiam tak tak kan awm a. Mahse mahni ram leh hnam hmangaih nachang hrelo khawpa inzir fing te pawh kan awm ve mek bawk a. Zirtirtu hnalaah hian MPSC pawh a tha e, chutihlai chuan sorkar in tha a tih anga a ngaiantuah angin a khuaa thawk ngei tur qualified te pawh a tha a, fair thei ang bera lak hi kan tih tur ah pawh ka ngai a, kan hotute pawhin tan an la turah ka ngai a. Zirtirtu addict ang chi te zirtirtu ni awmlo tak tak hi an awm ve bawk a. Khang kha pawisa sen ngailo chi a ni bawk a, department hian theihtawpin tan han la leh se a than ka ring a ni.

Chutihlai chuan thingtlang bikah zirtirtu an tlem em em a, naupang an tam a. Khawpui ah naupang an tlem a, zirtirtu an tam thung a. Heti zela kan kal a nih chuan khawpuiah bik district capital-ah te, Aizawl-ah te hi chuan school education hi privatize a fuh ka la ring a. Mahse rural area thingtlang angah te chuan nasa taka

sorkar anga hma lak te a that ka ring bawk a. Tin, amalgamation te pawh kan kal pui a thain ka ring a. Chutiang chuan school education kan kal fuh loh chuan kan ram hi a ngaiantuahawm tih pawh kan hria a.

Demand No.36-na Forest Department lamah han lut leh lawk ila. Anchiri chu member zahawm takin a sawi tawh a, ka sawi tawh lovang a. Mirethei zawkte leh thingtlang miten sum an lak vena a ni a. A rem mai loh nan SEDP hmangin tihpun hna te pawh hi thawk ila tih te pawh ka zep tel leh duh a. Chutih lai chuan kan hria a, kan ram hi green desert a ni mai ang tih te pawh a hlauhawm tawh a.

Tin, khawvel a lo lum tial tial a, heng zawng zawng global warming te, Ozone depletion te hi keimahnin kan siam vek a ni a. Chutih lai chuan automobiles atanga meikhu chhuakte hi a hrisello bawk a. Kan hotute theihtawp chhuah zel turin ka chah duh ve hrim hrim a. Kan hriat angin kan ram luidungah sangha hrai kan ching a, hengte pawh hi a kristian lo va, a YMA lo a ni tihte pawh inzirtir uar leh ta ila.

Tin, Forest-ah hian kan ram hausak zia kan hria a, kan resource neih that ber a ni a. Family 50,000 hian nitin 200 forest atangin hausakna emaw, sum la ta se, thingzai te, chawhmeh te, chuti a nih chuan thlakhatah crore khat a lo ni a. Kum khatah phei chuan forest atang hian vaibelchhe tam tak an la chhuak a, mi tam ber nunna leh kan ram hausakna a ni tihte pawh hi hre thar leh ta ila. Chutiang bawkin kan sorkarin kan mau neihsate pawh tangkai zawka hman a tum chho zel a. Sorkar anga kan ram hausakna awmze nei zawka hman a tul tak zetin ka hria.

Tin, Transport lam Demand No. 42-na kha kan hria a, kan Minister-in hma a la tha hlein ka hria a. Motor chhiah kum 15 kan han pe ngawt te kha lehlamah chuan a rapthlak angreng a. Motor kum 15 kawllo kan awm a, rickshaw te phei chu kum 8-ah a chhia a. Khatiang khan vawiinah chuan felfai takin a lo awm a. Tin, tax pe duh manglo, document thi tawh an tam avangin kan hotuten tunah ruahmanna tha tak siamin, late fee te ngaidamin tax tam tak kan hmuh theih ka ring bawk a. Khatiang khan inter-state te, international bus service-te ruahmanna a nei hi a ropui ka tiin a fakawm ka ti takzet a ni.

Demand No. 8-na Taxation lamah lut leh ta ila. Nichinah member ten an sawi tawh angin sorkar hnathawkten an chhiah, professional tax pek danah hian

tunhma kha chuan hlawh base-in a ni a, amount base-in a ni a. Tunah erawh chuan an hrut rual ta deuh a, a hnuai ber atangin a chhip thlengin kan ti niin ka hria a. Kan hriat angin kan budget hi 80% deuhthaw sorkar hnathawkah a lut a, mihring nuai 12 dawnah, 6% hi Govt. servant ang kan ni ta a. Sorkar hmalakna chi hrang hrang thawktu an ni teh meuh mai, hah pawh an hah a, sorkarin duat pawh a duat a, hlawh tam tak a pe a. Hei vang hian kan ram kan intodelh si lo va, hmalakna tur a tam em em a. Ka thu chu ni se sorkar hnathawkte ka ngen duh chu 100 zelah thlatin 1 pe ila, a tlingkhawm vaibelchhe 40, 50 te chu help sector te mirethei khawtlang zirnaah te keimahni Mizo ngei hi chhanchhuah a ngai a ni tih kha appeal he House kaltlang hian ka sawi tel duh a.

Chutihlai chuan nichinah member zahawm tak Mamit MLA-in a sawi tawh a, wealth tax hi kan pek a hun tawh lo maw? A bikin Aizawl, Lunglei leh Kolasih-ah te in luah man to tak tak mi thenkhatin an la lut a. Nuai 5/nuai 6 la te pawh an awm a, mirethei, maian zuarin market-ah fee an chawi a, kan thik hauh lova, kan lawmpui a. Mahse, kan ram tan eng emaw hi chu pelut ve sela. Building leh property tax tuna kal pangngai bak tiema han fawkkhawm deuh dan te pawh hi Taxation lam te pawhin nei se kan ram hi a itawm zawng ni lo a puih zawngin mipuite pawh kan tel ve a ngain ka hria. Pu Speaker, ka zo tep khawngaih takin.

Demand No. 8-na Printing & Stationery, House Leader in a sawifiah tawh a. Printing & Stationery dawr lo eng emaw zat kan awmin a rinawm a, zir tur kan ngahin ka hria. Chutihlai chuan Lunglei Salem Vengah Printing & Stationery Office a awm a. tui a lut nasa thin a, tui a lian thin ti ila, chu chu department lam te pawh khan min enfiah sak se ka duh deuh a.

Demand No. 28-na Skill Development hi a pawimawh takzet a, mi zawng zawngin sorkar hna kan thawk dawn lova, keimahni kutkawih thiamna ngeia eizawnna kan siam a ngai takmeuh a. Tute pawh sorkar ila sorkar hna emaw contract ringawtin kan inchawm seng lova, thawk chhuak tura kan thalaite kan siam a ngai takzet a ni tih kha hun chep tak karah ka rawn ti deuh zung zung a.

Tin, Education Demand No. 20-na ah khan kan English medium private school te pawh hi enchian that deuha puih ngai a nih chuan puih te pawh hi siam rem ngai a awm a nih chuan siam rem te pawh a tha takzetiin ka hria. Pu Speaker, ka lawm e.

DEPUTY SPEAKER : Aizawl South-I bialtu zahawm tak i lo sawm ang.

PU C.LALSAWIVUNGA : Pu Deputy Speaker, ka lawm e. Vawiinah kan Minister pathum te demand kan sawiho a ni a, sawi tur a tam duh viau mai a. Amaherawhchu ka ngaimawh zual sawi ka tum dawn a, a tlangpui chauhin, a chhan chu an sawi teuh tawh a, khang kha han thual ka tum lova.

A hmasa berah Demand No.36-ah hian lut ta ila, Environment, Forest & Climate Change-ah hian. Tunlai khawvelah climate change chungchang hi kan ngaihpawimawh a hun hle tawhin a lang a. Khua a lum em em tawh a; tin, fur leh thal, sik leh sa te hian awmzia min neihpui thui tawh lo niin a lang a. Chuvang chuan climate change hi kan ngaihpawimawh hle tulin ka hria a. Thing phun te, ramngaw humhalh te tun ai hian uar ila. Tin, kan rama awm ramsa te, nungcha te, Pathianin leilung hausakna min pek humhalh te hi a pawimawh em em a ni. Budget-ah hian tun aia tam zawk pawisa dah theih dan awm se tih hi rilruin a ngaihtuah a. Hei hi tawitein ka sawi duh a ni.

Demand No. 42-na Transport-ah hian an rawn sawi teuh tawh a, member zahawm tak tak te sawi kha sawi nawn tawh lo ang a. Mipuiin kan chhawr theih, a bikin thingtlang lama awm te tana pawimawh bus service hi tun aia tam zawk changtlung zawk kan kal tir hi a pawimawh khawp hian ka hria a. Tin, chumi bakah chuan Lalaghat atanga Bairabi rail head hi kan bungraw lakluhnaw pawimawh tak a nih avang hian tun aia changtlung zawk hian siam ni sela. Rel-a bungraw phurh man hi a thawm avangin sum tam tak kan save thei dawn a ni, hei hi ngaihpawimawh a tul khawpin ka hria. Tichuan, pawisa pawh hetah hian tun aia uar deuh zawka dah theih dan a awm em tih kha duham deuh hlekin ka rawn sawi a ni.

Pu Deputy Speaker, Demand No. 18-na Printing & Stationery lamah hian tawi te tein ka sawi dawn a, ka sawi vek lo ang a. Demand No. 18-na Printing & Stationery- ah hian ka rilrua zawhna awm reng chu, eng vang nge department hrang hrang te hian kan Stationery atang hian an mamawh hi an lak loh tih hi a la ni reng a ni. Sorkar leh sorkar indawrna hmangin sorkar tan sum hnar tha tak a awm thei a. Improvement siam a tul anih pawhin improvement siam tura hma lak ni se. (**Pu LALDUHOMA :** Pu Deputy Speaker, tun hma khan a changtu Minister mahni department dawr duh lo te kha an awm vang a ni thei ang em le?) Chutiang a nih phei chuan a pawi khawp ang, Minister atanga bul kan tan pawh a ngai ang. Tichuan

sorkar department leh sorkar department kan inpuih tawnna leh kan insiam tawnna tha tak tur niin a lang a. Chuvangin, hei hi ngaihpawimawh a tul hlein ka hria a. Improvement tih a ngai a nih pawhin improvement ti tur hian hma la ila. Revenue earning kan neih theihna remchang te pawh a nih dawn avang hian improvement atan pawh pawisa hi tun aia tam deuh zawk dah theih dan a awm em? Tun tumah hian a remchang lo a nih pawhin SEDP atang te pawhin pawisa dah belh theih dan kawng a awm em? A awm a nih chuan a tha ngawtin ka ring.

Demand No. 20-na School Education chungchangah hian han lut leh ta ila. School Education-ah hian ka tarlan duh chu Pu Deputy Speaker, salary-ah hian ₹ 1526.93 lakh dah a ni a; tin, wages-ah hian ₹ 93.12 lakh dah a ni bawk a, hei hi nikum lam aiin a pung deuh vek a. Tin, minor works-ah hian ₹ 121.20 lakh dah a ni a, major works-ah hian ₹ 500 lakh dah a ni bawk a. Tin, non-salary kan tiyah hian state bik atangin ₹ 785. 22 lakh dah a ni a, CSS atangin ₹ 23,632.64 lakh hi dah a ni bawk a. Hemi CSS atanga kan beisei kan hmuh tur hi eng atana hman tura ruahman nge a nih ang aw tih ka hrethiam lova, ka bih thin a ka hrethiam lo khawp mai a. Nakinah kan Minister zahawm tak khan min hrilhfiah sak sela, eng scheme atana hman tur nge a nih tih ka questioned tel duh a. Tin, hetih rual hian ka bial chhungah Govt. Bethlehem Vengthalang High School building sak that ngai em em a awm a. Tin Govt. Central High School building leh office sak that ngai em em a awm bawk. Hengte hi 1980 vela sak tawh kha an ni a, a chung te hi a pawp NASA em em a, silpaulin-in tunah hian kan lining a ni. Tin, Bethlehem-ah Model School a awm bawk a, hei hi vertical extension tih ngai a ni bawk a ni. Heng hi kan Minister zahawm takin min lo chhinchhiah sak se, vawiina he demand kan sawihona atang leh he House kaltlang hian hengte hi min sak sak turin ka dil a, ka ngen a ni.

Tin, Demand No. 8-naah hian tawite in han sawi leh ila, Taxation bikah hian. Member zahawm tak tak ten an sawi kha chu sawi nawn ka tum tawh lova Pu Deputy Speaker, ka sawi lan duh zawk erawh chu professional tax kan lak dan system hi engtin nge aw kan kalpui tih hi a ni a. Chumi ka han sawi chhuah duh nachhan chu ka bial chhung dawr tinah an lo kal a, lehkha an ken chu dawrah an fill up chawp a. Professional tax an pek zat tur ziakin an rawn pe chawpchilh a ni. Kha kha professional tax kan lak dan tur kal hmang reng a ni em tih kha ka hre duh a. Tin, professional tax kan lak dan tur kal hmang reng a lo nih pawhin a system leh a kal hmang hi a official lo riau hian ka hria a, chuvangin kan Minister zahawm takin

hei hi min lo enfel sak se (DeputySPEAKER : Minute 1 i la nei e.) tih kha ka ngen duh a ni.

Pu Deputy Speaker, Demand No.16-naah hian ka lut leh nghal mai ang a. Sawi tur a tam lutuk a Labour, Employment, Skill Development & Entrepreneurship te pawh ka kal kan daih mai a, kan ram kan intodelh theihna tura department pawimawh a ni si a, sawi a chakawm khawp mai a, ka sawi lo mai anga. Home Department ah hian han lut ila, Ramri chungchang hi sawi ka duh a. Pu Deputy Speaker, kumin chhungah April/May velah khan Daido leh Bungpuilian, Mizoram leh Manipur ramri Vawngkawt (a hming pawh ka chhinchhiah thei chiah lova) Manipur PWD ten kawng Mizoram chhungah an rawn lai a. Manipur lamin an sawi dan chuan ramri nia an hriat atanga meter 25 vel Mizoram lam (Pu Deputy Speaker, min lo hrithiam hram rawh) an black top nghal a ni. Tin, tunhmaa ramri lung phunna atangin metre 130 a thui kha an rawn metal a mihi chu. Tin, an lai a, an metal nghal mai a ni lova, kan ram chhungah waiting shed an rawn sa bawk a ni, a pawi hlein ka hria a. Sorkar hian a hria em aw tih vawiinah hian ka zawhna a ni.

Vairengte lam kan en chuan 1875-a kan ramri, Mizote'n kan pawm, British leh Mizo lal ten sa-ui an tanna Dholai atangin Vairengte khaw chhung thlengin kan ram leilung min rawn luah sak tawh a. Tin, Zophai-ah kan Chief Minister hmasa ber Pu Ch. Chhunga leilet ngei pawh kan humhalh hleithei tawh lova. A hman hmanin kan ramri hi min chhuh a, min nek a, min luahsak tawh a ni.

Chuvangin Pu Deputy Speaker, vawiina he demand kan sawinaah hian a changtu Minister mai pawh ni lovin kan sorkar hian ngai thutak hle sela, hma pawh chak takin la rawh se. Unstarred Question min chhannaah khan Assam nen kan inkarah ramri-ah buaina kan nei tih a ni a. Mizoram ram chin erawh kha chu min hrilh thei lova. India leh MNF te an inrem hnu, state puitling kan nih hnuah kum 30 chuang kan lo kal tawh. Hemi chhunga kan ram chin pawh kan la hre lo hi hnam anga mualphona niin a lang.

Hetah hian mipuite nge mawhphur ang a sorkar tih pawh hi ngaihtuah tham awmin ka hria. Pu Deputy Speaker, kan ram leh kan hnam tan a serious em em a ni, i ngai serious ang u, i ngai thutak ang u, kan zavaia

kan tan tlanna tur a ni, i tangtlang ang u. Kan ram Pathianin min pek, kan luah tur chin hi chu i humhalh ang u tih hi Pu Deputy Speaker, ka tlangkawmna a ni. Hun min pek belh a ka lawm e.

DEPUTY SPEAKER : Pu Zothantluanga West-I bialtu MLA zahawm tak i lo sawm ang u.

Pu ZOTHANTLUANGA : Pu Deputy Speaker, ka lawm e. Vawiinah hian sawi tam hman a har duh dawn khawp mai a. Minister 3 chan Department 10 chuang demand kan sawi dawn a ni a. Chuvangin, sawi nghal mawp mawp mai ila.

Demand No. 16 - Home chungchangah hian sawi tur a tam hle in ka hria a. Sorkar hmasaah khan police force te chu kan ram venghimtu tur, mipuite min venghimtu tur an nih laia zu zuar-a kan han hmangte khan mi tam tak nunna a lak sak a. Police-ah hi chuan indaihlohma nasa tak hi awm ngei tur a ni hrim hrim mai a. Vawiinah hian kan Home Minister-in min hriat sak tur chu kan police force te tichak tur leh hna thawk thei tur hi chuan police force-te lak belh an ngai tih hi a chiang sa in ka hria a.

Tin, khawthlang lamahte kan kal thin a, police discipline hi a chhe khawp mai a, IR out-post eng emaw zat ka lo hmuh tawhah hian rui chungin an awm deuh ber niin a lang a. Tunah sorkar thar leh Home Minister chak tak kan nei a, police discipline-te pawh a lo tha ang a. Chu chuan kan ram venhimna chungchangah te, law & order chungchangahte hma kan sawn ang tih ka ring a. Police Station awmna hrang hrangte han en hian Zoram dung leh vangah, quarter chungchangah leh facilities chungchangah-te kan chhe viau a ni.

A bik takin Sairang P.S.-ah hmannah ka kal a, kan building-te a lo chhe em em a, kan Home Minister zahawm takin minor repair te a tih sak na a, minor repair-a dam zo lo pawh a tam mai a, min la hriat sak fo sela A.O. awm laia quarter-te kha a la ni a. Kan hre theuh a, rail head awmna tur a ni a, chumi hlawhtlinna tur atan chuan vawiinah hian contractor tam tak an awm a, hnam dang an ni deuh vek a, Mizo zingah hna an thawk a, harsatna eng eng emaw a thleng fo a, chutiang ching fel tur pawh chuan

veivahna tur vehicle an nei lo a ni. Gypsy tawng tak pakhat an nei a, an tlan aiin an repair chhung a tam zawk a ni. Chuvangin kan Home Minister zahawm takin min hriat sak se, hmun pawimawh a nih avangin motor tha kan pek belh thei lo a nih pawhin vehicle dang, two wheeler emaw tal te pek theih ni se a lawmawm hle ang. Police chungchangah chuan kha kha duhtawk mai ila.

Tin, 16-ah tho hian ka bial Aizawl West-I ah khuan Central Jail a awm a, ka zuk en thuak thuakin jail-ah pawh harsatna tam tak a lo awm a. Pakhatnaah chuan thawktu/staff an indaihlo nasa em em a, ambulance pakhat an nei a, driver pakhat tun thlaa pension mai tur hi a ni a. Dam mawh hritlan a neih chang pawhin motor khalhtu tur kha an inzawng chawp thin a ni.

Tin, an quarter, an office main building phei chu furah chuan awm ngaihna a awm lova, tui a far tluk tluk mai a ni. Khangte kha min lo hriat sak a, sak thata enkawl chi niin ka hria. Hman deuh lawkah khan auditorium an sa a, auditorium hnuai khu jail tang ten an lai a, tuizem/tanky siamna atan an beisei a, sorkar atangin sum an hmu chuang lo a. Tin, a chung kha a bang han pin khan industry atan hmun rem tak mai a ni tih kan Home Minister hian min hriat sak se ka duh a. Tin, Doctor-te nei ve bawk mahse damdawi supply-te a awmlo a ni. Chutiang te chu an harsatna a ni a. Tin, Central Jail mai ni lovin Mizoram pum pui jail hrang hrang han ngaiantuah hian kan hna ber chu jail tangte venhim, an chhuah lohna tura venhim hi ni deuh berin a lang a. Chumi ah pawh chuan kan indaihloh em em laiin a tang te nun siam thatna kawng, moral reform lam te; tin, an nunkawng han kawhhmuhan turah te hian NGO thenkhat ten hun an neih remchana an han tlawh mai thin lo hi chu, khatiang annmahni vei a, an tana thahnemngai a, hna anga neih, khatiang post te siam thei ila chuan Mizoramah hian jail hi inhremna ngawr ngawr ni lo in, moral reformation atan te pawh a hman theih ang tih ka ring a. Chung chu kan Home Minister pawhin min lo hriat sak se ka duh a.

A dang lehah chuan Demand No.16-ah tho hian, keini bial hi kan vannei a, Central Jail awmna a ni a, chutiang bawkin Home Guards hmunpui kan ni a. Mizoram Home Guards hi Mizoram sorkar hian a hmang tangkai em em a. An

thawk hah a, an rim a, an rintlak em em bawk a. Thingtlang leh khawpuiah te pawh kan bank venghimtu, chhun-zan zawma duty an ni a. Anni hi an hamthatna hi sorkar hian tuna an chan aia tha zawk an chan theih dan tur ngaihtuah a tha khawp mai. Police te an hah kan ti a, an hun hmang tam bawk mahse, chutiang tho chuan Mizoram Home Guards te hian hna an ngah a, an hun an hmang tam a. Chuvang chuan police te anga thla 13 hlawh te hi pek ve theih ni se tih hi kan Home Minister hian min hriat sak sela. Tin, tuna an indaihloh em emna te pawh hi phuhruk turin hma a la mek niin ka hria a. Chumi indaihlohnah chuan mi eng emaw zat lakbelh theihna tur chance a awm ni ten ka hria a, lawmawm ka ti a.

Tin, Education, Demand No.20 chungchangah hian, mihring zawng zawngte hian hma kan sawn dawn a, develop kan ngai a nih chuan education hmang hian develop kan awl ber a. Mihring nunah hian zirna, thiamna aia pawimawh hi a awm bik chuanglo ang a tih tur khawpin education hi kan ngaipawimawh thin a ni. Kan thian ten an sawi tawh ang khan Zoram pum puiah kan Pu hoa kum 10 kan kal ve chhung khan kan education building te a lo chhe em em a. Chuvang chuan hemi kawngah hian hma lak a ngai nasa hlein ka hria.

Khawpuiah hian English medium kan bawh nasa a, Mizo school tam tak a hlawhchham tan a. A then te phei chu defunct tawh te an ni a. Defunct ngai te kan awm laiin ka bialah chuan mak deuh mai chu Tanhril Primary School I leh Govt. Complex Primary School I te chuan zirlai hi an la seng lo a. Chuti khawp chuan an bawh a, amaherawhchu an building a te a. Tin, Tanhril Primary School I-ah phei chuan zirlai an ngah lutuk a, an Head Teacher leh teachers ho khan an thawhlawm a, anmahnii thawhlawm leh eng eng emaw atangin zirtirtu 2 an la mek a ni. Chutiang khawp chuan thahnem an ngai a. Kan Minister bakah kan officer te khan chungte chu min lo hriat sak ka duh a. A dangah education-ah hian ka bial chhungah pawh hmalakna tur tam tak a awm a ni.

Tin, kan sawi fo tawh angin Aizawl-ah Higher Secondary tam tak a awm, College pawh tam tak a awm. Aizawl bial ni ve si, keini bialah Higher Secondary School pakhatmah a la awm lo te pawh khu kan hotute khan min lo ngaihven sak ka duh a, ka han sawi nawn leh duh bawk a. Pu Deputy Speaker, Opposition Group hruiututen an rawt ang khan kan indaihloh deuh chuan min hrithiam ve deuh mai la, sawi tur a la tam bawk si a.

Demand No.36, Environment & Forest chungchangah hian sawi duh ka la nei bawk a. Forest Protection Squad-ah hian member 18 emaw chauh kan nei a. Hetilai ramri chungchang kan sawi kan sawi, kan buaina te pawh kha, hemi Protection Squad hi tilian ila. Hei aia tam leh thil tithei, a tul ang anga thuam ni sela, Vairengte leh khulai ramriah pawh khuan Assam ho in an tih angin a forefront ah forest ho an awm a, a dawtah police an awm thin a ni. Chutiang chuan keini pawh kan ram venghim turin Inner Line Forest Reserve veng tur leh khamia hma la tur pawh khan Protection Squad hi tihchak a, khulamin an neih aia tha hmanrua leh lirtheite pawhin thuam that a chakawm hle a ni.

Tin, chumi kan neih loh avanga harsatna kan tawh hi Pu Deputy Speaker, ngaihtuah let ila, i biala i kal chhoh kawngah hian i hmu fo ang a. Forest Teak puitling tawh zawng zawng, Tuirial kam ami kha a bo vek tawh. Sorkarin revenue pakhatmah a hmu lo, khawnge? Kan venhim zawk loh vang a ni. Sairang ruam lo kal ula in hmu ang. Mizoram Forest Teak plantation hmasa, a puitling tawh, hmanrua atan, furniture leh thil tul zawng zawnaga hman theih kha tunah khuan a awm tawh lo a ni, a vaiin a bo vek tawh. Chuvang chuan ven a ngai a. Serlui bialtupa pawhin a sawi a, tunah hian Vairengte ram vel ami chu Forest plantation, Teak lian tha, puitling tawh kha a bo tawh,a bo mek zel, a boral leh vek ang, hmun dang ami ang bawk khan.

Chuvang chuan hmun hrang hrangah sawi ila, tu ten nge ti bo thin, tu te nge venghim zo lo tih te pawh hi kan ngaihtuah a ngai a. Chuti a nih tho tho si chuan a revenue kha hmu law law ila sorkar hian a tha mai a ni lawm ni? A vaia hralha khatia tih pawp pawp kha central lamin an phallo a nih pawhin zawng te pawh khan tiral ve mai ila, lei duh chu an tam mai. Khaw thlangah khuan an vak mur mur mai a ni, state dang atanga kan teak lei tum hi. Chuvangin, hemi kawngah pawh hian Pu Deputy Speaker, hma lak a ngaiin ka hria.

Transport chungchang tlem han sawi leh ila. Transport-in a hma an lakna, kan Minister chak takin hma an lakna a lawmawm a. Chhiah chawi chungchang ah te. Tin, tun hmain insurance-ah kan motor kum1 bak a nung theilo a, kan lo hre lo a, a thi a, kan buai kan buai a, tunah hian kum 3 atan te pawh kan motor-hi insure theih a lo ni reng a. Hmanniah khan ka han hria a, a lawmawm ka ti a. Tin, two wheeler taxi-hi Aizawl khawchhungah chuan a tam in ti a ni mai thei a, traffic an tibuai in ti

a ni mai thei. Amaherawhchu, keini bial angah chuan Ramrikawn-ah te khuan a awm ve lo reng reng ania. Ramrikawn atangin University-a kal duh tam tak an awm a. Tin, Tanhril-a kal duh te, Aizawl lam rawn kal duh te; tin, Sakawrtuichhun lamah te, PTC lamah te, khuan kan nei lo. Chuvangin, anni base deuhte pawh hian, a pum puia kan ti thei lo a nih pawhin Transport Minister hian two wheeler taxi-te pawh hi min pe ve teh u. Khulai bial khuan kan mamawh khawp mai, keini anga mamawh ve te pawh an awmin ka ring tho. Amaherawhchu, a rate-hi sorkar hian tuk chiang sela, taxi-te ang rate dawn dawnan tlan erawh hi chu dik ka ti lo a. Chutiang chuan thalaite hna sorkar hna kan pe thei lo a, amaherawhchu, anmahnia ei an zawnna tur, cheng nuai pawh tlingloa eizawng theia kan siam hi a tha ve hrim hrimin ka hre bawk a ni.

Tin, Disaster Demand 30-ah hian han sawi leh ka duh chu disaster-te hi kan duh avanga lo thleng a ni lova, kan zavai hian, mahse, a lo thleng reng si a. Kumtin deuh thaw Tlawng luiah hian Mizote hi kan boral thin a, kan tlahlum thin a. Inhmuh mai theih a ni lova, a kar a kar Mizo dan anga ni 7 kan inzawn a kan beidawn te; tin, ni 2/1-a kan hmuuh te, a zana kan hmuhte pawh awm bawk thin mahse, a tam zawk hi chu hun eng emaw chen zawn ngai hian kan awm thin a. Tumah tlak tawh loh tur a ni tih kha a theih ngawt si lova. Helamah hian kan la thla a, a zawng turin tlawmngai chuan kan kal ve tak meuh mai, amaherawhchu, a tawp thlenga tlawmngai thin chu Sairang ruama kan unaute, an thalai tlawmngaithe klu an ni thin a ni. Hetiang nikhua hian Sihhmu, Sairang Dintharte khuan an theihtawp an chhuah thin a. Chutianga chhiatna a lo thlen pawha a zawnna tur atan lawng te, light tha deuh te, life jacket te leh thil chi hrang hrang an mamawhte hi DM & R atang hian a ngaihtuah theih ang em tiin ka han ngen duh a. Kan Home Minister pawhin min lo chhinchhiah sak se. Kumtina harsatna kan tawh thin a ni a, a bialtu mi pakhat tana han tih theih chi kha a ni lo a, sorkar anga theitawp min chhuahpui kha kan sorkar hotute ka han ngen bawk a ni e. Pu Deputy Speaker, ka lawm e.

DEPUTY SPEAKER : Pu C. Ngunlianchunga, Lawngtlai ‘W’ bialtu MLA ilo sawm ang.

PU C. NGUNLIANCHUNGA : Pu Deputy Speaker, ka lawm e. Tan nghal mawp mawp ila. Pakhatnaah Taxation Department-ah hian rawtna chhete han siam ve ka duh chu kan budget kan en a, sum leh pai kan thawhchhuah tur a tam khawp

mai a, ka hmaa miten an sawi ang khan, professional tax hi chu Union subject a nih avangin tihdanglam theih a ni si lova. Sorkar hmasaah pawh khan kan sorkar hnathawkte an hlawh atanga health care 2% tih ang chi emaw kan tum ve ang te pawh kha lawm lo hi an tam khawp mai a. MR bill-te pawh khan min lo chhawk thei ang a, Taxation Minister hian hma la ta se, kan sorkar hnathawk, cheng nuai 2 chuang hlawh professional tax ₹ 2500/- chauh chawi mai an ni a. IAS central atangin an lo kal a, professional tax ₹ 2500/- chauh an chawi a, an lawm em em a, kan IAS Officer-te an zuk kal thlak hian vairamah income tax-te an chawi a ngai a, Mizoramah khatiang kan nei ve lova. Chuvangin kan sorkar hnathawkte atang hian tlawnmgaih dilin, health care ang zawng te pawhin thawh ve ta se, an hlawh atangin 2% emaw tal lo pe ve sela, tichuan kan MR bill-a pawisa kan sen teuh teuh hi a chhawk zangkhaiin ka ring a. Keini MLA-te ngei pawh hian thawh ve ila. Kei hi cancer patient ka ni a, Mumbai-ah ka kal thin a, a chang chuan nuai 2, nuai 3 dawn hman change a awm a, MR kan bill leh a, khatiang reng reng kha a ni a. Chuvang chuan hemi hi thawh ve theih dan kawng awm se a tha awm mang e aw tih ka han rawt ve a nih chu.

Pahnihnaah chuan, Home Department-ah kan hotu hmasa, MLA zahawm tak ten an sawi a, SP kan hawng thar leh dawn a, office sakna tur pawisa pawh kan dah a. MNF sorkar hmasaah khan Congress sorkar 1998-in DC thar Lawngtlai, Serchhip, Champhai, Mamit leh Kolasib a hawn khan MNF sorkarin a chhunzawm a, tha takin a enkawl zui a. Tichuan, SP leh DC office-te MNF sorkar hmasaah khan sak a ni. A bikin Lawngtlai SP office an sak chu luah ngam a ni lova. Tin, DC office sak kha contractor pahnih an pe a, (MNF hruiitute) an sa zo thei lova, a chhe em em a, department-in an chhuhsak a an sak zawk sak a ni. Tin, Chawnhu-ah quarter an sa leh a, a chhe em em a, DC-ten an luah duh lova, Multi-modal transport a rawn awm khan SE, PWD an rawn dah a, PWD-in an enkawl a, an sa chhunzawm a, tichuan luahin a awm a ni. Tunah pawh sawn DC bungalow chiah kha DC-in a chang a, a dang zawng chu PWD-ten an la luah nghe nghe a ni. Hma thar kan lak lehna turah hian a thawktu turte kha thlang uluk ila, kum sawm, sawmhnih daih hian building sa ila, tih kha Pu Dy Speaker, ka han sawi duh a.

Tin, zu zawrh chungchangah Police-te zu kan zawrh tir avanga thi ta hum hum anga kan sawi kha a dik ber dawn em ni aw ka ti a. MNF sorkar hmasa khan IR-a lak dawn khan, ti tiah pawh a awm kha maw le, “Ka pu, hei ka teh a, a tling lo”

an ti a, “E, lo teh rawh ka ti hleinem, lo la rawh ka ti alawm” an tihte pawh kha a awm ve a, official phei chuan record a awm lem lo mai thei a. Khatih hunlai khan kan lo inla uluk lo em em a, a rui nen, rui lo nen, a ngawl vei nen, vei lo nen kan la chho kha a ni a. Khangho kha kum 10 hlawh neia an han awm phei chuan an han in chho a, zu zawrh avanga thi an ni berin a lang lo a ni.

Lawngtlai-ah sawn MNF sorkar hmasa hun laia IR lak lai khan kan u fapa hi an la ve a, zu a heh khawp mai a, a thi thuai mai ang a kan ti a. Amaherawhchu, a thawk ve zel a Mizorama zu an zawrh khan zu kha a sim dair mai a nih chu! Zu zawrh avang khan a thi lem bik chuang tlat lo a ni. Chuvang chuan Congress-in zu an zawrh avanga Police thi ta hum huma inpuh ringawt kha ‘zawlbuca e tang theuh theuh’ tih ang deuh kha kan ni em aw tih vawiinah hian Pu Deputy Speaker, khalai kha ka sawi duh a ni. A takna, a reality lai zawk kha sawi thin ta ila.

Vawiinah pawh Home Department lamah kan indaihloh dan te, post ruak kan ngah dan te kan ngaithla a, member-te atangin. Kan la leh dawn a nih pawhin fitness hi i uluk ang u. Company tam takah leh kohhranahte advertisement an siam a, ‘Zu in mi tan chuan dil buai a ngai lo ang’ an tih ang hian, Police kan la leh dawn a nih pawhin khatiang tan chuan dil buai a ngai lo ang ti ila. Hnam Run list emaw, MLA list emaw, Minister list emaw lam kha ni lo sela. Kan rama kan Police-te, kan ram veng turte kan lak dawn hian mi fit leh mi tlingte hi la ila, tichuan he kan inpuhmawhna pawh hi a bo deuh ka ring a ni tih kha Pu Deputy Speaker, ka sawi duh a ni.

Sawi tur a tam si a, ka sawi zung zung mai ang a. Home Department bikah khan keini bial lama Zochachhuah kan tih saw kan hriat theuh angin Act East Policy avangin Burma nen inhainhte kan ni a, Police Out Post dah belh kan ngai khawp mai. Tunah ngei pawh sawn Burma hel atanga ralstan mi 200 chuang, Home Minister chhannaah pawh khan an la chambang a ni an ti a. Nikum kum laihawl, inthlan hmaa bial ka fan phei chuan sang dawn Zochachhuah-ah te, Hmawngbuchhuah-ah te, Dumzautlang-ah te, Dumzau leh Laitlang-ah te an awm a ni. A chhan chu a piah lawk kha Varang a ni a, kha kha a inrina a nih avangin sawlaiah sawn Police Out Post kan mamawh khawp mai a, a khuain a mamawh bawk a. Tin, kan Home Minister zahawm tak hi kan hnungah pawh vanduaina an tawk a, a pawi ka ti khawp mai a. Vathuampui-ah min va kal sak tawh a.

Vathuampui-ah pawh sawn Out Post min dah sak ve a ngai a ni. Saw laiah sawn khaw 10 chuang an awm a. Police Out Post kan mamawh a, law & order problem awm se Vasaikai-a va kal daih a ngai a. Member zahawm tak tak ten an sawi ang khan moteor vehicle an nei tha bawk si lova. Tin, inbiakpawhna a lo harsat avangin khami thilah khan a buaithlak em em a. Tin, a piah lawkah Tuisentlang ram piah lawk kha Burma ramri a lo ni bawk si a. Tin, Parva lamte nen, Vathuampui-ah te, Zochachhuah-ah te kan mamawh hle a ni.

Tin, Jognasuri, Tuichawng dung kan tihah pawh hian Police Station hi Chawngte-ah a awm a. Lawngpuighat-ah Out Post-a awm leh a. A inkarah khan Pu B.D. Chakma hi Chakma lam bialah a ni a, kei hi Lai District-ah, Tuichawng kan inkarah a luang a, chulaiah chuan Police Out Post pakhatmah a awm lova, buaina a awm nikhua hian a buaithlak em em mai a. Chuvang chuan, Vathuampui-ah te, Zochachhuah-ah te, Jognasuri-ah te hian Police Out Post min dah sak theih chuan kan lawm hle ang tih ka sawi duh a ni.

Tin, kan Police quarter a chhe tawh a ni, khawiah pawh hian a chhe vek mai a. MNF sorkar hmasaah khan Police ho tihchangtlunna tur ‘modernisation’ an tiin ka hria a, kan la awm ve hma a ni a. Kan lo tleng hriat ve danin, sum tam tak central atangin MNF sorkar khan a hnukchhuak a, mahse khata lar ta ber chu ‘mawza man to’ tih te, ‘kel pal hungna man to’ tih te kha a ni tlat mai a ni! A hunlai khan kan Police quarter-te tha tak takin lo sa ni ila chuan tuna kan sawi kan sawi hi a kiang deuhin ka ring.

Vawiinah hian hun kal tawh rawn sawi let hrim hrim tum ka ni lo. Amaherawhchu Congress-in kum 10 sorkar a kalpui chhung khan, hmannia ka sawi tak ang khan ke thluang mai leh inkuangkuah mai kan ni bik lo. Central atangin Police tih changtlunna tur sum tam tak Mizoram sorkarin a lo haichhuah tawh avangin haichhuah leh a har a ni te pawhin ka ring a. Kan sum hmuh hi dik takin, tha takin Zoram tana innghahna tlak hian hmang zel thei ila hma kan sawn khawpin ka ring tih ka sawi duh a ni.

Demand No. 30-na, Disaster Management & Rehabilitation Department kha Minister zahawm tak khan Hunthar Veng lei tlahniam zawhna a chhannaah khan, tuna kan sorkar thar Chief Minister zahawm tak Delhi-ah a zu kal a, a zu sawi avanga rawn chhuak ta mai ang khan zawhna chhannaah a sawi kha a vanduaithlak ka

ti a. 2016 atang khan Mizoramah, helai atang pawhin kan ngaithla a, kan group leader Pu Duhoma pawhin Serchhip-te a sawi a, Champhai, Khawzawl te. Lawngtlai East bialtu zahawm tak Pu Biakzaua pawhin NH54 hnuiai Lawngtlai L3, a mual min a min mai tur ang chi te. Siaha, Mamit leh hmun hrang hrangah kan khawpui leiminin min khawih nasa em em a. Khami atan khan DPR kan siam a, mahse central khan “Mizoram tan pakhat chauh kan approve sak phawt ang che u, Hunthar Veng hi”, an ti a. Chumi atan chuan kan insawrbing ta a. Theihtawpin department lama thawktute pawhin hma an la a, tan an la a, (SPEAKER : Minute 1 a la awm aw) a kal zel a. Tichuan, vawiinah a rah a lo thleng ta a. Khulai Hunthar Veng tihna atan khuan DPR siam maia chhuak mai chi a ni lo. A hmunah an lo kal a, an uluk em em a, 30m drilling, lei zawl atanga lei hnuai 30m-ah khan engnge awm tih Guwahati atangin central Geology & Mining Department-te Mizoram sorkarin sum tam tak sengin a zuk ruai a. Anni report leh expert committee-te kaltlanga thil tih ngai a ni a. Hmannia ka sawi tawh ang khan, ‘Paula’n a phun a, Apolloa’n tuiin a chawm a, Pathianin a than tir’ tih ang deuh khan sorkar hmasain hma a lo lakna kha vawiinah a rah kan hmu chho niin a lang a, a lawmawm ka ti a, kan theihtawpin kan vei ve a ni. Tin, DM & R-ah hian pawimawh deuh pakhat chu, kum 5 lai lo enkawl ve tawh kan nih avangin, mitigation fund hi a pawimawh em em mai a ni. Hei hi dah belh a nih loh chuan eng emaw thil thuah lo thleng se. (Speaker : I hun a tawp chiah.) Pu Speaker, ham strict lo deuhhlek mai rawh. Han in chhanna tur leh han dawl maina tur ang chi, cheng nuai 2/1 lek emaw pawh han dah mai theih tur ang chi, han hmanna tur atan khan DM&R-ah hian mitigation fund a pawimawh hle a ni tih kha ka sawi tel leh duh a ni.

Education pawh hi sawi tur a tam khawp mai a, kan sawi vek lo mai ang a. Printing & Stationery kha nichinah khan kan group leader khan Minister changtu pawhin a lak duh loh vang kha a ni lo maw a tih lai te kha eng nge, thil hi a pawr lai apiang kan inzawn sak dawn a nih chuan a nih theihna chin te pawh a awm theiin ka ring a. Term hmasa khan kan hotute duhsaknain Printing & Stationery te kan han la ve a, ka bangbo khawp mai a. Tute nge dawr thin a, dawr lo thin tih te pawh kan hrelo a ni. Tun sorkar lo kalah chuan sorkar hmasa hmalaknain department 44 laiin a lo dawr ta te kha a lawmawm ka ti a. Hei hi Mizoram sorkarin sum a hailuh ve na pakhat pawh a ni. Heta tanga hlep, revenue kha Controller leh Printing-a thawktute ei tur a ni lo. Sorkarah kha pawisa lo pung kha a lut leh a ni. Chuvangin ka enkawl

ve lai pawh khan he House-ah hian a dawr te leh dawr lo te kha kan enkawl department a ni emaw, a ni lo emaw, a dum chu a dum, a var chu a var niin kan sawi mai a. An lo dawr lo a ni tih kan hriat rual rualin, khami atanga an dawr lo a ni tih kan hriat rual rual kha chuan an dawr nghal a ni, kan enkawltute khan.

Chumi avang chuan vawiinah hian department 44 laiin an lo dawr ta hi a lawmawm ka ti a, 100% hian dawr thei se ka duh khawp mai. Tin, tihlen pawh a tha ka ti a. Sorkar hmasa kan hun hma atanga lo kal tawh khawl changkang tak tak, khawl man to tak tak te an nei a. Hengte hi sorkar sum bawm pakhat ni thei a nih avangin Pu Deputy Speaker, kan sorkar hian ngai pawimawh se. A bik takin kan Controller hi department tan mi thahnemngai tak a nih zia, kum 5 ka lo enkawl ve na atang khan ka hria a. Vawiinah pawh amah a la awm hi a lawmawm ka ti a. He department hi chawinun leh chawilen tlak a ni tih ka han sawi tel duh hram a ni e.

Pu Deputy Speaker, Education Department-ah khan ka zawhna hi i phalnain ka'n chhiar lawk ang e, chhan hman a ni ta si lova. Ka zawhnaah chuan Mizorama zirtirtu indaihlohma chinfel nan SSA leh RMSA-a thawk tam tak, zirtirtu ni si, classroom-a awm lova office lama thawkte hi classroom-ah dah let tumna a awm em tih ka zawt a, min chhang hman ta lova. Mahse ziakin a chhanna nimin Zirtawp lamah khan kan hmu a. Chuta min chhannaah chuan Mizorama zirtirtu indaihlohma chinfel nan SSA leh RMSA-a thawk tam tak, zirtirtu ni si, classroom-a awm lova office lama thawkte chungchang sorkarin a zirchiang mek a ti a, lawmawm pawh ka ti a.

Zirtirtu atana lak an ni a, kan indaihloh avangin tun sorkar thar pawhin thiam takin mahni mi leh sa te bengluhna atan, mahni khaw chhung ami ngei tiin MPSC hnuai atang pawhin kan han lak sak a, duhdana kan pawh fan theihna tur a niin ka ring a. Tin, khawtual mi ngei hna lak tih chungchang hi inenkawlna dan a that chuan loh chuan engtihnamah a ni lo. Sorkar hna lak dawnin, ‘Khawiah pawh min dah ula ka awm duh ang, thahnemngai takin ka thawk ang,’ kan ti vek. Kum 2/1 an awm a, chhuanlam malaria ka vei, chumi khami tiin khawpuia luh vek kan tum. Vawiinah khawpui chhungah sikul thenkhatah chuan naupang aia zirtirtu tamna te pawh a awm a ni mai thei, chutiang khawp chuan khawpui chhungah hian zirtirtu a muka muk kan awm a ni.

Posting and transfer administration hi kan ti thei dawn lo a nih chuan sing pawh la ila, harsatna a kiam chuangin ka ring lo. Chu ai chuan vawiina kan zirtirtute hi a hunte pawh siam ila, kum 3 atan, kum 5 atan tiin zirtirtu indaihlohmaah, zirtirtu leh naupangte dinhmun en in semzai ni zawk sela, he sorkar thar hian huaisen takin hma la zawk sela, zirtirtu indaihlohma kawngah chuan hma kan sawn zawk ka ring. Chanchinbu thenkhatah te leh zirlai pawl ten Minister te an hmu thin a, zirtirtu sawn darh hi a har a ni ang tih ka ring. Tun kan sorkar pawh hian bul a rawn tan naah hian huaisen takin, a ni chu ni, ni lo chu ni lo, Zoram tan tih hi kan thupui ni se, chutiang chuan ke pen ila, vawiina zirtirtu kan indaihlohma, harsatna kan neih, thinglang kilkhawr zawktea kan sikul zirtirtu awm lohmaah te hian posting hi ti ngam ila chuan hma kan sawn zawk ka ring.

Tin, RMSA, a bik takin saw lamah kan bialah te High Sikul tlem a awm a, zirtirtu aikal chungchangah hian a manganthlak ka ti a. Zirtirtu lak dawnin B.Ed a nih loh chuan emaw, DLEd a nih loh chuan tiin qualification kan strict a. Kan han la a, thla 2/3 an awm a, a khawchhung ami, matric pass mang lo te, a then chu matric pass te kha B.Ed khan aikal an chhawr leh si a, khatiangte kha a tam em em a ni. Heng zawk hi kan sikul dinhmun leh kan zirtirtute dinhmun hi he kan sorkar hian hrechiang sela. Chulaiah chuan naupang an tam a, chulaiah chuan zirtirtu aikal an tam a, aikal kal phal loh a ni tih te hi, eng emaw natna avang te, chhungkaw harsatna avang te hi chu thu dang a ni e. Chutiang ni lovin ₹ 60,000/70,000 hlawh te, SSA leh RMSA-ah chuan ₹ 25,000 leh ₹ 28,000 hlawh te an ni. ₹ 5,000 hlawh ten an aikal an chhawr a, kal lovin hmun 4-a thena hmun 3 la a, aikal he Zoram-ah hian Education Department-ah leh SSA-ah hian a tam em em a ni.

Chuvangin indaihlohma lak belh lam hian kan harsatna hi a sukiang tak tak ang em? Chu ai chuan kan staff te leh kan sikul dinhmun hi hrechiang ila, a nih ang tur takin indahin in post ila, chuta kal duh lo te, kal thei lo te an awm a nih chuan voluntary retirement te pawh inpek zawk a, a kal thei tur zawk indah dan zawng tein hma la ila. Chutiang chuan a hlawhtling zawk ang tih a beiseiawm hlein ka hria.

Tin, Transport-ah pakhat chiah Pu Deputy Speaker, a lawmawm ka ti a, Tahan thlengin kan service dawn a ni a. Lawngtlai ‘E’ bialtu zahawm tak Pu H. Biakzaua khan a sawi tawh a. Lawngtlai-ah sawn MST a awm ve thin a, ka bial bik Vaseikai-ah hian a service thin a, mahse a awm tawh lo reng reng a, kan sorkar

kalta ah pawh khan Transport Minister nen khan kan inhnial thin a. Tunah phei chuan Lawngtlai Transport Department-ah sawn engmah a awm tawh lo! Office a awm a, MVI a awm a, chu chu a ni ringawt a ni. Khawngaih takin Lawngtlai thlang lam Pu B.D.A bial te, ka bial te cover hian BRTF road Damdep thlengin black topping a kal a, bus hi min service tir ve hram se tih hi kan duh khawp mai. Kan bial mipuite rethei leh harsa ve te te te an ni a, zin lo thei an ni bik si lova, a tam zawkin harsatna an tawk a ni. MST a nih chuan a man te pawh a lo tlawn a, sorkar hmasaa kan Minister nena kan inhnialna ber pawh ‘a chuang tur an awm lo alawm’ a ti thin a. A regular loh avangin, kal dawn nge dawn lo hriatchian thin loh avang khan, bus kha a tlan lo thin a ni, Lawngtlai – Siaha, Lawngtlai -Aizawl te pawh hi, Aizawl – Siaha te tunhma khan a tlan thin a, tunah hian tihtawp a ni a. Hengte pawh hi tun sorkar chak tak hian tlan tir leh hram ni sela. Lawngtlai-ah sawn chhiat that thilah bus han hire ve mai tur ang chi te pawh MST a awm ta lo hrim hrim saw a fuh lo hlein ka hria a, khang te kha min tihhlawhtlin sak hram se tih ka ngen ve leh duh a ni e. Pu Deputy Speaker, hun min pek belh avangin ka lawm e.

DEPUTY SPEAKER : Member te an khat liam si a, chawhma lamah rawtna kan lo nei a. Chuvang chuan kan ngaihdan leh duhdan te han puanchhuah hi thil pawimawh tak a ni si a ni. Engpawh ni se, minute tlem a la awm a, Pu Rintluanga hi ka lo hual ruk deuh a ni a, a nih leh kan chawl mai dawn em ni ?

Pu Lalrintluanga Sailo, member zahawm tak kha nakinah kan luh leh veleh kan lo book lawk a nih chu. Engpawh ni se, tam hnem ei turin thingpui in chawlh kan nei ang a, darkar engzat nge kan chawlh ang, darkar chanve kan chawl mai dawn em ni? Nimin kha minute 15 kan ti a, kan hrawk chak dan a inchen si lova kan buai hle mai. Chuvangin darkar chanve ti tawh ila, dar 5:30 P.M.-ah kan lut leh dawn nia. Chawl ang ule.

RECESS TILL 5:30 PM

5:30 P.M.

S P E A K E R : Kan tan leh ang a, Pu Lalrintluanga Sailo a hun chiahin ka hria, chumi zawahah Pu Andrew H. Thangliana.

PU LALRINTLUANGA SAILO : Pu Speaker, ka lawm e. Minister pathumte Demand zinga vawiina ka han sawi duh chu Demand No. 16-na Home Department chungchang hi a ni a.

A hmasain Pu Speaker, lawmthu han sawi a thain ka hria a. Kan Home Minister zahawm takin hun rei tak atanga kan lo thlir tawh, ka bial chhung N. Kangmun-ah Police Outpost min dah sak dawn thu hmanni zawnha leh chhanna hunah khan a tarlang tawh a, hemi vang hian lawmthu ka sawi duh a. Chutihlaiin sorkar hmasaa buaina namenlo awm, ex-servicemen hovin kawng nasa taka an zawnha chhan Home Guard D.G. dah an tum chungchangah khan he kan sorkar thar Pu Zoramthanga kaihruai sorkar hian tha takin a lehlam lehlam lungawilohna awm lovin a chingfel ta a, a lawmawm hlein ka hria a, Home chungchangah hian lawmthu ka sawi tel duh a.

Chutihreal chuan ka hmaa member zahawm tak Lawngtlae ‘W’ bialtuin a sawi kha ka ngaiantuahnaah a lian hle a. ‘Congress kan sorkar laia zu kan zawrh avang khan Police ho hi thi ta chiamah in ngai niin ka hria’ a ti a. Pu Speaker, i kaihruaina hnuaih nge ka hre lova, Congress sorkar laia Police death rate kha a sang hlein ka hria a, enfiah turte pawhin tun hunah hian ka ngen duh a ni. Chutihreal chuan mihring reng reng hi mahni insawimawi kan tan chuan eng emaw dik lo hi chu a awm a ni tih kan hriathiam a rinawmin ka hria a. Tin, DPR siam avanga disaster chungchangah khan an hmalakna nasa tak niawm-a a rawn sawi te pawh kha a ni em aw tih min ngaiantuah tel tir a. A chhan chu NDA sorkar kha ngampa takin an dawr ngam lo ni khan ka hria a, DPR hi chu a thehluh thlak mai theih a, a bawhzui lai hi thil pawimawh tak a ni a. Keipawh ka bial tan concept paper-te ziakin kan han thehlut thla a, kan bawhzui chinah chuan a lo chhuak tha viau a, bawhzui loh hi a la awm a. Chutiang chu khawvel kalphung a ni tih hretute kan ni a. Chuvang chuan DPR leh concept

paper thehluh avanga hma la chiam anga han insawi kha a bawhzui lam a awm si loh chuan thil awmze awm lo a ni tih ka han tarlang tel duh a.

Tin, kum sawm leh kum sawmhnih daih tal police building sak ni tawh sela tih te kha a han rawt a, an duh reilo hlein ka hria. Tun ang thiamna sang tawhah chuan kum za tel daih ni zawk turah khan ka ngai deuh hlek a ni.

A dawta ka sawi duh chu Pu Speaker, kan Police te hi thuam that an ngai a, thuam tha tur chuan building, lungmuang taka an awm theihna turin kan buatsaih a thain ka hria. Tun hunah hian member zawng zawngin kan sawi chu, kan Police-te building a tha lo hle a ni tih kan hria a, Outpost a ni emaw, post puitling a ni emaw, khawiahmah hian building tha tak hi kan nei tawh lo a ni tih a langin ka hria a.

Chutirual chuan vehicles hi an nei chhe hle hlawm mai a, keini bial hi international border-a awm kan ni a, khulaiah khuan crime te a awm mai bakah inrukbo te kan lo tawng tawh thin a. Khang han umzui dawn khan thil buaithlak tak awm chu Police lam hian motor an nei chhe em em mai a. Tun maiah kan lei thei lo a nih pawhin Home Minister zahawm tak hian min lo hriat sak sela, international border-a awm ngat phei hi chu tlemin min thuam tha deuh se tiin ka ngen duh a, helai hi tlang deuhin ka sawi duh a ni. Tin, Police ho hi kum sawm Pu Zoramthanga sorkar a lan loh hnuah khan an discipline hi a lo chhe hle tawh a ni tih a langin ka hria a ni.

Nichina zawhna leh chhanna huna member pakhatin a sawi ang khan ‘salute kan dawng ngun e’ tih kha ngaihtuahnaah a awm a. An salute dan te pawh a inanglo a ni, kun chunga salute inpe mawlh mawlh te hi kan tawng thinin ka hria a, heng hi a nih dan phung a ni em aw tih te min ngaihtuah tir a. Chuvangin discipline hi kan ngaih pawimawh a thain ka hria. Kan veng thlang maiah khuan BRTF te an awm a, zingah hian walk an neiin exercise an nei tha hle mai a. Mizoram Police in heng kan ti ta lo lutuk hi kan ngaihtuah nawn a thain ka hria a, chu chu ka han tarlang duh a.

Tin, Armed Forces-a awm ngat phei hi chu fitness hi kan ngai pawimawh hle tur niin ka hria a ni. Tin, tun dinhmunah hian Police kan

indaihloh zia hretu vek kan ni a, kan la mai thei lo a nih chuan Home Guard volunteer tal hi kan tihlen a thain ka hria, Pu Speaker. Anni ho hi nichina Aizawl ‘W’-I bialtu zahawm tak Pu Zothantluanga sawi ang khan Bank lamah te an tangkai em em a. Bank lamah te an duty phei chuan an hlawh chanve hi Bank-in an tum niin ka hria a. Chuvangin sum sen tlem bawk si, a awlsamna lai leh zangkhaina lai kha kan ngaih pawimawh a thain ka hria a ni. Home Guard hi an tangkai em em a, sorkar pawhin a hmang tangkai a. Tin, kan indaihloh chuan traffic-ah te pawh hian kan hmang niin ka hria a. Hengah hian police tam zawk kan la la thei chiah lo a nih pawhin lak hi a tha hlein ka hria.

A dawt lehah chuan Jail chungchang hi ka sawi duh a. Luangmual-a awm kan ni a, Jail area-a awm kan nih rualin, Mamit khawpuiah khuan District Jail kan nei ve a. Dan angah chuan a thawk te hi Jail hnaihah an awm tur a ni tih a ni a. Amaherawhchu, building indaihloh avangin kan staff mi pariat ngawt chu hla takah an resident a awm a, an tan duty a buaithlak em em mai a. Riahna engmah a awm si lova, chuvangin khung khu building thar pariat tal rang taka min sak sak loh chuan crime a pung a, jail-a lut an pung si a, a enkawltu kan pung si lo laiah hian harsatna kan tawk a ni tih kha Pu Speaker, min hriat sak tha hlein ka hria.

Tin, tunlaiah suahsualna a punlun a, rukruk, inthah tih ang chi tam tak a awm a. Chuvangin Forensic Science Laboratory-te pawh hi tihchangtlun chhunzawm a thain ka hria a, rawtna ka siam duh a ni.

A dawt lehah chuan Pu Speaker, Demand No. 30-na, Disaster chungchang hi tawitein ka sawi duh a. I veilam amite khan chawhma lam khan silpaulin sem tawk MLA nih kha an hlauin ka hria a. Kei chuan green card sem tawk MLA kan ni ang tih ka hlau zawk deuh hlek a. Ka bialah khuan silpaulin hi kan hmang tangkai em em a ni. Inchungah te kan hmang a, biakin chungah te, sikul chungah te pawh kan hmang a. Chuvangin silpaulin sem MLA nih kha a zahthlak loh hlein ka hria a, kan sem tam chuan min lawm hle ang tih ka ring a. Pu Speaker, a dawt lehah chuan Pu Lalchhandama Ralte Demand No. 20-na, School Education chungchangah hian

sawi tur a tam hlein ka hria a. A hmasa berin lawmthu han sawi leh a thain ka hria a.

Kan Minister zahawm tak hi a chak vak a, an kum te a la tlem bawk a. Chuvang chuan P.C. hun laia kan elementary, a bikin Primary School zirtirtu, eng emaw induhsak luat avanga Pre-Primary zirtirtu an lak chiam avang khan vawiin thleng hian kan la tawrh phah niin ka hria a. Qualified lo, pawl ruk pawh passed mang lo zirtirtu lak kha an tam a. Kha Pre Primary kha tihbo a lo ni a, an service an chhunzawm lo thei lova. Khatiang kha kan dinhmun a lo ni chho ta zel a, chutih rual chuan a siamtha turin kan Minister chak takin hma a la chho zel hi lawmawm ka ti a. Zirtirtu indaihlohma hriaa chak taka 946 la tura sorkara a han thlen chho te. Tin, school timing, thingtlang tana a tiha tih ngeih lo ang chi sorkar hmasain a tih a ti tawp a, Missionary hun lai atang tawha kan ei in hun te, kan sakhaw biak dan te leh kan culture mila school timing kan lo hman tawh, kum za tel kan lo hman tawha kan let leh theihna turin kan Minister in chak taka hma a han la a, kan han let leh thei te hi a lawmawm hlein ka hria a, lawmthu ka sawi a.

Tin, ka bialah kum 10 kalta sorkar hmasa chhung khan Pu Speaker, SDEO 18 kan nei hman ka tih kha vawiinah a ngheta min dah sak dawn avangin lawmthu ka sawi duh a. Chutihral chuan lumpsum grant atanga kan enkawl mek kum 2008-a Education Minister zahawm tak Dr. R.Lalthangliana hova kan din W.Phaileng Higher Secondary te chu a ngai rengin a la awm a, hengte pawh hi upgrade kan mamawh tawh mang e tiin vawiinah hian ka'n tarlang duh a. Chutihral chuan kum 2007 vela din tawh Bawngthah High School te; tin, tun maia Reiek Higher Secondary School mamawhna avanga kan han din te hi lumsum grant-ah te min han telh thei sela tiin dilna ka thehlut tel duh a.

Chutihral chuan school building a tlabal nasa em em a, ka bialah Primary School IV Phaileng ami phei chu tun ruah surah pawh khan Head Teacher room-ah naupang zawng zawng an tlan khawm a, chutiang chuan inbihruksiak ang maiin an khawsa a ni tih ka tarlang duh a. Sikul dang dang building tha kan nei tawh lova, hengah hian kan Minister hian chak taka hma min lak sak ka ngen duh a.

Tin, chutih rual rual chuan school facilities hrang hrang table te leh a mamawh chi tinreng te hi he sorkar hian zirna atan an mawmawh ang chi kha min pe chak thei se tih kha ka tarlang duh bawk a ni.

A dawt lehah chuan Pu Speaker, kan area-ah hian zawnha leh chhanna ka sawi tawh ang khan Chakma an tam a, a bik takin Hnahva, Silsury, Hruiduk, Marpara leh Bekabeki te an awm a, Mizo tawng an thiam lo a ni, Pu Speaker. Kan in communicate hlei thei lova. Zirna sikul a awm a, ka ngen duh chu kan Minister pawh tun hunah hian Mizo tawng compulsory-a Primary School atanga kan tan loh chuan Chakma leh Mizo hnam hi a awm reng dawn a ni. Chakma versus Mizo hi a awm reng dawn avangin hemi tihbo na tur chuan Mizo tawng offical language hi an thiam ve thain ka hria a. Chak taka hma lak thain ka hria a ni. A chhan chu Chakma population zatve deuh thaw hi kan ramah hian Gorkhali hi an awm a, anni nen hian harsatna kan nei ngai lo a ni, kan hriat theuh angin. Eng nge a chhan kan tih chuan Mizo tawng an thiam a, sorkar hna ni se state service-ah te, engineering-ah te, doctor-ah leh state service office staff hrang hrangah an tam em em a, Chakma hi vawiinah pakhatmah an awm lo a ni. Helai hi a bul thum niin ka hria a. Chuvang chuan Primary School-ah hian tun atanga kan tan phawt chuan kan term chhung hian kan boruak pawh hi a that ka ring a.

Tin, foreigners te pawh hi kan sawi kan sawi a, a takin kan zu hmu ve a, Chakma chuan ‘Foreigner is Foreigner’ an ti ve tho a ni. Chulai ngaihtuahna atang chuan Mizotawng an thiama, bel taka an thiam chuan anmahnia an hmeichhia te pawhin Aizawl-ah an tlhai thar te an rawn zawrh ngam chinah hi chuan kan in unauna a tha ang a, khatiang khan he ramah hian Dan anga awmte nen hi chuan nghet takin kan leng ho thei ang tih hi a langin ka hria a, a taka cheng thin kan ni a.

(Pu Speaker, i vei lam ami te kha kan duhsak deuhvin ka hria a, khawngaihin sawi tur a la tam si a. Keini hi aspirational district mi kan ni a, kan lokal na a hla deuh a, min duhsak te pawh ka’n ngiat deuh a ni.)

Tin, Chakma ho leh kan Bru unau te avang khuan zirna percentage-ah hian kan state chhungah a pawt hniamtu kan ni deuh ziah bawk si a. Chuvangin aspirational district kan nihna avang hian Education Minister pawh hian khati zawng khan min duhsak se tih ka ngen duh a. Khalai kha a pawimawh hlein ka hria.

Tin, Autonomous District Council-ah te pawh sawn Chakma tawng hi an tawng a ni kumkhua ang. Amaherawhchu, Mizo tawng hi thiam ve sela, Elementary lamah Council lam thuneihna pawh ni sela, kan Education Minister pawh hian chak

takin engtin emaw introduce dan zawng se thain ka hria a. Kan inunauna leh kan thawhhona atan te pawh a pawimawhin ka hria a, Pu Speaker, ka'n sawi duh a.

Pu Speaker, khawngaihin a dawt lehah chuan ka ngaihpawimawh em em Environment & Forests hi a ni a. Member zahawm tak takte khan climate change hi an sawi nasa em em a, a dik khawp mai. Tunlaiah chuan global warming te kan ti a, ka sawi duh chu hei hi a ni: Central lam atang hian a bik takin hma chak takin la an rawn awm thin a, chungah chuan Zoo Authority of India hian sanctuary leh national park te min rawn introduce a, official lam hi kan kal chak mah mah em aw ka ti a. A chhan chu Forests kutah ram kan pek tawh chuan kan nei let leh tawh ngai dawn si lova. Entirnan Darngawn-ah te pawh harsatna kan nei a, tun hunah hian ka bial Zopui-ah pawh hma lak chhoh mek a ni a, cheng nuai sawma ram zau tak kan tihral mai hian awmzia a nei tak tak lo. Chuvangin Forests plantation leh sanctuary kan neih te, hma kan lo lak tawhna ang chi hi enkawl ngun ni mai sela, a danga hrhalh ang zawnga hma kan lak hian kan ram tan a tha ber lovang tih ka sawi duh a.

A dawt lehah chuan Pu Speaker, climate change chungchangah hian ka ngaihpawimawh em em member ten an la sawi loh nia ka hriat chu chain saw an ti a, Thingzai khawl hi, kan zinnaah pawh kan hmu a. Thinglian ngil taka ding ni lo, kawi teng tung pawh an han en vang vang a, ft 4/ft 5 zai tlak a awm chuan an kit pawp mai a ni. Chawhmaah darkar hnih khat lekah an zo vek mai a ni. Khatiang khan kan ram ngaw hi an suat nasa em em mai a, kan Minister zahawm tak pawhin min hriat sak se ka duh a. Chain saw hi ka hriat sual loh chuan Forest lam hian permit pek an nei a. Mahse, Permit nei lo hi an tam zawk a ni. Chuvang chuan kan ramngaw thiahna tha lo deuh a ni a, pawi ka ti hle a, helai hi khap theih ni se ka ti a.

Tin, a tawp tak tak nan Pu Speaker, Transport chungchangah hian inthlan hmaa thawm lian deuh awm kha nang pawhin i hriat kha, Pu Speaker. Taxi replacement chungchang hi ngaihpawimawh thain ka hria a, hei hi khawngaihin min lo hriat sak se a thain ka hria a, khang kha ka ngen duh a ni e. Sawi tur la tam viau mah se ka duhtawk ang e. Ka lawm e.

SPEAKER : A lawmawm e. Member-te in inpuahchah tha a. Sawi tur a tam a, in indaih si lo a nih hi. Tunah member zahawm tak Pu Andrew H. Thangliana i lo sawm ang. Pu B.D. Chakma nen an inang a nia, kan pek dan.

PU ANDREW H. THANGLIANA : Pu Speaker, ka lawm e. Minister zahawm tak tak 3 Demand sawi theia ka awm hi a lawmawm ka ti a. A vai chuan ka luhchilh hman dawn bik lova. Thiam ang angin a theih theihna lai hi ka rawn thurchhuak deuh a.

Demand No.30-na, Disaster Management & Rehabilitation chungchangah khan chawhma lam khan MLA Pu Mathlana khan a rawn sawi tawh a. Silpauline ringawt lo deuh, equipment tha hi khawtinah hian kan pek theih chuan kan tangkaipui dawn viauin ka hria a. Mizoram chu kan hria a, a bik takin kan kawngte accident-prone area hi a ni fai deuh vek a. Khatiang lama chhiat tawh nikhuaah, motor accident-ah te pawh hruihrual te, torchlight te mamawhna a nasa thin a. Helam hi branch YMA kaltlang emaw te hian ngaihtuah theih ni sela, khawtin hi khang equiptment khan thuam thei ila chu a thain ka ring a. Tin, Sairang te, Hortoki-te, tuitla an awm nikhuaah lawngte an mamawh em em mai a. Khawtlang kan tibuai lo thei si lova, ngaihtuah sak theih dan hi awm se tih rawtna ka nei ve duh a.

Tichuan, Home chungchangah ka sawi tura ka tih, nichin khan message ka dawng a. Sawlai Bukpui tlangdung kan han tih mai, hmar tlang dungah sawn Police Outpost kan mamawh a. Survey an nei tawh tih thute min rawn hrilh a. Sawlaiah sawn Police Outpost hi dah ngei ni se. Tin, Excise lamah te pawh a ni tho a. Zu kan han khap tak hnuah hian illegal-a zu rawn phurh luhna highway-ah hian an hmang tan der tawh a ni tihte pawh ka han sawi tel bawk a.

Demand No.36-naah hian hmanni khan Green Mizoram Day kha kan hmang a, khalai kha ka rilruah a lian khawp mai a. Mahni bial lam han sawi ta ila. Green Tuirial Project ang zawngte pawh hian MLA hian hma la ila a tha awm mang e tih ngaihtuahna te ka nei a. Thingphun lamah khulama kan NGO-te pawh phungbawmah sawm ila, tichuan, a hnua kan thingphun tawhte pawh enkawl zui hna kha an kutah khatiang zawng khan kalpui kan tum a. Helaite hi ka rawn sawilang duh ve hrim hrim bawk a.

Demand No. 20-na, School Education chungchangah hian luh ka duh a. A hmasain Education kan sawi dawn tih an han hriat khan bial khaw hrang hrang atangin zirtirtu indaihlohma thu phone call a rawn ri nghal chuah chuah a. A tlangpuiin bial dangte pawh kan ni tho ang a, kan indaihlohma hi a nasa a.

N. Chaltlangah Headmaster nei lovin kan awm a. Party-a tlaklum deuh avang nge ni, transfer sakin kan awm ta daih mai a. Chutiangin Thingdawlah-te pawh Hindi Teacher hi a student-te parent-ten sum thawhkhawmin an ruai a, hma an la ve mawp mawp a. Tin, zirtirtu indaih ngang lohna avanga chawchhumtute pawhin class an lak lawp lawpna khuate pawh a awm a ni. Chutih rual chuan Kawnpui Higher Secondary School khu bial chhungah chuan kan neihchhun a ni a. A bawhtu pawh an tam hle mai a. Tun tum result-ah khan adhoc aided zingah chuan 100% passed kan neihna chhun a ni a. First division hi candidate 41-ah 11 lai kan nei thei a. Chutiang chuan zirna lamah hma an sawn em em mai a. Minister zahawm tak pawh ka han ngen duh chu a khaw chhuahna te a lo ni bawk a, lawmman angreng deuhah adhoc aided atang hian provincialised status hi pek theih dante awm se tih kha ka rawn sawipui ve duh a.

Tin, Transfer & Postings chungchang bawkah hian a luhaithlak angreng thin khawp mai a. Mizoramah tuna kan sorkar lai MNF-in an hun hmasa lama an lo passed tawh, chawhma lam pawh khan sawi rik a ni tawh a, “The Mizoram Education Act”, 2003 kumah helaiah siam a lo ni tawh a. Tichuan, Mizoram Education, Transfer & Posting of School Teachers, Rules, 2006- ah siam a lo ni leh a. He Rules hi a sorkar lai veka leh khami dawta rawn sorkar lehte hian an zawm tlang lo ni deuha hriatna ka nei a. House-ah hian Dan te kan siam a, Rules te kan siam a. Mahse, Dan tam tak bawhzui lem loh hi a awm a, hei hian House zahawmna te pawh hi a tihniamin ka hria a ni. Helai Rules-ah pawh hian chiang deuha lang chu, in lo zir ve chuan Posting of Teachers tih te, Tenure of Posting tih te, Grading of Posting tih te pawh a awm a. MLA zahawm tak Pu Hlanan a rawn sawi tawh ang khan khaw list-te pawh awmin school zawng zawng hi ABCD-a categorized a lo ni a. Entiran, A leh B te chu district khawpui deuhte a lo ni a. C leh D te chu “hard area” kan tih, hmun hrehawm deuh hlek anga ngaih, chakkhai han lam mai pawh harsa deuhte a lo ni bawk a. Helai danah hian fel deuh maiin a inthliar a. Consideration of transfer tih te, compulsory posting, House-a kan sawi rik tawh ang te; tin, appropriate authority te, minimum tenure, engkim heti laiah hian tarlan a ni a. Entiran, dan angin fixed minimum tenure kum 3 lo ni ta se, A leh B category emaw, A category-a kum thum an lo awm hman tawh chuan a aia hrehawm deuh zawk C leh D-ah pawh kal ve na tur ang chi, va transfer mai theihna tur Rules-te; tin, hard area kan tih C leh D a hrehawm deuha lo awm tawhte pawh an fixed

minimum tenure an hman tawh chuan, anmahnin an duh bawk si chuan A-ah emaw, B-ah emaw, hmun nuam deuhah te an awm theihna tur dan kha fel takin kan hotutem an zam a. Rules kan nei thlip thlep vek a. Hetiang hian kal ta mai ila, tuna transfer & postings chungchanga harsatna tam tak kan neihte hi a fel thei mai lo ang maw tih kha ka ngaihdan ka han sawi duh a. Tin, hengah pawh hian higher authority an awm a, inter-district-ah chuan Education Director, intra-district-ah SDEO te, appropriate authority te tarlan vek a ni a. An power hi an exercise thei a, zirtirtute an awmna hmun te tha taka an monitor a, han inthlakthleng vela hi an kalpui tak tak theih chuan buaina tam tak hi kan pumpelh theiin ka ring a. A luhai thlak angreng thin khawp mai a, Minister tan phei hi chuan a ni lehzualin ka ring a. Ani bulah khan transfer leh posting chungchangah transfer-te an han dil a. Heti laiah, "MLA hriatpuina a ngai," a ti a, a rawn pen per a. Tichuan, mahni bial chhunga ami tho kha entirnan, khaw pakhat ami kan transfer tir a, an han dah phei a. A hnawhkhah lam kha a ran leh si loh chuan, mahni bial chhunga khua leh khua kha kan inti vuivai a, a then kan intilawm a, decision siam a har thin khawp a. A khaw mi leh sate pawh kan han rawn nachungin an mi ui em em laite a chang leh lakchhuah a ngai thin a. Chumi piah lamah block leh ruling lamin an lo recommend te an lo awm ve leh zel bawk a. A buaithlak thin khawp mai Transfer and posting chungchangah hian ka han sawi belh duh zeuh bawk chu kan ruling party hruiatu ten Mizoramah thil tha lo tak mai kan practice thin chu thuneihna emaw, transfer chungchangah te thunei awm ziazanga kan zirtirtute an vaukhan ang chi te pawh hi sawi tur a tam a ni. Chulai chu ka rawn sawi lang ve duh bawk a ni. Sawi tur tam mahse ka duhtawk rih phawt mai ang e. Ka lawm e.

SPEAKER : Helam sawm hmasa ang u aw. Pu Ramthanmawia, member zahawm tak.

PU RAMTHANMAWIA : Pu Speaker, ka lawm e. Kan sawi tam tawh hle mai a, mahse, a pawimawh si a. Department 3 atangin sawi chauh ka tum ang a.

Minister zahawm tak tak te demand kan sawi turah hian a hmasa berah chuan Demand No. 20-na School Education hi ka sawi hmasa duh a. A chhan chu khawtina awm a ni a, department lian ber ti ila kan sawi sual lo ang a. Department pawimawh tak a nih avangin an sawi tam tawh hle nain han sawi ve leh ka duh a.

Pu Speaker, chuta a hmasa a ka sawi duh chu, sorkar lo siam tawh hi mipui hian kan lo hrereng lo a. zKeipawhin ka han zawt a, UT atanga state thlenga party hrang hrangin sorkarna kan lo siam tawh hun hi hetiang hi a niin ka hria a. PC khan kum 6.5 sorkarna an siam a, MNF hian 10.5 , kum 12.5, Congress-in kum 22.5 he ramah hian ro an lo rel tawh a ni. Inthlan hma khan Congress kum 10, MNF kum 10 sorkar tawh tih ringawt kha kan sawi thin a, a lo ni lo deuh a ni tih hi ka sawi duh. Congress hian sorkarna a lo siam rei tawh ber a ni tih ka sawi ve duh hrim hrim a.

Tichuan sorkar-in zirtirtu indaihlohma phuhruk nan MR 946 lak atum chungchangah hian Pu Speaker, i veilam ami te leh khawi khawi emaw atangin party induhsakna tur thil a ni tiin an sawi leh thin a. A nihna tak ni a ka hriat chu thingtlang zokhaw lamah a khua amite, a tling leh tha duhsakna tur niin ka hria a ni. Chungte avang chuan aniang, ka bial atanga zirtirtu hna dil tuma lo kalte hi party dang atangin an ni tlat a ni. “Keini chu Congress kan nia, kan chhungkua chu, ZPM kan nia ka pa te chu,” an ti thei. Education Minister zahawm takin a lo sawi thin hi an ring em em a ni. He sorkarin hleih nei lova zirtirtu lak a tum hi an ring a, kei pawh ka lawm a. Ka hnena an lo kal pawhin tim miah lovin, inthlahrung miah lovin an rawn sawi bawrh bawrh a ni. An thlamuan thute pawh an rawn sawi a ni. Hei hian Pu Speaker, i veilam amiten an hlauhthawnna hi chu ka bial ami te chuan an hlauthawng miah lo tih ka sawi duh a ni.

MPSC-in zirtirtu a la thin a, zirtirtu tha tak tak, thiam tak tak, tling tak tak a la thin a, a lawmawm khawp mai. Tichuan, hna hmuh nan thingtlangah zokhaw lamah an han awm a. Member zahawm tak tak ten an sawi ang khan kum khat te, kum hnih te chu tha takin an awm a ni. Kan school-te pawhin hma an sawn phah em em a, an lung pawh a awi em em a ni. Amaherawhchu, kum hnih a liam hnu chuan chhuanlam chi hrang hrang hmangin aikal an la deuh zel a ni. A thiam a te MPSC-in an la a kan lawm tehlul nen, Aizawl lamah leh an khaw lamah kirin a thiam lo zawk a khaw mite kha an aiah khan an dah tlat mai a. Chu chuan zirna hi a tichhia niin ka hria. Pu Speaker, MPSC-in an lak hi a lawmawm rual rualin an thawk leh duh tak tak si lo hi a buaithlak lai chu niin ka hria. Chuvangin, sorkar chuan remhre takin insawn dil dil leh tawh lo tur, a hmuna nghet taka, rilru muang taka, phur taka thawk tur, a khaw mite leh a chhehvel amite lakna tura ruahmannna a siam hi a fintlhak hlein ka hria. Ka hmaa sawitu member zahawm takin a sawi ang khan Zokhaw lam

leh thinglang lama bialtute kan luhaina ber chu Aizawl lama insawn dil hi an ni vek mai a ni.

Kum a han thar a, hrisel lohna chhuanlam tur tam takte an lo nei a, a dik te pawh a dik ang. Amaherawhchu, a hriselte pawh khan insawn an duh tho tho, ka awm rei tawh tih mai mai in. Education Department-a zirnaah hian harsatna kan tawk nasa em em a. Zirtirtu indaihloh laiin insawn dil hi an tam em em a ni. Vawiin thleng hian ka lo la dang ngar ngar a, ‘in aiawh tur awm hma chu in chhuak thei lo ang’ ka lo ti thin. Minister zahawm tak hnenah pawh ka ngen a, ka hrilh a, ‘ka bial chhunga zirtirtute lak chhuah a nih dawn chuan an aiawh tur tal in dah a ngai ang,’ ka ti a. Ka ngenna chu min zah sak a, vawiin thlengin harsatna nei lovin kan la awm a. Amaherawhchu, ka bialah Headmaster neih lohna school hi 26 kan ni ringawt mai a ni, school 79-ah 26-in kan nei lo a. Zirtirtu 2 chauh awmna school 15 te kan ni a. Kan indaihlohma khi a nasa em em mai a, Minister zahawm tak hian min hriatpui a, nakina MR Teacher lak hunah pawh a tling leh tha te, a khaw mite thahnem zawk min duhsak turin ka ngen a.

Tin, Higher & Secondary School hi 2 Farkawn-ah leh Khawbung-ah kan nei a. Tulna avangin Vaphai-ah tunhnai khan khawchhung tangrualin an din bawk a. He school-ah hian Science zirna kan nei lo a, Arts chauh zirna kan neih avangin kan zirlai Doctor te, Engineer te ni thei tur tam tak hi an nih loh phahin ka hria a. Aizawl tlanga rawn zir ve thei lo, miharsa zawkten khilaiah an zir a ngai a. Chuvangin, Science zirna hi Minister zahawm tak hian a hun chhungin min hawn sak ngei se tih ka ngen duh a.

Demand No. 16-na Home Department-ah hian ka sawi leh duh a. Pu Speaker, Dungtlang Police Outpost khi Police Station turin Minister zahawm tak te, kan CM zahawm takten hma min lakpui niin ka hria a, a lawmawm hle a. Sawi tam ka tum lo a. Kan dinhmun hi in hrechiang a, ramri bula awm kan nih avangin thil tha tam tak a chhuak a, thil tha lo tam tak a chhuak bawk a, chutiang chiah chuan a lo lut leh bawk a ni. Theih anga chakin helai hmuna Police Station puitling tur hian hma min lak sak zel turin ka ngen duh a ni.

Zu chungchangah khan Pu Speaker, ka han sawi lawk duh chu kan force-te nunna chan an tam em em a ni tih kan hria a. An hmunah/battallion-ah zu kan zawrh chilh tlat a, zu an lo in lo thei lo a ni. Nunna chan tam tak an awm a; tin, tuna nunna

chan si lo, zu ngawl veia kan chhuah takte hi department lam hian engtin nge kan enkawl dan tur lai hi ngaihtuah tel ngaiin ka hria a, chungte chu ka sawi duh a. Anmahni hmunah zu kan zawrh tlat si avangin an lo in lo thei lo a, vawiinah hian zu ngawl vei eng emaw zat an awmin ka ring. Heng hi kan ngaihtuah a ngaiin ka hria.

A tawpnaah chuan Demand No.42 Transport Department hi kan Minister zahawm tak, chak tak hian kan harsatna te hi min hriatpui avangin kumin kumtir atang khan MST bus a service tir a, kan lawm hle mai a. Khuangthing-ah pakhat an tlan tir a, Farkawn lamah an tlan tir bawk a, Vaphai, Dungtlang, Samthang te intawm turin. Hei hi khawpui leh a chhehvel atan chuan thil mak a ni lem lo a, keini bial tan erawh chuan lawm dan hi a dang khawp a. Khawbung-a kan ZNP unau hrhauit pakhat chuan tihian mi ti a ni, “Pu Papui, MST bus a rawn service leh thei hi a va mak ve, a tih theih tawh lohah kan lo ngai asin” a ti a, lawmthu min hrilh a ni. Mipui hi an lawm tak tak a ni. A chhan chu motor man te a lo to a, oil man te a lo to a, sumo ticket man hi a to em em tawh a ni. MST-a an kal chuan a man chanve in an thlengin an haw thei a. Hei hian Zokhaw lama kan mi leh sa, thingtlang unaute hi lawm tak tein an lawm a. Bus tha zawk leh tam zawk he sorkar tharah hian lei a ngai, tih belh a ngai a ni tih hi ka sawi tel duh a. Kan mite an la rethei si a, MST-a kalna lo awm hi Aizawl-ah te damloa lo kal theihna chance an lo nei bawk a. Transport Minister hian hei hi hriain bus tha zawk leia, service belh tirte hi kan beisei, kan nghakhlel hle a ni tih kha a tawp nan ka sawi duh a ni e. Ka lawm e.

SPEAKER : Member zahawm tak Pu Zodintluanga Ralte i lo sawm ang. Ani hi minute 15 nei sa kha a ni a.

PU ZODINTLUANGA RALTE : Pu Speaker, ka lawm e. Demand No. 20-na School Education-ah hian tawite han sawi ve ka duh a. Minister zahawm tak hi a hun hmasa lamah te zirna lam ngaipawimawh mi, MZP hrhauit thin a ni a. Minister a nih phat khan min tilawm em emtu chu MZP office atanga a thusawi an rawn chhuahah chuan a ngaih pawimawh tur chu rationalization of teacher chungchang a ni ka lawm em em a. Member tam takten an sawi ang khan zirtirtu hi chu an tam thawkhat a, mahse thingtlangah an tlem a, khawpuiah an inbeng khawm a. Hengte hi an rawn sem darh turah kan lo beisei a. Interim budget session kan neih khan rationalization of teacher chungchang kha ka zawt a. Zirtirtu an lak belh turte leh chumi hnuah an tih tur thu khan min chhang a. Tin, Hnan Run-a a thusawi

chanchinbuua kan lo en chuan zirtirtu transfer chungchangah chuan MLA-te rawn hmasa lo chuan kan ti dawn lo tih kha chanchinbuah te kan lo hmu a ni. Amaherawhchu, vawiinah i dinglam leh i veilamten vawiin nilengin demand kan sawi a. Kan sawi tam ber chu zirtirtu inlak chhuahsakte, Kawnpui bialtu Pu Andrew chu a vannei a, ama phalna in an lo sawn a ni maithei a. Keini kan bialah phei chuan zirtirtu an transfer hi kan sawi peih tawh lo a ni, chutiang chuan dinglam atang pawhin chawhma lamah te an sawi a. Member zahawm tak tak te khan sawn lo turin a ngen in an ngen lawp lawp mai a ni. Ka hma lawka rawn sawi pawh khan an zirtirtu awm chhun te sawn lo turin a ngen a ni. Khatianga ngen a ngai a nih chuan kan sorkar chhung hun reiloteah hian an nawm an mak in a remchangah an duhsak zawng te hmun thaah an indah a ni tih a ti chiang em em mai a. Chuvang chuan an dinna ngai, a tira an sawi ah khan ding thei hram se tih ka rawn ngen duh a. Tin, vawiinah pawh subject a topic ber, zirtirtu lak tur chungchang hi Pu Speaker, tlemte ka rawn sawi ve duh a. Mizoram Public Service Commission-in sorkar hna an lak reng reng hian vui leh vai an awm lo e, ti ila kan sawi sualin ka ring lo. Fair takin, free takin exam an conduct a, interview nen a tlinglo te pawhin a tlinga te kha kan tluk lo a ni an ti mai thin a ni.

Chungah chuan kan thalai lekhathiam tam tak te ngaihtha takin a dawt leh hun atan an in prepare a, chumi chu exam a awm leh dawn, chutah chuan ka try leh dawn e, tiin nasa takin an bei thin a ni. Tunah chuan zirtirtu kan lak turah MPSC kaltlang lo in kan han la dawn ta a ni a, a pawi ka ti khawp mai. Tunah hian zirtirtu an lak hun atana lo inpuahchah tawh hun rei tak sum leh pai tam tak sengin, tha leh zung tam tak an seng a. M.TED te exam theih ang ang an va exam a, khang te kha a tul dawn tawh lo an han tih phei hi chuan a rilru nat thlak a ni. Kan thalai sang tam tak hetiang opportunity, sorkar-in hna a lak hun, a thiam leh tha an lak theiha, “kei hi chu ka lut ve dawn a ni” ti a zanah tlaivar thak thak a lehkhazir. General knowledge bu an lei a, an inchhiar zau a, interview-na ah te tih that tum a an inpuahchah thin nakha, vawiin ni atang chuan khang thalai beidawng khan khatiang zawng khan hma an lak tawh loh a rinawm tlat mai a ni. Chuvangin Pu Speaker, hun a la awm a, tun ah pawh an lak dan tur engkim final tak tak a la awm lo a. Heng te hi free leh fair taka a tlinga te pawh a tling lo te pawhin an lawmpui theihna atan, MPSC ah ngei hian dah let leh sela, Zoram hi kan damin ka ring a ni.

Tin, an insawimawina, kan tu leh fate zirtir turin a thiam lak aiin a thiam lo deuh pawh a khaw mi a nih chuan kan la tur a ni tih kha, a lehlam zawng chuan a ngaihthatawm loh hle mai a. A lehlam zawng chuan kan educational system hi chhe vek mahse a pawilo a ni tihna rilru kan pu ta em ni ka ti a. Helaiah zawhna leh chhanna hunah Aizawl North – II bialtu MLA zahawm takin, zirtirtu lak tur chungchangah party worker recommend te, party list te a awm loh theihna tur atan Minister zahawm tak he House assure turin a ngen lawm lawm a, kan assure theilo a ni. Khatianga kan assure theilo a nih si chuan lo ngaithlatu, zirtirtu ah thiamna nena luh tumtu te tan chuan khatatang ringawt pawh khan a beidawnthlak tawh em em a ni.

Tin, Pu Speaker, sorkar hna lak dan kan hria a, vawiin niah pawh zirtirtu an la dawn, Education Department-a zirtirtu an lak thin dan pangngai hi hei bak hian an kal dawn lo. Chutah chuan district level-ah district tinah kan la dawn an ti, engtin nge a khua amite kha an hriat hrان dawn? Post by post-in an la dawn si lo a. Member tam tak ten a khua amite tan chance kan pe a ni, an ti. Bungzung khaw pa kha Bungzung-ah post kha a awm em tih kha kan hre lawk tlat lo, Pu Speaker. Engtinne a khua amite kha kan induhsak theih ang? Chuvang chuan hengte chu hmai phih faina mai mai a ni. A nihna tak tak ah a khua amite kan induhsak dawn a nih chuan, chumi khua ah chuan Bungtlang-ah, Bunghmun-ah zirtirtu an indaihlo NASA em em a, chutah chuan zirtirtu pakhat kan dah chuan kan ziaawm deuh ang tiin, Bunghmun-ah emaw, Bungtlang-ah emaw awm duh ho khan khami atan khan post kha apply mai sela. Tuna an rawn sawi ang kha chu a dik thei a ni. Amaherawhchu sorkar kalphungah chuan khatiang kha a theih siloh a, zirtirtu an lak chuan an generalize a ngai a, chumi khaw bik atana lak kha a thiang tlat si lo. Chuvangin Pu Speaker, kan zirtirtu lak tur hi ennawn leh turin kan Minister zahawm tak hi ka ngen ngawih ngawih a. A khua amite an la duh a nih chuan a khua a mamawh zirtirtu kan neihloh ngawih ngawihna khua, khaw miten leh MLA ten an hlawh kan tum sakna khua, private- a kan lakna khua ah hian la turin kan Minister zahawm tak hi ka ngen a ni.

Tin, Education-ah a tawp ber atan chuan kan Minister zahawm tak hian Mizoram New Educational Policy (MNEP) hi engtik atang in nge kal tan pui min tum tih hi wind up na ah min rawn chhang thei se, tih kha ka rawn sawi theih chu a ni a.

Tin, Pu Speaker, Demand No-16 na, Home Department-ah hian tukin zingah zawhna ka zawt tawh a. Kan House zahawm taka kan Home Minister zahawm takin a chhanna kha official, sorkar in a stand turah kei chuan ka pawm thlap a. Mizoram leh Assam inrina ramri ah hian sorkar in ramri a pawm tur chin hi zirchian mek a ni tih kha he House zahawm taka a sawi a nih avangin kha kha ka pawm a. Chuvang chuan ngenna ka siam duh chu kan House Leader pawh a awm a, Socio Economic Development Policy hi Government of Mizoram Planning & Programme Implementation Department in a tih chhuah a ni a. Hetah pawh hian a introductory note-ah pawh hian kan House Leader zahawm tak kan Chief Minister signature thlapa tih a ni a. Hei hi government press ah chhut niin member zawng zawng te pawh min rawn pe tawh a. Pu Speaker, ka rawn request duh chu he SEDP-a an ziah hi kan tam lo bawk a, hemi bu hi recall leh vek sela, chhu tha sela, an chhut that chu min rawn sem tha leh turin ka ngen duh a. A chhan chu, the government accepts the state boundary based on the Northeast Bengal Frontier Regulation, 1873, hetah hian a ti a. He House zawhna chhannaah ‘kan zirchiang mek a ni’, an ti si a. Chuvang chuan, he lehkhabu hi rawn recall leh vek sela, sorkar stand dik tak zawk kha rawn chhu chhuak turin ka ngen a. Anih loh chuan mipuiten khawi zawk nge sorkarin a thuchhuah ve ve, official taka a chhuah ve ve si kha, min tibuai thei ang tih ka hlauh vang a ni a.

Pu Speaker, Home Minister fel tak, he House-ah pawh senior kan nei hi ka lawm em em a. Sorkar hmasa tih dan te member zahawm tak tak atangin kan hria a. MNF sorkar hmasa hunlai ang kha a hunlai hian thleng lo hram se ka duh khawp mai. Kha hunlai khan kan ram a thim a, a pik a. A hman hmanin min kidnap a, inkhulchhuah a ngai a. Khatihlaia Home Minister phei chuan min kidnaptute kha an kidnap te an rawn chhuah avangin Tennis Court-ah lawmthu te a sawi anih kha, kidnaptute chungah chuan. Aizawl khawpui chhungah, hmun hran hranah tualthihna te, hel camp a awm thin te, ek in kal thei te, mawza man to te kha, khawiahnge an dah zawh tak? Khatiang zawng zawng hunlai kha kum 10 Congress a sorkar khan kan hre tawh lo va. Khatih hunlai khan Home Minister chak takin kan ram a kaihruai a. Harsatna kan neih reng reng pawh rang takin chhutmih anni a. In kidnap te, helte nena inbeih ruk ruk te a thleng tlem em em a ni. Chuvangin vawiin ah pawh kan Home Minister zahawm tak hi a hmaa sorkar anga kal tawh lo va kan ram a enkawl chhohna turah duhsakna sangber ka rawn hlan duh bawk a ni.

Pu Speaker, Demand No. 36 – na, Environment, Forests & Climate Change-ah hian Minister zahawm tak hi ka sawipui tawh na in, House-ah hian min assure theih takin a wind-up naah. Hmanniah news te kan lo hmu a, Teirei Forest tih vel anuin ka hria. Forest Department a hnathawk tam tak an ban a, chumi aiah chuan party workerte an la teuh tih te a ni a. Ka bial Thenhlum-ah khatiang chi Forest Watcher kha, hunrei tak Central sorkar atanga funding a tawp avangin a thawkhai te kha hunrei tak thawk thei lovin ban lai lawk anni a. Chumi hnuah Central sorkar atangin scheme a rawn kal leh a. Chungte chu mi, mamawh tak tak te leh Forest Department tan pawha mi tangkai tak tak eng emaw zat lak anni a. Chungte chuan khawthlang lama an inban sup sup ang khan ban ve mai an hlau em em a. Chuvangin, kan Minister zahawm tak hian hetianga mi eizawnna, chhan leh vang mumal pawh neilo a, ruling party member te an luh ve duh avanga han inban tawp a, han inthlak ang hi chu a ti lo thei em tih kha nakinah wind-up naah min hrilh thei se ka lawm ngawt ang.

A tawp ber atan Pu Speaker, Demand No. 28 – Labour, Employment, Skill Development & Entrepreneurship-ah khan, kan hriat angin central sorkar duh dan a ni a, kan sorkar pawhin kan ti a. Tukin zinga i ngaihpawimawh em em Labour Cess-a sum tam tak hi a rang thei ang bera, a nihna tur ang tak taka kan Minister hian lo enpui a, hman vat vat theih turin ka rawn ngen bawk a ni e. Pu Speaker, hun min pek avangin ka lawm e.

SPEAKER : Member zahawm tak Pu C.Lalmuanpuia kan sawm leh e.

Pu C. LALMUANPUIA : Pu Speaker, vawiinah Minister zahawm tak tak 3 te Department chan 10 lai demand kan sawi thei hi lawmawm ka ti a. A hmasa bera ka sawiduh chu Demand No. 16 na, Home Department chungchang hi a ni a. A changtu Minister zahawm tak Pu Lalchamliana hi he Department a chang hi a inhme hlein ka hria a. Home chu a pawimawh zia kan hria a, kan ram innghahna bulpui te pawh a tih theih awm e. Kan ram himna leh him lohna pawh thui takin a innghat a ni a. A Minister hian hneh takin a chang chho a. Tuna a hmalakna tawh chin han thlir pawh hian a lungawithlak viau a ni. Home Department hi ka han thlirchiang a, post ruak hnawhkhah tur tam tak a lo la awm te hi a pawi ka ti a, 2800 chuanglai hnawhkhah ngai te hi a pawi tak zet zet a. Thuam chak, tih chak a ngai a ni tih a langchiangin ka hria.

Tin, tunlai thiamna thar ber hmanga an hmanruate pawh hi tihchangtlun tulin ka hria a. Ka sawi duh chu tunlai an hmanrua kan tihna chhan chu ka PSO silai ka en sak a, revolver kha a la pai a. A safety lock pawh a lo la awm reng reng lo mai a. Ka bial chhungah disaster thil a thleng a, kan kal tluk tluk a. Ka hnungah te mi zui ve khut khut si a, ‘i rawn tlu ang a, a safety kha a awm bawk si lo a’, te kan inti a. Chutiangte tunlaia kan la pai te hi Pu Speaker, thuamchak kan ngai hlein ka hria. Amaherawhchu, ‘va thleng teh a’, kan inti a. Tunah khan min rawn thleng sak a, Home Department chungah pawh ka lawm khawp mai. Khatiang khan hmalakna tur tam tak a awm a. Tin, lirthei chungchang a ni emaw, kawng hran hranah hian Home Department hi thuamchak ngai hlein ka hria a. Kumin kumtir lam khan Sakawrdai lamah kan han zin a. Chutah pawh chuan kan pilot-te motor kha a tlan thei ta miah lo mai a. ‘Hei hi in dinhmun em ni?’, kan han inti a. Chutiangte chu an dinhmun kal mek a ni a. Home Department hi thuamchak an ngai khawp mai tih ka sawilang duh a.

Demand No. 30-na, Disaster Management & Rehabilitation chungchang ah kan ramah disaster a thleng nual mai a, a pawi ka ti tak zet zet a. Ka bial chhungah ngei pawh Hunthar Vengah lei tlahniam, lei tawlh kumhlun kan nei a. Tihdam tumin sorkar hmasa atang khan kan ngaiantuah tawh ang khan chak taka hmalak a ni a. Tun dinhmunah project-te pawmin peihfel a lo ni ta hi a lawmawm ka ti a. Helaiah hian hmalakna tur tam tak a la awm a, heng zawng zawng disaster lam hawi zawng hian ke kan pen nasat a tulin ka hria a. Tin, nichina ka sawi tawh ang khan Edenthal-ah kan nei bawk a, Electric Vengah-te kan nei bawk a ni. Mizoram hmun hrang hrangah hetiang thleng thei dinhmun hi a tam em em a, chuvang chuan disaster lamah hian ke kan pen chak leh zual a tulin ka hria a.

Chu mai ni lo in disaster hi chu a rik rup tawh hnua inbuatsah a ni a. Mitigation fund-ah hian dah tam theih ni se a lawmawm khawpin ka ring a. Nichin khan a changtu Minister zahawm tak khan ka zawnate min han chhang a. Mitigation fund-ah khan nuai 996 dil a ni a, mahse nuai 386 chauh mai hmu a ni te kha inbuatsah kan ngai nasa a. Chhiatrupna thleng thei tam tak a awm a, hengah hian a mitigation, a invenna lam pawh hi dah tama, uar tam a va tha em tih kha ka han sawi lang leh duh bawk a ni.

Pu Speaker, kan luhchilh vek hman lo ang a, tawi te te ka sawi ang a, hunte a kal deuh tawh bawk a. Pathumnaa ka sawi duh chu Demand no. 20-na, Pu Lalchhandama Ralte, Minister zahawm tak chan School Education chungchang hi a ni a. School Education hi a pawimawh em em a, kan ram, kan hnam tan kan hmathlir thui tak he department-ah hian a innghat a ni. Mizoram pum kan han fang a, kan han kal kual a, kan zirna dinhmun ka han thlir hian a lungawithlak loh in ka hria a. Amaherawhchu, chutih mek lai chuan a changtu Minister zahawm takin a intiam ang ngeia zirtirtute indaihlohma hmun hrang hrangah a sem kual ngam a, huaisen taka zirtirtute pawh a siksawi ngam erawh hi chu Pu Speaker, a fakawmin ka hria a, a huaisen a. Hei hian a hmalam hunah pawh fun ngam loh pawh nei loin, huaisen takin hma a la dawn nia ka hriat avangin a chungah lawmthu ka sawi duh a.

Zirtirtu hi indaihlohma a nasa hle mai a, lak belh turte pawh a ni a. Zirtirtu 900 chuang lai lak belh turte pawh kan han ngaithla a, a lawmawm hlein ka hria a. Zirtirtu lak hi a pawimawh em em a, ka lo thlir ve danah chuan Pu Speaker, zirtirtu pakhat kan lak belh hian kum 30-40 a nghawng a ni. Kan lak sual vaih chuan an service chhung hi kum 30-40 a ni a, kan zirlai hi a hnuk hniam dawrh thei a ni. Amaherawhchu, zirtirtu lak dan tur kalphung an han sawi khan a thlamuanthlak hlein ka hria a, trained teacher qualified ngei kan la ang tih kha. Politics-a duhsak zawng mai kan la dawn lo a ni tih a chiangin ka hria a. Mithiam bik, trained-te pawh tunlaiah chuan a harsa tawh em em a ni. Mi nazawng an train hlei thei tawh lo, entrance-te a awm a, mithiam tak takin zirtirtu training hi an train tawh a ni. Chuvangin, zirtirtu kan lak belh tur pawh kha a him tawk a ni tih kha a chiangin ka hria a, a lawmawm tak zet a ni.

Tin, ka ngaihpawimawh leh pakhat chu school building hi a ni a. Kan han kal kual a, school building hi a lo upa tawh khawp mai a. Thuam that a ngai a, a inchung far te kan han hmu a. Chuvangin, school building pawh hi thawmthat dan kawng an ngaihtuah mek niin ka hria a, hei aia chak zawka thawmthat ni thei se a lawmawm ngawtin ka ring.

Tin, School Education chungchanga ka sawi lan leh duh talk chu, zirna kan kalpui mekah hian(Hindi Teacher chungchangah hian) Hindi hi kan han zirtir ve a, kan han zir a, an thiam tawk lo in ka hre tlat mai a, Hindi-in an tawng hleithei lo a, an hrethiam tawk lo in ka hria a. Hindi-ah te pawh hian hei aia tan lak leh zual hi a

tulin ka hria , kan zirlaite hi. Helai pawh hi kan Minister zahawm tak khan khawngaihin min lo hriat sak se thanin ka hria.

Tin, chu lo leha ka sawi duh chu zirlai harsate tanpuina tih hi ngaipawimawh em em a. Elementary chinah hi chuan Mid-day meal-te an dawng a, chhunah pawh tiffin pai a ngai lo a, a chunglam Higher chinah te hian Zokhaw lam a kan zirlai unaute an harsa em em a ni, a takin ka hmu a, ka hria a. Chhun tiffin eitur pawh nei mumal lo te an awm a. Tin, an kawr nghawng han check a, a nghawng lo chhe vekte, pheikhawk mumal bun tur nei lo te pawh hi kan lo la awm a. Heng ho tan hian engtinng eirlu kan sen ang? Heng ho tan hian engtinng kan luanliam ang? SSA atangte hian heng ho te hi chu an tam lo a, tih dan te hi a awm em tih te ka ngaihtuah a. An khawngaihthlak em em a, khawpui Aizawl-te an rawn pan khawm ve a, heng ho tan hian engtinng ngaihtuahna kan sen?

Kan ram hi kan changkang ve viau tawhin ka hria a, heng-ho tan hian an zirlai, a tuka an tiffin inhlawhna turte pawh hi, a darkar bi te pawh hian inhlawhna hi kan siam sak thei em aw tih te ka rilruah a rawn lang a. Hengte hi a la harsa deuh a nih pawhin kan hma hun lo kal zel turah chuan ngaihtuah theih ni se a lawmawm ngawtin ka ring.

Tin, school timing kan han tidanglam dawrhte pawh hi a lawmawm tak zetin ka hria. Naupangte, a bik takin khawpuiah zirna tha zawk, zirna sang zawk, changkang zawk duhin an rawn kal khawm a, chhungte an rawn bel a, zingah hma taka an kal hian chaw te hi ei hman lo in an lo kal thin a. Hengte pawh hi tunah chuan a lo reh chho zel niin ka hria a, Pu Speaker, a lawmawm tak zet a ni.

A dawt lehah chuan Demand No. 42-na Transport Minister zahawm tak Pu T.J. Lalnuntluanga Department chan hi ka sawi leh duh a. A changtu Minister hi a inhme hlein ka hria a, a lawmawm tak zet a, hmalam hun pawh a thlir thiamin ka hria a, a inbuatsaihna pawh hi a tha viau a ni.

Ka sawi duh chu Pu Speaker, Transport Department hi a pawimawh em em a, tihlen a ngai a, miharsa zawkte tan MST bus-te pawh hi hei aia tam zawk hi dah theih ni se a lawmawm ngawtin ka hria a. Tin, ka sawi duh chu(hun a tawp mai dawn a) Urban Transport lam hi a ni. Khawpuia kan transport-te hi tih changtlun, tih len emaw a tulin ka hria a. Kan kal dan system, tuna City bus kan han tlan tirte pawh

hi a len lutuk chuan hei aia te zawkte hi tlan tir a ngai a ni. Kan public transport hi kan ennawn a ngai a, mi 10 emaw, mi 5 leng emaw te kan intlan chhawk tirte hi a tul tawh em tihte ka rilruah a rawn lang a.

Tin, Urban Transport kan sawi laia pawimawh ka tih chu, tunah pawh kawng chhawngte kan siam dawn a ni a. Kawng chhawng chungah hian metro-te hi a la leng thei ang em? Main spine-ah hi chuan metro-te pawh hi kan ngaihtuah tan a tul tawh lo maw? Traffic jam awm ve lo te hi. Hengte thleng hian Pu Speaker, kan ngaihtuahna hi kan sen a ngai a. Public transport kan tih that chuan tuna kan traffic jam luih luih te pawh hi min chhawk ngei ka beisei a ni.

Pu Speaker, sawi tur chu ka la ngah khawp mai. Ka lawm e.

SPEAKER : Tunge sawi leh ang? Pu Lalduhoma kan sawm tawh dawn em ni? Member zahawm tak Pu Lalduhoma kan sawm e.

PU LALDUHOMA : Pu Speaker, ka lawm e. Kan session chhung zawng hian zawhna hunah a ni emaw, Demand sawihonaah a ni emaw, member ten kan ram tan te, kan bial tana kan mamawh leh kan harsatna kan sawite, kan Minister ten min chhanna langsar ber chu sum harsatna a ni.

PU LALDUHOMA : Post ruak za tel, sang tel neihna department a awm thleh thluah a, an fill up theih loh thu, Finance Department in an phal loh thu kan ngaithla ngun a. Building sak mek zawh theih loh te, a thar sanction la awm hleitheilo te leh material leh hmanrua chi hrang hrang indaihlohma nasa tak kan hospital-ah te leh thil dang dang ah te a tam a. Kan harsatna lian ber nia lang chu suma kan indaihlohma hi a ni a.

Chuvang chuan Taxation Department ah hian ka han tan ang. Kan budget hi han thlir ila thil 3 a ni mai a. Central atanga kan dawn tur leh keimahni thawhchhuah ve leh capital account hnuiaia kan puk hemi 3 tling khawm hi a ni mai a. Indaihlohma hlirin a khat a, chutihlai chuan he House-ah hian ‘Thingkhawnpui’ tih hi kan ngaithla zing ta khawp mai. Khawilaiah hian nge Thingkhawnpui hi a awm ? Vawiinh hian min hrilh sela ka duh, Zoram mipui hi bum lo ila ka duh, kan budget bu ah hian Thingkhawnpui ka hmu miah lo. Cheng khat mah ka hmulo, chu chu a ni a, tihian kan ti vak zel a. Chuvang chuan kumina kan budget hi han en ila kan owned

tax leh owned non-tax revenue a kan lakluh tur hi vaibelchhe 225in a lo pung dawn ta a.

Zoram mipuite hian vaibelchhe 225 hi kan tuak dawn a ni, kan ipte atangin, chhiah in a chiang reng. A department budget pun dan pawh hi 55%- in a pung daih a ni. Chu chu khawia mi mah sum lo kal tur hi kei chuan ka hmu ve lova Thingkhawnpui pawh ka hmu bawk lova. Heng sum hi khawi atangin nge alo kal thin kan tih chuan kan owned tax chu chu GST te, vehicle tax te, land revenue te a langsar an ni a. Kan owned non-tax revenue chu tui bill te, electric bill te, guest house-a kan riahna man te, licence fee te, sorkar bus a kan chuanna man te kha a ni leh mai a. A bak a awm tak tak lova, heng zozai tuak chhuak tur hian Zoram mipuite hian phurrit kan hmabak a ni tih hi a chiang khawpin ka hria a. Chuvangin application form paper pakhat lek pawhRs.150/- in an zuar ta a ni a. kan sorkar sum mamawh zia chu a takin kan hmu mek zel a ni. Pu Speaker, India ramah hian Mizote tluka chhiah chawi nasa hi an awm chuang lovang. Hla tak atangin kan awmna a kilkhawr avangin bungrua leh ei tur engkim a lo lut a. Khang zawng zawng kha mi ten chhiah chawi tul zawng zawng an chawi zawk tawh hnu a heta hlep awm tura an zawrh chhawn kan lei a ni. Thil kan lei reng rengin khang zawng zawng kha chhiah chawi tawh hnu a nih avangin Tax kan pe tel a ni tih hi kan inhriat a ngai. Chhiah chawi hrim hrim ka sawisel lo, amaherawhchu, Mizote hian kan awmna hmunin a zir loh avangin chhiah hi kan chawi nasa em em a ni. Taxation budget han en pawh hian kan chawi nasa leh dawn a. Eng eng-ah-te hian nge chhiah lak an tum a, fee te, royalty te tih pun an tum tih hi kan sorkar hian zep lovin min hrilh law law se a thain ka hria. Kawng zawk te a la ngai leh dawn em ka hre lo.

A dawt lehah chuan Home-ah ka lut ang a. Home a lut tur e tilo chuan Thenzawl Higher Secondary School sawi a ngai daih a ni. Thenzawl-a kan Higher Secondary School atan sawn building sakna tur NECS atangin tanpuina an lo dawng a. La dawn leh tur installment dang a awm a. A lokal thei tawh silova, chuvangin, session hmasaah khan Education Department-ah ka zawt a, Education Department kaltlangin NECS atangin engmah kan dawng lo ti khan min chhang ta si a. Kan ngaihven zui a, Home Department kal tlanga pek kha a lo ni reng mai a lo ni a.

Tichuan Home Department changtu Secretary ni bawk, Chief Secretary kha D.O letter ka thawn ta a ni. "Home department kaltlanga Highier Secondary School

sakna tur hi pek a ni a, a la bang hi a rang thei ang bera dawn kan duh e”, tiin ka ziaka. Tunah hian thla 2 a liam tawh a, chhanna ka la dawng lo a ni. Pu Speaker, hmanni-ah khan Chief Secretary-in a memorandum a lo siam tawh copy te kha min pe a, MLA ten lehkha kan ziah reng reng chu department ten ni 15 chhungin acknowledgement min pe tur a ni, chumi atanga chhiara ni 15 dang leh chhungin reply pangngai an pe tur a ni tih kha a ni. Mahsela, tunah hian zawm a ni chuang lova, chuvangin, ka beidawng a, tunah hian zawnha ka zawt leh a ni, Home Department ah bawk hian. Ka zawnha chua lo la chhuak lova, chu chu anih avangin hei hi min han enfiah sak vat turin kan Home Minister zahawm tak hi ka ngen a.

Tin, tukin lamah khan kan Higher Secondary Thenzawl amibuilding sakna tur pek kan ni dawn tih kha Minister zahawm tak hnen atangin ka dawng a, lawmthu ka sawi nghal bawk a ni.

Tin, Police Insignia an ti, ban a bun hi, hemi hi contractor-in an lei a, an supply thin a ni a. Constable atanga Inspector thlengin an dawng thin a. Tun tumah hian an hlawh atangin a then chu Rs 200, a then chu Rs 400 he insignia lei nan atan hian cut sak niin report ka dawng a. Sang tel an ni a, nuai tam tak a tling dawnin a langa, hei hi engvanga lo thleng ta mai nge ? Thil kal phung a ni reng nge, ni chiah lo-in thil a lo kal ? Chuti a nih chuan chhui fiaha, a tul anga bawhzui a tha in kan hria a, ka zawt bawk a ni.

Tin, ramri chungchang-ah khan SEDP a inziak, Northeast Frontier Regulation kha khawvelah hian khatiang kha a awm lo hrim hrim, chuvangin, a dik lo a ni. BERC, 1873 erawh chu kan hria, Northeast kha chu ka hre ngailo. Chuvangin siamthat kha a ngai hrim hrim a, engpawhnise, kan ramri hi party tinin ithlan dawna kan manifestoa kan ziakah hian Inner Line 1875 kan ti vek kumkhua a ni. Party tin kan kal khawm a, censeasus ngaihdan kan lak khawm pawh khan 1875 hi kan tanhmun ni rawh se kan ti thap a ni. Nimahsela, vawiinah chuan kan ramri chin pawh kan sorkar hian a lo hre ta si lova, kan ramri buai chingfel tura Core Committee an din te pawh chu a ramri chin hi khawilai ah nge tih zirchiangtur mai an lo ni tih te kha kan han hre ta a. MNF party khan kan ram chin hrelo in zallen a lo sual em ni? Chuvang chu em ni an sorkar laia MZP buk sak te pawh kha an thiah-tir? An sorkar hmasak khan Official Resolution an rawn pulut a, Boundary Commission din an rawt a, phur takin kan pass pui a ni. Khatih laia kan Home

Minister Pu Tawna chairman-na hnuiah Boundary Committee kan din a, keipawh member ka ni. Prime Minister hnena thehluh tur memorandum chhahpui kan siam a, hah takin kan bei a. A huhovin Delhi-ah i zuk thehlut ang u kan ti a. Mahse chu pawh chu ngawi rengin an thehlut lo ringawt . Home Ministerin ziaka min chhanna, an thehluh loh thu hi ka kawl reng. Khati khawpa buaia kan lo tih, ramri chinfel tum ang taka mipuia lang si, thehlut leh si lo, a ruka thupbo leh si te kha kan nih vang em ni vawiinah hian1875 ramri, kan zavaia kan tanhmun atana kan sawhngheh chu kan phatsan tak le? He sorkar hian kan ram, kan ramri, kan leilung hi min phatsan a ni ber tawh lawm ni? Chuvangin, ka ngai serious a, tukina kan Home Minister thusawi kha Assam sorkar hian an hria ang tih ka hlau zek zek a ni. Chutiang chu thil awmzia a ni a. Chuvangin hengah hian mahni ngawta kalloin, concensus-a kal-a, inrawn khawm te pawh hi a thain ka hria.

A dawt lehah chuan Forest-ah ka lut ang a. New Serchhip ‘N’, VC area ah sawn Forest-in ram zau tak an nei a ni. Chu chu Revenue Department-ah lease an dil a, pek an la ni lo va, Forest ram pawh official chuan a la ni chiah lo a nih chu. Tunah sawn in hmun neilo chhungkaw 250 New Serchhip ‘N’ Village Council hnuiah hian an awm a. Chung zinga chhungkaw 150 tan chuan Housing for All pek tura ruahman a ni a. Khami dawng tur khan in hmun an neih a ngai a. In hmun theh tur dang an neih tawh si loh avangin sawlai Forest ram, Forest ram pawh la ni chiah lo, zau lutuk mai saw, a area saw a zau bawk a, 100 hectare lai a ni a. Chu chu heng in sakna mamawh, in hmun mamawhte tan hian min chhuahsan teh u, min sahtlak sak teh u khai tiin, 43,500 sq. mts. a zau hi an dil a, ramri pawh hemi chinah hian kal se an ti thlap a ni. Chu chu Serchhip Settlement Officer hnenah VCP-in a thehlut a, RO hnenah a thehlut bawk a, DFO hnenah a thehlut bawk a. Mahse chhanna pawh an dawng lo va. A changtu Minister zahawm tak hnenah hian DO letter ka ziak a, mahse vawiin thlengin min la chhang lo. Saw saw min enfiahpui vat a tul ka ti a. Chuti a nih loh chuan kan khawtlang mipui thinur sawn an duh chin saw an khawih mai ang a, kan intibuai ang tih a hlauhawm a ni. Forest sawn plantation area te, ram zau tak an nei a. Mipui nekchep zawng ni lovin a insiam rem theih dan chin a awmin a lang a, chu chu a rang lama siamfel ni se a tha hlein ka hria a ni. Tin, DM&R-ah hian lawmthu ka sawi duh a. Tukin lamah khan a changtu Minister zahawm tak khan Serchhip khaw chhunga leimin thin, kan buaipui em em te, mumal taka zirchianga enfiah turin DPR buatsaiah a nih tur thu a sawi kha lawmthu ka sawi duh bawk a ni.

LESDE-ah hian han kal ila. Kan entrepreneur ho kan fuihna ber tur chu thil thar la awm ngailo hmuhchhuahna, innovation hi a ni. Hmanni lawkah MZU, kan University-in exhibition a buatsaih a, dawhkan tin ka tlawhchhuak vek a. Mizo thluak atanga rawn chhuak ni awmlo pui pui, thil tha deuh deuh a awm a, mahse an la thleng tawi a ni. Tanpuitu an la mamawh a ni. Chuvangin kan sorkar hian kan ram chhunga kan thalaite thil thiam nei, eizawnna ngelng het siam thei tur si ho hi ZPM policy, Hand-Holding Policy, bana kaih policy hi hmang hrehlo se. SEDP sum te pawh hetah hian hmangin innovation lamah hian uar takin kalpui se tih hi ka sawi duh bawk a.

Tin, Serchhip-ah Youth Centre sa turin kan inbuatsaih mek a. Hei hi a kalmuang em em mai a, kan thlen chin han hriat te pawh a chakawmin ka hria a. ITI te pawh ESDI hnuaiah sak mek a ni a, kan nghakhlel hle a, ka han sawi ri duh bawk a.

Tin, Labour Cess hi a tam si a, kan hmang senglo a ni ber a. A hmanna tura ruahman sa ang hi a buaithlak deuh hlek a. Sum lam a tam si, thla tin a lo lut si. Pu Speaker, hei hi a moidify theih lawm maw ni le ka ti a ni. He Labour Cess dan hi ennawn ila, kawng laih nan te hian hmang thei ila. Education a kan harsatna sutkian nan te, Agriculture-a kan harsatna sutkian nan te pawh hian a pawh sawih theih lawm maw ni le? Khatiang khan ti thei ila chuan Labour Cess hi ram hmasawn nan leh hmasawnna ruangam din nan hian kan hmang tangkai lehzual turah ka ngai a ni.

Transport Department-ah hian High Security Registration Plate hi sorkarin min vuah tir a, awmzia a nei miah lova. A chhan chu Automatic Number Plate Recognition hi a tello va. Khami tel kha chu ni se satellite atangin engkim kha a rawn chhui tur ania. A bo a, a bo ringawt a, chhuichhuah nan an hmang chuang lova, chhiah pe leh pe lo hriat hran theih nan pawh an hmang chuang lova, kan seng thlawn ringawt mai a. Central YMA te pawhin hei hi tihtawp ni se tiin an au chhuak ta hial kha niin ka hria a. He Security Plate hi thil tullo tak kan invuah-tir a, sum kan seng ringawt mai a. Chu chu tihtawp ni se tih kha ka han rawt bawk a ni.

Pu Speaker, ka han dil belh ve che ang a. Kan rama traffic signal kan inpek dan hi a pawi ka ti khawp mai a. Hnungah miin min rawn tlanpel dawn a, tah chuan vei lamah signal kan pe tlat zel a ni. Hei hi a dik lo hulhual a, kan kalna lam turah signal kan pe tur a ni. Kan kalloohna lam turah signal kan pe a, kha kha accident a

awl em em mai a. Hei hi dan ni hauh si lo tlanglawn deuhin kan hmang ta a, a tha lo in ka hria a. No Tolerance Week te hi engahnge kan hman kan hman le? No Tolerance Week lo zawng zawng hi Tolerance Week tihna em ni? Surprise check hi an ti phut zel zawk tur a ni dawn lawm ni? Rukru in Nilaithawhtan zanah in inah ruk ka rawn ru dawn ti se, min hrilh lawk se, tunge lo inringlo ang? Chuvangin No Tolerance Week kan hmang dawn ti-a puan ut ut a han hman te hi zawng a effective tak tak lo tih hi a chiang hlein ka hria.

School Education-ah ka lut mai ang a. Education tho a ni a, kan University hi han sawi zawk ka duh a. Tunah hian India ram chhung-a Univeristy tha tha 36 zingah kan MZU hi a lo tel tawh a, patent siamna kawngah phei chuan a ti tha ber 5 zingah an lut tawh a. Tin, Lalremsiami pawh hi MZU Sports Ambassador a ni a, kan hnam hming a titha em em mai a Prof. KRS Sambasiva Rao-a hnенah hian lawmthu ka sawi duh a, kan hnam an chawimawi khawp mai.

Tin, grant lo kal reng reng hna kan thawh dan hi party miin an thawh hian a tha lova, party miin a thawk si, amaherawhchu a completion certificate-ah erawh chuan VEC-in an thawh anga inziah luih-tir hi hun hmasaah khan a tam khawp mai, hei hi tih tawp ni se thleng tawh lo se tih ka duh hle bawk a.

A tawp nan privatization hi i uar teh ang u, kan ramah student 1 atana kan senso hi India ramah a sang ber pawl kan ni a, eng nge kan dinhmun chu kan hria a, a tha chuang miah si lo va. Chuvangin sorkar school hi chu kan ti tha thei dawn lo a nih hi, chuvangin privatisation hi uar ila. Private school te, kohhran school te hi finance ve mai ila, tichuan man tlawm zawkin miretheite pawh school thaah an lo lut ve thei ang a, a management-ah hian inrawlh tawh lo ila, Disctrict Council hun laia kan tih ang khan sumin pui mai ila tichuan kan ram education-a kan chhiatna hi chu a ziaawm ka ring a ni. Pu Speaker, ka duh tawk mai ang e. Ka lawm e.

SPEAKER : Kan CM hian sawi duh te a nei em? Member te kan inphalrai a, chhan chu kan hriat angin Minister zahawm taktak 12 an awm a, 2 diat diata ti turin Pu Tawna, kan Dy. CM zahawm tak a dam lo bawk si a. Kan han ngaiantuah a vawiin hi kan session laia kan la phur deuh, chak deuh, la ngui loh deuh lai, la hah loh lai deuhah kan la a, mi 3 kan dah a ni. Chuvangin tlemin hun pawh han pel deuh hlek kha kan hrethiam a. Vawiin chiah hi Minister 3 te demand sawini a ni a, a bak chu 2 diat diat, chu chu kan rel dan kha a ni a. Tunah chuanin kan Minister zahawm tak

takte demand kan han sawi liam liam ta a. Pu Lalchamliana, Minister zahawm takin a Demand te rawn wind up se, sawifiah ngai a tih angte rawn sawifiah nghalin, a Demand te House-ah pass rawn dil nghal se, kan lo sawm ang e.

PU LALCHAMLIANA, MINISTER : Pu Speaker, ka lawm e. Minister 3 demand sawi ni a ni a, a rei duhawm si a, tawi tein khaikhawm mai ila a tha awm mang e ka tih laiin member zahawm tak takten ka Department chan min ngaih pawimawh sak a, kan sawi liam liam hlawm si a, ka sawi tawi thiam lo mai awm mange tih te ka ngaihtuah a ni.

Thil hi hriat loh hi chuan a hriat loh ve theih khawp mai a Pu Speaker, budget hi, mahse ka rin ai daihin member te an in zir peih a, uluk takin an zir tih an thusawi atangin a hriat a, a lawmawm khawp mai. Kan thian pakhat finance thiam deuh hian min hrilh chu, sorkar officer pakhat office a la thu ngai lo hi a kaisang a, office a that angai ve ta tlat mai a, a lo leng a, a ti. Budget hi a awmzia min hrilh the, RE tih hi chu ka hrethiam mai a ‘routine examination’ tihna a ni anga BE hi ka buai tlat a ni, a ti a. BE leh a dangah kan buai vak lo niin a hriat a, a lawmawm khawp mai.

A hmasain Pu Speaker, he House zahawm tak hian Pathian leh kan hotupa berin kan chanvo tura min dahsak Department hrang hrangte chanchin tlangpui himin hriat sak thuak se, a thain ka hria a. A hmasa berin Home hnuaih hian Department 6 lai mai a lo awm a, Chungte chu Police a ni phawt mai a, hei hi a lian ber a, tah hian sanction strength 11,923 a awm a, tunah hian actual strength chu 9204 a ni a, tichuan vacancy hi 2861 a awm a ni. Kum 10 kalta chhung han chhui let khan Police Department-ah hian average a chhutin mitthi leh pension hi kum tin 309 an awma chhut theih a ni.

Tin, Mizoram Home Guards & Civil Defence hi a awm leh a, hetah hian staff chi hniih an awm a, regular leh volunteers. Chutah chuan regular-ah hian sanction strength 158 a nih laiin actual strength chu 100 a ni a, vacancy 58 a awm tihna a ni. Tin, volunteers hi sanction strength chu 1260 a ni a, actual strength hi 1706 a ni a, vacant post hi 184 a awm a, hei hi hnawkhah dil a ni a, amaherawhchu a vai ni lo deuhin a zah ve 92 hi min tih sak dawn niin alang. Home Guards te hi kan sawi law law nghal mai ang a, an tangkai khawp a, tunah hian hmun 80 chuangah duty an nei a, chuta an duty atanga an hlawh chhuah hi nikum chhung khan 2.5 crore chuang an

hlawh chhuak a ni. Tin, kan volunteers hlawh hi Supreme Court-in Police te hlawh ang pek ve ni rawh se a ti na a, sorkar hian a la tlin lova chuvang chuan Mizoram a Muster Roll te wages ang kha pek an ni a, daily-in ₹520 tunah hian hlawh tir mek an ni. Lawngtlai bialtu zahawm tak Pu H.Biakzauva'n, Sangau-ah kudam-ah an duty a, an in withdraw daih mai a tih kha thil dik a ni a. A chhan chu eirawngbawlna hmun te, khum te, tui te an nei tha lova, chuvang chuan withdraw lo theih niin an inre lova chuvang chuan an hotuten an lo withdraw a ni tih kha kan sawifiah nghal ang e.

Chu lohah chuan pathumnaah chuan Fire & Emergency Services hi a awm a, hei hi Director-in a hova mitlemte an ni an vai hian mi 225 awmna tura tih a ni a, tunah hian 205 an awm mek a vacancy hi 20 kan nei a ni. Fire station hi Mizoram pumah kumin chhunga kan hawn thar ITI veng leh Vairengte te tiamin 12 an awm a, chumi bakah chuan Lengpui airport-ah hian nitin duty an kal a. Tin, helicopter service-na hmunah hian duty an awm bawk a. Tin, mobile service kan ti a, Chaltlang-ah khian pakhat, Aizawl South lamah hian pakhat, chutiang chuan nitin an in tirchhuak ve a ni.

Prison Department hi a lo awm leh a, hetah hian thawktu sanction strength hi 428 a ni a, tunah tak hian actual strength chu 313 an ni a, vacancy 115 a awm tihna a ni. District tinah District Jail kan nei a, Aizawl hmunah hian Central Jail leh District Jail kan nei kawp a. Kolasib-ah leh Central Jail-ah chiah hian Doctor kan nei thei rih a, Jail dangah te pawh hian kan mamawh hle a ni tih ka sawiduh a ni.

Member zahawm tak pakhat khan Reformatory Centre ang deuh-in siam nise a tha lawmni tih kha, ka rilru pawhin a tawm zawng tak a ni a. Tin, NGO pakhat Shalom an tih hian rawtna a rawn siam a, Stake holder hrang hrangte nen committee kan nei tawh a. Chutah chuan kan Jail-te hi thil tidiklote hremna hmun ringawt nilo in, an chhuah hun pawha an eizawnna tur te siamsak an nih theih nan chutiang lo ngaihtuatu tur committee i din ang u an ti a, tichuan Additional Secretary, Home ho in an din a, naktuk hian meeting hmasaber chu an nei dawn nghe nghe a ni awm e.

Kan Jail building te leh quarter-te hi a chhe em em a ni tih kan hria a, tunah hian kan IG(P) zawm thar hoin consultancy firm pakhat chu an

indawr mek a ni tih ka hria a. State sorkar pawisa atang ringawt chuan kan ti thei si lova, khatiang kawng zawng khan hmalak kan tum mek a ni.

Sainik Welfare & Resettlement Board a awm leh a, Director-in a ho a. District pali Aizawl, Lunglei, Champhai leh Kolasib-ah te hian an function mek a. Amaherawhchu, hei hi sipai bangte enkawl biktur an ni a, an te khawp mai a. Post sanction hi Directorate-ah hian 23 a awm a, District-4 ah hian 27, vacant post hi 11 a awm a, a vain 50 chauh an nih chu. Tunah hian Aizawl-ah 8, Lunglei-ah 7, Champhai-ah 6, Kolasib-ah 6 leh Directorate amite an ni. Chulo leh ah chuan Forensic Science Laboratory hi Director ho bawkin a awm a, hetah hian sanction strength 58 a ni a, actual strength erawh chu 42 a ni a, vacancies 16 a awm.

Forensic Science Laboratory hi tunlai khawvelah chuan a pawimawh tak zet a. Nirbhaya Scheme an tih hnuaih tunhnaiah tih changtlun a ni a, vaibelchhe 4 chuangin equipment hrang hrang an mamawh ang chi tea thuam chak an ni a, DNA thlengin an test ve thei tawh a ni tih ka han sawilang a ni.

Department dang, Taxation hi sanction strength hi 297 a ni a, actual strength erawh chu 251 a ni a, vacancy hi 47 a awm a, heng vacancy 47 zingah hian State Tax Officer, tunhmaa Tax Inspector kan tih kha 17 ruak a awm a ni. Anni hi field-a thawktu ber an ni a, he post ruak hi hnawkhah theih kan mamawh em em a ni tih ka sawi kai tel a ni. Tin, Disaster Management & Rehabilitation hi a department lian lo mahse chhiat kan tawh chuan pawimawh em em si a ni a. Sanction strength 58 a ni a, actual strength 54, tunah hian vacancy 4 an nei a ni.

A detail deuh hlekin Police chungchang kha ka kal hret ang a. Tunah hian Mizoram pumah Range 2 kan nei a, District 8-ah District Executive Force (DEF) an awm a, Sub Division 17 a awm a, Police Station kan tih hi 41 a awm a, chung zingah chuan Special Narcotic Cell tihte, Cyber Crime Police Station kan tihte leh ACB te an tel a ni. Police Station pangngai kan tih ang chi hi chu Mizoram pumah 38 kan nei a nih chu.

Tin, out-post kan tih hi 15 kan nei mek a, hmannia Chhingchhip-a hawn thar nen 16 a ni dawn ta a ni. Out-post kan tih hi MRP te awmna hi a ni a, silai keng awmna hi border out-post tih bik a ni a, chu chu 23 kan nei mek a. Armed Battalion hi 3 kan nei a, Indian Reserve Battalion hi 5 kan nei a, Police Training School hi Thenzawl-ah 1 kan nei a, Traffic Control Room hi 1 kan nei bawk a ni.

Pu Speaker, member thenkhat thu sawi te kha a tlangpui han sawi zuai zuai a tha in ka ring a. West-I bialtu zahawm tak khan “Home Guard te hi thla 13 hlawh pek ve ni sela” tih kha a rawt a, a tha viau a. Amaherawhchu, tunhmain an lo dil tawh a, sorkar-in rem a ti theilo a ni tih ka sawi duh a ni. Ka sawi tawh ang khan Home Guard-te hi hmun 80 chuangah an duty a, anmahni hlanga an duty-na bakah, Aizawl-ah hian Traffic Police-te pawh mi 33 laiin an pui ve a ni tih ka han sawi kai duh a ni.

Police chungchangah khan tlem-a-zawng han sawibelh loh theihloh niin ka hria a. Kan Police-te hi duhthusam an nilo a nih pawhin Police tha pangngai tak an ni a, mi sing dawn zingah chuan tha lo deuhte pawh an lo awm ve thin a. Chungte chu an chungah action te la in, a thente chu ban te an ni a. A thente chu anmahni department chhungah hrem an ni. Police-ah hian discipline tha tak a awm tur a ni tih hi kei pawh ka ngaihdan a ni a, he mawhphurhna ka chan tirha Police Officer ka koh khawm hmasak berah pawh discipline hi kan maintain tur a ni kan ti a. Aizawl emaw, hmun dangah battalion heaquarters-ah Gazetted Officer awm miah lova lo awm chang pawh a awm thin a, chu chu order kan chhuah a, Gazetted Officer-in englaipawhin a uap reng tur a ni tihte; tin, an fit theihnan battalion road marching te pawh an nei leh tur a ni tihte pawh kan sawi a. Tin, dul kiar leh police a inhmeh lo a ni tihte pawh kan sawilang tawh a. Chutiang chuan kan police te hi physically leh mentally-a an infit theihna turin kawng hrang hrangin hma kan la a. A theih chuan Police headquarters-ah hian psychologist emaw, psychiatrist emaw, khatiang kan sawi thin zu leh ruitheih thila harsatna tawkte chhanchhuah theihna turin neih theih ni se tih te pawh hi tunah hian kan ngaihtuah mek a, Health Department-te nen kan la ngaihtuah tlang turah kan ngai a ni.

Kan Police te hi inthlan lai chuan an rim em em mai a. Ka sawi tawhang khan, MLA inthlan kan zo fel tawk a, khatah pawh khan rim takin hna an thawk a, an thawhrimna zarah inthlanna ralmuang tak kan nei a. Tin, Parliamentary election-ah pawh company 16 lai mai Manipur, Tripura leh West Bengal lamah te pawh kan intir chhuak a ni. Thil lawmawm deuh mai chu, hetah hian sawi chi a ni nge ka hre lova, an kalna West Bengal-ah te pawh kan Mizopuite Kohhran hrang hrang intelkhawm te tan khan pawisate pawh an thawhkhawm a, an ti lawmawm hlein ka hria a ni.

Tin, tunlai hian tleirawl rual, a huhoa che a, aia upate zahpah nei miah lova kutthlak chingte an awm tih thu kan dawng zeuh zeuh a. Hei hi theihpatawp chhuaha tireh tumin leh kawngsirah mawilo tak takin, khing Durtlang kawngahte, a nih loh leh Sairang kawng Rangvamual-ah te an awm lohna turin tan kan la a, patrolling te pawh hi kan ti urhsun khawp a ni.

Tin, kan Police-te hian chhuanawmna an nei a, sorkar hmasa hunlai 2014, 2015 leh 2016-ah khan conviction rate sang ber record nei an ni, India ram pumah. IPC case bikah 94.5% an ni a, Local & Special Law-ah 86.1% a ni. 2017, 2018 data a la chhuak lo a ni.

Tin, Mizo mipuite leh a bik takin YMA te, SRS te nen thahnemngai takin kan thawhhona zarah heroine te, ganza te, damdawi thalo metamphetamine te leh zu tam tham tak tunhnai te pawh khan man a ni tih ka sawi duh a. Kan NGO-te nen, mipute nen policing hna hi tha taka kan thawhho zel chuan kan ram hi ram ralmuang, chenna tlakah kan siam thei ang tih ka sawi duh a ni.

Tin, member ten an sawi chhuaha ka rin, an sawi chhuah tak lemloh, tunhnaia ramdang mi Mizoramah man an awm nual a. Pakhatah chuan Nepal atangin passport nei thlap Vairengte-ah an lo man a, chumite chu dan an bawhchhiatna teh chiam a awm hran lova, an ram lama thawn kir leh an ni tawh. Chulo lehah chuan, YMA nena tanhona zarah Aizawl khaw chhungah Rohingya nia hriat man an ni a; chulo lehah chuan tun hnai leh zualah Dungtlang police ten Rohingya nia hriat tleirawl te te mi 8 lai an lo man a. Chung chu tun hnaia thil thleng House zahawm tak hian a hriat thain ka hria a. Kan ram hi human trafficking kan ti dawn nge, immoral trafficking a khawi zawk zawk emaw, kalkawngah an hmang a ni tih kha kan hriat tlana, mipui mimirte pawh hemi kawngah hian kan alert a

pawimawh khawp mai a. Thil diklo, mahni mihringpuite hmanga sumdawng duhte, an sumdawnnaa lo tanpuitute Mizote zingah pawh kan lo awm ta zel mai hi a vanduaithlak takzeten ka hria a ni.

Tin, Police Department-a kan hmalaknaah hian member tam zawkina kan sawi chu, quarter chhe lutuk leh vehicle indaih tawklo tih kha a ni a. Hei hi thil dik a ni a, mi, chhungkaw sing dawn thaw quarter kan pe vek thei lova, tunah hian quarter chungchanga kan satisfaction level hi 20% ang velin a chhut theih a. Chuvang chuan, kan police-hote hi an lainat-awm khawp mai. Kum kaltaah khan cheng 2 crore kha minor repairing-ah sorkarin min pe ve a, an han ti mek tana, hei, engchen nge an tih that theih ang kan hre lo va. Thenkhat a that viau theih laiin thenkhat chu a tha lem lovang tih kha a rin theih bawk a. Member zahawm tak ten an sawi ang khan, a khawilai ber nge repair tur tih pawh hriat lova quarter chhia te pawh a lo awm ve tawh a ni. Mahse, tunah hian Ministry of Home Affairs atangin Police Housing chungchangah proposal rawn siam rawh u, tuna in dinhmun atanga 20% vela upgrade thei turin proposal rawn siam rawh u an ti a, chu chu state tinah hriattirna an thawn a. Kan PHQ pawhin hei hi rang takin a buatsaih a, a vaiin 600 crore chuang hret Police Housing atan hian a buatsaih a, chu chu sanction a nih chuan tlemin kan ziaawm phah deuh ang tih kan beisei a ni.

Tin, motor chungchanga indaihlohma hi kan hria a, a nasa khawp mai a, chuvang chuan sorkarin a lei a, a driver nen, a tui nen, a repairing nena tih hi a hautak em mai a, hiring system-in iti dawn teh ang u kan ti a, hmannah kan sawikhawm tawh a. Kan House Leader zahawm tak pawh hian, ‘a tha khawp ang chu, a tih theih chuan’ a ti a. Motor 66 vel a indaihlo zual ten an hire theihna turin ruahmanna kan siam a. Mahse CS ho-a committee an han neih leh chuan, ‘hawh u, enchhin nan heti zat zat lo deuh 33, 34 vel hi tichhin ang’ an ti a, kha kha a hlawhtlin theih chuan tun aiin tlem chuan kan indaih tawh deuh ang tih kan beisei a. Kha kha a tlangpuuin ka han sawi duh a ni.

LALCHAMLIANA,MINISTER : Member zahawm tak Dr.Vanlaltanpuia khan Police fitness hi ngaipawimawh rawh u, check thin ni se tih a ni a. Hmanah KPS Gill kha Punjab Director General of Police a nih lai khan hetiang thil deuh hi a ti tawhin ka hria a. Amaherawhchu chutiang tak chuan kan lo ti lova. Fitness hi ngaipawimawh deuh deuh turin kan inbuatsaih mek a ni.

Pukpui sipai hmun chungchang kha mimal ang pawhin min sawi pui tawh a, a ngaihna ka la hre lo khawp mai a, Revenue lam chan tur nge ni tih hi ka ngaihtuahnaah chuan a awm mek a ni. Tin, member zahawm tak Pu C.Lalrinsanga khan Phainuam-ah khuan check gate dah ve ni se a ti a, Phainuam takah khuan kan la daih thei lova, tunah khuan temporary-in Vairengte chhim lam Phainuam kawng pengah khuan temporary-in check gate chu kan dah a. Khu khuan motor bote pawh a tih nep deuh kan beisei a ni.

Tin, Home chhungah nichin khan Lawngtla East bialtu zahawm tak, ani hi awm ta lova a kal daih mai a. Vaseitlang, Chawngte leh Borapansuri-ah te Police outpost dah a tul thu kha a sawi a. Kumtir lam khan keipawh sawlaiah sawn ka va kal a, mamawh an ngah khawp mai. An kawngte chu kan officer kalpui pakhat chuan, 'luidungah motor-in chakai kan khawrh a ni ringawt alawm le'. a ti a, ruah kha a sur bawk si a. 'Engatinge heti em em a kawng chhia a awm theih le, Minister bial a ni si a,' ka ti a. Mahse, ka han hrechiang a, BRTF kawng a lo a ni a. Sawlai saw ngaihpawimah an ngai khawp mai; kawngah te, Police chungchangahte pawh chuan a ni ngei ang tih ka ring. A theih chuan Bike tal pawh a ti a, Bike-te chu sawngahte chuan Police outpost-ahte chuan dah theih dan kan ngaihtuah a tul a ni. Reivakloah hian Bike sawmhnih bawr vel kan lei thar dawn a, chungahte pawh chuan kan Department hotute pawh hian lo chinchhiah se a thain ka ring.

Tin, Champhai North bialtu zahawm tak khan Traffic duty-te kha a lainat kha a ropui khawp a, standing Allowance-te kha pek a tha lawm ni a ti a. Standing Allowance khawi rules-ah nge a awm ang aw tih kha ngaihtuahna a awm lo thei lova. Hmeichhe Police indaihlohma Champhai-ah te khan a rawn sawi lang a, a ni khawp mai, tunah hian police sang kua leh tlem zingah hian hmeichhia zanga leh sawmnga leh pathum vel officer tenau leh constable an awm a ni tih kha ka han hriattir ni se.

Opposition Group Leader zahawm tak Pu Lalduhoma khan ramri chungchang a rawn sawi kha a dik khawp mai. Political party zawng zawngin kan party anga kan sawiah chuan 1875 Innerline Regulation kan pawm kan ti theuh a. Amaherawhchu tun dinhmunah hian engtik hunah emaw chuan sawihona kan la nei ang tih ka ring a, chu chu sorkar hmasa pawh khan a ring a. Document kan mamawh ang zawng zawngte lo la khawm a, chu sawi khawm niah chuan kha kha

tanchhana kan neih theihna turin Core Committee kha kan din a ni reng a. Core Committee khan an peih hunah sorkar hi a malin a kal ka ring lova, party hrang hrangte nen consensus neiin kan dinthmun tur kan la thlir tlang turah ka ngai tih ka sawi duh a ni.

Tin, Home-ah tho khan Traffic signal, motor-in signal indicator hman dan hi keipawh ka ngaihmawhna a rei tawh a. Motor-ah khan ding lam leh vei lamah indicator light a awm a, kha kha kan kalna tur lam kawhhmuhtu tur a ni. Ding lamah kan peng dawn a nih chuan a ding lam kha kan ti de tur a ni a, vei lama kan peng dawn a nih chuan vei lam kha kan ti de tur a ni. Tin, kan hnung ami kha min tlan pel sela kan tih chuan a veilam zawka kha kan ti de tur a ni a, hei hi vawi khat chu traffic hotute ka sawi pui tawh a. A dik reng mai a, vai ho hian an hmang dik lo nasa a, a buaithlak khawp mai an ti a. Hei hi lo enzui ila, signal indicator hi a dika kan hman theihna turin tan lak a ngai a ni tih ka sawi kai duh a ni.

Tin, Thenzawl Higher Secondary chungchang hi a rawn sawi lang a, zawhnaah pawh a awm a. Hei hi MHRD atanga fund, Home Department kaltlang a ni. 1st instalment chu pek tawh a ni a, mahse, 2nd instalment hi la pek loh a ni. Nikum khan 2nd instalment pek dan tur chungchang sawiho turin MHRD hian meeting a rawn ko a. Tahchuan Home Department atang pawhin mi intirh a ni. Amaherawhchu, mi rintlak tak hnena atanga chanchin ka hriat dan chuan, Home aiawha zuk kal pawh kha kan ram hotu lu ber office atangin “kha meetingah khan tel suh,” tih telephone atangin hrilh a ni an ti a, chuvang chuan a tel ta lo a. Tun thleng hian 2nd instalment hi an la hmu ta lo tih hi ka hriat dan a ni. Kha kha a tlangpuiin Police lam ni sela. (Pu LALDUHOMA : Kha kha chu a exact chu ka hre lova, a la awm enge maw zat chu a beisei awm turah kan ngai an ti Home lam chuan.) Member zahawm tak Pu Andrewa khan Bukpui-ah sawn Police Outpost dah ve a ngai a ni a ti a, chu chu sorkar pawh hian a ngai pawimawh a. Tunah pawh hian Police Outpost mai ni lo, Bukpui-ah sawn Police Station dah tumna a awm a, a hlawhtilin hun tur erawh chu ka sawi mai ngam lo a ni. Lengpui Airport-ahte pawh khuan Police Station kan la nei lova. Lengpui Airport te, Bukpuit kha Police Station dahna tura ruahmanna kal mek a ni tih ka sawi duh bawk a ni. Tin, member zahawm tak Pu Muangpuia khan, “Ka PSO silai chu pistol a ni a, revolver a ni e” a ti a. Revolver hi thenkhat chuan kah a nuam zawk an ti a, a inanglo thei viau a. Amaherawhchu, cowboy hunlai pawh khan a mu ruk hian an thunkhat lova,

engemaw tih tlak palhah pawh a puah mai loh nan mu nga an thun thin a, a firing pin in a chhut tur tak hi an dah awl thin a ni. Chu chu kan Police revolver hmangte pawhin lo hre ve mai mai se, intihpalh a awm lo deuh ang tih ka ring a ni.

A pawimawh ber mai ka sawi hmah dawn chu le! Member zahawm tak Pu Sawivunga khan Daido lama kan boundary chungchang kha a rawn sawi a. Hei hi Police pawh ni lo, department dang daih officer-in telephone-in min rawn hrilh a. Ka ngaihven tir vat a, unofficial-a ka hriat a ni. Unofficial bawkin ka ngaihven tir a, an report dawn chu nichina member zahawm takin a sawi ang deuh khan Manipur ho khian tunhmaa ramria kan ngaih rawn pel khan kawng an lo siam ngei a ni tih finfiah a ni a. Chuvang chuan unofficial-a lo kal an ni ang e ka ti a, kan Police hote hnenah unofficial bawkin, “Kan ramri chinah khan engpawhni se lung han phun ula, ‘Welcome to Mizoram’ tih lo han phun phawt mai teh u” ka ti a. Hei hi tunhmaa kan ramri nia kan hriatna hmuna an lungphun chu a ni a. Tichuan, official takin a bialtu DC hi lo enquire a report pe turin kan ti mek a. Hei hi kan hria e, kan ngaihven mek e tih ka chhanna ni se a tha mai awm e.

Taxation lamah khan Group Leader zahawm tak Pu Duhome khan, “Kan budget punna hi mipuiin kan tuar dawn a ni” ti khan a sawi a. A sawi thiam thin ropui si a, ka awih ve hman lek lek a. Mahse Taxation Department hi chuan chhiah kan tipung dawn lo tih ka sawi duh a. A chhan chu keimahni thua tihpun ngawt theih pawh a ni lo. GST hnuia kan luh tawh avang hian GST item hrang hrang hi a rate awm sa vek a ni a. Chuvang chuan Taxation Department lam atang hian tihpun tumna a awm lova. Tin, Non-tax Revenue zingah khan tihpun theih chu tui leh fee chi hrang hrangte kha a ni ang a. Khang kha chu a concern department-in an ti dawn em, dawn lo em ka hre lova, ka sawi thei lova.

Electricity bill pawh hi Mizoram sorkar-in a tih ni lovin Joint Electricity Regulation Commission, Manipur nena kan intawm hian a fix thin a ni. Tunhnai lawkah pawh khan a tipung a ni.

Tin, application form man to tih kha a dik chiah a, kei pawhin, “A va to ve” ka ti a. Pu Chhantea hi ka zawt chiang a, sorkar hmasain a tuk kha a lo ni a, form pakhat man ₹150/- kha. Lehlamah chuan exam a ni ang a, a exam tute kha renumeration pek an ngai ang a tih zawng zawng nena an chhut kha a lo ni awm e. He sorkar-in a tih a lo ni lo tih ka sawi kai zawk duh a ni.

GST hnuiah hnam dang in register an tam thu kha member zahawm tak Pu Lalchhuanthanga'n a rawn sawi a. Hei hi a buaithlak khawp mai a. GST hian kan ram tan pawh thatna a neih rualin that lohna a keng tel a. Thil hi hmai hnih nei vek hi a lo ni a, thatna leh that lohna a awm zel a ni. GST portal-ah hian in register duh kha chu computer-in an in register a, kha kha system khan a lo thliar ta a. Hei hi state GST-ah kal se, hei hi central GST-ah kal se tih kha computer khan a lo thliar ta a ni. Computer-in a lo thliar zawk hnuah khan ni 3 chhungin an tifel tur tih a ni a. Kha kha Mizoram sorkar, sorkar hmasa khan khati chung chung pawh khan Mizoram State GST Act-ah khan 'Mizoram-a sumdawng tur chuan kum 2 tal valid ILP a nei tur a ni' tih an lo zep tel a. Khami clause hmang khan state GST hnuia application lo lut kha a theih chin chin an lo dang thin a ni. Mahse Central lamah chuan khatiang kha a tel ve loh avangin thil danga a fel chuan an lo ti zel mai a lo ni a. Hei hi a zia lo khawp mai.

Hetih lai hian lehlamah chuan GST hian kan chhiah lak hi nasa takin a tipung a. Nikumah khan budget estimate-ah ₹37,400 lakhs ni tura a tih kha actual collection chu ₹57,888.31 lakhs a ni a. Chuti a nih chuan budget estimate a khumna hi ₹20,488.31 lakhs a ni. Kumina kan budget estimate hi ₹52,195 lakhs a ni a. Thla hnih chhung hian ₹13034.78 lakhs kan la hman a ni. Hemi rate a kal chho hian han chhut ta ila, thla 2 chhunga heti zat kan lak chuan thla 12 chhung chuan ₹78,208 lakhs lai a tling thei ang. Chu chu a kal that phei chuan kan khum thei a, tlem-a-zawngin kan thleng lo thei bawk a. Chuti a nih chuan kumina kan budget estimate hi, kha tiang-a projection han neih takah chuan, ₹25,013 lakhs in kan khum thei dawn ni in a lang a. Hei hi GST a thatna lam hawi zawnga sawi a ni a, a chhiatna lam pawh a awm tho a ni tih ka sawi tel duh a ni.

Tin, Professional Tax chungchang kha sawi lan a ni a. ₹2,500/- a tam berah chawi tur tih hi Parliament dan a ni a, an tihdanglam hma chua (aw 2500 passed kha), kha aia tam kha khawn a thiango a ni. Tin, 2500 chawi tlinglo hi hetiang hian siam a ni tih kha kan member zahawm tak te hnenah hian ka'n sawilang duh a. Sorkar hnathawk professional tax chawi ve chu cheng 5000 aia tlem la lut chu nil a ni a, 5000 leh 8000 inkarin kum khatah 900 an chawi a. 8000 - 10000 in 1440; 10000 - 12000 in 1800 an chawi a; 12000 - 15000 in cheng 2160; 15000 - 20000 in cheng 2340 a ni a. Hei hi thla tin cut sak theih a ni tih ka han sawikai tel a ni.

Tin, cess lak chungchang member pahnhin an sawi a, ka thlawp zawng tak a ni a. Hmana kan sorkar ve lai pawh khan sport tihhmasawn nan cess hi la ve tawh ang u tih te pawh a thuphung chuan ka sawi a, mahse kan ti ta lem lova. Dr. TPA leh Dr. Vanlalthlana'n cess chungchang an sawi a. Tunah hian Mizoram Road Fund Board hian petrol leh diesel-ah hian road maintenance atan hian cess i la ang u hmiang tih an ngaihtuah mek a. Hei hi thil remchang a ni em tih central -a GST Council-ah pawh an zuk zawt tawh a, a remchan lohna a awm dawn lo a ni mai thei. Nakinah tha kan tih tlan chuan hengte pawh hi kan hmasawn zelna atan kan la ti dawn a ni. Tin, mipui nawlpuiin GST chung chang hi kan la hre tawk lo va, inzirtirna a awm leh thei lawm ni tih te pawh kha kan thahnemngaihna a ni, a lawmawm e. A nawlpui ang chuan kan ti tawh lova, a tir lamah khan department in hmun hrang hrangah GST inzirtirna hi a siam a. Tunah hian harsatna neite tan 'help desk' and 'facilitation centre' a awm a, chu chu nitin a inhawng a. Tahchuan GST chungchang a harsatna nei te chu kal sela, an lo tanpui thei a ni tih kha min hrilh dan a ni.

Aw le, Pu Speaker, ka sawi tam chuan a rei lutuk ang tih ka hlau a, chuvang chuan kha kha ka duhtawk mai ang a. Engemaw han hriatfiah duh dang nei kan awm em ?

PU C..LALSAWIVUNGA : Pu Speaker, khawngaihin, hman ni deuh mai khan dawr tinah kalin Professional Tax hi khawn a ni a. Hei hi khawn dan tur phung reng a ni em ? Khawn dan tur phung reng a nih loh chuan a system kha siam that a va ngai awm em! Min enfel sak turin ka beisei a. Proper tax ti khan ka lo sawi a ni mai thei a,, Minister zahawm tak min lo ngaidam se – professional tax a ni zawk e. An lehkha te pawh ka kawl a, receipt an lo pek te pawh ka kawl a ni. He thil kalphung pangngai a ni nge? a va duhawm lo ve, a official lo em mai a min enchian sak se (Pu Lalchamliana - Aw le, kan lo en zui ang a)

Dr. K. PACHHUNGA : Pu Speaker, Minister zahawm takin hriathiam loh lai te a awm em a tih takah chuan engemaw han zawh ve zawk ka duh a, Sangau godown vengtu Home Guard te kha - border a ni a, buhfai a tam thin si a. Sawlai saw ven loh ringawt chu a hlauhawm dawnin

a lang a. Supply Department lam khan quarter ruak pawh an nei a, pek theih chuan Home Guard kha ven tir leh theih dan a awm em tih kha khawngaihin ka rawn tinawn hram a ni.

PU LALCHAMLIANA, MINISTER : Aw le, in ruak ringawt ni lo deuh sela, tui supply te awm sela. Mihring ve bawk an ni a, khum mutna, single theuh te a theih loh pawhin kel khum ang tal te pawh, han mut theihna tur an provide theih dawn te chuan kan lo ngaihtuah ang a, kan duty te zinga pakhat a nia lawm tih kha ka chhanna ni se. Member zahawm tak Pu Lalsawivunga sawi kha - official lo deuh taka kan lo ti a nih chuan official deuh taka tihdan kawng kan lo zawng ang e. Assessment te chu an lo siam ve ka ring deuh a, an turn-over hrang hrang te ngaihtuahin. Duh tawk dawn tawh ila Pu Speaker. Member zahawm tak tak ten thahnemngai taka min sawi puinaah lawmthu ka sawi leh a. Hun hi ka duh aiin ka hmang rei ta deuh a ni awm e.

Pu Speaker, ka Demand No. 8-na Taxation cheng 24,69,24,000.000 ; Demand No. 16-na cheng 7,98,09,27,000.00 leh Demand No. 30-na Disaster Management & Rehabilitation cheng 27,44,77,000.00 ; a vaiin cheng 8,50,23,28,000.00 te hi he House zahawm tak hian min pass sak ka han ngen e.

S P E A K E R : Aw le, Minister zahawm takin Demand No. 8 Taxation ; Demand No. 16 - Home ; Demand No 30 - Disaster Management & Rhabilitation kum 2019 - 2020-a hman atan a vaia belkhawm cheng 8,50,23,28,000.00 te hi House-ah pass a rawn dil a. Remti apiangin remti ti rawh u le (Members:) Remtilo chuan ‘Remti’ lo ti rawh u le. An awm loh chuan Minister zahawm tak Pu Lalchamliana enkawl a department Demand No. 8 – Taxation ; Demand No. 16 - Home ; Demand No. 30 - Disaster Management & Rehabilitation te hman a tan a vain cheng 8,50,23,28,000.00 te hi House-in a pass ta a ni.

PU LALCHAMLIANA, MINISTER : Pu Speaker, ka lawm e.

PU LALRINTLUANGA SAILO : Pu Speaker, engemaw han sawi tel duh lawk ka nei a, a remchang thei ang em aw. Naktuk hi Art & Culture

demand sawi ni kha a ni a, remchanlohma a awm loh chuan khawngaihin...hemni ah hian Zo inthuama inthuam deuh te kha a mawi awm mang e tih ngaihtuahna kan lo nei a. Engnge kan ngaihdan ni hlawm ni?

SPEAKER : Kan tum dawn nia. Tunah chuan Minister zahawm tak Pu Lalchhandama Ralte, kan sawihona te rawn wind up turin kan sawm ang a. Sawifiah ngaite rawn sawifiah a, a demand-te House-a pass rawn dil nghal turin kan sawm e.

PU LALCHHANDAMA RALTE, MINISTER : Pu Speaker, ka lawm e. Vawiinah House zahawm takah member ten thahnemngai leh taima takin kan demand-te min han sawi pui a. Zawhna te, rawtna te, thurawn tha tak tak te min pe a, a lawmawm a. Kan theih ang chin chin te wind up naah hian han sawi tel ka tum ang a. Amaherawhchu a vaia kan inchhan dawn chuan hun te rin aiin a kal rei deuh tawh avangin a tlangpui, a khaikhawm theihna ang chi angin han sawi mai te ka tum deuh a. Zawhbelhna leh tul kan nei a nih chuan hnungramah chung chu kan ti mai turah ka ngai a.

Pu Speaker, Demand No. 18-na Printing & Stationery kha sawitu member zahawm tak tak pasarih kan nei a. Vawiin hi Minister 3 demand kan sawi avangin hun a tawt a, sawi an chak hlawm viauin ka hria a, amaherawhchu kha kha mi 7 in min rawn sawi sak thei a. Kan hriat anginPrinting & Stationery Department hi department lian leh langsar chu a ni hauh lo, mahse Mizoram sorkar department-ah hian department pawimawh tak, sorkar kutke pawimawh, confidential engkim khawihtu, a loa kan awm theih loh a ni a. Kan hriat angin tun kan session-a kan budget bu zawng zawng leh tul pawimawh, confidential zawng zawngte lo khawih a, tlaivara kan tana lo thawktute an ni. An chungchang hrim hrim hi Zoram mipuite hriatah pawh wind up-naah hian ka han sawi tel duh a. 1972-80 inkar chhung khan Information Department-te nen department khatah awm in, peng khatah an awm a, 1980 atang khan Directorate hrangin Treasury sirah in-bun-in Printing & Stationery Department kan ti a, mi zawng zawngin kan sawi a ni. Amaherawhchu vawiinah chuan Printing & Stationery Directorate, kan Controller hmun pawh khu, kan Department hi sorkar hmasaa sorkar-in ruahmanna a siamah Information Department-in an building sakna extension atan pek a nih tak avangin tun dinhmunah hian kan khawl pui te nen kan hnathawhna kal zel tur pawh insuan ngaiin kan awm mek a ni tih kha ka han sawi hmasa duh a.

Kan establishment hrim hrim hi Aizawl, Lunglei leh Siaha-ah establishment kan nei a. Chungah chuan Aizawl lamah thawktu kan tam deuhin depot lian leh hmun pawh kan nei tam deuh a. Lunglei-ah hian depot pawh kan nei chungin, Press lian vaklo kan nei tel a. Siaha-ah pawh depot kan nei tel bawk a. Kan khawl neihte pawh hi khawl changkang leh khawl lian, North East-ah pawh khawl tha ve tak te zinga ngaih theih kan nei a ni. Kan staff dinhmun hrim hrim hi sanction post hi 291 kan nei a. Chungah chuan 167 luah mek a ni a, thawktu 124 post ruak kan nei a ni. Tunah hian kan thawktute hi an senior chhoh tawh avangin pension hnai tam tak kan nei a. Department pawimawh tak, thil khawih tul tak, hunbi tuka hnathawh ngai a nih si avangin sorkar kal zel turah pawh Printing & Stationery Department-hi thawktute mamawhna kan phuhruk a, kan tihlen deuh deuh hi a tul hlein ka hria a ni.

Sorkarin 2008-ah khan, ‘Guidelines of Execution of Printing Works in Mizoram Government, 2008,’ kha a lo pass tawh a. Sorkar department leh corporation hrang hrang ten print tur thil tul an neihah te, Government Press an dawr ngeina atan te, department leh corporation ten Printing & Stationery Department-ah stationery mamawh lakna tur te hetah hian hung bikna leh sorkar department atanga la tura tihna a lo awm tawh a. Hna tam tak printing works pawh kan thawk a, department tam tak pawhin min pe khawm mek a, kan khawlin a zawh loh leh thawktuin kan manage theih loh dawn pawhin Dan fel tak neiin Mizorama Press Owner te nen te in tied up thain, kan thawh sen loh tur pawh anmahni, registered Press Owners hnenah a intahtawlin thawhtir/pek an ni.

Tin, Stationery chungchangah pawh hian stationery kan neih loh ang chi te a awm a nih pawhin kan department hian non availability certificate pe in, hmun dangah an lei theihna ang chi a pe thin a ni tih kha ka sawi duh a. Nimin piah lawka Hosue-a zawhna ka chhan tawh ang khan department 44-in tunah Printing & Stationery hi min dawr a. Department 13-in tun dinhmunah min la dawr lo a ni tih he House-ah hian reminder angin department hrang hrang enkawltu kan Minister-te leh kan official-te pawhin min hriatpui atana ka duh chu Printing & Stationery Department hi sorkarin dawr tura min tih leh min beisei ang hian dawr tlang hram hram ila tih hi kan inngenin kan insawm a ni.

Chumi loah chuan nichina ka sawi tak ang khan keimahni department bik hian Modern Printing Centre dinna tur atan tunah hian DPR te kan siam a. Crore

12.23 man tunah hian UD&PA te nena ti hovin umzui kan nei mek a ni tih kha ka han sawi duh a ni. Ka sawi tawh ang khan Directorate, kan Controller Office neih ve ber khu tun dinhmunah inlakchhuah kan ngaih tak avangin Assembly House kawt mai, Secretariat Annexe II-ah hian tunah hian kan khawl hmun tur te, engkim mai, inbunna tur te kan inruahman a. Chumi tur chuan hna pawh kan thawk mup mup a, kumin kum chawhnu lamah te hi chuan kan lut chho thei dawn tawh ang a tiin ruahmanna kan nei a. Amaherawhchu Secretariat lam enkawltu, SAD lam pawhin kan lenna tur nia an rin min pek hi, khawl lian pui pui, khawl changkang tak tak nei leh enkawl kan nih bakah, binding room-ah pawh room lian tak mamawh kan nih avangin, tuna min pek room-ah hian kan leng dawn lo hle a ni tih ka sawi duh a. Chumi avang chuan SAD-lam te pawh hian Annexe II-ah hian room dang min pek theih chuan ruahmanna a rang lama min siam sak ka duh a. Chumi chu harsatna a awm a nih pawhin Secretariat Annexe I lamah tal hian Printing & Stationery te hi accommodate se, a hlawma awm khawm ngai kan nih bawk si avangin sorkarin priority min pek kan mamawh hle a ni tih kha Printing & Stationery Department bik chhungah chuan ka sawi duh ni mai se.

Demand No. 28-na Labour, Employment, Skill Development & Entrepreneurship Department kha member zahawm tak 10-in min sawipui a. Kan department hi vawiinah pawh engemaw zat khan in rawn sawi a, department thangduang leh hmabak eng tak nei kan nih thu in, rawn sawi a, rawn tuipuitu kan memberte zingah pawh kan tam ta khawp mai a. Tin, kan Chief Minister zahawm tak, kan Finance Minister ni bawk hian kan department hi min duhsak khawp mai tih a hriat theih a. Tun tum budget siamah pawh hian department hrang hrang, department sawm dawn te chu kum hmasa lama an Budget pawh an phak mang loh lai khan LESDE-ah hian a punna ringawt pawh hi Dr. Vanlalthlana,MLA AIZAWL NORTH-II khan a chhutna min rawn pe a, 256.54% in a increase a ni, a let hnih leh a chanve in budget pawh tihpun a ni a. Tin, member zahawm tak thenkhat ten an sawi ang khan skill development hi he sorkar thar hian nasa taka hmalak tel a tum avangin SEDP ah pawh khan 5 crore kha he department in a hman tur hian a rawn tarlang tel a, a rawn mention tel a ni tih ka sawi duh a ni.

Tin, skill development lam hi langsar vut lo mahse, hmasawnna hnukpui kalpui tur chuan tunlai khawvelah chuan thil tul a ni a. Kan

department hi hlawm thumin then a ni a. Pakhatnaah chuan labour administration lam khawihtu hi kan kal hrang deuh a. Tin, employment service lam hi a awm bawk a, chulo lehah chuan skill development & entrepreneurship lam changtu te. Keini department hi a hming pawh hi a sei khawp mai a, han lam chhuah dawn pawh hian sawi a har lek lek thin a ni. Labour, Employment, Skill Development & Entrepreneurship tih a ni a, a sei khawp mai a, a huam pawh a zau viau a ni. Department thawktu hrim hrim pawh hi 173 sanctioned post kan nei mek a. Chung zingah chuan 117 hnawhkhah a ni a, 56 tunah hian hnawhkhah loh kan nei a. Champhai North bialtu zahawm takin a rawn sawi ang khan, Champhai lama kan department neihchhun te pawh han thuam chaka han ti tur khan a manpower lamah hian kan han tlahniam deuh a. Amaherawhchu, kan sorkarin skill development lam pawimawhna te min hriat sak angin hmabakah hian engemaw chen thla kan zar zauh theihna tur atan a staff lam pawh hi min thuam chak kan beisei viau bawk a ni.

Tin, thil lawmawm deuh chu sorkar thar kan han kal a, he department ka han chan khan skill labour hoten beiseina thar an nei a. Hun rei tak sorkar hmasain an hlawh an lo pun tawh loh minimum wages kan tih, M.R. kan tih te kha he sorkar thar hian sorkarna a lak atanga hun reiloteah khan cabinet meeting vawihnihna ah an hlawh tihpunna tur a siam nghal a. Notification kha ni 18.2.2019-ah tichhuakin a effective date-ah pawh khan sorkar hmasa huna ni 1.10.2018 atanga hlawh pung tur ang khan ruahmanna a siam sak a. Chumi ringawtah pawh chuan sorkarin kan pawisa sen belh cheng vaibelchhe 40 chuang chumi decision kan siamah chuan mi singkhat zet zawtin hamthatna an hmuh theihna turin hmalakna hmasaah kan nei a. Chu chuan workers welfare nasa taka a ngaiantuahna a tilang hle a ni.

Tin, chumi bakah chuan he department hnuiah hian Mizoram Building and Others Construction Workers Welfare Board a awm a. Vawiinah khan member tam takin kan sawi a, MBOCWB hman turah hian sorkar hnuia contract emaw, supply thawkte emaw zawng zawngin cess 1% an rawn chhunglut a. Kan cess hi Mizoram Building & Others Construction Workers Welfare Board din tirk atangin 2011 atanga 2019, tun financial year kal liam ta thleng khan vaibelchhe 85,22,46,638.00 kan hmu tawh a. Amaherawhchu

vaibelchhe 20,97,13,866.00 hmanral tawh a ni a, vaibelchhe 63 dawn zet hi hman loh hian kan la kawl a ni. A hman dan tur phung hi Serchhip bialtu MLA zahawm takin a sawi ang khan ‘ennawn deuh pawh atul lo em ni’ a tih ang khan guidelines awm ang hi rinai hian a khirh khawp mai a. 5% hi administrative cost-ah hman theih a ni a ti a. A bak chu workers welfare-ah hman tur a ni tih te a ni a. Tunhnaiah hian 20% skill develop-ah hman theih turin rawn tih a ni ta a. Hei hi India ram pum-ah hman dan tur guideline awm anih avangin Mizoramah kan duh anga huang kan zauh ngawt theih anih loh avangin hei pawh hi ennawn deuh dan leh kawng dang deuh zawn ava tha ve tiin department ho nen kan sawiho mek a ni.

Tin, skill development entrepreneurship hnuiah hian hma nasa takin kan la a, training farmers 15 te nen thawk tlangin thalai 5000 rual dawn training kan pe a. Chung zingah chuan thalai 765 zet te hian hna an hmu tawh a ni. Tin, State Skill Mission din a ni a, department hrang hranga skill development hmalakna tur nei hote phuar khawmna turin SANKALP din a ni a, rei vak lovah hmalak kan tum dawn a ni. Tin, chu lo lehah chuan kan department-ah hian skill development nasa taka kalpui a ni a, kan hriat tlan angin Industrial Training Institute (ITI) hi Aizawl-ah leh Lunglei-ah leh Siaha-ah hun hmasa lam khan din lo ni tawhin skill development trade hrang hrang 23 velah kan kalpui tawh a ni. Chutihrual chuan Serchhip, Champhai leh Kolasib District-ah te ITI dinna tur hi hun hmasa lamah khan hmuh a ni a. Serchhip leh Champhai-ah te chuan building sak a ni a, Kolasib District-ah tan ala ni lova. 2020 financial year tawpah hian tawp tawh tur a nih avangin hmalak chhoh tum mek a ni tih ka sawi duh a ni.

Tin, LESDE kan tih tuna kan department sawi mek hnuiah hian Mizoram Youth Commission kan tih, thalaite enkawltu Youth Commission hi a awm mek a. Mizoram Youth Commission hi kan hriat angin kum 2008-a MNF ministry-in a din kha a ni a. Thalaite ei leh bar zawnna kawng leh kawng dik kawh hmuhna tur te, tuai hriamna tur te, kan financial support siamna tur kawng hrang hranga din a ni. Chumi hnuiah chuan Civil Service coaching te neih a ni a. Reliable firm te nen partnership-in engkim kan ti a, kan thalai tam tak ten chumi hnuiah chuan coaching an kal a; tin, IIT te, JEE te, NEET tih te, Banking leh Army lamah te pawh coaching pek an ni a. Tin, hemi hnuiah hian

incentive cash award te pawh siam turin kan ti a. Mizo thalai UPSC -ah te kan tling tlem kan tihah pawh incentive pek turin offer te kan siam a, Preliminary an tlinin cheng nuaikhat pek, main an tlinin cheng nuaihnih pek tih te, University recognise-ah topper an nih chuan Master degree topper chu ₹40,000.00 pek tih te. Chutiang chuan he MYC hnuaiah hian kan thalai te inelna thianghlim leh tha leh hmabakah hman tlak, ram tana hna tha an thawh theihna atan offer tam tak kan siam a ni.

Tin, keimahni puala Coaching Centre kan neih theihna turin tunah hian pawisa pawh Coaching Centre sakna tur te awm tawh sa kan nei a, sorkar hmasa khan a lo ruahman a. Amaherawhchu sakna hmun tur engmah a awm loh avangin tun hunah hian Coaching Centre sakna turin kan inruahman a. Tin, Youth Centre hi Aizawl, Lunglei leh Serchhip-ah sa turin kan inruahman a. Serchhip bialtuin a zawhna ang khan Serchhip-a Youth Centre tur te pawh a satu tur contractor pawh thlan a ni tawh a, a hmun tur pawh tun hnai khan tihfel a ni a, Lunglei pawh a hmun tur identify a ni. Heng hi sorkar hmasa khan engemaw chen ruahmann a lo kalpui, mahse a hmunhma engmah thlan felna awm lo, contractor chiah thlan felsain min kalsan a ni. Chu chu contractor an thlang fel a, a hmun a awm si lova, chu chu keinin kan thlang fel a ni tih kha ka han sawi duh hrim hrim a ni.

Chu lo lehah chuan ka sawi leh duh chu tun dinhmunah harsatna kan neih chu Aizawl South II bialtu MLA zahawm tak pawhin a rawn zawh Kan Directorate Republic veng ami hi hmun dangah tichhuah/pek tumna a awm em ni tih kha zawhna a awm a, hmun ram chu kan nei a, Aizawl Republic-ah hmun chep deuhhleka. Mahse, hun kal tawhah khan kan building hi a him lo, luah tlak a ni tawh lo ve tiin thuneitu ten chhuah san tura an tih avangin chhuah san a ni a. Building han sak thatna tur mai kan nei bawk si lova, Tuikhuahtlang pan chhohnaah hian mi mal in kan luah a. Tin, kan Directorate piah lamah district level hian mimal in an luah bawk a ni. He department hi hun lo kal zel turah department pawimawh, kan thanna tur hnukpui pawimawh a nih avangin Directorate hmunhma tha kan neih hi a tul tak zet zet a. Sorkar hmasa hunah khan Secretariat hmunh kuan Directorate hmun tur pek kan ni a, mahse a sak hun tur chhung an pekah khan sakna tur sum kha pek a nih si loh avangin cancelled sak leh an ni. Chu chu tun hunah hian kan sorkar tharah hian kan Chief Minister hnenah he department-in Directorate building kan neih theihna tur leh building hmunhma felfai nuam zawk

kan neih theihna turin hmun min allot turin kan dil a, kan Chief Minister-in min phur pui a. Rei vak lovah hian Directorate hmun thar kan neih kan beisei a. Chumi hmunah chuan kan district te nen te inthlun khawmna te neia, training centre te pawh din tumin ruahmanna kan nei mek a. Kan Chief Minister hian he department hi min tui pui a, kan sawi tawh ang khan kumin budget-ah budget pung chak ber, pung sang ber a nih piah lamah SEDP-ah pawh hei hi chiang takin a reflect a ni.

Aw le, a bu pui ber Education lamah Demand No. 20 - Pu Speaker, member zawng zawng khan an sawi vek mai a, member 27-in an sawi a, vawiin kan discussion hi Education khan a lai lum a luah avangin eng chin nge ka rawn react dawn ka hre lova. A tam khawp mai, ka react kim seng lo ang a, a tlangpui ka sawi phawt mai ang e.

Education Department hi Mizoram sorkar hnuaih chuan department lian ber, thawktu pawh tamna ber, budget pawh sang ber a ni kan ti a, vawiinah member tam tak khan an rawn sawi a, thawktu pawh kan tam, khawtin thleng pha a ni a. Kan ram development a thanchak na turinthahnemngaia an sawi kha Education ber kan ngaihthah chuan kan ram development hi kawngpui tha te, building tha te nei mah ila Education a tlakchhiat chuan hmasawnna kebai a ni dawn tih a lang reng a ni. Tun kan sorkar tharah hian Chief Minister, Finance Minister ni bawk, Education ngai pawimawh kan nei a, a lawmawm khawp mai. Kan budget a len tehlul nen a punna rate pawh kha a sang viau a, 23.19 %-in kan pung a, chumi piah lamah chuan SEDP-ah khan vaibelchhe 30 pawh a rawn reflect tel a ni. Khatiang zawng zawng han en khan Education hi he sorkar thar hian priority a pe a ni tih a lang a. Tin, chumi piah lamah chuan kan Chief Minister ngei, kan House Leader hian hmun tam taka a thusawinaah Education te, Health te he sorkar hian priority a pe dawn tih hi a sawi zin avangin kan thla a muang viau a ni.

Education Department kan han tih hian ngaihtuahna kalah hlawm li kan awm a. Pakhatnaah chuan – MBSE, (Mizoram Board of School Education), anni hi autonomous body an ni a, kan hriat angin kan exam pawimawh HSLC te, HSSLC te, chu bakah chuan D.Led leh MTET kan tih ang chi te exam lo buatsaihlu an ni.

Tin, MBSE te hian Matric Exam Centre te, a tul dan anga han pe a, kan thalaite exam-na felfai, thianglim an neih theihna tur a buaipuitu an ni a. Tin, MBSE hi academic authority, secondary level-ah an ni. High Sikul leh Higher Secondary Sikulte zirlaibu tur, text book te pawh a thlang a. Tin, ennawn a ngaih hun pawha ennawntu an ni a. Tun dinhmunah hian kan result te, pass percentage-te sang ve viau anga kan lan aiin ram puma inelna NEET exam a ni emaw, thildang JEE-ah te pawh hian kan nula tlangvalte rin aiin result a tha lo viau zel mai a. Chumi avang chuan tun dinhmunah pawh hian MBSE chuan kan exam system-te pawh hi ennawn deuh a tul lo maw, an ti a. Zirlaibu hi chu all India level-a hman pangngai takin NCERT-in a recommend zirlaibu vek hi MBSE pawh hian a recommend tho a ni. Chumi phenah chuan kan academic authority an nih angin zirna quality tha zawk a awm theihna turin anni hian exam question leh classroom zirtirna inzawm tlat, awmze nei zawk leh tinzawn mumal nei zawka kalpui a nih theihna turin question set dan bu, “Scheme of Examination and Question Design” chu April, 2019 khan a tichhuak thar ta a. Chumi hnuiah chuan naupangte thiamna tak tak cho chhuak tur, exam oriented, by-heart tawp loh deuh, book knowledge piah lamah thil dang, naupangte pawhin an hriat theih tur, competition sang zawk hmachhawn thei tura ruahman turin 2020 HSLC exam lo awm turah hi chuan exam question an set dan pattern pawh hi rawn tihdanglam an tum dawn a. Chumi tur chuan zirtirtute train tur, Trainers turte pawh state pawn atangin mithiamte chah lutin ruahmanna an siam mek a ni. Zirna quality tha zawk a awm theihna turin ruahmanna siam a ni. Tin, anmahni te nen pawh kan sawiho tawh a, zirlaibuenawn hnah academic authority an nih angin kan nula tlangval, kan tleirawl rual zawkten nun dan phungdik zir an mamawh hle tih tukinah member ten an sawi kha. Kan tradition, social life, manner and etiquette, nationalism a ni emaw, kawng tha kawhhmuh theihna tur ang hi zirlaibuh pawh a theih ang chin chinah telh turin kan inhriattir a. Chutiang tur chuan kan innge a, theihtawp chhuah ho kan tum mek ani.

Tin, a dawt lehah chuan Education Department hnuiah, SCERT, State Council of Educational Research & Training kan tih hi a awm a. Director hrان nei an ni. Amaherawhchu Secretariat-ah Education-ah kan inhlunkhawm avangin anni hi kan hriat angin DIET 8 district hrang hranga ami te an enkawl bakah hian B.Ed zirna hi 3 Aizawl, Lunglei leh B.Ed special course SCERT-ah te kan nei a.

Tin, SCERT hi academic authority elementary Stage, primary leh middle; nursery kan tih level te an enkual a. Anni hian chung zirlaibu siam te, an standard tur engkim maintain te hi an kutah a awm a, theihtawp an chhuah a. Kum 2015-ah khan tuna kan zirlaibu hmante hi an hmang tan a. Kum 5 danah ennawn thin a nih avangin tunah hian zirlaibute pawh ennawn leh an tum mek a. Kan sawi ang khan anni pawh kan sawiho tawhnaah chuan naupang te te ten an thanlen pui turah hian tunhmaa kan zirlaia awm thin, nu hmangaihna kan tih te, aia upa zah chungchang te leh chhungkua hlutna engkim naupangten an hriat chhoh theihna turin, Mizonization-a an let lehna turin khatiang chi kha telh turin kan inngen a, chutiang tur chuan ruahmanna pawh kan siam mek a ni tih kasawi leh duh a ni.

Tin, hemi lo lehah hian Wing lian deuh pakhat kan neih leh chu SSA, RMSA leh TE kan ti a, chung ho chu tunah hian “Samagra” tiin hmun khatah phuar khawm tur a ni ta a ni. Rei vak lovah hian Samagra angin an kalkhawm ang a. SSA, RMSA, TE a awm tawh dawn lo va, Samagra tihtur a ni. Directorate pakhat angin an khaikhawm tawh dawn a nih chu. Chu chu rei loteah hian kan hmachhawn dawn tih pawh kha ka han sawi duh a ni. A bak chu School Education Directorate kan hriat pangngai hi a ni.

Awle, ka han sawifiah kual a, department lian a nih avangin a wing hrang hrang te pawh kha department thenkhat directorate aia lian mah deuh vek an ni a. Chuvangin anmahni han mention tel loh kha ka ui avangin ka rawn sawi a ni. Ka sawi tak ang khan kan sorkar thar hian education hi priority-ah min pek avangin hun reilo te, thla 6 emaw chauh kan sorkar chhung hian Education bikah hna thar lak tur hi 1120 dawn zet, Police battalion khat aia tam kan Chief Minister hian hmalakna tur min phalsak der tawh a ni. Hei hi a ropui khawp mai a, achievement lian tak a ni. Hna nghet an ni emaw, ni lo emaw cabinet sanctioned post hi, heti zat kan nei hi kan vannei hle ani. Kan hriat angin zirtirtu 946 lakna tur chungchangte bakah khan ka han sawi belh duh chu MR IVth Grade 54 lak phalna te, chumi bakah chuan tunhmaa substitute teacher kan tih, thlawhbawk zirtirtu kan tih, rambuai laia zirtirna hna lo thawk, sorkarin kan chhawr laklawh ho kha mi 36 an lo la awm a ni, hlawh mumal pawh la lo kha. A then chu an pension tawh a, a then chu pension lek lekte an ni a. Council of Ministers meeting hnuhnung ber khan chung 36-te chu regularize turin a passed bawk a.

Sorkar hmasain a lo kalpui, ruahmanna a lo neih tawh angin Primary zirtirtumi 94 leh Middle School 58, a vaiin 152-te kha kumin Feb thla ah result tetichhuakin , hmanni lawkah appointment kan pe thar bawk a. Chutiangchuan, hna thar 1120 zet hi tun thla 6 chhung hian ruahman a ni. Pu Speaker, i veilama thu te khan an rawn sawi, uar deuha han sawifiah duh ka nei a. Mipuite hi zirtirna himlo, diklo kan pe thei lek lekin ka hria a. Zirtirtu thar kan lak turte hi 946, a tak tak kan lak hunah chuan hei ai hian a tlem hret dawn. A chhan chu he post sanction kan nei tawha kha tun hnaiah Cabinet-in lak kan han tiyah khan a lo ei then ve hret hret avangin kan post neihsa kha a lo ei then a. Engpawh nise, Council of Minister phal ang chuan 946 kan lak turah hian, MTET relaxation chungchangthu, Thorang bialtu MLA zahawm tak khan a rawn sawi a. “TET an zir hah tehlul nen, MTET an tul ta lo tur kha a van pawi em !” a ti a. MTET nei hlei hlei kha kan duh zawk a ni. Tunah hian Mizoram sorkar hian zirtirtu kan lak tur hi fimkhur takin kan kalpui a. Kan ram dinhmun en chungin thutlukna kan siam a ni tih hi Zoram mipuite hriatah ka sawi duh a ni. Palak bialtu khan, MTET nei tawh chin kha 4109 niin a hriat thu a sawi a. A sawi dik viau a, Primary School level-ah hian 1510, Middle School bik chauh nei 1090, a pahnih a nei kawp hi 752 an ni a. 4109 anga a lan lai khan a mihring chuan MTET nei hi 3352 an ni. Mahse, khang MTET nei te kha tuna thawklai regular tam tak an awm a, SSA, RMSA –a thawk tam tak an awm a, sumdawng ta daihte tam tak an awm a. Hna kan han la dawn a, tute nge MTET nei, hna zawng lai awm tih hi keini chuan kan han zawt nghal ta a. Employment Exchange-ah kan han kal a, MTET nei zirtirtu nih duh, in register engzat nge awm kan en a. Zirtirtu mamawhna san tehlul nen MTET nei zirtirtu nih duh in register hi 149 chiah an lo awm a. Chuvangin, Mizoram pumpuiah MTET nei zirtirtu atana hna zawnglai awm hi 149 an ni a, a bakte hi hna nghet an thawk tawh nge, thil dang an ti nge tih hi sorkar tan chuan hriat ngaihna a awm loh avangin, tunah hian relaxation kha siam loh theih loh a ni. Dan ding laiah khan MTET nei ngei ngei tih a nih si avangin sorkar hian arkhawthimundai ngawt lovin awmze neiin MTET relaxation hi kan ram mamawh thlir chungin a siam ta ani.

Tin, Zirtirtu kan lak turah hian trained ngei, qualified, RTE-in a phut ang ngeiin trained ngei kan la dawn a. DLED nei emaw, chutiang chauh chu lak kan tum tih ka sawi duh a, qualified lo lak kan tum reng reng lo.

Tin, engati nge MPSC atangin MR zirtirtu lak tur in lakchhuah tih chungchang kha han sawifiah ngai lai deuh a awm a. Hei hi kan thlirna azirin a dik, a diklo tih a awm thei. Sorkarna bul kan han tan chiah a, zirtirtu indaihlohn, zirtirtu post ruak hi kan han en a. School-a thawk hrim hrim, zirtirna lam huangah, WE teacherte nen zirtirtu post ruak hrim hrim hi 2574 a awm tawh a ni. Zirtirtu kha an tam hle mai tihte kha kan sawi a, khawi data-in nge in tih aw kan ti a. Elementary-ah te pawh hian kan han chhut a, kan School neih zawng zawng leh zirtirtu thawkte kan han en hian classroom daih zirtirtu hi an awm lo hrim hrim! School thenkhat chu an lo buk deuh a nih pawhin, school thenkhat sorkar hmasain min hnutchhiah chu zirtirtu awm reng reng lo school 13 an ni a. Chu chang a ni lo, single teacher pawh kan ngah em em (Pu VANLALHLANA: Teacher student ratio kha, zirtirtu pakhatin naupang 14 a enkawl ang khan i chhang a, kha kha chu indaih tihna a ni lawm ni?) Pu Speaker, kha pawh kha ka rawn hrilhfiah ang. TPR leh tuna kan tih hi a danglamna ka sawi dawn a ni. TPR kha chu kan sawi ang khan, tuna MLA zahawm tak Aizawl North-I bialtu rawn sawi ang khan national norms chu 1:30 a ni. Keini chu 1:13 a lo nih pawhin, thingtlang khaw te reuh te te, bawk ah pawh school kan nei vek si a. Phai ramah chuan mihring an tam a, naupang pawh an tam bawk a ni. Keiniah chuan khaw te reuh te te-ah pawh zirtirna pek vek a ngai a. RTE-in zirtirna pe turin min phut bawk si a. Naupang 20 tling mang lo pawh Class I, II, III Tv thleng awm a ngai a, zirtirtu pakhatin class I – IV a lak vek theih loh. Naupang pahnih pawh class II-ah awm se, a class a hrang tlat a ni. Tah chuan, kan ngaihtuahna chu 946 la turin Council of Minister-in a pawm a, kan Chief Minister ho a kan ngaihtuahnaah hian zirtirtu classroom daih tal ni rawh se, spare teacher pawh an awm lo hrim hrim. Classroom daih zirtirtu hi tuna kan ngaihtuahnaah hian a awm hmasa a ni.

Tin, chu lo lehah chuan, a khaw mi lak kan han tih chungchange ka sawi duh chu, MPSC hian a lak a fair ang tih pawh kan ring, a tha tih pawh kan hria. Amaherawhchu sorkar thar kan ni a, kan han bunin, “Khawtinah zirtirtu kan nei lo, pakhat chauh kan nei, MLA hlawhin kan ruai, ni za inhlawnain kan ruai, zirtirtu vekin kan hlawhin kan ruai,” an ti a, kan hnatiang sup sup mai a ni. Zirtirtu lak dan pangngaia kan tih dawn chuan, experience kan nei, zirtirtu 152 lak te kha, sorkar hmasa khan July, 2017-ah Cabinet-in a phal a. Tahchuan, MPSC-ah October thla bawr velah hnalak phalna, la tura hriattirna an pe a. 2018 June/July thla velah

written test an buatsaih a. February 2019-ah written test result a chhuak a ni. 150 vel la turin kum 2 chhung deuhthaw kan hmang a ni. 1000 chuang zirtirtu mamawh tawh laia khatiang speed tur chuan kan ram education hi a thi hman ang tih kan hlau a. Chumi avang chuan hna ng het lovin Muster Roll basis-in la ila, MR regularisation scheme-te pawh a awm a, lo kal zel ta ang se la, engtik niah emaw he scheme hmangin ng heh te pawh lo ngai dawn ni ta se, kan dan neih ang thlapin MTET nei lo chu regularize theih an ni dawn chuang lo. Kan dan hi engkimah kan zawm a, ram mamawh avangin tunah hian kan kalpui lo thei lo a ni. Tin, chu chang a ni lo, a khaw mi kan han tihna hi member zahawm tak takten an sawi a. Lawngtlai West bialtu pawhin ministry hmasaah pawh a pawh a ngai pawimawh leh a sawi thin thu a sawi. Aizawl/hmundang atangin mi tam tak zirtirtu MPSC lak an lo kal a, an awm rei leh duh lo a, aikal an la zel a ti. MPSC-in a lak hian mithiam tak takin an rawn exam a, an tling a. Thingtlangah a post loh theih loh a, kan in post a. Sorkar hmasa hun zawng zawngah pawh a ni vek, 400 chuang an la. Amaherawhchu, awm hlen duh hi an awm chuang lo reng reng a, transfe an khel zel a. Chhuanlam hrang hrang leh kil tinah political pressure nen an nawr vek a ni. Chumi chu sorkar hian a ngaihtuah a, thingthlang thleng phak education hi he sorkar thar hian a ngai pawimawh a ni tih ka sawi duh a ni. Kan Chief Minister hovin a khaw mi qualified an awm phawt chuan eng party mah kan sawi lo, party induhsak lam kan sawi lo hrim hrim, a khaw mi qualified an awm phawt chuan kan la hmasa ber dawn.

A dawt lehah chuan a khaw hnaivai kan ti. Tin, a district thawh duhna ngei ah dil rawh se kan ti. Hei hi kan sawina chhan chu Champhai District-a thawk, Aizawl luh phet an tum kha. Champhai District dil chu Champhai District-ah a service ang. Khatiang tur khan ngaihtuahna kan seng a. Kan ram education kal zel turah awmze nei a, systematic-a kal tum kan ni. Tin, member thenkhat khan hmannia Aizawl North-II bialtu MLA zahawm tak zawnha Hnam Run list in hmang leh dawn em tih chungchang-ah commitment a pe thei lo ti te khan min sawi a. A theih chin chinah a fair thei ang berin ka ti dawn kan tih kha. Eng hna lakah mah hian Hnam Run hian list a nei ngai lo tih hi ka sawi duh a. Hnam Run list hi kan hriat ve ngai loh avangin direct takin kan chhang lo mai a ni. Kan theih chin chinah a fair thei ang berin kan ti dawn kan tih hi a result lo en ula tih he House-a hian ka sawi duh. A dawt lehah kan theih chin bak a mi chu House-ah kan la sawiho leh dawn a ni tih ka sawi duh a ni. Kan duh chu zirna hi a tha thei ang ber, politics hi tel

suh se tih mimal ang pawhin ka sawi a ni. Party politics hi a tel tur a ni lo. Zirnaah chuan a thiam kan la ang kan ti. (**PU ZODINTLUANGA RALTE** : A khaw mi kan la dawn a tih kha, post by post-in advertisement an chhuah dawn nge, engtin nge khalai kha min hrilh fiah thei em aw? A khaw mi tih ngawt kha.) Pu Speaker, ka lo sawi hmaih a nih kha Thorang bialtu zahawm tak zawhna kha. Tunah hian post ruak awm zawng zawng hi kan identify vek tawh a. District tinah, Champhai District-ah engzat nge lak tur tih te, a school tih zawng zawng te, kan tar chhuak vek dawn. Miin dilna an siam hunah an duhna 1st option, 2nd option an pe ang. Chumi ang chuan interview DPC-in a ti ang a. DPC, district tina kan neih turah hian District DC a Chairman ang a, DEO Secretary a ni ang kan ti a. DP&AR aiawhte nen an ti ang kan ti a ni. Felfai tak, thianghlim takin kan theih chin chinah lak kan tum kan tih thin kha vawiinah ka rawn sawifiah deuh hlek a ni.

A dawt lehah chuan member zahawm takin a rawn sawi chhuah, Home Minister zahawm tak khan a sawi tawh na a, a sawi zikluak lo deuh a. IV Grade hna kan la turah a form man ₹ 150 khan sawi a hlawh a. Kei ngei pawhin ₹ 150 a rate tur an han tih khan kan department Directorate lam pawh ka zawt nghal a. Amaherawhchu Pu Speaker, sorkar hmasa, nikum lama sorkarte khan 15th February 2015-ah khan he gazette hi an lo chhuah a. Chumiah chuan IV Grade lak turah pawh a form an lei chhuahna tur hi exam fee angin ₹ 150 an lo ti a ni. (**PU ZODINTLUANGA RALTE** : Printing & Stationery chungchangah sorkar hmasain a tih avanga khilaia duh lo deuha chhuak angin a sawi a. Tunah sorkar an ni tawh a, engatinge Printing & Stationery pawh kha a ngaiah a dah mai loh. Tin, tunah pawh a form kha a to a nih chuan a tihiang theitu a ni a, lo tihiang mai ang hmiang. Khatianga sawi vak vak a ngai em ni, a tihiang theitu an ni tawh alawm.) (**PU LALDUHOMA** : Pu Speaker, a sawi fel hmaa lo tihiuai loh n se a tha ang a.) Printing & Stationery insawn chungchang kan sawi khan lungawi loh thu kan sawi lo. Printing & Stationery hmunhma tha leh kan len ngei na tur ah min dah tawh rawh u, sorkar hmasain min sawn si a kan ti mai a ni. Tunah pawh in thil tih kha kan rawn chhunzawm mai a ni tih kha Pu Speaker, ka sawi duh a ni.

A dawt lehah chuan Pu Speaker, Muster Roll 54 kan lak tur pawh hi Zoram mipuite hriattirna ka pek nghal duh chu tun dinhmunah hian Muster Roll hi mi 8871-in post 54 atan dilna form an la a. Amaherawhchu, form rawn thehlut hi chu 6617 kan dawng a, complete nge incomplete tih tunah hian kan check mek a ni. Kalpui

kan tum danah chuan Pu Speaker, Muster Roll IV Grade exam tura Aizawl rawn pan khawm ruih ruih vek hi tha lovin department hotute nen kan hria a. District tinah exam hi a rualin kan nei dawn a ni. Hei hi thingtlang atanga Grade IV dil tan te pawh a awlsam zawkna turin anmahni district theuhah Education Department set up lian tak mai DEO ho in an awm vek a. Chu chuan question thuhmun vek hi a rualin district tinah exam anconduct ang a, a diltute kha an-mahni district theuhah hriattirna pe turin kan inruahman mek a ni tih kha he House hi ka hrilh nghal bawk a ni.

Pu Speaker, kan tui lutuk dawn a, (**SPEAKER** : E, inthlahrung miah suh.) Hmalam thlirna leh harsatna kan neih chungchang Pu Speaker, tlem ka sawi leh ang a. Vawiinah khan member zahawm tak tak te khan in vei tak tak, in sawi thin,hmanhmawh avangin in sawi kim lo deuh niin ka hria a. Hindi zirtirtu 1305 ban tak te khan he House thukhawm hi min lo thlir ve thapin ka ring a. Sorkarna kan chan hlim atangin, Hindi zirtirtu 1305 te lak let leh an nih theihna turin theihtawpin hma kanla a. Kan Chief Minister zahawm tak pawh Delhi-a a kal hmasak berah Prime Minister leh Home Minister te hemi chungchang hi a sawipui a. Tin, kan senior Minister Dr.R.Lalthangiana pawhin HRD Minister te a sawipui a, kei pawhin chutiang chuan Delhi ah zuk kalin hemi chungchang hi hotute ka zuk sawipui a. Tuna ministry thar a lo pian leh hnuah pawh hian kan session leh thil velah hian kan la kal thla hman lo chungin D.O letter Minister thar hnenah ka thawn leh a. Hindi zirtirtu 1305 ban an ni hi anmahni hrim hrim piah lamah kan ramah Hindi zirna 40 % vel school ah hian zirtirtu neilo kan awm ta a. Vawiinah pawh member thenkhat khan in bialah Hindi zirtirtu in neih loh thu ininsawi kha, chung chu khami chawl ta te kal zel nghawng kha a ni. India hnenah Hindi zirtirtu kan lak leh theihna turin nasa takin hma kan la tih ka sawi duh a. Tin, SSA leh RMSA-a thawktu hi 4000 dawn zet zawt kan nei a, heng te kal zel dan tur chungchang te pawh hi he hian uluk takin a ngaihtuah a. Kan sum dinhmun nen engtinngé kan zirtirtu te kan kalpui ang tih te pawh hi kan ngaihtuah a. CSS hnuia Hindi ang mai hian engtik ni ah emaw scheme hi a rawn tawp ve mai ang tih kan hlauh avangin, ang pawhin ngaituahna kan sen mek ah hian anni hi engtinngé hun kal zel turah service security tha zawk an neih ang tih te pawh kan sawiho a. Thutlukna kan la neilo chungin, hna nghet lak tur chungchangah pawh an tan ruahmanna siam a tha lawm ni han tih te. Kawng chi

danga an service security tur pawh hi sorkarin ngaihtuahna a hmang mek a ni tih kha House information ah ka sawi duh a ni.

Tin, chumi lo leh chu school upgrade chungchang kha member eng emaw zatin an sawi a. Khawtlang enkawl, private te, lumpsum-a luh te, rei tak lumpsum grant-in-aid, adhoc grant-in-aid awm duhna te, adhoc grant-in-aida rei tak awm, provincialise-a awm duh te pawh kan awm a ni. Sorkarin hemi chungchang pawh hi uluk takin a thlir a, kan Chief Minister pawhin a ngaihpawimawh a ni. Hei hi remchang hmasaah engchin nge kan kalpui theih tur tih hi sorkarin a thlir dawn a ni tih ka sawi leh duh a ni.

Tin, High School zirtirtu kan indaihlohma kan sawi a, Palak bialtu MLA zahawm tak Pu K.T Rokhaw pawh khan a sawi ang khan High School zirtirtu kan neih loh pawh 164 hnawh khah dilin sorkar ah kan thlen leh mek a. Tin, chumi lo lehah chuan harsatna kan neih member ten in sawi hrang hrang, Headmaster kan nei lo tih te kha a awm nual a. Tun dinhmun ah hian sorkar enkawl Higher Secondary School 5-ah hian Principal kan nei lo a, High School Headmaster neilo hi 73 an ni a, Middle School Headmaster neilo hi 129 kan nei mek a ni. Kan hriat angin Headmaster chu Gazetted post a ni a, anni promotion a kal tir chu MPSC kut a nih avangin keini pawhin hei hi rawn chhuak tawh se, MPSC lam atangin hengte hnawh khahna tur hi lo chhuak thei tawh se tih hi kan nghakhlel viau a. Tin, chumi piah lamah chuan Headmaster neilo Primary-ah 209 kan nei a, chu chu tun hnaiah kan Chief Minister remruatnain 134 Headmaster fill up phalna min rawn pe a. Hei hi rei vak loah Primary School pawh 134 kan fill up thei ang a, a dang pawh hi dilna kan siam chhunzawm leh dawn nia tiin Finance Department lam pawhin min chah a ni.

Tin, a dawt lehah chuan a tlangpui kan ngaih pawimawh em em chu, nichina member zahawm tak Pu Hlana, Aizawl North – I bialtu in a sawi TPR chungchangah khan 1:14 Mizoram kan ni a, national norms 1:30 kan tih kha a chhanna kha a fiahah kan ngai mai em aw ka ti a. Keiniah chuan khaw te reuh te te kan tam a ; tin, tunhma chuan school hi kan lo ngah laklawh a ni. Dik tak chuan school hi han khar ngawt theih mang loh hi a tam si a. School awm ve si, naupang 20 te an awm a, Class – I to IV ah te, class 4 awm si a, zirtirtu pakhat ngawt pek kha national ratioa 1:30 angin, naupang 30 an awm a, zirtirtu pakhat nei rawh se ti ta ila, Class I – IV nilengin zing dar 9 AM atang tlai dar 2:30 PM zirtirtur chuan mihring

chakna leh finnain a pha lo ang. Chuvang chuan demand kan sawi danah khan rationalization hi tih ni se, zirtirtute kan indaih mai lawng maw kan ti a. Calculation tam tak kan nei tawh a, kan theih chin chin ah rationalization pawh kan ti, zirtirtu pawh hi kan siam rem viau a, tunah pawh hian. Chuti chung chuan zirtirtu a mihring hrim hrim hian kan indaihlo a ni tih ka sawi duh a. Tuna kan lak tur hi awmze neiin kan ti a, state sum heklo thei ang tur leh awmze nei takin kan kalpui a ni tih kha ka sawi duh bawk a ni.

Pu Speaker, a dawt lehah chuan (**Pu LALRINDIKA RALTE** : Pu Speaker, thil pakhat chiah khalaiah khan. Ratio chungchang kha ram pum huap angin an la lo nge ka hre lo a. Statistical handbook-ah hian Primary School-ah hian 1:18 a ni a, Middle School-ah hian 1:9, High School-ah 1:8. Hei hi ram pum angin an la lo nge, a bukna lai chiah an la nge. Hei hi wrong information nge? hei hi kan nei thlap kha a ni a.) member tam takin an sawi transfer & posting chungchangah rules mumal tak neih a va tha tawh ve tih kha, MNF sorkar hmasa kum 2006-ah khan Transfer & Posting Rules hi siam a ni a, House-ah lay a ni tawh a ni. Amaherawhchu hman a nih dawn khan hman hleihtheihlohin a awm a. Assembly Committee zawk hian a scrap hrih ta a, ennawn leh tura a tih avangin, department-ah a lo let leh a, kum 10 chhung khan mangnghilh zingah a tel a. Chuvang chuan keini sorkar thar chuan ngai pawimawhin, tun dinhmunah hotute nen vawi eng emaw zat kan thukhawm tawh a. June thla chhunga, a final lo siam turin Committee/Task Force te pawh Director, Education kaihhruainain kan siam a. June thla chhung hian rawn peih ula, July thlaah rawn thehluh hman tum rawh u, kan ti a. Chutiang chuan kan theih ang chin chinah chuan kan kalpui a. Chu chu ka hriattir duh a ni. Vawiinah member tam takin kan sawi tawh ang khan category hrang hrangah Mizoram khuate pawh daha, zirtirtute hi sawn kuala, rotationa an kal theih dan tur te pawh ruahmanneng emaw zat kan nei a ni.

Tin, sorkar thar hian kan ngaihpawimawh, kan Chief Minister hoa kan sawikhawm pawh a kan ngaih pawimawh em em chu school inspection tih thar hi a ni. Kum tam tak school hi inspection a awm tawh lo va, a kal ngaiin an kal mai mai a. Inspecting Officer te pawh hi thuneihna kan lo pe mumal tawh lo va. Chumi avang chuan school zawng zawng hi a inthlahdul tawh a, kan dinhmun hi a chhe em em a ni. Sorkar thar hian inspection hi mumal zawk, chak zawka neih leh tumin inspecting staff te pawh tichak turin, an bial fanna tur atan pawh vehicle, Bolero

pawh 10 a lei a. Chung chu Inspecting Officer te kan pe a, thingtlang kil zawkah te an kal theihna turin. MPSC-ah CEO 5 lakna tur min pe bawk a. Chu chu October thlaah exam nei turin ruahman mek a ni a. A theih chin chinah inspection hi mumal zawka neih kan tum a ni.

Hemi piah lamah hian sawikhawmna tun stage-ah chuan kan la nei chiah lo na in, remchang hmasaah Inspection/Monitoring bakah school hi, quality assessment neih hi a tha ang, kan ti a. College level pawh hi NAAC_in a tlawh a, assessment a pe, ‘A+’ te, ‘B++’ tih te, College level intihsiakna tha tak tak. Chumi hmang chuan UGC atang ten fund an release thin a. Mizoram sorkar enkawl school a ni emaw, private institution te pawh hi thuneitu, academic authority te kaihruainain kan mithiamte nen assessment mumal zawk leh grading hi pe ve ta ila. Chumi mil chuan sorkar pawh hian tanpuina kan neih te pawh hi pek chhuah ni se competition sang zawk hi a awm lovang maw tiin department-ah pawh chu chu kan hmalakna tura kan chhawp, kan sawiho mek laiah a tel a ni tih House ka hriattir bawk a ni.

Vawiina kan sawi tam em em zingami zirtirtu aikal lak chungchang kha. A ngheta thawk mek te piah lamah hian RMSA leh SSAa thawktu, a nghet lo pawh hian aikal an la nasa khawp mai. Ministry kal tawhah a ni emaw, tun dinhmunah a ni emaw, aikal la an tam em em ringawt mai a. Hei hi kan department chuan kan ngaipawimawh khawp mai a. Keimah ngei pawh hi district hrang hrangah kal kual inprogramme ka siamchho mek a. District eng emaw zat ka tlawh tawh a. Zirtirtute ko khawmin aikal lak hi tih loh kan duhthu leh sorkar hi a vin dawn a ni, sorkar hi a strict dawn a ni. Aikal la tur te, thawk remchang ngang lo, health ground-ah, hrisel lohna avanga society pawhin a pawm, khawtlang pawhin an pawm, cancer patient an ni emaw, natna khirh bik tak te, loh theih loh, societyin a pawmpui tih ni lem lo, inthlahdah avanga aikal la hote hi chu an tuina zawk dang an lo thawh hi a tha zawk ang a tih ngaiantuahna kan nei deuh hlek a. Chumi avang chuan Directorate lamah pawh zirtirtute, mimal tin hnenah hriattirna an thawhna post-ah Pathian rawngbawlna anga ngaia rinawm tak, taima taka thawk tura fuih tur leh sorkar a strict tur thu hriattir turin kan inti a. Tin, SSA, RMSA lamah pawh an thawktu zawng zawngte hriattirna lo pe turin kan inti a. Chutiang chuan theih chin chinah ham strict kan tum a. MLA thenkhatten an bialah aikal lak an phal loh thu an sawi kha sorkarin kalpui a tum dan in thlawpna a nih avangin MLA zawng zawngte in bialah aikal la an awm a nih chuan sorkarah min hriattir rawh u, kan theih chin

chinah, sorkarin a tih theih chin chinah action lak a tum a ni tih House-ah hian ka sawiduh bawk a ni.

Chulo lehah chuan school bag policy hi House-ah hian ka sawi duh a. School naupang bag ak rit lutuk hi, hriselna atan pawh a tha lo ve tih a awm avangin, central sorkar hian “The Children School Bag (Limitation of Weight) Bill, 2006” kha a pass tawh a. Amaherawhchu chumi mil ang chuan dan siama, guideline siam te a ngai a. Sorkarah, he mawhphurhnaa ka that hnuah department hotu/thuneitute nen kan thu ho a. Chumi hnuah chuan “Guideline for Reducing The Weight of School Bag” tih chu 7.6.2019-ah kan tichhuak ta a. Rei vak loah school hrang hrang naupangte hi national norms RTE in a phut angin Class I & II – 1^{1/2} kg aia rit a ni tur a ni lo. Class III to V – 2 to 3 kg aia rit a ni tur a ni lo. Class VI to VII – 4 kg aia rit tur a ni lo. Class VIII chin – 4^{1/2} kg tih hi a theih chin chinah zawm a nih leh nih loh hi remchangah NGO dangte helam min tihpuitute nen en ho in kawnah emaw, remchangah an bag ah rih zawngte teha lo en tumin ruahmanna kan siam mek tih pawh hi House-ah hian ka sawi duh a ni.

Chulo leh ah chuan CCE tihdanglam, modified form kalpui kan tum tih House-ah kan sawi tawh a. Kan hria a, kum 5/7 dawn CCE hi hman a ni ta a. Amaherawhchu, CCE Continuous and Comprehensive Evaluation kha Mizoram-ah hian kan hmang thiam tawk lo a, zirtirtu pawhin zirlai pawhin a ni ang, Central YMA pawhin an rorelna khawlah an sawi tawh a. MNF party pawhin kan SEDP-ah pawh CCE kan ennawn ang tih kha kan dah a, chumi ang ngei chuan kan sorkar atanga reiloteah CCE hi kan ennawn nghal a. Tunah hian CCE modified form kan siam ta a, exam awm tawh loin eng emaw test mai mai tiin kawtlai an phiah fai pawhin pawl an sawn zel mai a. No detention policy nen khan a kal chho a, naupang quality hi a chhe dawnin kan hria a. Tunah hian CCE kha a Principle Act pah si loin, modified form in kan kalpui dawn a. Mizo irawm milin, exam system, 1st term, 2nd term, 3rd term ang kha kan kalpui leh dawn a. Amaherawhchu CCE-in grading a pek dan tur mark tam tak kha 1st term-ah 30%, 2nd term ami in 30% a keng ang a, 3rd term-in 40% a keng ang tih ang te in kan la chho a. Chutiang chuan exam-ah let leh turin kan ti a.

Kan school calendar-te pawh chumi CCE modified form chuan tun hnaiah school calendar pawh kan thlakna kan tichhuak bawk a ni. Tin, chumi lo leh ah

chuan, nichina kan sawi ang khan school building hlui/chhia hmuntinah a tam em em mai a. Theihtawpin kan hotupa, kan Chief Minister, kan House Leader kaihruainain, Education Department sum remchang thei atangin a ni emaw, NABARD atangin a ni emaw, remchang hrang hrang Samagra scheme atangtein school building hi he sorkar term thar chhoah hian a theih chin chin, a thar sak emaw, repair works ang chi emaw ti turin kan inhruahman mek a ni.

A tawp lamah chuan kan ngaihpawimawh tel em em chu- sorkar school enrollment tlahniam zel hi kan vei khawp mai a. Chu chu campaign kan neihah pawh kan kal nasa a ni. Zoram mipui nu leh pa te hi zirtir thar an ngai a, department pawh kan thiam lo a. Mizo society hian kan value system hi kan thlak a tul kan ti a ni. English medium ngaihsanna bawihah kan lut lutuk! English medium ngaihsan viau hian eng nge min thlen tih hi Aizawl ‘W’-III bialtu MLA zahawm tak khan a sawi kha.

English medium kan uar a, central service kan tlem sawt em le tihte leh dropout tam chungchangte nichinah khan a rawn sawi tel a. Enrollment chungchangah hian sorkar school-ah tuition fee/monthly fee chawi awm reng reng lo, uniform free, text-book free, tiffin free-in kan pe bawk. Engkim mai a thlawna zir theihin a awm vek a, zirtirtu pawh qualified trained vek awm si, building pawh tha zawk awm si in, engatinge kan fate private school-ah, a then phei chu a hmunhma pawh him lo zawk, zirtirtu pawh qualify lo zawkah kan kal tir tlat hi department-ah pawh kan inzawhna leh zirtirtu kan koh khawm pawha kan challenge a ni.

Chu chu tun dinhmunah hian enrollment drive nei thei turin zirtirtu pawh i intuai thar ang u hmiang. Lehlamah chuan sorkar kan thiam lohna pawh, zirtirtute kan lo inthlahdah rei ve deuh a. Sorkar hna ng het kan thawh hian kan thawh, kan work-rate te a lo hniam deuh hlek pawh a ni thei e tiin keimahni pawh kan thiam loh kan inkhengbet thui viau a. Chutih rual chuan kan value system pawh hi kan thlak deuh loh chuan, kan economy mila kan zirna pawh chhungkua hian kalpui nachang kan hriat hi a tul kan ti a. Chumi inzirtirna pawh chu nasa takin kalpui kan tum mek a ni.

Pu Speaker, a tawpna lamah chuan kan hmabakah hian kum 2021-a census lo awm leh turah hian literacy-ah kan state dinhmun hi a in up leh theihna turin literacy-ah kan dinhmun a san zawk theihna turin MLA tinte kan bial theuhah, kan

theihna chin chinah MLA area development fund-te pawh education concern-ah hian theih chin chinah 10% aia tlemlo min hman sak turin ngenna ka rawn siam a, literacy drive neih nan te pawh a tha maithei e.

NGO-te leh kohhran-te nen pawh tanghoa kal dan ngaihtuah a tha mang e kan ti a. Chu chu ka han sawi duh a ni. Quality improvement kan neih theihna turin heng hi kalpui kan tum a ni. Vawiina response thenkhat kan dawn ah khan kan MLA-te an area Local Area Development Fund, education hmasawnna tur atan inthlahrung tak chungin kan ram education siam tha turin in fund atanga 10% aia tlem lo in area-ah education tan min hmansak kan beisei kan ti a. Eng emaw zatin, a then phei chuan ziak ngatin hman ngei an tum thute an rawn pe a.

Tin, MLA thenkhatten verbal pawhin hman an tum thute, a then phei chuan 20%, 30% dawn ka hmang dawn tihte response ka han dawng kha ka lawm hle a, department aiawh pawhin lawmthu ka sawi a ni. Tikhan Pu Speaker, a tlangpui chu ka'n ti a, zawhna a zawh hmain (**Pu ZODINTLUANGA RALTE** : Mizoram New Educational Policy kha engtikahnge an tan ang tih min rawn hrilh thei em le? Nichina ka zawhna kha a ni a) SEDP-ah a awm a, (**PU LALDUHOMA** : Kan Minister zahawm tak thusawi kha a ngaihnawm khawp mai a, challenge-in a khatin ka hria a. Tih tak takna nena hma an la dawn a nih chuan theihtawpin kan cooperate ang tih ka sawi duh a. Amaherawhchu, nichina zirtirtu hna lak turah khan kan theih chin chinah tih tel lo khan dik takin kan la dawn ti mai sela. Kha kha chu min assure mai sela.

Theih chin chinah tihte khan engemaw ngaihtuahna hi a siam ve deuh a. Khami kha paikh thei se kan duh a. Tin, Education Department budget a pun nasat zia te; tin, SEDP atang pawha an la dawn leh zel tur te kan han ngaithla a, khati kha chuan kan fund tlemte kha chu min han dil bik tawh lo sela, kha kha chu a ngai bik tawh lo a va ang ve mawle.)

SPEAKER : A theih chin chinah tih kha kohhran upa ho hi tawng infimkhur lutuk a. Pu Chhantea Minister pawh hi upa a ni a, a fimkhurin ka hria.

Dr. K.PACHHUNGA : Pu Speaker, demand kan pass hmain kan Minister khan min lo hriat sak sela, khawngaih takin Lunglei Printing and Stationery Office hi Salem vengah ni lo in Lunglawnah a awm tih ka rawn sawi tha leh e.

Pu B.D. CHAKMA : Pu Speaker, i phalnain Minister zahawm tak demand pass hmain EPR chungchanga tlem rilrua ngaihtuahna awm chu Teachers Pupil Ratio chungchanga national level hi 1:30 in kan sawi zung zung a, Meeting-ah hian tunhlengin thil pakhat ka hriatthiamloh chu engtinngé kan hisap theih ang? Total strength of the school nge subject wise in kan hisap ang? Total strength of school a nih chuan high school tam takin class 9 leh class 10-ah hian below 30 pawh school tam tak hi a awm a.

Khami school-ah khan Pu Speaker, zirtirtu pakhat chauh a awm dawn nge chu kan hre lo va, ka ngaihdanah chuan subject wise in tih tur a ni a, teachers pupil ratio kha chu. Subject hi all subject specialize a nih loh chuan kha kha chu a ni thei lo. Science tan pakhat tal, mathematics tan pakhat tal, English tan pakhat tal, literature atan pakhat talkha an tih loh chuan as a whole school enrollment-a tih chuan zirtirtu pakhat tan pawh school pakhat hi enkawl a ngai thei a nia? Hei hi chu thil dik tak a ni, Pu Speaker, ka ngaihdan chuan.

PU LALCHHANDAMA RALTE, MINISTER : Pu Speaker, member zahawm tak Tuichawng bialtu Dr BD chakma in a sawi kha ni e, subject wise-in teacher pe dawn phei ila chuan kan duh belh tam ngawt ang. Subject hi a tam si a, tun ami hi chu naupang leh zirtirtu atanga teh a ni tih kha (kan TPR kha) ka sawifiah duh a. Chu chu naupang engzat nge awm ? Zirtirtu engzatnge awm tihna atanga teh a ni e.

Tin, Thorang bialtu zahawm takin New Education Policy hi engtikahngé hman a nih ang a ti a, ka lawm khawp mai min lo tui pui a. SEDP alo chhiar uluk piah lamah thla 6 chauh sorkar kal lai kan nih chhunga khatiang policy lian tak mai min beisei pui kha ka lawm khawp mai a, a lawmawm khawp mai tih ka sawi duh a. Tuna kan kalpui tur tam tak ka han sawi te kha khami huang chhung kha a ni anga, New Education Policy hi chu kum 5 chhung hi chuan kan hrual mum ve ngeiin ka ring. Pu Speaker, Sorkar hmasa din Education Reform Commission ai hi chuan a mumal deuh ang.

PU NIHAR KANTI CHAKMA : Pu Speaker, min la chhang lo va, girl child education hmasawnna tur a ni a. A building te pawh an sa zo tawh a ni awm e, kha kha engtik nge a tan hun tur kha ni ang?

Dr. BD Chakma zawhna KGP chungchang kha chu kan lo enfiah dawn nia, a hma thei anga hma lak turin aw. Pu Speaker, a lawmawm hle mai, darkar khat chuanghun ka la lehngthal a. Amaherawhchu response pawh a thain kha hria. Ka demand hrang hrang 3 te :

Demand No. 18	Printing & Stationery Dept. ₹16,98,55,000.00
Demand No. 20	School Education Dept. ₹ 13,28,42,02,000.00
Demand No. 28	Labour, Employment, Skill Development & Entrepreneurship Dept. ₹13,92,99,71,000.00

Total : ₹13,92,99,71,000.00 hi he House zahawm tak hian min pass sak turin ka han dil e.

SPEAKER : Aw le, Education Minister zahawm takin ngaihnawm takin a rawn present zar zar mai a, a ngaihnawm hle mai. Tichuan a department enkawl Demand No.18 Printing & Stationery, Demand no.20 School Education, Demand no.28 Labour, Employment, Skill Development & Entrepreneurship Department te hman tur a vai a belh khawm 13,92,99,71,000.00 te hi House ah pass a rawn dil ta a. Remti apiangin remti ula, remtilo an awm chuan remtilo ti rawh ule, remtilo an awm loh chuan tunah chuan Pu Lalchhandam Ralte hna chanpual demand 18 na Printing & Stationery, demand 20 na School Education, demand 28 na Labour, Employment, Skill Development & Entrepreneurship Department te hman atan a vaia belkhawm 13,92,99,71,000.00 te chu Housein a pass ta a ni.

PU LALCHHANDAMA RALTE, MINISTER : Pu Speaker, ka lawm e.

SPEAKER : Aw le, tunah chuan a hnuhnung ber atan Minister zahawm tak Pu T.J.Lalnuntluanga kan sawm anga, a department chan te rawn wind up a, sawifiah ngai te rawn sawifiah a, House-a pass rawn dil turin kan sawm e.

PU T.J. LALNUNTLUANGA, MINISTER : Pu Speaker, ka lawm e. A hmasain Pathian kaihhruaina zarah kum 2019-2020 budget move-a, wind-up theia ka awm avangin Pathian hnenah lawmthu ka sawi a ni. Hun hnuhnung lam chang ka ni a, Upain, “Se hnuhnungin vuak a tuar” an tih ang deuh kan ang ang tih ka hlau deuh hlek tawh a. Amaherawhchu, tawi thei anga sawi ka tum ang a. Chutih rual erawh chuan Pu Speaker, ka department chan hi 4 lai a ni a, sawi tur tam tak a awm

a. A chhunga kalpui dan te, department ruhrel te leh kan thil kalpui leh hmalak mek lai te, hmalak than tur, hmachhawp chi hrang hrangte kan nei a. Heng hi department budget pass tur a nihna avang leh wind-up tur a nihna avangin eng emaw chen han sawikai loh theihloh a ni dawn a. Chutih rual erawh chuan a tawi thei ang bera kaihtawi ka tum ang a.

Member zahawm tak tak ten an zighthna leh an rawtna te kha kan lo chhinchhiah a. Kan secretary te, kan department hotuten an lo chhinchhiah a, an sawi zawnng zawnng kan react theilo a nih pawhin min hriathiamma ka dil a. Chu bakah MLA zahawm tak takte tan he House pawn ah pawh, office lamah te pawh zighthna inzawt turin kan inhuam a ni tih te kha thuhmaah ka han sawi duh bawk a ni.

A hmasa berah chuan Law & Judicial Department, Demand No.4 kha sawi hmasak ka han tum ang a. Vawiinah khan zighthna zaws kha pakhat chiah Law & Judicial-ah khan a awm a. Amaherawhchu, kan department kalphungte sawina remchang atan a thain ka ring a. A hmasain ka han chhang nghal mai ang a. Pu H.Biakzaua, MLA zahawm takin a rawn zighthna, District Court-a staff te indaihloh chungchang a rawn sawi a, a dik khawp mai a. Tunah hian staff chi hrang hrang hi department hrang hrangah hian kan indaihlo tlang vek mai a. Helai hi chu theih ang tawka kan mamawh zualpuite, kan Chief Minister hoa lo rel kan tum ang a, sorkar ang pawha department hrang hranga kan mamawh te hi sawiho tura tih a ni.

Tin, District & Session Court kha Lunglei-in a hmui a, chumi chu Siaha-ah zawk khan awm ta se, annin min hmui zawk se tiin rawtna a rawn siam a. Hei hi heliai Law Department atanga han tih direct tawp theih chi a ni lemlo a, High Court te nen sawiho ngai chi a ni a. Chumi avang chuan a tul angin hma lo la turah inngai ila a tha awm e. Tin, Lawngtlai-ah khan District Court hmun kan nei tawh a, mahse a building a la awmlo a, tuna court hman mek hi a hmun a chep thu te kan ngaithla a. Tunah sown staff quarters te kan sa tawh a, amaherawhchu Court building sa tur hian CSS hmanga sak tumin tunah hian hma kan la mek a ni tih kha ka chhanna ni se.

Department kalphung tawite han tihlan ka tum ang a. Law Department hian mawhphurhna leh hnathawh chi hrang hrang chi thum (3) a nei a. Pakhatnaah chuan Bill te, Ordinance te, Recruitment Rules tih te, MoU te lo vet tu, lo endiktu kha an

ni a. Pahnihnaah chuan department hrang hrang ten legal advice an mamawh hunah legal advice te dilin an rawn kal thin a. Chungte chu legal advice kan lo pe thin bawk a ni. Pathumnaah chuan department hrang hrangin court case kan neih ang chi te leh thubuai hrang hrang kaihhnawiha kan telna ang chi ah para wise comments te kan lo neihpui a, kan lo endik a, an lo vet pui bawk a ni. Helaia ka han sawi tel duh chu sorkarin a liability tur, sorkarin a tawrhna tur, sorkar leiba tur ang chi te, sorkarin a chawi tur ang chi te tam tak kan save thin a ni tih vawiinah ka han sawi lang tel duh bawk a ni.

Tin, helai hmun hi a forumah ngai ta ila, kan sorkar department hrang hrangte pawh ngen duh ka nei a. Chulaiah chuan heng Bill te, Rules kan tih chungchangah te hian department hrang hrangte hian Law Department kaltlang loa lo tihpalh te pawh a awm thei a. Tin, House-a putluh tur te, Cabinet-a putluh tur ang chi te, Recruitment Rules a ni emaw, Bill a ni emaw, khatiang chungchangah khan a hnua Law-in a modification emaw, correction emaw tih ngai ang chi te pawhin a awm thei a. Chungah chuan tul lemlo ah Minister ten House zahawm takah hian ngaihdam dil fo te a ngai thin a. Chutiang te kan ven theihna tur chuan kan department te pawhin hnawhsarum taka hetiang Bill te, Recruitment Rules kan tih emaw, MoU kan tih emaw te hi buatsaih lo turin kan inchah duh a. Hei hi kan ram hmasawnna tur atan thil pawimawh tak niin Law Department chuan a hria a ni.

Heng bakah hian Law Department hian judicial infrastructure hrang hrang atan chak takin hma a la a. Tin, District Court building sak chungchangah te pawh central sponsor atangte pawhin hma kan la a. Tunah hian district tinah changtlung taka District Court pawh central atanga fund hmu a sak kan tum bawk a ni.

A dawt lehah chuan district thar 3 kan nei chho dawn a ni a. Hetah hian Chief Judicial Magistrate leh Civil Judge 1 theuh dah tum a ni a, GAD lamah te pawh proposal thehluh tawh a ni a. A sum senso tur pawh hi ₹1,419 lakhs vel a ni a. Hei hi tun kan budget-ah kha chuan a lang hmanlo deuh a, nakinah supplementary-ah te a la lang turah ngai ila a tha awm e. Tin, kan District Court hrang hrangah hian court tana thil pawimawh ber te zing ami court library hi kan nei changtlung lo hle a, hemi tih changtlunna tur hian ruahmanna kan siam bawk a ni.

Tin, Law Department hnuaiah hian tawite ka sawi lan leh duh chu Legal Service Authority hi a awm bawk a, hei hi tangkai takin Mizoram mipuiten kan

hmang a, Dan hriatna chungchangah inhrilh hriatna, awareness chungchangah hma nasa takin an la a. Tin, thubuai nei mi vanduai ukil rawihna nei lo te tan anni hian puihna an lo siam a. Tin, tawrhna victim compensation kan tih ang chi te anni kaltlang hian an buaipui thin a ni tih te kha vawiin-ah ka report tel duh bawk a ni.

A dawt lehah chuan kan hriat sa ni mah sela Law Department in a buaipui zinga kan ram tana thil chhinchhiah tlak tak, langsar tak han tar lan ka duh a chu chu Lok Ayukta a ni a. Ni 1.1.2014 khan Lok Pal and Lok Ayukta Act, 2013 India rama hlemhletna do turin siam a ni a, chu Lok Pal Act-ah chuan Section 63-naah heti hian a inziak a, Lok Pal Act commencement ni 1.1.2014 atanga kum khat chhungin State tinah Lok Ayukta hi din tura tih a ni a. A danah chuan Selection Committee-in Search Committee te an ruat ang a, Search Committee te chuan Lok Ayukta a chairperson leh member te Selection Committee in an lo thlan tur te lo chhawp chhuaktu tur an ni a. Tichuan 2014 atang khan ministry hmasa khan hma an la thin a, amaherawhchu hetih lai hian hmalakna chak tawk lo te pawh a awm a ni mai thei, Supreme Court of India khan ni 15.12.2018 hmaa chhuanlam dang siam lova Lok Ayukta hi tikhawtlai lova din turin sorkar hmasa kha an rawn hriattir a. Tichuan Pathian zarah kan Chief Minister zahawm tak Pu Zoramthanga kaihruai sorkar a lo din khan kan SEDP-a kan lo ziah tawh hlemhletna(corruption) hmachhawn turin Vigilance Commission emaw, Lok Ayukta din a ni ang kan tih chu kan sorkar atanga thla 3 chhungin kan peih fel ta a ni. File kal tur zawng zawngte kan buaipui a, heliaih hian kan Chief Minister zahawm tak Pu Zoramthanga hi han fak ka duh a, judiciary min ngaipawimawh a, kei hi Law background atanga lut ka ni a, chulaiah chuan lawmthu ka sawi tel duh a. A ministry hmasa 2005-ah khan separation of judiciary kan tih pawh hi Mizoram-a introduce tu a ni a, chutianga dan ngai pawimawh tak Chief Minister kan nei hi kan vannei hlein ka hria a. Tin, ka sawi belh leh duh chu Search Committee te khan hnam dang a list-ah ministry hmasaah thlan tur zinga dah tel a ni a. Amaherawhchu, Mizo pa ngei chairperson-ah dah thei turin a meeting pui member dangte vai judge hote pawh a convince thei a, chumi avang chuan tunah hian Mizo pa ngei chairperson kan han nei thei te hi a lawmawm ka ti a, vawiinah hian kan Chief Minister chungah lawmthu ka sawi nawn leh a ni. Tichuan tunah hian budget-ah pawh khung fel a ni tawh bawk a ni. Nichin khan Law Department-a zawhna kha kan chhang fel tawh a.

Tichuan a dawt lehah Demand No. 12-na Parliamentary Affairs Department chungchang hi han sawi leh lawk ka tum ang a. Hei hi sawi thui ngai lovin allocation-ah pawh a kalpui tur leh function pawh hi a tam lutuk lem lova. Amaherawhchu, kan hruaitu helaia kan member zahawm tak takte pawhin PAD kalphung kan hre tlangin ka ring a Helaiah hian thil chhinchhiah tlak tak han sawi lan ka duh erawh chu kan party flagship programme SEDP-a kan ngaihpawimawh leh kan ziah good governance, sorkar tha, langtlang sorkar, inrawnkhamna kan neih theihna, ram chhiat thata mawhphurhna leh neitu nihna kan lak tlan theih nan PAD Department hnuiai Consultative Committee hi hman tangkai kan tum a. Tichuan, he Consultative Committee hi mumal taka a kal chhoh chuan House rorelna thleng pawha boruak muanawm siam thei tur a ni a. Chu mai ni lovin department hrang hrang tan pawh hmasawnna tling tur a ni. Tin, chhinchhiah tlak deuh mai tun ministry-a kan buatsaih thar a awm a, chu chu Consultative Committee member te function leh procedure chungchang hi Mizoram pual hian guideline kan lo la nei ngai lova, charge kan han lak hnu khan kan buaipui nghal char char a. Tunah hian Consultative Committee guideline hi Mizoram pualin kan nei ta a ni tih vawiinah hian ka report tel duh bawk a ni.

Tunah hian member zahawm tak takte pawh he Consultative Committee member tur hian department hrang hrang chanvo ah member-te pawh kan inruat fel tawh bawk tih ka sawilang tel leh duh bawk a ni e. PAD chungchangah zawhna a awm lem lo bawk a, kha kha Demand No. 12-naa ka sawi theih nisela.

A dawt lehah chuan Pu Speaker, Demand No. 36-na Environment, Forests & Climate Change chungchangah - Environment, Forests & Climate Change Department hnathawh ber chu ramngaw tihzauh te, kan ramngaw neih uluk taka enkawl te, ramsate leh an chennate venhima humhalh tlatte, ram humhalha sik leh sa inthlak danglam nasa tur venhimte a ni a. Ram changkang chho mek kan ni a, chumi avang chuan Mizoram mipuite pawh hian thingphun leh ramngaw humhalhte kan uar a. Heng hi awarness pawh kan nei chho zel a, hma kan sawn zel a, a lawmawm hle a ni.

Sik leh sa inhlak danglam nasa lutukte tunlaiin Mizoram-ah kan tawng chho a. Thila hmasaah phei chuan kan hriat theuh angin Mizoram khawlum kha a lum dan amah leh ama record kha a inkhum chho zat zat mai kha a ni a. Thingphun leh kan thing leh maute kan humhalh that a pawimawh hle a ni.

Pu Speaker, ka sawi duh chu, he sorkar tharin a tum ber pakhat chu thingphun chungchangah hian phun tam quantity plantation ni lovin, quality plantation kalpui hi kan tum a. Thingphun teuha, enkawl leh si loh ai chuan kan enkawl tawk phun a, puitling ngei tura hmalak a ni a. Hei hian kan rama thing leh maute kan phun dan kawngah nasa takin hmasawn kan inbeisei tlat a ni. Tin, kan rama tualto thingte humhalh kawngah hian sorkarin theihtawp chhuah a tum a, tun sorkarin a tum dan ah chuan thingphunte pawh hi te reuh te te, tunhmaa kan phun a, a nung tha manglo, a nung rate/a success rate tlem tak ang chi ni lo in, tunah hi chuan tall seedling ang chia, thing lian sa phun kan tum a ni. Tunah pawh hian sorkarin thingtiak man pawh a rate ti sangin tunah hian hma kan la mek a, a rate pawh hi kan final tep tawh a ni.

Heng bakah hian tun sorkarin kan ngaih pawimawh em em chu tui lak kangchat mai tur venhim a ni a. Nichinah member zahawm tak tak ten an rawn sawi hlawm a, kan tui lak te, lui tuite a kang chat zel a ni tihte an sawi a. Chu chu tun sorkar hian priority-ah kan dah a, riverine catchmen area-ah plantation-te nasa taka hma lak kan tum a. Helaiah pawh hian ka han sawibelh duh chu tourist park te, urban plantation te, rural plantation te, roadside plantationte hmun hrang hrangah din turin hma lak kan tum bawk a ni.

Tichuan, riverine catchmen area-te, urban rural roadside plantation kan tih ang chiah te khan kan Chief Minister-in a duh angin tunah hian mihring leh sava te, ramsa ten an tlan theih ang chi thing phun kan tum a, chutiang chuan hma kan la mek bawk a ni.

Tin, wetland development chungchangah pawh hma nasa taka lak kan tum a, a bik takin dil kan neih len Palak dilte, Tamdilte leh dil dangte pawh cheibawla; humhalha tangkai taka hmang turin kan inbuatsaih mek a.

Tin, kan rilrua awm ang chuan khualzinmite leh thalaite leh chhungkua angte pawha tlawh theih turin siam kan tum a ni. Hetih ruala kan ramin kan mamawha kan hriat chu, heng dil kan neih te hi, a neitu department hi kan lo awm deuh nual mai a, kut kan thlak tlang vek bawk si a. Chumi avang chuan department hrang hrangte pawh joint meeting neiha, tu kuta awm tur nge, engchin nge hma kan lak dawn tih hi sawiho turin joint meeting nei turin tunah hian kan in buatsaih mek a ni.

Tin, Pu Speaker thil chhinchhiahtlak tun ministry in a kan tih pakhat a awm leh a, chu chu “The Mizoram Reward for Detection of Forest & Wildlife Offence Scheme, 2019” kan duang thar a. Helaiah hian kan forest leh nungchate humhalhna chungchangah hma kan sawn theihna turin kan NGO te leh mimal ang pawhin forest dan bawhchhe hote, nungchate humhalhna kawnga dan bawhchheho report-tute hnenah rewards pek theihna tur scheme kan duang a ni. Budget-ah pawh fund provision/funding scheme pawh kan dah a, kumtin cheng nuai 10 dah thei turin ruahmannna thar kan siam nghal a ni.

Kan hriat angin Environment, Forests & Climate Change Department hian ramngaw humhalh hi a ngaipawimawh hle a. Tunah hian wildlife sanctuary pawh hi 10 kan nei a, heng wildlife sanctuary-te hi department-in uluk takin a enkawl a, heng bakah hian notified forest 6 kan nei a, Environment, Forests & Climate Change hi Central Sponsored Scheme ah a innghat a, CSS kan neihte han tarlang leh ila. Pakhatnaah Green India Mission, pahnihna National Afforestation Programme, pathumnaah National Plant for Conservation and Aquatic Eco-System, palina Integrated Development of Wildlife Habitat, pangana Project Tiger Dampa, parukna Forest Fire Prevention Act & Management Scheme, pasarihna Maintenance of Forest, pariatna ah Medicinal Plant Conservation & Development leh pakuana National Bamboo Mission, khatiang khan CSS hnuaih fund kan dawng thin a ni.

Sawi tawh ang khan Environment hisapin Climate change Department hi CSS hnuaih budget a innghat thui hle a. Chuvang chuan CSS hnuaih sum kan hmuh token budget-ah pawh cheng nuai 979.64 ruahman a ni a. CSS kan dawn that a zirin

kan budget pawh hi a danglam chho hle turah kan ngai a. CSS atanga sum kan dawn tur hian Mizoram budget nasa taka pui turin kan ngai bawk a ni.

Development lamah leh infrastructure maintenance-ah te pawh thahnem tak hman a nih avangin hmasawnna tham a ni dawn a. Environment, Forest and Climate change hnuiah nikum lam aiin hlawhah hian cheng nuai 620.44in a sang a, hei hi 7th Pay kan hman tak vang a ni a. Department hnuiah hian sanction post 1357-ah post 575 a ruak a, indaihlohma a nasat em avangin a tul anga hma lak chhoh a ngai niin a lang. Tin, helaia thil pawimawh deuh mai pakhat chu hna chungchangah hian revenue earning post kan tih ang chi Forest Department-ah hian a check-tu pawl team te kan mamawh zual em em mai a, kan ramin hma a sawnna tur leh revenue ti thang awk thei tur a nih avangin hna lak tharna tur chungchangah pawh Finance Department te pawhin min hriatpui kan duh hle a ni.

Tichuan, Forest Department chungchangah khan zawhna eng emaw neuh neuh a awm a, amaherawchu kan sawi ang khan enge maw chen chu chhang nghal turah ka inngai a. Amaherawhchu tawi te tea han react theih chin kan nei ang a. Hetihlai hian member zahawm tak tak te hming tam zawk erawh chu kan miss lo turah ngai ila than ka hria a, a khaikhawm thei turah ngai ila. Heng sanctuary, ramngaw te humhalh a ngaih thu te, plantation humhalh a ngaih chungchang te, claimate change avanga rannung thar species piang thar te, tuihna humhalh chungchang te, forest ram kang ven chungchang te, zawhna a awm a. Tin, Phawngpui humhalh chungchang te, thawktu indaihlo chungchangte pawh helaiah hian zawhna a awm a. Tin, air gun chungchanga Wildlife Protection hnuiah khapna a awm leh awm loh te rawn zawh a ni a. Khangho kha tihian a chhan theih maiin ka hria a.

Kan sanctuary te, kan ramngaw te humhalh tur hian scheme hrang hrang kan hmuh atangte leh state sorkar atanga fund kan hmuh atangtein theihtawpa hma lak kan lo tum dawn a ni. Tin, staff chungchangah pawh khan indaihlohma chungchang hetah Ngengpui, Phawngpui, nichina kan sawi ang khan kan mamawh leh kan sum dinhmun a zirin theihtawp chhuaha hma lo laka, a tam thei ang ber hma lo la turin tan kan lo la ang e tih kha ni ta sela.

Tin, air gun chungchangah khan Forest Protection hnuiah heng nungcha te tihhlum chungchangah khan a khapna khuakhirhna dan tha tak kan nei a. Tin, tunah

hian Home Department in Arms Rule kan duang mek a. Hemiah pawh hian proper license (license pangngai) nei turin tunah hian a awm mek a ni tihte pawh kha a chhanna atan ka sawi duh bawk a ni.

Nichinah khan senior member Pu Zodintluanga kha a lo awm ta lova, min chhang thei ang em, helaiah assurance min pe thei ang em tih kha zawhna a rawn nei a. Forest Department-ah hian mi tam tak an ban a, an department ami ten an ban thei ang em tih zawhna kha a awm a. Keini chuan department atanga ban kan hre lem lova. Tin, Forest Department-ah hian scheme hrang hrang an lo thawk tawh thin a, 13th Finance Commission hnuiah te, 12th Finance Commission-ah te, MNF-in tam tak kan lo lak te pawh kha, kha scheme a tawp avang khan an chawl a, chhungkaw harsa tak takin chhungkaw chawmna atan an lo hman thin te, khango kha scheme dang a rawn kal leh khan ministry hmasa khan la zui tawh lovin an dah bawk a. Chutiang chu Forest Department hnuia hna an lo lak dan leh hetiang tho hi an lo tih dan a ni tih kha member zahawm tak pawh khan a hre sa a ni tih a lang a. Nichina a sawi lai tak kha an legal right leh appointment authority te leh a criteria chungchang te pawh kan lo enzui ang e tih kha a chhanna ni se a tha ang e.

Tin, member zahawm tak kan senior MLA Pu Lalduhoma zawhna D.O. letter pawh ziaka a tihna kha han chhan leh ka tum ang a. Serchhip-a inhmun nei lo te Forest rama an neih theihna turin lehkha ka ziak a, a tih chungchang ka lo hmu a. Lehkha ka dawn niah PCCF-ah department lamah ka thawn nghal a. A tul anglo lo endik a, lo enquire a, a chanchin te pawh amah lo hrilh leh turin kan inhrilh tawh a. Amaherawhchu department-ah hian thil hi a kal chak zung zung thei lova, chanchin in hre thuai turah ngai ila a tha awm e. Kha kha Forest Department ni leh ta sela.

A tawp berah chuan Pu Speaker, Demand 42-na Transport Department hia rei hret maihei a, a mawng khal deuhah a awm a. Zanin chu kan bang tlai ta sa sa, in nghak deuh tang tang mai ila a tha awm e. Transport Department hi wing lian tak tak pahnihah then a ni a. Chungte chu MST wing leh MV wing-te an ni a, mipui tan bus service kan kalpui bakah sorkar revenue laluttu pawimawh tak kan ni.

MST bus service chungchang, tunlai himasawnna thang zel karah hian mipuite hamthatna turin MST bus-te hi a la service zel a. Eng emaw hunlai khan private lirthei te, commercial vehicle te a tam tawh avang khan kan bus service-te kha a chuangtu hmuoh loh avangin hmun thenkhatah kan han chawl a.

Amaherawhchu, hmun tam takah mipuite mamawhna avangin tluang takin a service zel a. Route thenkhatah chuan passenger hi phurh sen loh kan la hmu zel a ni. Tunah hian Zokhaw lam ami ten bus service chuan man a lo hniam avang te, sorkar ngaihhnathiamna tam tak avang te in, bus service hi khaw hrang hrang atangin an rawn dil reng a. Mahse, bus kan neih dan dinhmunte a tlem avangin bus mamawh tak tak khuate pawh khawngaih tak chungin kan service tir thei thin lo a. Department ang chuan bus kan neih loh avangin kan rilru a hreawm thin hle a ni.

A bik takin hunpui Chrismas angah hi chuan bus hi indaihlohma a nasa hle a. Tun Christmas-ah khan charge kan han lak tantirh khan bus service turin khaw hrang hrang khan an rawn ngen nual mai a. Chumi avang chuan Christmas lo thlen leh dawnah hi chuan inbuatsaihna thar kan neih a ngai a nih hi, bus kan lei thar a nih loh pawhin, arrangement eng emaw, phailam bus a ni emaw, city bus a ni emaw, department bus emaw te ngaihtuah dan nei ila, arrangement siam tur a ni tiin tunah hian thutlukna kan siam a. Kan department hotute pawh hemi tur hian an inbuatsaih tawh a ni.

Tin, Pu Speaker, MST bus chungchangah hian ka sawi tel leh duh chu kum za tam, kum sang tel lo changkang tawh te tih anga corporation-a bus han leh duhnate pawh hi a awm ve bawk a. Amaherawhchu, kan Zoram dihmun leh kan economics dinhmunte, kan mipuiten nitina an sum lakluh te, thingtlang mipuite dinhmun han ngaihtuah hian bus eng emaw zat la kawl hi State Transport Department hi chuan mamawh niin kan inhria a. Chubakah sorkarin law & order a kenkawh a tul chang hi a awm ve fo thin a. Chumi avang chuan MST bus hi kan neih a la ngai hrih a ni tih hi Transport Department ngaihdan a ni.

Pu Speaker, kan sorkar hian a bikin heng ho hi ngaihhnathiamna tam tak a nei a, cancer-a na te, middel te, pianphung raulbanlo te, rilru buai te, khangho tan khan a thlawna an chuan theihna tur ruahmanna scheme a siam sak a. Chubakah chuan hmeichhia kum 60 chin chunglamte tan Mizoram chhungah a thlawna zin theihna tur te, mi tupawh kum 65 chin chunglam 50% fare concession te kalpui zel a ni a. Hei hi ram mipuite tan malsawmna niin kan hria a, sorkar hi tax emaw, chhiah emaw va pe a, sorkara kan tha va thawhna reng tur hmun ni lovin, sorkar hian mipuite tana a service-na tur forum pakhat a nih hi a, agency pakhat a nih tih hi Transport Department-in kan inngaih dan a ni. Kum kalta lama heng concession lo

avail-tute leh data chu sawi tawh lo mai ila. Mizoram pumah Transport Department hi tangkai tak taka lo hmangtute kan awm a ni.

Pu Speaker, tunah hian MST bus service lai hi 36 kan nei a. Heng zinga 7 te hi chhim lam Lunglei, Siaha, Kolasib station-ah te dah an ni a. Bus-in tha taka hna a thawh theih hun life span hi kum 10 vel anga ngaih a ni a. Amaherawhchu, tuna kan bus dinhmun hi a upat zawng hi kum 7 leh thla 4 ang vela chawhrual an ni tawh a. A hlui eng emaw zat hi tihrala a thara thlak a hun hle tawh hlawm a ni. Kum kalta 2018-2019 chhungin MST bus-te kha route 16-ah an tlan a, trip 3565 an la, passenger 66000 an phur chhuak a ni.

A dawt lehah chuan motor vehicle wing lam sawi veleh ila Registration of Motor Vehicles: lirthei zawng zawng hi Motor Vehicle Act dan hnuaih khan, DTO hrang hrang hnuaih registration tih a ni a, kan DTO ho ten rim takin registration hna hi an thawk mek a. Kumin 2019 January ni 1 atanga May ni 31 chhung khan Mizoramah lirthei 12063 zet an register tawh a ni.

Sum hmuhna lam: Motor vehicle tax hrang hrang atanga sum hmuhte hi sorkarah thehlutin sorkar tan sum hnhar pawimawh tak a ni chho ta mek a. Nikum 2018-2019 chhunga MV wing lama sum hmuh dan han sawi lang leh ila-

1) Vehicle Tax atangin ₹ 383633412

2) Passenger and Goods Tax atangin ₹ 421879899 a ni a. Tunah hian a aia tam hmu thei tur hian hmalak mek a ni a. Amaherawhchu, nichina Forest & Environment kan sawi ang deuh khan Transport Department-ah hian revenue earning post lai hi kan indaihlo deuh riau mai a. Tin, heng Vehicle Inspector kan tih, MVI leh Sub-Inspector-te pawh hi kan indaihlo khawp mai a. Tun dinhmunah hian Finance Department lam pawhin min hriatpui tura ka duh chu tun ministry tharah hian Compounding Authority nei thei turin tiin kan MVI-te indaihlohnna avangin Sub-Inspector ten power an neih phak loh thin kha Sub-Inspector hian Compounding Authority hi nei ve se he ministry tharah hian kan ti a. Chuvang chuan tunah pawh hian kan revenue tam takin a pun phah niin kan hria.

Pu Speaker, helaia ka sawi belh duh chu Transport Department hi nichin khan hloh department ringawtah khan kan inngai deuhin ka hria a, loss department

ni lovin Transport Department hi Mizoram sorkar tan revenue chhung lut tha pawl tak department kan ni e tih vawiinah hian ka report tel duh bawk a ni.

Information & Technology chungchangah khan Sarathi leh Vahan tih hi Transport Department-ah hian a lar khawp mai a. Sarathi kan tih hi license pek chhuahna a ni a. He Sarathi software hi tunah hian Sarathi 4 kan hmang mek a. District 5-ah te hman tan a ni a, tunah hian district dang 4-ah hman tum leh mek a ni a. He Sarathi 4 hi kan hman kim vek hunah chuan driving license-te pawh transfer ngai lovin kha Sarathi 4 hmanna hmun apiangah khan kan renew thei tawh dawn a ni tih ka sawi tel duh bawk a. Tin, security lamah pawh a tha thei ang ber tura thuam a ni a. Data loss leh harsatna hrang hrang awm thei ah pawh him hle turah kan ngai bawk a ni.

Vahan Vehicle Registration chungchang han sawi leh ila. Ministry of Transport and Highway, Govt. of India thuchhuak angin 29th Aug, 2017 atang khan Motor Vehicle Registration atan Vahan 4, All India Application Software hman tan a ni tawh a, tunah hian DTO zawng zawngah hman a ni tawh bawk a. India ram chhung state hrang hrang nen motor registration kaihnawih hi huang khatah thlunzawm a ni tawh a. Hei hian nasa takin security lamah pawh min pui thei turah kan ngai bawk a ni.

Tin, nichinah khan High Security Plate chungchang kha member zahawm tak Pu Lalduhoma khan a rawn sawi tawh a. Khami chungchang kha keini pawhin kan enzui a, kan ministry a kal tan phatah pawh khan zawnha keimah pawhin ka zawt a, “High Security Plate chungchang hi eng nge maw a tangkaina le? Detection eng nge a awm dan le?” tiin ka zawt a. Khatiang detection leh motor bote lo detect theitu tur kha a lo awm lova, amaherawhchu kha registration plate kha a lo danglam deuh a, a plate kha Supreme Court PIL thehluhna atanga thuchhuakin India ram puma hman tura a tih a nih avanga lo hman chhunzawm a ni tih kha kan han hre chho a.

Tun dinhmunah phei chuan Ministry of Road Transport-in hman loh theih loh turin notification 6.12.2018 khan a chhuah thar leh a. He notification-ah hian ‘motor thara HSRP fit tur reng reng chu motor manufacturer-in HSRP approved vendor atangin direct-in an lei ang a, anmahniin an fit zel tawh ang’ tiin thuchhuah an siam a ni. Chuvang chuan kan YMA hruaitu zahawm tak takte leh member senior zahawm takin a zawnha ‘HSRP chungchang tihtawp mai a tha lawm ni’ tih rawtna

kha tun dinhmunah chuan keimahni thuneihna piahlam a nih avangin tihtawp mai theih a ni lo tih kha HSRP kan sawi pahin ka rawn chhang nghal a ni e.

Tin, Pu Speaker, hmalakna thar leh hmalak tumna chi hrang hrangte tarlan leh ka duh a, budget pass tur kan ni bawk a. A hmasa berah chuan kan hriat theuh tawh, kum 2018 MLA election campaign laia kan lo sawi tawh leh kan aupui thin ‘motor lifetime tax pek dan kan siam tha ang’ kan tih thin chu kan Chief Minister zahawm tak Pu Zoramthanga hovin Pathian zara kan sorkar veleh khan kan ngaihtuah nghal vat a. Tichuan campaign laia kan sawi ang ngeiin private motor neituten lifetime tax kum 15 compulsory atana road tax an pek thin chu ram mipuite, motor neitute phurrit chhawk zangkhai turin ni 13.6.2019 atanga hman tan theih turin motor vehicle register tur te duhthlan theihna kan siam sak a, kum 5, 10, 15 tea pek theih tiin kan siam a ni tih ka sawi tel duh bawk a ni.

A dawt leh ah chuan Online payment of tax and related kan han ti leh a. Helaiah hian staff te kan indaihloa, chumai ni lovin mipui te pawhin hun leh tha kan seng a, tunlaiah chuan mi tul tak tak te kan ni tawh a. Chuvangin kan chhiah pek chi hrang hrang te online a kan pek theihna turin tunah hian kan buaipui mek a. Gateway an ti a, bank lamah te kan buaipui mek a. Hemi hikan tihfel chuan office lama thui tak tak intlara, kan hun hlu tak tak te senga kan khawhral thin kha kan tihtawp theih kan ring a. Chumi avang chuan sorkar tharin he online payment hi a tih theihna turin chak takin hma an la tih ka sawi leh duh a. Tin, ka han sawi belh leh duh chu, motor endik hunah chuan passport kan siam tir a mahni inlan hun a awm zel ang khan motor a taka inlan hun a awm dawn tih kha kan han inhriattir a. Ka sawi belh leh duh chu, kan Chief Minister zahawm tak Finance changtu in budget a present laia a sawi - chhiah tipung si lova chhiah lakna tur khawrhchhuah that chungchang a sawi ang khan, hetianga tax pek theihna online system kan neih theih chuan sorkar revenue pawh hi a pun phah ngei kan ring bawk a ni. Pathumnaah chuan, khawngaihna hun grace period kan ti leh a. Tunlai hian mi tam takin buaina leh harsatna an tawh mek a awm a. Chhiah lo pe lo rei deuh te, hun lo inpelhsawlh deuh te, awmna hmun/khua zirloh vang te in chhiah pe lo rei deuh ten penalty/hremna nena pek a ngaih dawn avangin chhiah te an pe theilo nual a ni tih kan hria a. Chuvang chuan mipuite

harsatna sutkianna tur leh mipui sorkar kan lantirna tur atan chhiah ba te hi a penalty, a pung telloin pek theihna hun siamsak ni se kan ti a.

Tichuan khawngaihna hun atan penalty telloin a pek theih hun hi ni 1/7/2019 atanga ni 31/8/2019, thla 2 chhung khawngaihna hun, grace period hi hawn a ni dawn a ni. He hun hi hmang tangkai vek turin Mizoram mipuite kan sawm a. Grace period hi sorkarin a tih zen zen tur a ni lova. Chumi avang chuan he hun hi mipuiten hmang tangkai turin vawiin hi hun remchangah ka han hmang nghal a ni. Tin, kan hriat tlan atana ka sawi tel duh chu hetianga tax pe lo te hi pek hunah an inlar duh thin lo a, sorkarin chhiah tam tak a hmuuh tur a hmuuhlooh phah thin a. Chumi avang chuan he grace period kan hawn avang hian kan revenue pawh tam takin a pun theih phah kan beisei bawk a ni. Tin, grace period zawh hunah hian nichina member zahawm takin a sawi ang deuhin, no tolerance lam pawh ni lemlo in uluk leh regular zawkin document check hna te pawh hi department pawhin neih kan tum a ni.

A dawt lehah chuan permit hrallh venna dan tunah hian kan buatsaiah a, kan tifel tep tawh bawk a. Chumi chu commercial permit kan ti a, a bik takin taxi te, two-wheeler te, bus te, hetiang permit hi tunlai hian manto tak taka hrallh an awm thin tih kan hria a. Eizawnna thar duh te, indang thar te, ram rem rap lo ten a ram rem an rah ve theihna tura eizawnna an thlan dawnin permit a lo awlai tawh lo a. A bik takin Aizawl khawpui chhungah phei chuan motor a lo tawt tawh deuh bawk a, permit thar han inpek chur churte a lo awlai lo deuh bawk a, chumi ah chuan commercial permit te an lo zuar bawk si a. Hetiang anih avangin sorkar chuan kan khawpui chhunga commercial vehicle te tam dan a zira indang thar tir te eizawnna atana duh tak takte bul tan theihna tur chanvo tur atan permit issue thar leh theihna turin rokhawmtu, legal heir te hnenah chauh permit hi hlanchhawn theihna turin tunah hian dan kan duang mek a ni. Hei hi kil hrang hrang atangin kan ngaihtuah a, a dan zawng pawhin kan ngaihtuah a, hei hi thil tha ber tura kan ngaihtuah hrih a ni a. Chumi chu eizawnna thar daptute tan pawh thil tangkai tak a nih kan beisei a ni.

A dawt lehah chuan Zoram tana thil chhinchhiahtlak tak tur MNF-in kan ngaihpawimawh em em, Zohnahthlak hrang hrangte inpumkhata kan inkalpawh theihna turin Mizoram State Transport tih hming chuanna ngei Champhai-Tahan, Aizawl-Jampui leh Lamka te service tir kan tum a. Chumi tur chuan hma kan la mek

a. Jampui leh Lamka hi service tir thuai turin tunah hian chak takin hmalak mek a ni
 a. Hei hi reiloteah service tir kan tum a ni. Champhai-Tahan service erawh hi chu ram hran anih avangin hmalakna kan duh angin a chak theilo a. Union Minister for External Affairs pawh kan hmu tawh a. Ani pawhin hma min lak sak turin kan ngenna min lo pawm pui a, tichuan Minister of External Affairs atangin Myanmar sorkar nen inbiakna neiin a kaihhnawih thil tam tak, heng Immigration Check Post te, Integrated Check Post te leh a tul ang an buaipui zawh hnu ah an hmalakna te leh khilai Burma sorkar te nena an inbiakna a fel hnu ah bus 3 min lei sak an tum thu nen lekhain min rawn hrilh leh tawh bawk a ni.

A dawt lehah chuan Inspection and Certification Centre kan ti a, hei hi tun kan dinhmunah hian motor fitness te Vehicle Inspector ten an han check hian hetia mita an han hmu theih mai bak hi an check mai thei thin lova. Chuvangin khawvel changkang zel milin khawl changkang tha hmanga motor kawchhungte hmu thei turin, check thei turin motor fitness te an check theihna turin Inspection and Certification Centre hi Hlimen-ah din turin hma kan la mek a. Tunah hian Ministry of Road Transport leh Central Institute of Road Transport, Pune te nen tangkawpin Automated Inspection & Certification Centre, Hlimen-ah din turin hma kan la mek a. Tun atanga reilote ah hian building sak theih kan beisei a ni.

Pu Speaker, kan hmalak tumna a tawp berna atan chuan nang pawhin i tuipui em em a ni a. Inland Water Transport- hi PWD hnuia allocate a ni a. PWD hi an tul deuh avang leh sorkar khat, chhungkaw khat kan nih tho avangin kan Chief Minister zahawm tak, kan pa ber ni bawk hnenah IWT hi Transport hnuiah dah ka dil a. Ani in a lo ngaihpawimawh em em a ni bawk a, tichuan Transport Department hnuiah dah min phalsak a. Kan House Leader chungah hian lawmthu ka sawi duh a ni. Waterway siam chungchang hi kan SEDP flagship programme-ah kan ziah tel leh kan ngaih pawimawh em em a ni bawk a. Tunah hian InlandWater Transport atan hian budget-ah chuan tangkai taka hman tham dah a la ni hrilh lova. Amaherawhchu kan Chief Minister zahawm tak remruatnain chhim lam kawtchhuah kan hman tangkai nan leh kan chakkhai te Bangladesh leh Howrah, Kolkata atang te a kan lak theihna turin hma kan la nghal a.

Hemi atan hian Tlabung Kawrpuichhuah te pawh kan hotute leh official te nen kan va tlawh tawh a. Member zahawm tak Pu Nihar Kanti Chakma te khua

pawh kan va tlawh a ni. Sawlai hmun saw Chanchinthia Mizorama alo thlenna, Missionary te rawn kaina hmun a lo ni bawk a. Mimal taka ka ngaihtuah pawh hian Pathianin kan Zoram tan sawlai hmun Tlabung kai, Kawrpuichhuah saw min chawimawi sak te pawh hi ka ring tlat a ni. Hemi kan tihhawhlin hi chuan Bairabi leh Vairengte-a vaiho nena kan buai fo avanga kan economics lifeline chat thei mai tur awm anga kan awm te pawh hi kan rilru kan thlak danglamin sorkar anga kan chet lakna chungchangah pawh hian kan huai phah sawt kan ring bawk a ni.

Heng bakah hian Inland Water Transport-ah hian nichinah pawh khan member zahawm tak tak ten an rawn sawi tawh a. Kan ram lui te pawh hi hman tangkai theihna tam tak a lo awm a ni tih kan han hrechhuak zel a. Chumi ah chuan Silchar pawhna tur te leh Zoram chhunga kan lui, khaw hrang hrang inkalpawh theihna tur te pawh hi siam turin project kan buatsaih nghal a. Tunah hian concept paper pawh kan buatsaih mek a. Kan ram chhunga lui te hmang tangkai tur leh kan lawngleng leh speed boat te hmanga water taxi te thleng pawha hman theih turin vawiinah hian kan ramah hengte hi introduce turin hma kan la mek a ni tih te pawh ka report tel duh bawk a ni.

Hei hian kan ram revenue pawh tam taka a tihsan theih kan beisei a. Hetianga kan tihhawhlin theih chuan intodelh state, hnam huaisen, ram huaisen kan nih theihna tura kalkawng pawimawh tak niin kan hria a, kan ngai pawimawh em em a ni tih kha Transport Department-a ka sawi theih ni se. Amaherawchu nichin khan zawhna tlem azawng han chhan tur a awm deuh niin ka hria a. Khang kha tawite te in han sawi leh ka tum ang a. Nichina kan thusawi atangte khan eng emaw zat kha chu chhang saah a inngaih theih tho mai a, mahse, ka han sawi nawn leh hlawm ang a, tam tak kha chu lawmthu sawina te pawh a ni bawk a. Bus service tih tam chungchangte an rawn sawi a, khangte pawh kha theihtawpin sorkarin a pawisa neih dan ang te, central atanga Ministry of Transport hnuiah te leh a theih ang anga hma lo lak kan tum dawn a.

Kan mipui te, thingtlang mi te harsatna dinhmun kan hria a, chumi avang chuan theihtawp chhuaha bus thar nei turin hma lak kan tum dawn a ni. Nichinah Krismas dawna kan buaina tur, inbuatsaihna tur chungchang kha ka sawi tawh bawk a. Tin, two wheeler, auto rickshaw leh sumo, commercial permit te kha District Headquarters dang leh Aizawl ni lo ah te hian tih theih dan a awm em tih kha a tul

ang azirin, an motor tam dana zirin khang kha kan lo enzui ang e. Tin, rate chungchang pawh nichinah member zahawm tak Dr. Thiamsanga khan a sawi a, an rate chungchang pawh kan lo enzui ang e tih kha ka chhanna ni ta sela.

Tin, driving license te leh motor checking, motor inspect hrim hrim chungchangah pawh khan thawktute indaihlohma phuhruk turin tunah hian kan Chief Minister, Finance Department changtu hnenah pawh kan thlen tawh a. Kan mamawh zualpui, kan indaihlohma mi phuhruksak a tumna pawh min hrilh tawh a ni.

Member zahawm tak Pu V.L. Zaithanzama'n a sawi Joint Director te leh Department Officer te Transport Departmentah hian an thlak zing riau mai a tih kha a dik khawp mai a, tunah kan Jt. Director pawh an lo thlak a, kei pawhin ka lo hre lova. A Directorate-ah mai pawh ni lovin, a Secretariat-ah pawh hian reilote te hi Transport-ah hian min rawn dah a, hmalak nasat kan tum bawk si a, hei hi chu a tul anga hma lo lak a, a ti theitu hnenah sawi ka lo tum dawn nia.

Tin, Aizawl 'W' lamah khan two wheeler a tih theih em tih lai te pawh kha kan kan hotute nen kan mamawh dan azirin kan lo zirchiang dawn nia tih kha ka chhanna ni mai sela.

Tin, Lalaghat atanga Bairabi rail head chungchangah, Railway Ministry hian Mizoramah hian Transport Department hi nodal department (a kalkawng) ang deuh chauh hian min la hmang a. Amaherawhchu, sorkar anga kan tih theihna chinah chuan Zoram hmasawnna turin theihtawp kan lo chhuah dawn nia tih kha ka chhanna ni leh ta sela.

Tin, inter-state bus terminal chungchang kha Serlui bialtu zahawm tak khan a rawn sawi a. Heng inter-state bus terminal bakah hian Driving Institute te pawh hi etiquette leh manner kan zir tel theihna turin Ministry of Transportah he project chi hniah ang hi kalpui turin tunah hian a tam thei ang ber kan neih theihna turin hma lak kan tum a. Chu chu sorkarin theihtawp a chhuah a, a hrereng a ni tih kha ka chhanna nise a tha awm e.

High Security plate chungchang kha nichinah khan ka thusawi pah khan ka chhang tawh a, kha bak kha chu han chhan chian vak ngaihna kha

a awmin ka hre chuang lova. Kha kha zawhna awm thei ka chhan theih te ni sela. (PU LALDUHOMA ; Forest Department sum hnar awm thei han sawi thliah thliah karah khan National Bamboo Mission kha ala tel a, bamboo kha grass a ni, Horticulture enkawl tur a ni tih kha kan sawi tawh deuh bawk si a. Pu Speaker, Forest Department hian an la enkawl zel dawn em ni bamboo hi ?) Pu Speaker, kha kha hmannya kan chhanna kha kan inngaithla chiang lo palh theiin ka hria a, hun khaihlak lai a ni a. Kan House Leader pawh khan a rawn sawi tawh bawk a, bamboo hi tree definition atanga a chhuah tak avang khan bamboo hi Horticulture-ah kal tura tih kha a ni tawh a. Chutihrual erawh chuan bamboo hi forest pawhin a enkawl zui zel ngai lai tur a awm a, a chhan chu forest area bikah kha chuan bamboo kha Forest hnuaia awm tur, Forest permission tel lova kutthlak theih loh tur a ni a. Amaherawhchu, member zahawm takin a rawn tinzwarn tura ka ngaih laia chu, private rama bamboo kan neih te, kan rua, kan mau neih te khangho kha niin ka ring a. Chungho chu Forest Department atanga chhuak tur a ni a. Chutih rual erawh chuan ka sawibelh leh duh chu state pawnah an kal chhuahpui dawn erawh chuan TP an ti a, hmun danga phurhchhuah phalna kha, a invenna tur atan fee pawh chawi a ngai lem lova registration an neihna atanga tih ngai a ni tih te kha ka sawibelh leh duh a ni e.

Dr. ZR. THIAMSANGA : Pu Speaker, zawhna pakhat a theih em aw? Hemi kan kawngpui dung Forest reserve hi kan ti tha lo riau mai a, kumtin mai a kang a. Champhai leh Tuipui inkarah pawh khian Lamkhuang puitling sa eng emaw zat kuminah khan a kang a ni. Kawngpui dungah khian lo an nei a, an vat zel mai a, hei hi tun aia hmalak that dan a awm em? Tum dan a awm em?

PU T.J. LALNUNTLUANGA, MINISTER : Pu Speaker, theihtawp chhuah kan lo tum ang e.

Pu Speaker, ka Demand No. 4-na Law& Judicial Department tan ₹ 2789.27 Demand No. 12-na Parliamentary Affairs tan ₹ 105.91

Demand No. 36-na Environment, Forests & Climate Change atan ₹ 16007.28.

Demand No. 42-na Transport Department atan ₹ 5031.08.

A vaiin ₹ 23933.54 te, kum 2019-2020 atana hman ka rawn dil te hi he House zahawm tak hian min pawmpui turin ka ngen e.

S P E A K E R : Aw le, Minister zahawm takin a hna chanpual te:-

Demand No. 4-na Law& Judicial

Demand No. 12-na Parliamentary Affairs

Demand No. 36-na Environment, Forests & Climate Change

Demand No. 42-na Transport atana hman tur ₹ 2,39,33,54,000.00 te House-ah pass turin a rawn dil a. Remti apiangin ‘Remti’ ti rawh ule. (MEMBERS : Remti). Remti lo in awm chuan ‘Remtilo’ ti rawh ule. Awle, remtilo an awm lova.

Tunah chuan Minister Pu T.J. Lalnuntluanga hna chanpual Demand No. 4-na Law& Judicial, Demand No. 12-na Parliamentary Affairs, Demand No. 36-na Environment, Forests & Climate Change, Demand No. 42-na Transport Department te hman turin a vaia belkhawm ₹ 2,39,33,54,000.00 te hi House in lungrial takin a pass ta a ni.

PU T.J. LALNUNTLUANGA, MINISTER : Pu Speaker, ka lawm e.

S P E A K E R : Tikhan vawiina kan business chu kan zo ta a, naktuk 25th June, 2019 (Thawhlehni) zing dar 10:30 ah kan thukhawm leh dawn nia. Sitting is adjourned.

Sitting is adjourned 09:55 P.M.